



BIBLIOTHECA
UNIV. JAGELL.
CRACOVENSIS

910342

Mag. St. Dr.

I

Feol. 3805



910342 I

Mag. St. Dr.

Xl. 5. 35

Xl. V. 35

~~Z. VIII 72~~

X. f. 9.


shul clo 36.722

I

I M. I.

Ex Bibliotheca Novitiorum Soc. Jesu ad S. Mathiam.

25. 5. 17



V I A
C Æ L E S T I S
S A P I E N T I Æ
V E S T I G I I S E X E R C I T I O R U M
S: P: I G N A T I I
Soc: J E S U F U N D A T O R I S.
R E L I G I O S I S
V I A T O R I B U S.


Ad Perfectionis culmen tendentibus
D E M O N S T R A T A
à P. Antonio Swirczynski S. J. Theologo
Annô

S A P I E N T I Æ I N C A R N A T Æ

1727.

Opus Posthumum.

S A N D O M I R I Æ
Typis S. R. M. Clari Collegii Societatis JESU.





910342

I

A P P R O B A T I O

Librum, cui Titulus: *Via Caelestis Sapientiae &c.* operâ Admodum Reverendi Patris Antonii Swirczynski Societatis JESU, aequè piè, ac eruditè conscriptum legi, qui cùm nihil Orthodoxæ Fidei non consonum in se contineat, imò ad amorem Dei & pietatem summopere legentem excitet, ideo, ut post detestam Typi sepiam, in Lucem Publicam prodire possit, dignum censeo, & concedo facultatem. Datum Cracoviæ in Collegio Majori A. D. 1727. 11. Calendas Maij.

M. Martinus Waleszynski S. Th. D. & P. Collega Major, S. Floriani ad Cracoviam, Scarbimirien; & S. Michaelis in Arce Crac: Custos, Cancellarius Lancieien: Premycovien. & Montis S. Georgii in Scepusio Præpositus, Studii Generalis Universitatis Cracoviensis Procancellarius, Librorum per D.æcelim Cracovien; Ordinarius Censor.

M P.


MARTINUS TRAMPCZYNSKI.
PRÆPOSITUS PROVINCIALIS Soc: JESU
per P O L O N I A M.

Cum Opus, quod inscribitur: *Via Caelestis &c.* Et additamentum, cui Titulus: *Via Regia*, aliquot ejusdem Societatis Theologi recognoverint & in lucem edi posse probaverint, potestate mihi facta ab A. R. P. Nostro Michaële Angelo Tamburrino Societatis Nostræ Præposito Generali, facultatem concedo, ut typis mandetur. si iis ad quos pertinet, ita videbitur. In cujus fidem, has Literas Manu meâ firmatas & sigillò munitas dedi. Cracoviæ 5. Aprilis Anno Domini 1727.

M. TRAMPCZYNSKI Soc JESU

MP.

(L.S.)




BEatus vir, qui in Sapientia morabitur, & qui in iustitia sua meditabitur: & in sensu cogitabit circumspeditionem DEI. Qui excogitat vias illius in corde suo, & in absconditis suis intelligens, vadens post illam quasi investigator, & in viis illius consistens. *Eccli: 14. v: 22. 23.*

Sapientia ubi invenitur? & quis est locus intelligentiæ? abyssus dicit: non est in me, & mare loquitur, non est mecum, non invenitur in terra suaviter viventium. *Job: 28.*

Viam Sapientiæ monstrabo tibi. *Prov: 4.*

Sapientia Justum deduxit per vias rectas, & ostendit illi regnum DEI, & dedit illi scientiam Sanctorum. *Sap: 10.*

In præsentī vita, quasi in via sumus, qua ad Patriam pergimus. *S. Greg: hom: 11. in Evang:*





PARS PRIMA INGRESSUS

Viaë Cælestis Sapientiaë
Per Viam Purgativam.

UT rectè decurratur Via Purgativa, imprimis intelligendus est Religioso Viatori finis tum suæ Creationis, tum suæ Vocationis, simulq; media ad utrumq; finem conducentia. 2dò: cognoscantur impedimenta, & pericula ab eo sine detrudentia. 3tiò: tandem provideantur adjumenta, & media, quibus removeantur ejusmodi obstacula, evitenturq; pericula. Hisce verò omnibus præmittenda est meditatio præparatoria, excitans ad eam viam non segniter decurrendam.



MEDITATIO Præparatoria

P*Præl:* 1. Constitue te, ante pedes S: Patris Ignatii librum exercitiorum tibi offerentis, & te ad solitudinem invitantis.

Præl: 2: Petitio auxilii Divini ad Sanctè & fructuosè hæc exercitia absolvenda, & alacriter ea inchoanda.

PUNCTUM Ium.

Exactè & diligenter peragenda Exercitia.

Considera motiva, quibus ad omnem conatum in his exercitiis, exactè peragendis, excitari possis: & primum est: quia hæc Exercitia, sunt experimentum, & fundamentum totius vitæ Religiosæ; qui itaq; desiderat vitam suam Religiosam, stabilem & firmam, debet omnem diligentiam adhibere, ut fundamentum ejus sit solidum, & non neglectim positum.

2dum: Quia Exercitia Spiritualia, sunt schola virtutis, in qua, sub Magisterio Spiritus Sancti, discitur vitæ ac morum honestas, & acquiritur notitia rerum, ad DEUM & salutem animæ spectantium. Quis sub tali Magistro non ambiat discere suæ animæ salutaria? Quis ad hanc solitudinem non aspiret, ad quam Deus ducit animam, ut ei loquatur ad cor juxta illud Osee 2: *Ducam eam in solitudinem, & loquar ei ad cor.* Quis cum desiderio & gaudio illud tempus non acceptet, quo soli DEO vacandum est, & cum DEO conversandum? quæ enim jucundior, & sublimior conversatio optari potest? O DEUS meus, en libens sequor te in solitudinem, ad quam me ducis, ut loquaris mihi ad cor, & discam melius audire Te & loqui Tibi, doce me orare, ut sine intermissione Tecum agere discam, & dignum me effice ejusmodi conversatione.

3tium:

3^{ium}: Quod nos ad omnem fervorem excitare debet, est Major DEI gloria, ad quam procurandam, lege Divina & humana obligamur, neq; enim illi aliquot septimanas, sed totam vitam debemus. Dedimus tot annos vanitati in mundo, cur DEO, & gloriæ ejus breve tempus negabimus? multos dies peccando perdidimus. Ergone eam jacturam paucis diebûs supplere non curabimus? Videamus, quæ & quanta contra DEI honorem commisimus? justum itaq;, ut Sanctioribûs Exercitiis malè acta compensemus.

4^{um}: Quod nos ad accuratam diligentiam urgeat, est Christus Magister noster, qui nos verbô & exemplô provocat, ad exactè peragenda exercitia. Provocat verbô, ubi dicit: *Cum oraveris, intra in cubiculum tuum, ipsæ collectiones sunt cubiculum cujusq;*. Provocat exemplô, manens ipse quadraginta diebûs & noctibûs, in solitudine, certè non ex sua necessitate, sed ad nostram necessitatem. Vide ergo; ut Tuo Magistro conformeris, & Christum solitarium imiteris. Dic cum Sancta anima, *Sub umbra illius, quem desideraveram, sedi.*

5^{um}: Tandem est necessitas tuæ animæ, cui Deus multa bona & gratias parat, in Collectionibus, quas negligere periculosum valde, & desertioni Divinæ obnoxium. Ad quid enim in hac Religione Novitiatum inchoasti, nisi ut pro tota vita sufficientem annonam colligeres? ad quid te Societati ad-dixisti, nisi ut eâ fundamenta poneres, quibus tuto ædificium Spiritualis vitæ, & structura virtutis, insistere possit? Ex his Collectionibus Societas nata, per illas crevit, & hucusq; felicissimè conservatur, nec tu aliâ viâ speres te profecturum aut in Societate perseveraturum, nisi per hæc Exercitia mundo & tibi moriaris, soli autem DEO vivere incipias. Resolve te ad omne studium accuratissimum, ut de te Religio bonam spem concipiat. Pete

auxilium à DEO, Beatissimæ solatia, & Sanctorum patrocinium.

PUNCTUM 2dum.

Quis modus ritè peragendi Exercitia S: Patris?

COgita imò: ut rectè peragas hæc Exercitia, necessariam esse ex parte DEI gratiam illuminantem tui intellectûs, & grâtiâ moventem tuæ voluntatis. Nam sine Divina illuminatione & motione, est homo tanquam ager sine cultura, tanquam locus caliginosus sine lucerna, tanquam oculus sine pupilla, tanquam corpus sine anima, & vitæ motu. Vide quantæ tenebræ in tuo intellectu, quanta ignorantia circa æterna, quam rebellis tua voluntas ad Divina. Agnosce te indignum omni gratia DEI, qui te toties ab eo avertisti, & in tenebris peccatorum hæsisisti, humilia te coram DEO. Pete per ejus misericordiam illuminari. *O Lux Beatissima reple cordis intima tuorum fidelium, sine tuo Numine, nihil est in homine, nihil est innoxium,*

Cogita 2dò. Ex parte tua necessarium est imò, ut omnia non perfunctoriè, sed seriò, ferventer, juxta præscriptum ordinem, & quidem perseveranter agas. 2dò ut amoveas omnia impedimenta, vincas tentationes heroicè, tædia, ac teipsum in omnibus. 3tò ut additiones S: Patris observes, & Regulas modestiæ, præcipuè autem oculos, & linguam custodias. 4tò ut in omnibus recurras ad superiorem, nec ullas celes tentationes. Ad hoc resolve te cum gratia DEI, fortiter statue te processurum, in his Collectionibus, juxta præscriptum & directionem S. Patris Ignatii, nihil volendo immutare, differre, ex omnibus etiam minimis.

PUNCTUM 3tium.

Sublimior intentio pro Collectionibus.

COgita & exquire ex tua voluntate, utrum libenter hanc solitudinem

De Preparatione,

dinē obire velis? ad quos fines, omnes tuas cogitationes, suspiria, verba sive scribenda, sive legenda, motus sive internos sive externos, momenta temporis, omnesq; exercitiorū circumstantias ordinare intendas? Ordina primò: ut debitum DEO honorem gloriam & cultum deferas. 2dò ut per Exercitia omnium virtutum, tam moralium, quam Theologicarum actus elicias, fidei, spei, charitatis, patientiæ, obedientiæ, mortificationis, humilitatis. 3tid: Ut Christum quadraginta diebùs in solitudine degentem imiteris. 4tò: Ut omnium Sanctorum insistas vestigiis, qui easdem Collectiones peragebant. Utinam illorum affectibùs, devotione, fervore, & applicatione ea decurras. 5tò: Ut mentem & imaginativam tuam potentiam, imbuas Cælestibus imaginibus, per varias Sanctas considerationes. 6tò: Ut te tñquam reum includas carceri, & satisfacias pro peccatis. Cum Psalmista dicendo: *Ego vinculus in Domino.* 7mò: Ut te confortiò & conversatione hominū prives, in pñam, quòd toties inter illos deliquisti. 8vò: Ut te mortifices, & abstrahas ab omnibus rebus creatis. 9nò: Ut impetres, tum tibi, tum alijs dona maximè necessaria; 10mò: Ut explices coram DEO desiderium, unionis cum DEO. 11mò: Ut prægustes Cælestis beatitudinis dulcedinem. 12mò: Ut sensibus frenum injicias: oculis quidem, avertendo illos ab omni vanitate, linguæ, in arcto silentio eam conservando, auribus, &c. 13tid: Ut saltem hñce diebùs, mundo & rebus caducis plenè moriaris. 14tò: Ut hanc particellam vitæ tuæ, perfectiùs DEO consecres. Offer tuam libertatem, intellectum, memoriam, voluntatem, affectu S. Patris Ignatii.

Suscipe Domine universam libertatem meam, accipe memoriam, intellectum, voluntatem. Accipe corpus & animam meam, & omnia. Invoca Spiritum Sanctum, Veni Sancte Spiritus & emitte Cælitus lucis tuæ radium. &c.

Pater: Ave: Anima Christi.

ACTUS SÆPIUS USURPANDI;

DA mihi Domine donum orandi. Moriar mundo, vivam tibi DEUS meus. Servus tuus sum ego, non amplius meus, non amplius mundi. Vae illi tempori, vae momento, quo non amavi te, quo non servivi tibi. O anni! o dies anteaetæ vitæ meæ, quomodo transiistis? Gressus meos dirige, secundum eloquium Tuum, ut non dominetur mei, omnis injustitia. *Psalm. 118.*

CAPUT I:

De Fine Creationis & Vocationis Religiosæ & Mediis ad utrumq; finem.

Siquidem salus & perfectio cujusq; Religiosi, maximopere pendet à notitia utriusq; prædicti finis; separatim de uno, quoque agetur, simulq; de singulorum mediis.

§. I mus.

Quis Finis Creationis?

Duplici meditatione examinatus innotescet finis Creationis: quarum ima: declarabit à quonam? ex quo? & qualis homo sit creatus? 2da edocebit, ad quem finem est creatus?

MEDITATIO ima.

De Creatione hominis.

Præl: 1. Colloca te coram DEO formante hominem de limo terræ, eidemq; animam & vitam inspirante.

Præl: 2: Pete gratiam cognoscendi beneficium Creationis, & pro illo gratias agendi.

PUNCTUM

PUNCTUM I^{um}.*Homo à quo est Creatus?*

Cogita 1^{mò}: Quòd DEUS te creavit ò homo! non mundus, non voluptas, non divitiæ, non honores, non aliæ res, sed DEUS ipse fecit te, ut esses is, qui es. Accinente Psalter: *Ipse fecit nos, & non ipsi nos. Psal: 99.* Credisne huic veritati ò anima? credo Domine, credo, tu adjuva incredulitatem meam. Recognosco Domine, quòd tu sis Creator meus, Dominus meus, & DEUS meus, opus manuum tuarum ego sum.

Cogita 2^{dò}. Si credis, quòd DEUS te fecit, non mundus, non caro, non honores; Cur ergo mundo, carni, commodis tuis non DEO adhæres? Cur DEO soli non servis? qui tuus Creator & plasmator est. Ah Domine hæc est cæcitas, hæc dementia mea, ut cum totum meum esse à Te habeam, non Tibi nec tuis obsequiis, sed vanitati potius me impendo. Confundor totus ante te, & confiteor, quia tu plasmasti me, Miserere ergo mei, da mihi intellectum. En jam totum me tibi trado. Suscipe universam libertatem meam, accipe memoriam, intellectum, voluntatem, accipe corpus & animam, totus jam tuus esse volo, qui me totum fecisti. Ejuro mundum, ejuro vanitatem, odi carnem, servus tuus sum ego.

Cogita 3^{tò}. DEUS dedit tibi corpus, dedit DEUS animam, DEUS dedit omnia, quæ habes. DEUM itaq; super omnia æstimare, appretiare debes, plus apud te valere debet, quàm omnia alia. Itane hucusq; vixisti? itane DEUM æstimasti? qui toties propter miseras nugas, illum offendere præsumpsisti. Confundere, deplora tuam stultitiam, appretia, extolle DEUM super omnia. Proponere illum amare præ omnibus, contemne omnia & dic: *Adhærere mihi, DEO, bonum est.*

Cogita 4^{tò}: DEUS te creavit ò homo, nullis tuis meritis ad id excitatus, imò pluribus peccatis tuis prævisis. Creavit te DE-

US

US qui est, sibi soli sufficiens, nullius egens, ex sola sua bonitate. Vide, quis Dominus, servum inutilem, multo magis nocivum, & indignum foveat & conservet. Et te DEUS sicut fecit, ita conservat & fovet, licet sibi inutilem, ac inobedientem, suâq; præcepta transgredientem. Admirare ejus bonitatem. Recognosce tuam indignitatem, erubescere inobedientiam, ama tam bonum Dominum & Creatorem tuum.

Amo Domine, amo & amplius ferventiùsq; amare desidero.

PUNCTUM 2dum

Homo ex quo Creatus?

Cogita 1mò: Ante creationem tui, v.g. ante centum annos, quid fuisti? nihil. DEUS itaq; eduxit te de nihilo; proinde tua Patria, tuus nidus est, nihil, & quidquid post creationem factus es, ex DEO es, & DEI totus es, ex te autem nihil es, & consequenter nihil potes. Ex quo inferas, quòd nihil tibi ipsi attribuere, & ex nulla re tanquam tua gloriari debeas. Reflecte te, utrum in hac cognitione tui nihili persistas? utrum nihil tibi arroges? Audi Apostolum dicentem *Quid habes quod non accepisti?* DEO ergo non tibi laudem referre teneris, cujus sunt omnia. Quanta enim impudentia, ex alieno venari plausus, ambire laudes? O confusio! o dolor!

Cogita 2dò: Si de nihilo es, ergo gratò animò suscipere debes, dum pro nihilo apud alios reputaris. Et tu ad minimam etiam tuæ vilipensionis umbram excandescis irâ, cogitas vindictam, querimonias reple domum. O corruptionem mentis humanæ! cur ô homo! refugis id haberi ac reputari, quod defacto ex te ipso es; lutum es, & aurò magis æstimari cupis; nihil es, & aliquid videri appetis.

Cogita 3tiò: Si nihil es ex te? ergo quidquid tecum fecerit DEUS, quàmvis te omnium pedibus calcandum subjecerit, quàmvis annihila verit,

De Creatione Hominis.

annihilaverit faciet id, quod tibi debetur; ergo nulla tibi injuria fuit, etiam si omnes homines te contemnant, tui obliviscantur, te averſentur, contra te loquantur, quia nihilo, nulla inferri potest injuria. Hæc substantia tua, hoc patrimonium tuum, nihil fuisse & nihil esse. Agnosce id coram DEO, erubescere tuam superbiam, quod hucusq; nullam injuriam patienter sustinuiſti. Propone æquò animò suffere injurias. *Bibl. 149.*

Cogita 4tò: Quòd DEUS eduxit te de nihilo, postpositis tot aliis creaturis, quas nec creavit, nec creabit, quamvis Sanctiores & Deo gratiores fuissent, easq; in suo nihilo reliquit. Te autem ex tanta possibilitate multitudinem elegit, & de nihilo sublevans constituit in numero existentium. Obſtupeſce ad tam amabilem circa te DEI providentiam, gratias illi age.

P U N C T U M 3tium.

Homo qualis Creatus?

Cogita 1mò. Quòd te DEUS creavit ad similitudinem & imaginem suam, hoc est creavit Spiritualem, quò ad animam, sicut & ipse Spiritus est. Creavit immortalem, sicut & ipse immortalis est, deditq; tibi tres facultates Spirituales, memoriã, intellectum & voluntatem. Creavit te liberum, sicut & ipse liber est. Accepisti ô homo animam Spiritualem! quid igitur tibi cum sensualitate & corporis commoditatibus? factus es immortalis, quid ergo tibi cum transitoriis? Imago es DEI, vide itaq; ne hanc Imaginem deturpes vitiis. Liberum te fecit DEUS, ne ergo servus sis peccati, & mancipium diaboli. Reflecte te upra vitam præcedentem. Confundere, deplora omnes defectus. Propone.

Cogita 2dò: Creavit te DEUS, non inter tenebras, infidelium, nec inter gentes idola colentes, non inter errores hæreticorum.

corum, sed in lumine veræ fidei Catholicæ, ex Parentibus Catholicis. Item creavit te non ante adventum Christi, non eo tempore, quo omnis caro corruerat viam suam, non sub tempore Antichristi. Vide, quas gratiarum actiones DEO referre debeas: quæ desideria concipere, illi ferventer & constanter serviendi, quos affectus: ejus adorationis, exaltationis benedictionis, tui humiliationis. &c.

Cogita 3tiò: Creavit te DEUS, sanum mente & corpore, dedit tibi usum oculorum, linguæ, aurium, integras manus, & pedes, quæ multis aliis ademit. illos cæcos, surdos, claudos, mancos relinquendo, cum itaq; hæc tibi DEUS dedit, quæ aliis denegavit, ergo fidelius illi servire præ aliis deberes. Ergo oculis, linguâ, manibus &c. ad ejus laudem, & obsequia, non ad offensam benefactoris utendum tibi esset. Quis enim tam malitiosus erit, ut hac ipsa framea aurò obducta, quam accepit à benefactore, contra eundem utatur. Et homo non semel oculis, manibus, linguâ, abuti præsumit, in contemptum DEI, ejusq; offensam.

Colloquium cum DEO creante.

O Domine Creator mi! quanta cæcitas animæ meæ, quâ im-
peditus, vix unquam cogitavi, de tanto beneficio creationis meæ. En nunc, procidens in faciem, tibi gratias ago pro beneficio creationis meæ & tot in ea donis. Confitebor Tibi Domine omnibus diebus vitæ meæ. Ecce ego opus manuum tuarum Domine, né quæso perdat me iniquitas mea, quem fecit omnipotens bonitas tua, omnes potentia, corporis & animæ meæ, venite adoremus, & procidamus ante DEUM, ploremus coram Domino, qui fecit nos, quia ipse est Dominus DEUS noster.

Pater: Ave: Anima Christi.

ACTUS

ACTUS SÆPIUS USURPANDI.

Qui plasmasti me, miserere mei.
Opus manuum tuarum ego sum.
Né perdat me iniquitas mea, quem fecit omnipotens bonitas tua.

MEDITATIO 2da.

De Fine Hominis.

Præl: 1: Pone te in Conspectu tui Creatoris.

Præl: 2: Implora gratiam cognoscendi & tendendi ad finem tuum. Notum fac mihi Domine finem meum, & da gratiam, ad eum currendi, & perveniendi.

PUNCTUM 1mum.

Homo ad quem finem non est creatus ?

Cogita 1mò: Non ad hoc homo creatus, ut edat, bibat, dormiat, deliciis fruatur, ut suum honorem, commoditates procuret, sensualitati indulgeat, &c, sed ut DEO serviat. Hinc inferendum: ergo multum aberrat, qui sollicitè famam, honorem, respectus humanos, carnis commoditates procurat, & de DEO vix aliquam cogitationem habet. Errat, qui calamò ad scribendum præparatò scindere, & cultrò scribere intendit. Similiter & ille errat, qui oculis, linguâ, non ad obsequia DEI, sed ad offensam utitur. Vide, utrum & tu non sis, vel non fueris in eodem errore. Erubescere, deprecare DEUM, dolo, propone.

Cogita 2dò: Non ad hoc homo creatus, ut humanam gratiam aucupetur, ut divitias colligat, respectibus humanis laboret, vanitati serviat, sed propter se DEUS creavit hominem. Vide itaq;, né sicut Dominus rejicit servum inutilem, quem ad

obsequia susceperat. Agricola negligit agrum, ex quo fructus colligere nequit, Hortulanus admovet securim ad excindendam arborem infructuosam. Ita & te ne projiciat DEUS à facie sua, ut pote ineptum ad finem, ad quem creatus es. Time, humilia te coram DEO, Pete cum Psalte: *Né projicias me à facie tua & Spiritum Sanctum tuum né auferas à me* Psal; 50.

Cogita 3tiò: Non ad hoc homini DEUS dedit oculos, ut illis versetur, circa creaturas cum offensa DEI. Non ad hoc dedit aures, ut illis auscultet sermones iniquos. Non ad hoc pedes, ut ambulet per vias iniquitatis. Non ad hoc ingenium, ut illo ad perversa abutatur. Non ad hoc voluntatem & cor, ut illa pravis affectibus inficiat, sed ut hîsce omnibus DEO serviat.

Reflecte te supra tuos sensus, & potentias corporis & animæ, quomodò illis usus sis; detestare omnes abusus eorum. Implora auxilium DEI, ut illis in posterum Sanctius utaris.

PUNCTUM 2dum.

Homo ad quem finem est creatus?

CREATUS est homo ad hunc finem, ut in hac vita DEUM suum amet, illi serviat, & ejus præcepta observet.

Cogita 1mò: Credisné firmiter hominem creatum esse à DEO non ob alium, nisi ob hunc finem, ut DEUM suum amet, illi serviat, & ejus præcepta observet? juxta illud: *Omnia propter semetipsum operatus Dominus* Prov. 19 & ita verum est, non esse alium finem hominis, nisi DEUM, ejusq; gloriam & obsequium, sicut verum est, Deum, esse Deum, adeoq; nihil est indubitabilius, nihil certius. Credo, domine, credo & malo potius in omnes venulas distrahi, milliesq; mori, quam vel minimum dubitare de hac veritate.

Cogita 2dò: Creavit DEUS hominem, ut Eum laudet, cor-
de ore,

de ore, opere, tam in prosperis, quàm in adversis successibus. Sicut Job benedicebat Dominum, sive in bonis, sive in malis. Vide, utrùm talis fuerit vita tua? laudastinè DEUM semper, corde, ore & opere? O, quot verba! quot cogitationes transierunt, quot opera fecisti non ad laudem DEI! sed potius cum ejus offensa. Erubescere, deplora dies vitæ tuæ. Propone ab hinc toto te servire DEO.

Cogita 3tò: Creavit te DEUS ò homo, ut eum reverearis in omni loco præsentem, & nihil agas, quod illius oculos offendant, atq; præsentem dishonoret. Creavit te, ut DEUM timeas, sicut sapiens Eccl: 12. docet: *DEUM time & mandata ejus observa, hoc est enim omnis homo.* Reflecte te ad omnes vitæ tuæ annos, & proponenda propone.

Cogita 4tò: Creavit te DEUS, deditq; tibi memoriam, ut esses gratus & memor beneficiorum ejus. Dedit tibi intellectum ne esses in actionibus tuis, *Sicut equus & mulus, quibus non est intellectus*, & æterna eligas præ transitoriis. Dedit tibi voluntatem, ut te ad amandum summum bonum convertas, *sciâsq; reprobare malum & eligere bonum.* Examina mores & vitam tuam, conformantur ne hisce veritatibus? uterisne potentiis animæ, eorumq; actibûs, ad finem ad quem es creatus? Erubescere, deprecare DEUM, abrenuntia omnibus vanitatibus, & recde totum te Creatori tuo.

P U N C T U M 3tium.

Creatus est homo, ut post hanc vitam salvus fiat.

Cogita imò: Quòd ad hunc finem vitæ cujusq; collimare debeat, ut post illam, felicem assequatur æternitatem, & in terris vivere desinendo, in Cælo cum DEO vivere incipiat. Vide quanta felicitas hominis, nullem enim majus bonum cogitari po-

test quam frui æternum DEO nihil infelicius, quàm ab ejus conspectu abjici. Vide, quò tuæ vitæ gressus contendant?

Cogita 2dò: Quòd omnes hujus vitæ actiones ordinare debeas, ut salvus fias, & Cælum per eas, acquiras. *Quid enim prodest homini, si universum mundum lucretur, animæ verò suæ detrimentum patiatur.* Vide, ut æstimes tuam sortem, qua te DEUS vocavit, ut sis hæres Regni Cælorum. Quid putas! quanta felicitas esset ruricolæ, aut alicujus in fimo pauperculi, si ad Regiam elevaretur dignitatem & hæres alicujus Regni constitueretur. En tecum id facit DEUS ô homo; quantam ergo illi gratitudinem debeas? perpende.

Colloquium cum DEO.

DEplorabo omnes dies vitæ meæ DEUS, quòd hucusq; vilis animam meam & salutem duxerim. En jam Domine DEUS meus, ad te omnia vota mea, & intentiones meas dirigo, tuus servus esse æternum volo. Né projicias me à facie tua & Spiritum tuum né auferas à me.

ACTUS SÆPIUS USURPANDI.

DOMinus meus & DEUS meus Joan: 10.

Totum te exigit, qui totum te fecit S. Aug.

Servus tuus sum ego, da mihi intellectum Psal: 118.

Fecisti nos propter te: inquietum est cor nostrum, donec requiescat in te. S. Aug: 1: 1. Con: c: 1.

HORA QUIETIS
DANDA CONSIDERATIONI

De Statu vitæ & Officio, quo quis fungitur.

Statue te in conspectu DEI, aut sub pedibûs Christi Crucifixi.

Pete gratiam utiliter instituendi hanc Considerationem.

1. Vide, quis tuus status? quod officium? quomodo & qua intentione

tione utrumq; adieris? ex aliquone affectu naturali? aut ex humanis respectibus? an verò pure propter DEUM, ex ejus voluntate, tam statum, quàm officium suscepisti?

2. Si quid pravam adverteris, ejura coram DEO. Elíce puriorem intentionem, si illa defuit, protestando: te nullo alio fine manere in hoc statu, nisi quòd credas id placitum DEO, acceptumq; esse.

3. Profitearis te velle contentum vivere tua vocatione, in qua te DEUS collocavit, repudiato omni affectu, & intuitu commodorum propriorum.

4. Certus esto plurimùm conducere ad salutem tuam, si in tuo statu fueris fidelis, hoc est: si te in eo geras, omnia diligenter exequendo, quæ à te exigunt Regulæ, ordinationes, & præscripta Religionis. Scias te de omnibus, severissimam redditurum rationem.

5. Nunquam meliùs explebis obligationem tui Statûs, & officii, quàm si nihil aliud in iis spectes, præter DEI obsequium & tuam perfectionem. Hæcne hucusq; spectasti?

6 Vide qua intentione & libertate animi tuis incumbis negotiis? quomodo eadem unis, intentionibus & Actionibus JESU Christi?

7. Qua ratione versaris, cum quibus vivis? quâ fiduciâ & sinceritate recurris ad Superiores? qua Caritate & reverentiâ agis cum æqualibus & inferioribus? versarisne inter omnes exemplariter?

8. Qua animi moderatione & passionum compressione, in occurrentibus actibus te geris?

9. Didicistinè ex necessitate facere virtutem, gratò animò acceptando & ferendo, quidquid à manu DEI venerit. Sive consonum, sive dissonum tuæ voluntati?

10. Vide

10. Vide an ductum naturæ non sequaris potius, in rebus agendis, quàm rationem & DEI instinctum?

11. Quando agitur de laude tua, commodo &c. Expende utrum & quomodo mentem tuam ab illis abstrahas? Non nobis Domine, non nobis, sed Nomini Tuo da gloriam.

12. Examina, qua parte fragilis es? an à nimio ardore, & impetu? an à nimia ignavia?

13. Considera, utrum non appetas te honoratiora, utrum commodiora tibi arrideant, & non quæ DEO placeant.

14. Quæcunq; tandem, in verbo, affectu vel opere, adverteris te mala commisisse, in tuo Statu, deprecare DEUM. Propone emendationem. Pete auxilium.

§. SECUNDUS DE MEDIIS.

Ad Finem Creationis.

Siquidem media conducentia ad finem hominis, sunt duplicis sortis, alia naturalia, alia supernaturalia, de utrisq; meditationes proponuntur: Universa enim opera Domini, si debite considerentur, & tractentur, ducunt in cognitionem Creatoris, & ad finem, viamq; Cælestis Sapientiæ deducunt, accinente Propheta. *Quàm magnificata sunt opera tua Domine, omnia in Sapientia fecisti.* Psal: 103. & Ecclesiastes testatur. *Lustravi universa animò meò, ut scirem, & quærerem sapientiam* Eccl: 9.

MEDITATIO 1ma.

De mediis naturalibus ad finem hominis conducentibus.

Preli: 1. Statue te coram DEO, omnes creaturas subjiciente homini, ut illis, tanquam mediis utatur, ad laudem Creatoris, & salutem

salutem, suam: dicente Psalmistâ: *Constituísti eum super omnia opera tua, omnia subiecísti, sub pedibus ejus. oves, boves, &c. Psal: 8.*

Prel: 2. Pete gratiam à DEO, cognoscendi & competenter usurpandi, media naturalia, quæ tibi providit DEUS ad finem tuæ Creationis.

P U N C T U M imum.

Omnes Creaturae factæ sunt propter hominem.

COgita 1mò: Creavit DEUS solem, lunam, sydera, ut illuminarent hominem, & per suum influxum in corpora sublunaria, producerent frumenta, herbas, olera, aliâq; necessaria, ad vitam hominis sustentandam. Creavit Cælum, ut esset æterna mansio hominis; fecit terram, ut homini fructus gigneret, & illum portaret, fecit aves, pecora, ut seipsis alerent hominem. Illuminat te Cælum ô homo! ut declines à tenebris peccatorum. Solatur te DEUS tanta varietate, & pulchritudine creaturarum, ut omnem sæditatem peccati effugias, dedit tibi totam universitatem creaturarum, ut tibi deserviret, & tu servires DEO, & salutem obtineres. Vide, quis mundi Dominus, tot & tanta bona servo suo confert, sicut tibi DEUS in creaturis providit. Emitné apud te his omnibus tuam fidelitatem & obsequia? Reflecte te, utrum ipsis creaturis non sis abusus ad offensam DEI? utrum cum ejus liberalitate, & ineffabili bonitate non certásti tuâ malitiâ. Ah Domine mi confiteor ingratitude meam, agnosco detestabilem in tuis obsequiis teporem, & negligentiam; sed dixi, nunc capí, desidero quam fidelissimè Tibi servíre, omnibus diebus vitæ meæ.

Cogita 2dò: Servit tibi terra, fructus in tuos usus producendo, ut & tu fructifices DEO, sicut Christus dicit ad Apostolos: Elegi vos, ut eatís, & fructum afferatis. Elegit te DE-

C

US

UIS ex tot possibilibus creaturis, nunquam producendis, ut de-
virtute in virtutem proficeres, & fructum afferres. Vide quem
illi hucusq; attulisti?

Cogita 3tiò: omnia creata serviunt tibi, ut & tua omnia
serviant DEO. Servitné illi tua memoria? tuus intellectus, tui
oculi, manus &c. Erubeſce, Propone.

PUNCTUM 2dum.

*Omnes Creaturae factae sunt ad hoc, ut juvent hominem ad laudem
DEI, & suam salutem obtinendam.*

Cogita: quomodo creaturae juvant hominem ad DEI laudem
& salutem consequendam? 1mò: multae creaturae juvant, con-
servando sanitatem & vires hominis, ad laborandum pro glo-
ria DEI, & salute sua. Ad huncné finem usus es sanitate &
viribus tuis? 2dò: quia repraesentant homini perfectiones divi-
nas, quas sibi habent communicatas, & toto suo esse praedicant
Deum: *Ipse fecit nos*, ut in iis cognoscat homo Deum, & lau-
det ac amet ejus perfectiones. Sic forma & pulchritudo alicujus
creaturae, ostendit homini & repraesentat pulchritudinem Crea-
toris, & admirabilem omnipotentiam illius, quae ex limo, & lu-
to, tam pulchram imaginem formavit. Sol ostendit claritatem
Dei. &c. 3tiò: juvant hominem & hóc modò, quia dant illi
occasionem, ut homo ab illis liberè abſtineat, & suum appeti-
tum mortificet, propter amorem Dei. 4tò: quia docent homi-
nem, quantum se impendere debeat obsequiis Dei. Sicut enim
plures creaturae serviunt homini, cum sui destructione, ita &
homo debet servire Deo, usq; ad sui exinanitionem, contem-
ptum, consumptionem, ac mortem. Vide, utrum juvabant te
creaturae, talibus modis, ad laudem Dei, & salutem tuam? an
tu non sis abusus eis ad offensam Dei? & utrum te in pericula,
&

& ruinam, per illas non dederis? Examina, quomodo utebaris oculis, manibus, lingua &c. Desle omnes abusus, deprecare Deum, erubescere tuam ingratitude.

PUNCTUM 3tium.

Qualis debeat esse usus Creaturarum?

COgita 1mò: In tantum concessit Deus uti creaturis, & illis nonnisi creaturis, in quantum, & quæ juvant hominem, ad finem suum; quæ autem creaturæ impediunt ab obtinendo fine, debet ab illarum usu abstinere homo. Proinde debet quisq; indifferens esse, ad creaturas suo usui subjectas, ut illas solum eligat, & desideret, quas viderit sibi conducturas ad finem, &c. cibo, potu, tantum uti quisq; debet ad hoc, ut conservet vitam & sanitatem, ad laudem Dei, cui sanitati omnis excessus officit. Similiter ita debet uti amicitia hominum, prout & quamdiu hæc juvat ad laudem Dei, & salutem propriam; si autem amicitia hominis impedit, ab amore Dei, & periculum facit ruinæ; fugienda est juxta Christi monitum: *Si oculus tuus scandalizat te erue eum.* Sicut S. Hieronymus in hunc locum disserit. *Si ita est quis tibi conjunctus, ut manus, pes, oculus, & est utilis, atq; sollicitus, atq; acutus ad perspicendum; scandalum autem tibi facit, & propter dissonantiam morum, te pertrahit in gehennam; melius est, ut & propinquitate ejus, & emolumentis carnalibus careas, ne, dum vis lucrifacere cognatos & necessarios, causam habeas ruinæ.* Reflecte te, quo affectu feraris in creaturas? an hoc unice motivò & titulo illas ames, iisq; utaris, quòd te juvent ad finem tuum consequendum. Erubescere, desle defectus, propone.

Cogita 2dò: Qui utitur creatura propter illius ipsius dulcedinem, pulchritudinem &c. vel etiam propter suam sensualitatem, voluptatem; ille non utitur creaturâ, tanquam mediò ad

laudem Dei, & suam salutem. Examina, qualis hucusq; tuus fuit usus creaturarum? nonne illi magis, quam Deo adhærebas? abstrahe cor tuum ab omnibus creaturis, transfer illud ad Deum. Pete gratiam Sanctè utendi creaturis.

Colloquium ex S. Augustino.

Domine ut totus servirem Tibi, omnia quæcunq; fecisti, in meum servitium fecisti, omnia sub pedibus hominis subiecisti, ut totus homo subiceretur Tibi, & ut totus Tuus esset. Super omnia opera Tua, dominatus est homo. Quidnî & ego me subiciam, & toto me, laudem, amem, honorem te Deum meum, & Dominum meum? Dic cum Ecclesia: Da Domine gratiam & auxilium, ut sic transeamus per hæc temporalia, né æterna perdamus.

Pater: Ave: Anima Christi.

ACTUS EJACULATORII.

Benedicite omnia opera Domini Domino, laudate & superexaltate in sæcula. Dan: 3.

Scitote quoniam Dominus, ipse est Deus: ipse fecit nos & non ipsi nos Psal: 99.

Sit gloria Domini in sæcula, lætetur Dominus, in operibus suis. Psal: 106.

Exaltare super Cælos Deus, & super omnem terram gloria tua. Psal: 107.

MEDITATIO 2da.

De mediis supernaturalibus ad obtinendum finem.

Præl: 1. Constitue te coram Deo, tanquam fonte omnium bonorum in te defluentium.

Præl: 2: Pete gratiam cognoscendi, & competenter usus pandi media supernaturalia ad finem tuæ Creationis.

PUN-

PUNCTUM 1^{um}.

Amor Patris æterni, efficacissimum medium salutis providit.

COgita seriò, quid Deus ita dilexit mundum, consequenter & te, ut tibi daret Filium suum Unigenitum, in Redemptorem ac Mediatorem, in Magistrum omnis veritatís, in Ducem peregrinationis, in Pastorem ac Patrem. Sine Redemptore, semper in vinculis peccatorum, sub tyrannide dæmonis hæssis, nunquam liberandus, nisi Redemptione & meritís suis subvenisset Filius Dei. Sine Mediatore, nunquam vixisses reconciliatus Deo, nunquam ad bona supernaturalia, & gratias ad salutem necessarias pervenisses o homo, nisi Mediator Dei & hominum Christus Dominus præparasset tibi accessum ad Deum. In tenebris ignorantie jacuisses cæcus, nisi te illuminasset cælesti veritate Magister Christus. Aberrasses à virtute, à Deo & Cælo æternum; nisi tuæ peregrinationis Dux fuisset Filius Dei. Inter lupos infernales perisisses errabunda ovicula, nisi te Pastor bonus quæsisset, & invenisset. Tanquam filius prodigus in Regione longinqua, inter filiquas porcorum computruisses: nisi te benevolentissimus Pater suscepisset expansis in Cruce manibus. Vide, quomodo gratus es Deo pro tanto beneficio? adhucné tu vermiculus, denegabis te Deo, & illi servire recusabis? cum ille dilectum Filium suum, in tua obtulerit obsequia. Reflecte te, quid sub tanto Magistro didicisti? illiusné doctrinam observas? an mundi? illumné Ducem sequeris? illiné Pastori adhaeres? illumné ut Patrem amas? confusio, dolor, deprecatio, propositum.

PUNCTUM 2^{um}.

Filius Dei Unigenitus, medium salutis.

COgita: quomodo Filius Dei tibi serviat? quomodo tuam salutem

lutem curavit? In hunc finem descendit de cælo, incarnatus, natus propter te, laboravit à juventute, sustinuit opprobria, illusiones, contemptus. In hunc finem expendit famam, honorem, vitam, sanguinem. In hunc finem tot egit, ac passus est. Quid tu hucusq; pro ejus gloria egisti? aut passus es? quid pro salute propria fecisti bonis? aut superasti mali. Tuné appretiabis te magis Filiò Dei, tuné delicatius vivere, pluris tuum honorem, famam, vitam æstimare audebis, quàm ille æstimaverit? O confusio! ô dolor! Filius Dei cùm esset dives, propter te factus est pauper, & non habens ubi caput reclinaret; tu in domo paupertatis abundantiam omnium rerum desideras? acerbè defectum in victu, vestitu, mansione, & aliis sustines? Filius Dei, deserens adorationes Angelorum, humiliavit semetipsum; formam servi accipiens; tu cinis & pulvis humiliari non vis? Filius Dei, Dominus omnium, factus obediens usq; ad mortem; tu vilissimus homuncio obedire detrectas? Examina teipsum, quomodo usus es doctrinâ Christi, & ejus meritis ac exemplis, quas illius virtutes imitaris? Admirare Dei Bonitatem, quòd tibi efficacissimum medium providerit ad salutem. Deplora tuam ingratitudinem. Propone Christi virtutes imitari. Pete, ut te trahat efficacibus auxiliis in odorem exemplorum suorum,

PUNCTUM 3tium.

Medium salutis Beatissima Virgo.

COgita: dedit tibi Deus pro speciali medio salutis Beatissimam Virginem Mariam, quam voluit tuam esse mediatricem & advocatam; non aliâ viâ dona sua, & æternam vitam tibi deferendam proposuit, nisi per manus Beatissimæ, teste S. Bernardo: *Omnia nos voluit habere per Mariam.* Proinde etiam statim à teneris, cùm esses parvulus, injecit tibi affectum ad hanc Matrem, fovit

fovit eum in te. Vide, quo affectu tu eam colis? quâ fiduciâ ad eam recurris? quo conatu illius honorem tueris, & promoves? qua devotione ejus maternam pietatem mereris? &c. Advola ad plantas Beatissimæ, deprecare eam, statue aliquam constantem, ad illam in singulos dies devotionem.

P U N C T U M 4tum.
Medium salutis Angelus Custos.

COgita: dedit tibi Deus Angelum suum ad tui Custodiam, & directionem, ut securius tuam salutem obtineres. Hinc Exod: 23. monet te dicens. *Ecce ego mitto Angelum meum ante te, qui precedat te, & custodiat in via, observa eum, & audi vocem ejus.* In quovisné diversorio, in quovisné angulo Angeli tui reverentiam habes? observasné eum? audisné illius instinctus? æstimasné tuam sortem, quod sub tutela, & custodia tam digni & perfecti Spiritûs maneat? Erubescere, deprecare Deum, & tuum Angelum. Propone ejus directionem sequi.

COLLOQUIUM:

ADora Divinam Bonitatem, tam efficacia medfa tibi, ad obtinendam salutem, providentem. Erubescere tuam negligentiam in eorum usu. Pete gratiam illis fructuosè utendi.

Pater: Ave: Anima Christi.

ACTUS EJACULATORII.

Quis Deus magnus, sicut Deus noster? Tu es Deus, qui facis mirabilia. Psal: 76.

Vivat Dominus, & benedictus Deus meus, & exaltetur Deus salutis meæ. Psal: 17.

O Sancti Dei: magnificate Dominum mecum, & exaltemus nomen ejus in idipsum. Psal: 33.

MEDL



MEDITATIO 3^{ta}.

De reliquis mediis supernaturalibus.

Prælua eadem superioris Meditationis.

PUNCTUM 1^{um}.

Medium ad salutem, status vitæ Religiosæ.

COgita 1^{mo}: Eduxit te Deus de mundo immundo, abstraxit ab omnibus ejus illecebris, amovit à tot periculis, in quibus alii pereunt. Adora Dei Providentiam circa te, quòd te non reliquit, in medio nationis prævæ, inter tot ruinarum præcipitia, sed te elegit sibi in servum, 1^{mo} in familiarem, ac suum domesticum. Gratias illi age, contemne mundum.

Cogita 2^{do}: Constituit te Deus in Religione tam Sancta, in medio herdum Christi, inter tot viros probos, Sapientes, inter tot occasiones meritorum, & exercendarum virtutum. In terra, multorum sanguine irrigata. Vide nè profanetur tuis moribus irreligiosis. Et cogita tibi id dici, quod Moyse: *Locus, in quo stas, terra Sancta est.* Exod: 3.

Cogita 3^{tio}: Providit tibi Deus in hac Societate, tot media salutis & perfectionis obtinendæ. Ad hoc enim quotidiana meditatio, examina, lectio libri Spiritualis, ad hoc Exercitia Spiritualia, item Colloquia & doctrinæ salutares, aliaq; diurna opera tibi servire, ad hoc Regulæ te juvare deberent. Reflecte te, quomodo hæc omnia te juvant? quâ diligentia ac applicatione illa peragis? quomodo Regulas observas? quem fructum ex his omnibus hucusq; percepisti? Erubescere, deplora negligentiam tuam. Pete gratiam sanctæ & dignæ vocatione tua vivendi.

PUNCTUM 2^{um}.

Ufus Sacramentorum, medium salutis.

COgita 1^{mo}: maximum & efficacissimum medium salutis & perfe-

perfectionis esse, frequentem usum Sacramenti pœnitentiæ, & Eucharistiæ, modò accurata præparatio hunc usum præcedat: eò enim majores fructus quisq; percipiet, quò cum majori devotione ad ea Sacramenta accesserit. Nam ex accurato usu pœnitentiæ oritur puritas conscientiæ, majus odium & horror peccati, emendatio vitæ, evitatio occasionum peccati, abstractio cordis & affectuum, à rebus terrenis, facilitas contritionis, cognitio sui, & suæ labilitatis, consequenter & humiliatio sui. Vide, an hos fructus percipias ex Sacramento pœnitentiæ? & quare non percipis? Præmittisné seriâ discussionem conscientiæ? Adhibesné congruos huic Sacramento actus? &c. Considera item fructus Sacramenti Eucharistiæ, quorum unus est, unio Christi cum anima susipientis, juxta illud. *Qui manducat meam carnem, & bibit meum Sanguinem, in me manet & ego in eo.* 2^{us}, quia etiam corpus hominis accipit semen suæ resurrectionis futuræ, teste Christo. *Qui manducat meam carnem, ego resuscitabo eum in novissimo die.* 3^{ius} fructus est, conservatio vitæ Spiritualis fundatæ in fide, spe, & charitate Dei, aliisq; virtutibus. 4^{us} est, fortitudo, & habilitas virium, ad resistendum tentationibus, juxta Psal: 22. *Parâsti mensam in conspectu meo, adversus eos qui tribulant me.* 5^{us} est, medicina præservativa à peccatis. 6^{us}, minuit hoc Sacramentum concupiscentias carnis, domat rebelles passionis &c. Vide, utrùm merearis hos omnes fructus percipere? Reflecte te, qua præparatione accedis ad hoc Sacramentum? quos actus in ejus sumptione adhibes? quam gratiarum actionem reddis Deo, post illius usum? quomodo apud te præsentem tractas Christum? dispone omnia, ut fructuosius in posterum communices.

P U N C T U M 3^{tium}.

Cur rari sunt, qui percipiant hos fructus ex usu Sacramentorum?
COgita imò: Cum Sacramentum pœnitentiæ & Eucharistiæ
D
sint

sint remedia contra omnes infirmitates, ac morbos animæ, sint fontes omnium Spiritualium bonorum, ac gratiarum: continent enim merita Christi, quæ, si ritè applicentur, plurima bona operantur in anima. Eucharistiæ verò Sacramentum continet ipsum datorem omnium cælestium donorum; Cur tamen rari sunt, qui per usum Sacramentorum meliorentur, & à suis morbis spiritualibus curentur? Immo hujus rationem expressit S: Paulus 1. Cor: 11: quia scilicet plurimi ad hæc Sacramenta accedunt, sine præparatione & debita conscientie discussione, ac sui dijudicatione, congruisq; considerationibus. Ideo, inquit ille. *Inter vos multi infirmi & imbecilles & dormiunt multi, quod non dijudicent, quis est ille quem recipiunt? quid in tantæ Majestatis susceptione illis agendum esset? qualiter præparandus animus? expurganda conscientia? quibus virtutibus, ornanda domus interior? quæ considerationes? qui virtutum actus præmittendi?* 2da ratio, quia plerumq; homines accedunt ad hæc Sacramenta, pleni affectibus inordinatis, & amore tum sui, tum creaturarum, proinde impediunt communicationem donorum cælestium. Quæ enim conjunctio lucis cum tenebris? quomodo vas plenum acetô & felle vanitatum terrenarum, recipiet balsamum divinæ consolationis, & dulcedinem benedictionis? Effunde prius sel cupiditatum terrenarum, ut sis capax cælestium desideriorum; expelle cogitationes vanas, ut mens tua cælesti lumine refulgeat. 3tia ratio est, quia aut negligens, aut nulla apud nos cura est, intentionis rectæ, in omnibus vitæ nostræ actionibus. Ferè omnia opera nostra, vel tantum ex inclinatione naturæ, aut ex motu passionis, aliarumq; affectionum nostrarum procedunt, & in illis non quæ sunt Jesu Christi, gloriæq; Divinæ, sed propria commoda inquirimus, ad transitoriam voluptatem, ad vanam gloriam, aliosq; vanos respectus, illa ordinamus. Quomodo itaq; taliter vi-

ventes

ventes Spiritus Christi vivificabit? quomodo eorum opera & actiones, ad primam morum Regulam, Dei voluntatem conformabit? quomodo gloriam Dei, pro meta & termino præfiget? examinemus conscientiam nostram, utrum non impediamus Christum, quominus operetur in nobis eos fructus? Petamus ut amoveat à nobis omnia impedimenta, & dignos nos faciat fructibus Sacramentorum.

IN COLLOQUIO.

Gratias agamus Providentiæ Divinæ, pro omnibus mediis, nobis, ad salutem & perfectionem consequendam, datis. Deploremus defectus anteactæ vitæ. Rogemus, ut illis omnibus quàm accuratissimè in posterum utamur.

Pater: Ave: Anima Christi.

ACTUS SÆPIUS USURPANDI.

Magnus Dominus & laudabilis nimis in Civitate Dei nostri, in monte Sancto ejus. Psal: 47.

Benedictus Dominus Deus, qui facit mirabilia magna solus Psal: 707.

Tu Dominus altissimus, super omnem terram, nimis exaltatus es super omnes Deos. Psal: 96.

§ TERTIUS.

De Fine Vocationis.

Sicut varii sunt status & conditiones hominum, ita varii sunt fines, cuiq; statui consentanei. Nobis hæc finis nostræ duntaxat Religionis cognoscendus est: & media principaliora penetranda.

MEDITATIO Ima.

De fine Religiosi Societatis JESU.

Prel: 1: Compositio loci, ad pedes S: Patris Ignatii, tenentis librum constitutionum præscribentium finem Societati.

Priel: 2: Petitio gratiæ cognoscendi & semper tendendi ad finem Societatis.

PUNCTUM Ium.

De Fine Societatis.

CONsidera & expende singula verba S: Patris. *Finis hujus Societatis est, non solum saluti, & perfectioni propriarum animarum, cum divina gratia, vacare, sed cum eadem, impense, in salutem, & perfectionem proximorum incumbere.* Ubi Cogita 1^{mo}: finem hujus Societatis, id est horum, qui dederunt nomen Societati, in ejus gremio vivunt, non solum illorum primorum Patrum, & Antecessorum nostrorum, quorum tot præclara gesta legimus, & audimus, sed etiam omnium istorum, qui etiam eandem Religionem nunc profitentur, adeoque tuus Religiose finis est, non otiosi, & confabulari, non commodis inhiare, non plausus & famam magni nominis captare, non sensualitati servire, non deliciis frui & honores appetere, sed pati, & laborare pro gloria Dei, sed salutem tuam & perfectionem, atque proximorum, omni conatu procurare. *Habitus & tonsura medicum conferunt, sed mutatio morum & integra mortificatio passionum, verum faciunt Religiosum, dicit Thomas à kempis.*

Cogita 2^{do}: Ad hunc finem quilibet Societatis Religiosus, adeoque & tu incessanter tendere debes, ad eum dirigere omnes actiones, passionem, intentiones, conatus, labores, vires, officia, vitam tuam, ut & salutem tuam consequaris, & alii quàm plurimi, per tuam operam, instructiones, exempla, trahantur ad eandem obtinendam.

Cogita 3^{to}: Quod debeas isti perfectioni vacare; id est remotis aliis omnibus curis, ad eam non conducentibus, unice attendere, & quidem sine omni anxietate; & perturbatione, sed ita suaviter, prout suavis est vacatio à labore. Vide qua hæc
omnia

omnia exequaris diligentia? desle defectus. Per proposita cor-
rige. Pete auxilium gratiæ Dei.

PUNCTUM 2dum.

Quotuplex finis Societatis?

CONsidera quadripartitum finem esse Religiosi Societatis. 1ma illius pars, ut salutem suam curet; in quo convenit cum omni homine ad id creato, ut salutem suam procuret, per observationem præceptorum Dei. 2da pars est, ut attendat suæ perfectioni, quæ consistit in immunitate à peccatis, extirpatione habituum malorum, in mortificatione passionum, in cumulandis meritis, augendâq; continuò gratia sanctificante, per varicos virtutum actus. Et in hac parte Religiosus Societatis convenit cum aliis omnibus Religiosis; quilibet enim Religiosus, ex vi sui statûs, obligatur sub peccato mortali tendere ad perfectionem. 3tia pars finis Societatis, ut curet salutem proximorum; in quo puncto aliquomodo convenit cum aliis, curam animarum habentibus, prout sunt beneficiarii. 4ta tandem pars, ut non solum in salutem, sed & etiam in perfectionem proximorum incumbat; hoc est; ut huic muneri impendat suas vires, valetudinem, famam, honorem, commoditates, labores, conatus & vitam suam; hæc est enim specifica differentia Religiosi Societatis, ab omni alio cujusvis status homine. Vide an? & quomodo tendas ad hunc finem? & quomodo deinceps tendere debeas? age gratias Deo, quod te ad tam sublimem finem vocaverit. Æstima dignitatem ejus. Confundere de tuis defectibus. Ordina totam vitam tuam, & omnes actiones ad eum consequendum. Pete à Deo gratias.

PUNCTUM 3tium.

Quæ media ad finem Societatis?

CONsidera efficacissima media à S: Patre præscripta, ad ob-
tinendum

rinendum Societatis finem. 1^{um} medium: est biennium Novitiatûs, ubi quò sanctiora quis posuerit fundamenta, eò aptior ad prædictum finem evadet. Vide, quomodo tu Novitiatum peragis? quam applicationem & diligentiam, in exequendis muniis adhibes? desle defectus, & proponenda propone. 2^{dum} medium, sunt ista ipsa Exercitia Spiritualia. Expende quantos fructus hæc fecerunt in aliis. Cur non similes in te? 3^{tium} medium, sunt Regulæ & ordinationes Religionis. Quomodo has observas? 4^{tum} medium, sunt quotidianæ meditationes, examina, lectiones libri spiritualis, exhortationes, usus Sacramentorum. Examina conscientiam, quàm exactè hæc omnia exequaris? Erubescere ac deplora defectus. Propone majorem diligentiam. Expende saltem aliquas Regulas ex summario, quantum te juvarent ad hunc finem, si eas sedulò observares? & imò Regulam summarii undecimam, quæ præscribit: omnino & non ex parte abhorre ab omnibus, quæ mundus amat & amplectitur. Abhorresne tu ab iis? Vide: mundus, seu mundani homines amant commoditates, tu amas. mundani fugiunt adversa, tu fugis. mundani appetunt laudari, honorari, æstimari, tu appetis. Quæ ergo distinctio tui à mundanis? Expende item Regulam illam, quæ jubet, ut quis vis majorem sui abnegationem, & continuam in rebus omnibus quærat mortificationem. Et Regulam 16^{am} summarii, quâ suadet, ut nihil perfectionis prætermittatur, quod obtineri possit: ac tandem Regulam 36^{am} summarii, quâ ordinatur, ut ita finamus nos ferri, ac regi à Divina Providentiâ per Superiores, tanquam cadaver essemus, ac baculus senis. Vide, quomodo has, ac alias Regulas observas? Quærisne in omnibus abnegationem ac mortificationem? non prætermittisne perfectionem, quam consequi possis? Confundere, deprecare Deum, & S: Patrem, quod tam efficacibus mediis tibi provisus uti negligas. Propone
secundum

secundum præscripta, S: Patris, tuam vitam ordinare. Pete ad id gratiam.

IN COLLOQUIO.

Accede ad Sanctissimam Trinitatem, & pete imprimis à Patre Aeterno, ut tibi det Spiritum bonum petenti, Spiritum Societatis, ut sicut commendavit S: Patrem Filio suo, ita & te recomendet eidem, licet hujus S: Patris Filiorum indignissimum. Pete item à Filio Unigenito, ut tibi mittat Spiritum Sanctum à suo Patre promissum, & sit tibi propitius, sicut se propitium promisit S: Patri. Invoca tandem Spiritum Sanctum. Veni Sancte Spiritus, & emitte cælitus, lucis tuæ radium.

Pater: Ave: Anima Christi.

ACTUS EJACULATORII.

Elegi abjectus esse in domo Dei mei, magis, quam habitare in tabernaculis peccatorum. Ps: 13.

Fidelis Deus, per quem vocati estis, in Societatem Filii ejus Jesu Christi Domini nostri. 1. Cor: 1.

Cum Sancto Sanctus eris, & cum Viro innocente innocens eris, & cum Electo electus eris. Psal: 17.

Trahe me post te, ut curram in odorem unguentorum tuorum.

§. QUARTUS
DE MEDIIS,

Ad finem Societatis conducentibus.

Multa sunt media in Societate, suo fini servientia, ex quibus, duo principaliora sedula consideratione Expendemus.

1. um medium est amor vocationis.

2. dum: accurata Regularum observatio. Illud enim dirigit ad nos per S: Patrem arbitremur, quod Deut: 4: dictum esse ad populum Dei legimus. Scitis quod docuerim vos præcepta atq; justitias; sicut mandavit mihi Dominus Deus meus, sic facietis ea, & observabitis, & implebitis opere, hæc est enim vestra sapientia.



IMUM MEDIUM ad FINEM SOCIETATIS

Amor Vocationis Religiosæ.

M E D I T A T I O

De Amore Vocationis Religiosæ.

Præf: 1: Statue te coram Deo, in medio Patrum ac Fratrum tuorum, laudantium Deum, eiq; ferventer servientium.

Præf: 2: Pete gratiam concipiendæ æstimationis, & amoris vocationis tuæ.

P U N C T U M I m u m .

Fundamentum amande Vocationis Religiosæ.

COgita: imum fundamentum amoris Vocationis Religiosæ stare in eo, quia vocatio Religiosa est donum Dei præstantissimum, & gratia gratiarum. Si ergo, Religiose, debes amare alias gratias & dona Dei, multò magis donum præstantissimum præ aliis donis. Quòd verò vocatio Religiosa sit donum præstantissimum, deducitur ex his rationibus. 1mò quia vocatio Religiosa est gratia secundi baptismi, ut cum aliis SS: Patribus docet S: Thomas, asserens Religiosum, si post emissionem trium votorum moreretur, statim rectà ad cælum evolaturum, non secus atq; qui susceptò baptismò statim moreretur. 2dò: quia gratia vocationis Religiosæ, est gratia cuiusdam Martyrii, quamvis lentioris, tamen diuturnitate molestioris, juxta S: Bernardum. 3tò: quia est infallibile privilegium vitæ æternæ. Veritas enim æterna nec falli nec fallere potest, quæ dicit: *Qui reliquerit domum, vel Fratres, aut Sorores, aut Patrem, aut Matrem, aut Uxorem, aut Filios, aut agros, propter nomen meum, centuplum accipiet, & vitam æternam possidebit.* 4tò: quia inire statum Religiosum, est summa vitæ hujus beatitudo, & salvatio à tot mundi periculis, prævia salvationi æternæ. Vide, utrum ex his rationibus non sit justum, ut ames vocationem tuam. Contemne itaq;
omnia

omnia quæ te abstrahere conantur, à vocatione Religiosâ. Gratiâ Deo age pro beneficio vocationis. Pete stabilitatem & constantiam in ea.

Cogita fundamentum 2dum amoris vocationis ab exemplis Sanctorum, qui summopere æstimârunt vocationem Religiosam. Sic S: Stanislaus, tot in commoda subiit, tot emensus itinera, tot superavit difficultates, ut vocationem suam consequeretur. S: Aloisius etiam per in ferni cruciatus transire eligebat, ut vel ad breve tempus in Societate viveret. P. Joannes Nunnez, cum esset creatus Patriarcha Æthiopiæ, postulabat exonerari hac dignitate, & ut in culina cujuscunq; Collegii, perpetuò ageret coquum, expetebat, addens: *Securior ibi serviam Deo & Societati.* Ità isti, ità multi alii æstimârunt vocationem suam; & tu quomodo illam hucusq; æstimâsti? quomodo æstimare debeas? nonne satius est, ut omnia perdas, quàm vel minimum periculum vocationis subeas.

P U N C T U M 2dum.

Modus amoris vocationis.

Cogita 1mò: ad verum vocationis Religiosæ amorem, requiri 1mò: ut omnia alia conjuncta cum vocatione æstimentur & amentur, tales sunt omnes personæ Religiosæ, quibus, debitus honor, & amor deferri debet; talia item sunt omnia Religionis officia, & functiones, etiam quæ videntur vilissimæ, tales insuper Regulæ, ordinationes, & omnia præscripta à Religione, quamvis appareant exigua. 2dò, requiritur, ut Religiosus paratus sit ad omnia ardua, & molesta, pro vocatione & cum vocatione toleranda. 3tò, totum se Religioni tradere debet, regendum, quò ad omnes sui dispositiones in totam vitam. 4tò, ex amore vocationis, exosculetur vestem Religiosam, quoties induitur, vel exuitur. 5tò, constantem aliquam devotionem, instituat, pro impetranda perseverantia in vocatione Religiosâ, & in Litanis

E

Omnium

Omnium Sanctorum, speciali affectu & devotione, proferat illa verba. *Ut nos in tuo Sancto servitio confortare, & conservare digneris.* Excita te ad hos modos, usurpandos variis motivis. Proponere, illis accurratè uti.

PUNCTUM 3tium.

Infelicitas deserentium Vocationem.

COgita infelicitatem deserentium vocationem oriri, imò ex eo, quia constituuntur, in periculosissimo statu, amittendæ salutis. Fiunt inepti ad Regnum Dei, juxta illud effatum Christi: *Nemo mittens manum ad aratrum, & respiciens retro, aptus est Regno Dei.* 2dò: quia deficientes à vocatione replentur magnis peccatis teste D: Paulo ad Rom: 1: *Cum cognovissent Deum, non sicut Deum glorificaverunt; tradidit illos Deus, in reprobum sensum, ut faciant ea, quæ non conveniunt, repletos omni iniquitate malitiâ &c.* 3tò quia subjungantur à dæmone, ut S: Bernardus de modo bene vivendi, Cap: 20. ait: *Qui congregationem Sanctam relinquunt, & ad secularem vitam descendunt, à Societate Dei elongantur, atq; dominio diaboli subjungantur.* 4tò: quia desertores continuo remorsu conscientiæ anguntur, quòd vocationem specialissimum salutis medium, deseruerint, sæpeq; illud Dei, eorum obversabitur menti: *Vocavi & renuistis, videbo in interitu vestro.* 5tò: quia Deus aufert ab eis illam doctrinam, illa talenta, quibus in Religione floruissent, spoliat illos hisce Deus, quia ista ob Religionem dederat: utinam non spoliet vitâ æternâ. 6tò: quia desertores, ab omnibus fere impetuntur, irrisionibus, contumeliosis compellationibus, epithetis infamibus. 7mò: tandem, quia tales amarissimam & sæpe diminutam ob desertionem vocationis vitam ducunt, mortem terribilem, æternitatem incertam incurrunt. Apprehendisne istam infelicitatem desertorum vocationis? Potestne major cogitari infelicitas? quàm reddi ineptum ad Regnum Dei,

Dei, ex malitiâ & voluntate propriâ: quàm peccatorum fieri sententiam, diaboli mancipium, rodentis conscientiæ lanienam, omnium ludibrium &c. Exhorresce tam infelicem statum, & né te ad illum deducat, repiditas tua: cura fervorem Spiritûs. Æstima vocationem tuam, pete in ea perseverantiam. Ne proficias me à facie tua Domine, & Spiritum Sanctum né auferas à me. Redde mihi lætitiâ salutaris, & Spiritu principali confirma me.

COLLOQUIUM.

Cum Christo in Cruce moriente, neq; ad vota Phariseorum de illa descendente, rogando Christum per ejus Clavos, & in Cruce mortem, ut te in Cruce Religionis conservare & emori faciat. Pete id ipsum à Beatissima sub Cruce stante, né te à sinu suo materno, avelli patiatur, in quo & vivas & ultimum expires. *Pater: Ave &c. Anima Christi.*

ACTUS EJACULATORII.

UNam petis à Domino, hanc requiram, ut inhabitem in Domo Domini omnibus diebus vitæ meæ. *Psal: 26.*

Beatus, quem elegisti, & assumpsisti, inhabitabit in atriis tuis, replebimur in bonis domus tuæ. *Psal: 64.*

Quàm dilecta tabernacula tua Domine virtutum, concupiscit & deficit anima mea in atria Domini. *Psal: 83.*

Beati, qui habitant. in domo tua Domine, in sæcula sæculorum laudabunt te.

Melior est dies una, in atriis tuis super millia. *Psal: 83.*
Unusquisq; in qua vocatione vocatus est, in ea permaneat. *1. Cor: 6.*

2dum MEDIUM ad FINEM SOCIETATIS.

Æstimatio & observatio Regularum.

IDem Religioso viatori sperandum est ex observatione Regularum sui Ordinis, quod regius Vates prænuñtiavit de lege

E2

Domini,

Domini, ubi ait: *Lex Domini immaculata, convertens animas, testimonium Domini fidele, sapientiam præstans parvulis.* Psal: 18.

M E D I T A T I O

De observatione accurata Regularum.

Prel: 1. Collocemus nos coram S: Patre porrigente nobis librum Constitutionum, ejusq; observationem commendante.

Prel: 2. Petamus gratiam sanctè juxta Institutum vivendi.

P U N C T U M I m u m .

Æstimandæ sunt & observandæ Regule.

1mò: Ex eo, quia sunt efficacissima media nobis à Deo oblata, ad consequendam perfectionem vitæ; non aliâ enim viâ Patres nostri pervenerunt, ad magnam Sanctitatem, nisi per constantem regularum observationem. Unde Gilbertus Middletonus Societatis nostræ, regulas dicebat, medullam, compendium, & florem perfectionis. Faciunt enim id duplici modò regulæ, ut nobis præstent medium efficax perfectionis. 1mò: impedimenta removendo, 2dò: auxilia suppeditando, ad obtinendam Sanctitatem, quod ipsum duplici similitudine declaravit S: Borgias, dum in Collegio Romano Regulas promulgaret. Unam quidem similitudinem sumpsit ab homine captivo, & inter hostium catervas detento, ab amicorum tamen cohorte propugnato, liberato. Quid putamus? quanto amore & æstimatione, debitâq; observatione, illum suum liberatorem, prosequeretur captivus, liberatus. Id totum Regulis nostris debemus, nos enim semper tanquàm captivi essemus, inter tot hostium præsertim domesticorum oppugnationes. Caro equidem concupiscit adversùs Spiritum, & Spiritus adversùs carnem. Tot item passionēs, tanquàm belluæ indomitæ continuò tumultuantur, & nostræ saluti insidiantur. Sensus ipsi conjurati sunt hostes, in nostram perniciem. Et Regulæ si illas observaverimus, liberant nos ab omnibus hisce oppugnationibus. Quidni illas

illas æstimemus? quidni illas observemus? 2dam similitudinem proposuit dictus S: Pater, ab aliqua Reliquia, vel Agno Dei, si cui offeretur à summo Pontifice, ad propulsanda incendia, tempestates, tentationes servitura; nonné hæc quisq; magnificeret. Multò itaq; pluris Regulas æstimare debemus, quæ nos defendunt ab incendio cupiditatum, à perturbationibus, ac variis tentationibus, ut sedulò consideranti, constare potest. Concipiamus itaq; æstimationem Regularum nostrarum. Petamus à Deo Spiritum exactæ observantiæ Regularum.

PUNCTUM 2dum.

Æstimande sunt & observandæ Regule.

2dò: Ex eo, quia hæc est voluntas Dei, ut in earum observatione vivamus, & per earum observationem perfecti efficiamur. Docet enim S: Thomas Angelicus, quòd quælibet Regula Religiosa, sit radius procedens, à lumine sapientiæ Divinæ, sit rivulus, emanans à fonte rectissimæ Voluntatis Divinæ. Ex quo facile quisq; inferre potest. quanti æstimandæ sint Regule. Hinc etiam dum S: Pater noster Ignatius scriberet Regulas, sæpius Spiritus Sanctus, in flamma ignis apparens visebatur. Et postea Paulus III. confirmans easdem Regulas dixit. *Spiritus Dei hic est.* Proinde qui contemnit Regulas Societatis, contemnit Spiritum Sanctum, & qui non vivit secundum has Regulas, non est in eo Spiritus Dei. Consequenter non vivit Deo, qui enim non habet Spiritum Christi, hic non est ejus. E contra verò qui juxta Regulas suam vitam ordinant, Spiritu Dei aguntur & sunt Filii Dei, juxta illud ad Rom: 8: *Qui Spiritu Dei aguntur, hi sunt Filii Dei.* Videamus itaq; quomodo hucusq; Regulas observavimus? & quo studio eas in posterum observare debeamus.

PUNCTUM 3tium.

Æstimande sunt & observandæ Regule.

3tìd: Ex eo, quia in observatione Regularum, tota consistit

substantia, & integritas vitæ Religiosæ: Quælibet enim Religio, est quoddam corpus, & Spiritus illud vivificans, sunt Regulæ; quamdiu itaq; est efficax & accurata observatio Regularum, tamdiu vivit Religio. Consequenter transgressores Regularum exanimant, & omni vigore destituunt Religionem. Juxta Sacram scripturam & Sanctos Patres, Religio est tanquam hortus conclusus, juxta illud *Cant: 4. Hortus conclusus, Soror mea sponsa.* Sicut autem nullus hortus valet quidquam sine sepimento, ita nec Religio sine Regulis. Qui hortus non est conclusus, patet direptioni latronum, conculcationi brutorum, nihilq; fructiferi asferre potest; pari modo & Religio absq; Regulis, ultimæ ruinæ & devastationi relinquitur. Hinc Deus Isaia 5. minatur Israël ob peccatum Christicidii: *Ostendam, quid faciam vineæ meæ, auferam sepem ejus, & erit in direptionem, destruam maceriam ejus, & erit in conculcationem.* Hæc desolatio timenda est, in Religiosis vineis, cum Regulæ, tanquam, sepimentum subruuntur, cum silentium sæpius violatur &c. Proinde P: Fabricius Bamfus Visitator hujus Provinciæ, in Exhortatione ad nostros dixit: Fratres mei servemus Regulas, né Deus in locum nostræ Religionis, excitet aliam, sicut fecit cum aliis Religionibus, jam pridem extinctis. Et S: Bernardus: *Rogo vos Fratres State in Domino, solliciti semper juxta custodiam ordinis, ut ordo vos custodiat. Pensemus his consideratis, quantû Regulas nostras facere debeamus.*

PUNCTUM 4^{um}.

Æstimandæ sunt, & observandæ Regule.

4^{to}: Ex eo, quia obligamur ad omnem honorem, & observantiam Sancto Patri nostro & Matri Religioni. Præceptum enim Dei est, ut Patri & Matri obediamus juxta illud. *Prov: 1: Audi Fili mi disciplinam Patris tui, & né dimittas legem Matris tuæ, ut addatur gratia capiti tuo, & torqueos Collo tuo.* Debemus itaq; implere

implere accuratè, quæ S: Pater noster, & S: Mater Religio nobis per Regulas, facienda præscribit. Sic cum occurrentibus occasionibus, Regulæ alicui adversantibus agere debemus, sicut fecerunt Rechabitaë *Ierem: 35*: Cum enim hi impellerentur, ut biberent vinum à patre Jonadab prohibitum, responderunt concordii voce: *Pater noster præcepit nobis dicens: Non bibetis vinum, obediemus ergo voci Patris nostri, in omnibus, quæ præcepit nobis.* Sic deberet quisq; Societatis Filius, in occasione transgressionis Regulæ, sibi ipsi intimare: Pater noster præcepit nobis, ut meditationem, examina, lectionem libri Spiritualis cum omni diligentia, perageremus. Procul itaq; tepor, procul omnis negligentia. Præcepit, né extra tempus recreationis loqueremur, né extra tempus prandii & cænæ biberemus ac ederemus, sine facultate, justum itaq; obedire Patri. Absit à me Domine, ut quidquam contra voluntatem S: Patris mei faciam. Volo exequi omnia, quæ mihi in suis Regulis præscripsit S: Ignatius. Volo omnes actiones meas, totam vitam meam conformare Regulis. Adjuva Domine infirmitatem meam. Da, ut tuo Spiritu, ut Spiritu S: Patris vivam.

Pater: Ave: Anima Christi.

ACTUS EJACULATORII.

QUIS est homo, qui timet Dominum? legem statuit ei in via, quam elegit. *Psal: 24.*

Da mihi intellectum & scrutabor legem tuam, & custodiam illam, in toto corde meo. *Psal: 118.*

Custodiam legem tuam semper, in sæculum & in sæculum sæculi. *Psal: 118.*

HORA QUIETIS DANDA CONSIDERATIONI,

Supra surrectionem Matutinam.

Statue te in Conspectu Dei, aut sub pedibus Christi Crucifixi.

Pete gratiam, utiliter instituendi hanc Considerationem.

I. Habesné prævísos Actus, quos exerceas surgendo, vel de nocte expurgando? Adorasné statim Sanctissimam Trinitatem, Christum Crucifixum, & vicinam Eucharistiam? venerarisné Beatissimam, S: Angelum Custodem tuum & SS: Patronos?

S: Xaverius nocturnæ quieti, aliquot horas detrahebat, quas Orationi dabat, potissimum vero in meditatione vitæ Christi, & mortis ejus acquiescebat. Vit: 1: 6. c: 5.

S: Borgias, maximè à media nocte meditationi vacabat, totusq; inflammatus, extra se videbatur. 1: 4. c: 4.

P: Ignatius Martinus diebus singulis, ac noctibus quinque horas, rerum divinarum contemplationi dabat flexis genibus. Nonné tu saltem identidem, poteris aspirare ad Deum? & per breves Oratiunculas, mentem tuam elevare? Orasné pro animabus purgatorii, præsertim pro iis, quarum corpora jacent in Ecclesia Domûs aut Collegii? Revelavit Christus Dominus S: Gertrudi Virgini (ut legitur 1: 4. c: 18. Insin: div: pietatis:) *Qui pro peccatoribus & animabus purgandis, devotè oraverit, hoc tam dignanter acceptabo, ac si ad me incarceratum, crebrius veniendo, blandis consolationibus suis, desolationem meam sublevasset.*

II. Ante somnum facisné protestationes, te velle obdormire in amore Dei sub pedibus Crucifixi, & sub scabello Pedum Beatissimæ, in assistentia S: Angeli Custodis, & SS: Patronorum.

P: Dacus Martinus ut memoriam passionis Christi, quam interdum semper fovebat, etiam de nocte conservaret, caput asperimò ciliciò obvolvebat. Lyr: 1: 1. Apoph: 17.

P: Joannes Gondinus, quacunq; noctis horâ conveniretur, coram Christo Crucifixo inveniebatur. *Idem.*

Joannes Berchmannus dicere solebat, in adversis non esse tutius asyllum, quàm Christi Crucifixi vulnera & sinum, ac pallium, Beatissimæ Virginis Vit: p: 2.

Protesta-

Protestarisné, id contra tuam voluntatem futurum, quidquid in somno malum acciderit? Commenda tua semina custodiæ S: Xaverii, etiam per somnium decertantis ad sanguinem, cum phantasmate minus Sancto.

III. Petisné ante somnum gratiam, ut te Deus præservet, ab omnibus phantasmatis, & diaboli illusionibus, præstet in per illa Christi ludibria, quæ passus est apud Caiphā, tota nocte exagitatus.

IV. Curasné primam cogitationem ad Deum convertere, & in ipsa surrectione elicisné actus fidei, spei, charitatis & invocationis Dei. Ex primordiis enim cogitationum manè, pendent & derivantur cogitationes totius diei, ut Cornelius à Lapide docet & addit, quod diabolus id sciens, evigilanti conatur objicere, primò cogitationes fædas, mundanas & vanas. Com; in Prov: Sal: c: 7.

V. Quis tibi gustus surgendi ad primum ictum campanæ? & tamen hoc signum magni Regis est. Quæsierat B: Bertrandus, ex Beatissima, quid amore suū vellet à se fieri; & audiit responsum; *Surge ad primum ictum signi dati.* Facisné id sine tergiversatione?

VI. Absuevistiné, ut compositis in Crucem manibus, dextro lateri indormias? ut per eam compositionem conserves doctrinam Thomæ à Kempis qui l: 2. c: 12. ait; *in Cruce salus, in Cruce vita, in Cruce protectio ab hostibus, in Cruce infusio supernæ suavitatis, in Cruce robur mentis, in Cruce gaudium Spiritus, in Cruce summa virtutis, in Cruce perfectio Sanctitatis.*

VII. Absuevistiné, ut cautus, & bene tectus dormias?

VIII. Non imitarisné aniles fabulas? locò debitæ devotionis interpretando somnia?

IX. Tantânè verecundiâ te ornas, ut nulla pars corporis, intacta minus decenter maneat? Recole illorum Eremitarum ve-

recundiam, qui nolentes nudare se, ad tranandum fluvium, Angelicis manibus deportati sunt. Recole & illud, quod Beatissima, cum Religiosorum de nocte visitaret cubicula, illos præteribat, qui non bene tecti decumbebant. Estné in te verecundiæ amor?

X. Retinesné pristinam Sanctorum Religiosorum consuetudinem, osculandi vestem Religiosam, tanquam pretium sanguinis domini tui?

XI. Solesné eluere aliquo actu, saltem percussione pectoris, si quid, etiam involuntariè somnies profanum aut turpe?

XII. Curasné à surgedo, quàm diutissimè silentium servare? & primum verbum nonnisi lingvâ in Vulneribus Christi intinctâ loqui?

XIII. Properasné cum magno desiderio, ad salutandum Christum in Eucharistia & ad Beatissimam? Legitur de Patre Theophilo Raynaudo nostro, Viro magnæ eruditionis, quod illum Visitator nocturnus, semper in lecto reperiebat, & Excitator semper extra lectum, ità festinantem ad Eucharistiam, ut nemo ad lectum surgens, illum præcesserit. Non possesné illum imitari?

XIV. Absuescisesné statim à Novitiatu, inducens id in naturam, ut sis contentus horis somni à S: Patre constitutis? utiq; hoc est nostrum matutinum, nostra de media nocteurrectio.

CAPUT 2dum.

De Impedimentis & Periculis, à Fine detrudentibus.

Nihil magis à consequendo fine, & de via Cælestis Sapientia, detrudit, quàm peccatum. Unde Sapiens monet: *In malevolam animam, non introibit sapientia, nec habitabit in corpore subdito peccatis Sap: 1.* Cui itaq; cordi est, servire Deo, propriamq; salutem promoveri & in via Cælestis sapientia consistere, maximus illi horror, maximumq; peccati odium, per varias considerationes, cognitionemq; seriam malitiæ peccati, concipiendum est. *Sapiens enim*

*enim cor, & intelligibile abſtinebit ſe à peccatis, & in operibus juſti-
tiæ ſucceſſus habebit Eccl: 3: 1mò: Igitur in cognitione gravitatis,
& malitiæ peccati, mens Religioſi demorabitur. 2dò: Cæcitatibus
ſpiritalibus, quæ ex peccatis oritur notitiam comparabit. 3tò:
deniq; ad contemplanda pericula, ut efficaciùs evitentur deſcendet.*

§. PRIMUS

De Malitia & gravitate peccati.

Triplici meditatione gravitas peccati mortalis, expendetur. 4ta
venialium exponet malitiam.

MEDITATIO ima.

De triplici peccato Angelorum, Adami, & proprio cujusq;

*Præl: 1: Colloca te tanquam reum coram Deo Judice in thro-
no ſedente, à cujus ore fluvius igneus, rapiduſq; egreditur ad
cruciandos peccatores, ut Propheta ait Dan: 7:*

*Præl: 2: Pete gratiam cognoscendi gravitatem peccati, & e-
jus horrorem concipiendi.*

PUNCTUM imum.

Peccatum Angelorum.

Inprimis memoria ſtatuat, ante oculum mentis tuæ, peccatum
ab Angelis commiſſum, qui in Cælo pleni ſapientiâ & gratiâ,
à Deo, conditi, libero ſuo arbitrio abutentes, ſuperbè, ſe contra
Deum Creatorem ſuum erexerunt, & propterea è Cælo ejeſti, ac
in infernum præcipitati ſunt. Diſcurrat deinde intellectus, circa
hanc veritatem, expendatq; ſingulas circumſtantias, atq; conſide-
ret illos Angelos, creatos eſſe puros Spiritus, immortales, intellectu-
ales, liberos, cum magnis dotibus & plenitudine donorum, ca-
paces beatitudinis æternæ; quia tamen ingrati multi exſtiterunt,
& abuſi donis Dei, Deus eos de Cælis ad æternos inferni ignes,
nullo pænitiæ ſpatio relicto, deturbavit; omnibus gratiæ do-

nis spoliatos. Exhorresce iustitiam Dei in Angelos, & mirare longanimitatem ejus super te: atq; infer: si Deus Angelis tam perfectis creaturis peccantibus non pepercit, quomodo tu vermiculus terræ præsumere audebis? si in peccatis, & consuetudine peccandi hæseris & veram pænitentiam non egeris. Expende, quibus te gratiis & donis cumulavit Deus, quomodo in Religione te, tanquam in Cælo collocavit; compara item innumera tua peccata, tum cogitationum, tum verborum, tum operum, cum unico cogitationis peccato Angelorum. Adde, quod Christus pro peccantibus Angelis non sit passus, tu toties peccando, sanguinem Christi pro te effusum conculcâsti. Ex his agnosce te digniorem, præ omnibus dæmonibus esse, quem Deus in infernum à facie sua projiciat. Deprime teipsum infra omnes inferos, abjice infra pedes Luciperi. Erige tamen spem in Deum dicens: O Deus misericordiarum, ego quidem malus, sed quia tu bonus, & bonitatis tuæ infinitus est numerus, humillimè supplico, miserere mei usq; in finem, & exalta in me misericordiam tuam.

Considera insuper, per quos gradus Angeli peccando ad tam infelicem statum pervenerunt. Imus fuit gradus perditionis; æstimatio sui, unde processit contemptus hominis, murmuratio in Deum, tandem seditio & commotio reliquorum Spirituum. Vide, utrùm non eodem passu in extremam ruinam descendant nonnulli Religiosi; sæpe enim aliqui appetunt excellere, videri, æstimari, unde progrediuntur ad contemptum aliorum, odiq; rixas excitant, calumniis, factionibus communitatem perturbant. Contra suos superiores murmur, & seditiones movent. Ex quo oritur rerum Spiritualium nausea, Regularum & meditationum neglectus, ac tandem vocationis ipsius contemptus, & à Religione defectio. Vide ô Religiose, ut abneges temetipsum, & amorem proprium, imprudentemq; tui æstimationem, totaliter exuas, ne in tam gravem ruinam devenias.

PUN.

PUNCTUM 2dum.

Peccatum Adami.

EAsdem potentias tres animæ tuæ exerce, circa peccatum primorum Parentum. Hi in paradiso, omnis voluptatis loco positi, donis justitiæ Originalis ornati, omnibus virtutibus cumulati, quia præceptum non custodierunt. ingrati pro tantis beneficiis, subito ejecti de paradiso, morti, & omnibus hujus vitæ miseris, cum tota posteritate subiecti.

Cogita imò: Semel Parentes nostri, unum transgressi sunt præceptum Dei & subito puniti, tu quot præcepta & quoties transgressus es? quid putas, an tu evades omnes pænas? Cogita 2dò: quanta mala imminet incauto homini, à gula, & sensuum oblectamentis. *Vidit mulier, quòd esset pulchrum & aspectu delectabile.* Et sic ad præceptum Dei violandum inclinata. Vide, né & tu, sensualitate abripiaris; curà, ut sis omnis sensualis voluptatis inimicus, sicut diaboli, & in filiorum Dei libertate persiste, nec unquam acquiescas carni & sanguini. Propone medià cautius vivendi.

PUNCTUM 3tium.

Peccatum particulare.

Percurre omnes annos, menses, dies vitæ tuæ, percurre locos in quibus mansisti, & vide, quæ in his omnibus & quanta peccata commisisti? multos Deus ad æternos Cruciatos damnavit ob unicum peccatum; tibi hucusq; parcit, qui tam multa & gravia commisisti, & adhuc te expectat; quando tandem finis turpitudinis tuæ? quando deplorabis, & seriam incipies de peccatis tuis pœnitentiam? Admirare specialem erga te Dei bonitatem, quòd te peccantem tamdiu toleraret, nec fulmine feriret, aut subitanea morte de vivis tolleretur. Detestare & odium inplacabile concipe omnis peccati. Elice actum contritionis, de peccatis commis-

sis, deprecare Deum à te offensum, puni in te peccatâ tua severâ pœnitentiâ. Pete ad id auxilium Dei, & Spiritum pœnitentiæ. Nonne sufficit tibi toties, iram Dei meruisse, tot annos, & dies vanitatibus dedicâsse?

COLLOQUIUM.

Tolerâsti me Domine hæcenus, tolerâsti peccantem, & tua præcepta transgredientem. Vidisti ingratitude & debita mea, & impium non perdidisti, sed misericors, tempus pœnitendi prolongâsti. Ergone miser abutar patientiâ tuâ? Ideone tu bonus, ut ego sim malus? O amor infinite, quomodo amplius defera m te? Non amplius Domine, non amplius peccare volo. Dixi, nunc capi; moriar potius, quàm ut amplius offendam te, displicet mihi & vita, si sit sine amore tuâ.

ACTUS SÆPIUS USURPANDI.

Deus propitius esto mihi peccatori.

Miserere mei Deus, secundum magnam misericordiam tuam, & secundum multitudinem miserationum tuarum, dele iniquitatem meam. *Psal: 50.*

O Deus! tibi soli peccavi, quem solum amare debui.

Pœniter me peccâsse; utinam nunquam te offendissem!

Amplius lava me ab iniquitate mea, & à peccato meo munda me. *Psf: 50.*

MEDITATIO 2da.

De Gravitæ ac Odibilitate peccati mortalis.

Præl: 1: Colloca te in conspectu Dei, increpantis peccatores his verbis. Deum, qui te genuit, dereliquisti, & oblitus es Domini Creatoris tui.

Præl: 2: Pete gratiam, ut seriò apprehendas, malitiam peccati, & concipias odium, horroremq; quàm maximum totâ vitâ durantem, omnis peccati mortalis.

PUN.

P U N C T U M I m u m .

Peccatum mortale adversatur Deo.

C O N s i d e r a gravitatem ac odibilitatem peccati, ex summa dignitate & magnitudine Dei, cui peccatum mortale adversatur. Nam adversatur, imò: Deo ut Creatori, cum opus ejus rectum depravet, & inficiat. Sic hominem, ad Imaginem Dei factum, deturpat, & ad altissimum finem ordinatum, transvertit ad quærendas vanitates, & à Creatore ad Creaturam convertit. Unde queritur Deus Jerem: 2. *Me dereliquerunt fontem aquæ vivæ, & foderunt sibi cisternas dissipatas.* 2dò: adversatur Deo, ut Benefactori, quia facit, ut peccans, beneficiis, creaturisq; sibi à Deo concessis, tanquam mediis ad Dei gloriam, & salutem ipsius hominis, abutatur ad offensam Dei, v. g. ut abutatur, oculis, lingvâ, manibus &c. & cæteris rebus, iis scilicet utendo, ad illicita, & à Deo prohibita. 3tò: adversatur peccatum Deo, ut Legislatori, ac supremo Domino: per peccatum enim, impéria & præcepta Dei violantur. Hinc S: Aug: lib: de natura & grat: *In omni peccato Deus contemnitur in suis præceptis.* 4tò: adversatur Justitiæ Divinæ, peccans equidem, non reveretur justissimum vindicem malorum, ac Judicem omnium, sed præsumens de ejus misericordia, falsò putat, quod ejus peccata Deus non vindicabit. Proinde S: Bern: Ser: 3. de Resurrectione Domini disserit: *Peccator omnino vellet, Deum peccata sua, aut vindicare non posse, aut nolle, aut nescire, vult ergo eum, non esse Deum.* 5tò: adversatur immensitati Divinæ, ejusq; sapientiæ, omnia clarissime videnti atq; persipienti, in cujus conspectu audet peccans indigna perpetrare. 6tò: adversatur Dei Omnipotentiae, illam non timendo, quæ potest corpus perdere, & animam mittere in gehennam, & eodem momento, fulmine ferire peccantem. 7mò: adversatur peccatum summæ bonitati Divinæ, quam spernit peccans, & postponit alicui bono creato, hoc plus amando, quærendo.

rendo, optando, honorando, ei deferendo, &c. quàm Deo. Vide utrùm & tu per peccata tua non adversabaris Deo, utrùm ipsius conspectum ubiq; reverebaris? utrùm in omni loco, & opere timeris Deum vindicem tibi assistentem, utrùm ingratus non abusus fueris ejus beneficiis, ad illius ipsius offensam? Exhorresce omne peccatum, detestare malitiam ejus toto cordis affectu. Admirare Dei bonitatem, quòd te incolumem tamdiu toleraverit. Deplora & tua & aliorum peccata. Age pœnitentiam, & dispone in singulos dies, adhibendas mortificationes & pœnitentias.

PUNCTUM 2dum.

Peccatum adversatur ipsi peccanti.

Considera, quæ mala infert peccatum ipsi peccanti. imò enim obcæcat eum, juxta illud Prophetæ Sophon: 1. *Ambulabunt, ut cæci, quia Domino peccaverunt.* 2dò: reddit illum fatuum, & stultum, quid enim stultius, quàm bonis æternis præferre temporalia? & plus adhærere Creaturæ, quam creatori? quid enim stultius, quàm velle finem, nempe velle salvari, & nolle media? velle esse Religiosum, & nolle observare ea, quæ sunt Religionis. 3tiò: omnia mala inducit in peccantem, juxta illud Prov: 4. *Miseros facit populos peccatum* Et S: Pauli Rom: 2. *Tribulatio & angustia, in omnem animam hominis operantis malum.* 4tò: Reponit peccantem in tali statu, in quo nihil potest pro gloria Cælesti mereri, periretq; in æternum, si moreretur. 5tò: spoliât hominem omnibus meritis, quæ habuit in thesauris Dei, & facit eum inhabilem ad participationem meritorum, quæ fiunt in tota Ecclesia. 6tò: aufert homini securitatem salutis per totam vitam, seclusâ speciali revelatione. 7mò: Privat eum jure hæreditatis Cælestis & dignitate filiorum Dei. 8vò: Facit homini vitam inquietam, mortem amaram, & tremendum Dei judicium. 9nd: Facit illum mancipium diaboli. Hinc S: Aug: in Epist: ad Rom: dicit: *quòd peccans*

peccans animam suam vendat diabolo accepta, tanquàm pretio, dulcedine voluptatis temporalis Quis peccatum non exhorrescat? quis non detestetur? reflecte te, utrùm & te similibus malis aliquando non infecerit? retracta omnia, deplora cecitatem hominum, quòd inconsideratè ruant in peccata. Implora auxilium Dei, ut nobis omnibus tribuat, in lumine claritatis suæ, in horrore peccati, ambulare cunctis diebus vitæ nostræ.

PUNCTUM 3tium.

Peccatum unius hominis adversatur toti Communitati ac Regno.

REvoca tibi ex sacra scriptura aliquorum peccata, inferentia in totas communitates multa mala. Sic peccatum Adami quantis malis totum genus humanum involvit, & hucusq; exercet. Sic unius Judæ perfidia totam navem cum Apostolis commovit, & periculo submersionis exposuit. Ut S: Ambr: 1: 4. in Luc: c: 5. *Unius delicto cunctorum merita quatuntur.* Sic Josuæ 7. Unus Achan deliquit furtivè aliqua surripieus, & totus Israël punitur; ad quem Josue, *quia turbasti nos, exturbet te Dominus, in die hac.* Sic Davide peccante, totum Regnum peste affligitur. Sæpe & nunc propter unius delictum puniuntur Regna, Communitates, Civitates &c. Expende, quanta sit malitia peccati, ex qua tot mala veniunt. Execrare & exhorresce peccatum. Elige potius omnia mala pati, quàm vel unum peccatum committere, Averte Deus viam iniquitatis à me & potius moriar millies, quàm te unquam, Dominum, Deum meum offendam. Humilia te coram Deo, & confitearis peccatum tuum, per quod fuisti causa multorum malorum.

COLLOQUIUM.

O Deus iuste & misericors, ego miser peccator, plenus confusione coram te, cupio deplorare miseriam meam, ut tuam impetrem misericordiam. Peccavi Domine, peccavi, & offendi te Deum meum, Creatorem, Benefactorem, Patrem ac Dominum, &

G

Judicem

Judicem meum. Pateras me in ipso peccati momento ad inferos detrahere, sed pepercisti mihi, ut per penitentiam redirem ad te. Da ergo lacrymas & cor contritum, ut dignè desistam peccata mea, & dignes faciam fructus penitentiae.

Pater: Ave &c. Anima Christi.

ACTUS EJACULATORII.

ECce enim in iniquitatibus conceptus sum, & in peccatis concepit me Mater mea. *Psal: 50.*

Malum & amarum est, relinquere Dominum Deum. *Ierem: 2.*

Non est abbreviata manus Domini, ut salvare nequeat, sed iniquitates & peccata vestra absconderunt vultum ejus à vobis, ne exaudiat. *Isaie: 59.*

De propitiato peccato noli esse sine metu, neq; adjicias peccatum, super peccatum. *Ecclesi: 5.*

Qui mortui sumus peccato, quomodo adhuc vivemus in illo? *Rom: 6.*

MEDITATIO 3tia.

De Circumstantiis aggravantibus peccata Religiosi.

Præl: 1. Collocemus nos coram Sanctissima Trinitate, & Sanctis Patribus nostris.

Præl: 2. Petamus gratiam cognoscendae gravitatis peccati in Religione commissi, & illius detestandi.

PUNCTUM 1um.

Gravitas peccati ex loco.

Consideremus, quod Deus gravissime puniverit, peccata in loco sacro commissa. Sic gravissime punivit Luciferum nullo ei relicto penitentiae spatio, ob superbiam in Caelo commissam. Sic Adamum & Evam propter inobedientiam factam in Paradiso. Sic Dathan & Abiron, ob murmurationem perpetratam, in medio populi Dei. Sic Matt: 22. Severa instituitur inquisitio, cum illo qui non debite ornatus, ausus est intrare in locum nuptiarum.

Amice

Amice quomodo hic intrāsti, non habens vestem nuptialem? ligatis manibus, & pedibus ejicite eum in tenebras exteriores Domus Religiosa est locus nuptiarum, in quo desponsantur animæ Filio Regis, Christo Domino. Sic deniq; *Isaia 26.* minatur omnibus in loco sacro peccantibus, ubi dicit: *In terra Sanctarum iniqua gessit, non videbit gloriam Domini.* Et certè dignusnè est gloriâ Domini, qui in loco Sancto, ex quo Sanctior esse debuerat, malus factus est? Ipsa loci Sanctitas, reverenter habenda est; nullis itaq; pravis moribus contaminanda. Videamus igitur, nè eandem sententiam pati mereamur, & à gloria Domini sive in terris promovenda, meritò excludamur, sive à Cælesti exulemus. Potest enim Deus absq; omni injuria, propter unum etiam parvum defectum in domo sua & in conspectu Majestatis suæ admissum, totaliter deferere hominem atq; gratiam subtrahere. Proinde, nè justam Dei indignationem, incurramus, faciamus, ut quàm cautissimè ambulemus in domo Domini. Percurramus dies vitæ nostræ, in Religione. Examinemus, utrùm hunc locum, tot Sanctorum Prædecessorum exemplis, ac virtutibus consecratum, non contaminaverimus. Erubescamus, deploremus, ac deprecemur Deum, & Sanctos Patres nostros.

P U N C T U M 2dum.

Gravitas peccati ex infructuositate.

CONSIDEREMUS, quid Deus de hominibus, nullum fructum facientibus, sub parabola de arbore infructuosa dixerit *Luc: 13* *Succide ergo illam, ut quid etiam terram occupat.* Nempe indignum judicabat, ut abq; ullo fructu illum locum teneret, quem alia fructifera occupasset utilius, ideoq; tollendam præcepit. Hinc inferamus, si tale quid de infructuoso ligno statuit, quid de pestifero & venenatas baccas ferente statuisset? Time igitur anima! sciens te infructuosam arborem esse, imò tot peccatorum venena proferen-

tem. Flēt enim alioqui, ut Deus te evellat ex vinea sua, abjiciatq; à gratia & Religione sua, & tanquam lignum aridum, ad ignem inferni deputet, ut interim alius ferventior, & observantior legum, substituatur, qui fructus faciat vitæ æternæ. Serio itaq; invigilandum sibi quisq; putet, & timorem Dei conservare velit, ac cum timore & tremore operari salutem non differat.

PUNCTUM 3tium.

Gravitas peccati ex tot auxiliis & prædiis.

Consideremus, quod Deus, tot media providit nobis, in Religione ad perfectionem consequendam, & evitanda peccata. Meditatio enim quotidiana, lectio libri Spiritualis, examina, Ordo ac dispositio temporis domestici, possunt nos juvare ad magnam Sanctitatem, modo ipsi velimus omnia ista diligentissimè observare. Item inspirationes divinæ, auxilia spiritualia, Regulæ, ac hæc ipsa Exercitia, nonne possent nos ad eximiam elevare vitæ sanctitatem, si omnia ut par est perageremus. Imaginemur alloquentem nos Christum. Ego te psci in loco isto Sanctorum, ut tu quoq; Sanctus evaderes. Introduxi te in terram bonam, ut in ea fructificares. Suppedito tibi tot inspirationes, tot ordinationes, instructiones, Regulæ, & tu in contrarium abiisti, & de malo pejor fieri in medio Sanctorum non vereris. Confundere coram Christo, deplora omnes defectus & negligentias tuas. Implora auxilium Dei, ut sanctius prædiis, ac donis tibi à Deo provisus utaris.

PUNCTUM 4tum.

Gravitas peccati ex Ratione Statûs Religiosi, & Fundatorum beneficiis.

Consideremus, quod peccata à Spirituali, ac Religioso homine facta graviora sint aliorum hominum peccatis. imò: ex eo, quia Religiosus majorem habet obligationem Deo serviendi, quàm omnes sæculares. Siquidem se specialiter Deo ad id obligavit. 2dò: quia

quia victu & amictu benefactorum, aliisq; commodis absq; suo labore, & impensis utitur, quæ non alio fine à benefactoribus conferuntur, nisi ut Religiosi fideliter Deo serviant. 3^{to}: quia per suum statum & Regulam, amovetur ab omnibus occasionibus peccandi, modò se ulterò non ingerat. 4^{to}. quia magis culpandus est, qui cadit in luce, & pleno meridie, quàm ille, qui cadit inter tenebras positus. Porro sæculares versantur, tanquam in tenebris, Religioso verò multa allucent lumina, tum exemplorum, tum doctrinarum, & inspirationum divinarum. Exhorrescat itaq; quàm maximè peccatum, petatq; à Deo gratiàm, ut illud implacabili prosequatur odio.

COLLOQUIUM.

O Bibis mente illos locos, vitæ tuæ Religiosæ, in quibus aliquo peccato Deum tuum offendisti, & prostratus, Deum deprecaberis, deplorabis, & lacrymis elues profanatam à te Sanctam Religionis terram. Retrahabis, quidquid aliquando malè actum; implorabis gratiam sanctè ubiq; vivendi.

Pater: Ave: Anima Christi.

ACTUS EJACULATORII.

IN terra Sanctorum iniqua gessit, non videbit gloriã Domini *Isa. 26.*
Terra sæpe venientem super se bibens imbrem, proferens autem spinas, ac tribulos, reprobata est & maledictio proxima *Heb. 6.*
Viam iniquitatis amove à me & de lege tua miserere mei *Psal. 118.*
Iniquitatem odio habui, & abominatus sum; legem autem tuam dilexi *Pf. 118.*

HORA QUIETIS DANDA CONSIDERATIONI,

Supra Usum Sensuum Externorum.

Collocatus sub pedibus Christi Crucifixi, pete gratiam fructuosæ reflexionis, de usu sensuum, donumq; illis bene utendi ac defectus evitandi.

Qui defectus contingunt in Ufu Oculorum.

1. *Curiositas.* Sic Gen: 34. Lina ob curiositatem videndi mulieres ejus nationis, jacturam Castitatis & famæ passa est.
2. *Cupido rerum inutilium.* Hac viâ Eva se, & nos perdidit Gen: 3. Videns & concupiscens pomum.
3. *Incontinentia ac libido.* Sic Judic: 14. Vidit mulierem de filiabus Philistiim & adamavit. Sic Dan: 18. Senes illi exarserunt in concupiscentiam.

Remedia evitandorum peccatorum.

1. *Firmum propositum* nunquam circumspectiendi vultus formosiores. Sic Alphonsus Rodriguez Janitor annorum 40., nunquam ullius fæminæ vultum conspexit.
2. *Modestia oculorum* accuratè servanda, quam Isaias sic commendat: *Qui claudit oculos suos, nè videat malum: iste in excelsis habitabit.* Narrat Marulus de quadam Abbatissa, quòd 60. annis, ad ripam fluminis manens, nunquam prospexit ad flumen circumfluens, aut ad prata vicina.
3. *Recordare JESU oculorum,* lacrymis, Sangvine & livore suffusarum, & amore ejus conclude fædus cum oculis tuis, nè videant vanitatem, olim ad cælestia spectanda reservandi.

Qui defectus contingunt in usu aurium?

1. *Audire verba* vel cantationes minùs decentes. Nam juxta Ecl: 37. *Verbum nequam immutabit cor.*
2. *Audire murmurationes, oblocutiones.* Unde monet Spiritus Sanctus Prov: 24. *Cum detractoribus non commiscearis, quoniam repente consurget perditio eorum.*
3. *Audire verba blanda, adulatoria, propriam laudem continentia.* audi David: Psal: 64. *molliti sunt sermones ejus, & ipsi sunt jacula.*
4. *Audire sermones inducentes & suadentes malum.* Hinc maledictio

ledictio Dei, in Adam. Gen: 3. *Quia audisti vocem uxoris tuæ, maledicta terra in opere tuo.*

5. Audire verba ludicra, servilia, de quibus Sanctus Bernardus: *Nugæ in ore secularis, sunt nugæ, in ore Religiosi sunt blasphemie.* & S: Paulus monet: *stultiloquium aut scurrilitas nec nominetur in vobis; sicut decet Sanctos.*

6. Audire rumores inutiles. Unde S: Pater noster in Regulis prohibet, nè domi referantur sine utilitate, quæ foris audiuntur.

Remedia evitandorum defectuum.

1. Vitanda conversatio cum illis, qui tales defectus obtrudunt auribus.

2. Si contigerit aliquid eorum, quæ lædunt conscientiam, ostende displicentiam.

3. Diverte ejusmodi sermones ad alia utiliora, vel si expedit, mone, nè talibus aures honestæ offendantur, aut, si aliter non poteris, demissis oculis, in interiore mente detestare ea, quæ profertur.

4. Ad hæc te excitet amor Christi, cujus aures spinis cruentatæ sunt propter nostras ineptias in audiendo.

Qui defectus contingunt in usu lingvæ, ad loquelam.

1. Oblocutiones, detractioes, quæ potissimum oriuntur ex superbia vel invidia, constituuntq; gravius peccatum, quàm sit surtum, Hinc S: Paulus Rom: 1: *Detractores Deo odibiles.*

2. Verba contumeliosa de quibus Sapiens. Prov: 10. *Qui profert contumeliam, insipiens est.*

3. Verba seminantia discordiam, de quibus, Ecl: 28. *Susurro & bilingvis maledictus.*

4. Verba irrisoria, quæ prohibentur Ecl: 7. nè irrideas hominem in amaritudine animæ.

5. Verba contentiosa, de quibus S: Paulus Tim: 2. *Noli contendere verbis, ad nihilum enim utile est.*

6. Verba

6. Verba prodentia arcana, quæ sunt contra prohibitionem Spiritus Sancti Prov: 52. *secretum extraneo ne reveles.*

7. Verba querulosa. Et tamen docetur Psal: 38: *Humiliatus sum & filii.*

8. Verba jactabunda, monet verò Spiritus Sanctus Prov: 27. *laudet te alienus & non os tuum, extraneus, & non labia tua.*

9. Verba mendacia, fraudulenta, ironica, de quibus Salomon Prov: 12. *Abominatio Domino, verba mendacia.*

10. Multa alia verba, ut minus decentia, allegorica &c, lingua enim juxta S: *Jacobum est universitas iniquitatis.*

Remedia defectuum lingvæ

1. Accuratum & constans silentium.

2. Vitandæ conversationes inutiles ac noxiæ.

3. Circumspectio in loquendo, ac verecundia.

Añales Ren: Coll: Spiren: 1611, referunt de P. Mathæo Boys, quoddam adhuc novitius, in peregrinatione, cujusdam mentis accumbens, ubi aliqua inhonesta loquentes, audisset, totus tremere, & tandem in lacrymas solvi, sanguinéq; de naribus perfundi cepit. Causam rogatus exposuit: Egoné dolore non afficiar? cum videam supremum Numen, ita hac lingvæ improbitate violari?

Qui defectus per gustum?

1. Edere & bibere supra necessitatem, præsertim cum jactura valetudinis.

2. Uti cibo ad Saturitatem, & potu, Luc: 6: *Vae vobis, qui saturari estis, quia esurietis.*

3. Uti cibus & liquore delicato, cum aromatibus Sanguinem accendentibus, & igniculos voluptatis carni subsistentibus.

4. Uti cibus & potu, ob solam gustus oblectationem, & non propter conservandas vires ad laudem Dei.

5. Uti cibo & potu, non suo tempore, non loco debito.

6. Effundi toto appetitu in cibos.

Remed-

Remedia defectuum.

1. Recordare invitatum te ad Cælestes nuptias, ubi satiaberis cū apparuerit gloria ejus.
2. Time, nè cum divite Epulone damneris, qui in inferno sepultus, quòd splendide quotidie vesceretur.
3. Memor esto paupertatis Christi, esurientis in deserto, & sitiētis in Cruce.
4. Considera, cibis oppleri brutorum esse, & eorum nimietas obtundit sensus.
5. Expende Sanctorum jejunantium exempla, quorum concivis cupis esse in Cælo.

Qui defectus per odoratum.

1. Cmittere bona opera, propter gravedinem odoris v. g. non præstare infirmo obsequium.
2. Circumferre odoraenta, vel illis sese inungere, quæ virum cordatum, & multò magis Religiosum dedecent.


Remedia.

1. Memor esto vultus Christi fædīs sputis obliti.
2. Cura ut virtute, sis bonus odor Christi.

Contra tactum.

Ex Sanctis Patribus & S. Bonaventura, Pachomio, Cassiano tenenda.

1. Absq; necessitate nemo tangat seipsum, vel alium.
2. Nec vultus, nec manus, nec caput alienum tangendum.
3. Cavendum, nè mulceantur canes, aves, & alia animalia.
4. Non utendum mollioribûs indumentis, strato &c.
5. Duriora & afflictiva sectanda sunt.
6. Vide manus & brachia Christi in Cruce extensa, & ejus clavīs confige manus tuas.



MEDITATIO 4ta.

De peccatis venialibus.

Prel: 1: Colloca te tanquam leprosum coram Deo, purissimo
omnis Sanctitatis fonte.

Prel: 2: Pete gratiam agnoscendi & detestandi fæditatem pec-
cati venialis.

PUNCTUM 1um.

Gravitas & feditas peccati venialis.

CONsidera peccati venialis gravitatem & fæditatem. imò: tan-
tam esse, ut, nè quidem pro toto mundo salvando, licitè
committi possit, quia opponitur voluntati Divinæ, fitq; per illud,
irreverentia, inobedientia, ac contemptus voluntatis Divinæ. Quæ
enim reverentia & amor Patris, à tali filio, qui ea tantum fa-
cere vult, quæ illi à Patre injunguntur, sub gravibus pænis, &
sub interminatione refectionis à sua facie. Nunquid, non ille
solus amat Patrem verè, ac reveretur, qui minimos etiam nutus
observat Patris, & quæcunq; scit placitura ei, promptissima sub-
jectione exequitur. Ideo viri timentes Deum, potius omnium re-
rum discrimen adire maluerunt, quàm ut unicum deliberatum ve-
niale admitterent. Unde S: Bernardus Serm: 1: de Conv: S:
Pauli alloquitur Religiosum: *Non est magnum, dicis, si in his, ma-
neam venialibus, minimisq; peccatis. Hæc est, inquit, dilectissimi
impenitentia, hæc est blasphemia in Spiritum Sanctum, irremissibilis.*
2dò ex eo gravitas, & feditas peccati venialis ostenditur, quòd
Deus in nullo Sanctorum suorum, nec in ipsa Humanitate Chri-
sti, pati illam potest; statimq; dissolveretur unio Personæ ab Hu-
manitate, & Sancti de Cælo excluderentur, si vel unicum leve
peccatum, in illis reperiretur. Hinc etiam iusti diutius in purga-
torio eluunt culpas, antequam in Cælum admittantur. 3tiò tan-
dem,

dē, ex eo gravitas venialis peccati deducitur, quod ad verſetur rectæ rationi, & animā deturpat in oculis Dei, tanquā pulviſculi Imaginem. His conſideratis adhuc ne contemnes levīa peccata? Deplora tuam & aliorum cæcitatem, quod hucusq; non agnoveris, aut agnoſcere neglexeris, ſeditatem vel minimi peccati. Ora, ut te Deus repleat, quā maximo ejus odio. Detestare illud. Propone majori diligentia uti, ad evitanda, maximè deliberata venialia.

P U N C T U M 2dum.

Gravitas peccati venialis, ex damnis, quæ inferit.

C Onſidera per peccatum veniale hæc damna fieri. 1mò: vires animæ debilitat, eamq; ſponſam Chriſti ſædat. Quis autem non optet, ut tanto ſponſo, quā maximè placeat. 2dò: deſolationes ſummas adfert, & incapaces facit ſpiritalis conſolationis, item non ita aptos ad lumina percipienda. 3tò: diſponit ad mortale, ſicut morbus diſponit ad mortem. *Qui enim ſpernit modica, paulatim decider. Eccl: 19.* Et ſæpe, quæ nobis videntur parva, apud Deum magna ſunt. Cogita, quid faceres, ut liberareris à lepra, aut alio morbo, ſi iſis laborares? multò majus malum eſt unica culpa venialis. Cur ergo tam facilè eam admittis? Reſolve te firmiſſimè, quod nunquam velis committere peccatum plene de- liberatum.

P U N C T U M 3tium.

Gravitas peccati venialis ex pœnis à Deo inflictis.

C Onſidera ex ſacra ſcriptura, tot exempla punitorum graviſſimè pro venialibus. 1mò: Uxor Loth pro curioſo aspectu converſo ad Sodomam, in ſtatuam ſalis converſa eſt, & inſperato caſu de vivis ſublata eſt. 2dò: quia David ex quadam vanitate juſſit exercitum numerari, puniſtus eſt morte magnæ multitudinis ex eodem exercitu; ſeptuaginta enim millia ſublata ſunt morte ſubita. 3tò: Unus de Prophetis, quia contra voluntatem Dei guſtavit

parum panis, apud alium Prophetam, à leone discerptus est. 4to: Pueri item quadraginta, illudentes Eliseo, & calvum eum compellantes, ab ursis suffocati sunt. 5to: Pariter illi inter Israëlitas, Datan, & Abiron, à terra sunt absorpti quia murmurabant contra Moysen Superiorem suum. 6to: Ananias & Zaphira extincti subita morte ob mendacium coram S: Petro commissum. Plura alia exempla habentur in sacra scriptura. Exhorresce quodvis peccatum, quod tam gravem pœnam meretur. Pete ardentè à Deo, ut te faciat immunem ab omni peccato.

COLLOQUIUM.

ERgoné Domine Deus meus, admittam aliquid contra voluntatem tuam, ob id, quia parvum videtur, & levis tua offensa? imò ex hoc ipso vincam me, & inveniar fidelis super pauca, sperans gratiam & auxilium tuum, ad vincenda graviora. Quid quid ô bone JESU videt maculæ oculus tuus, in anima mea, eluat illud sanguis tuus, defluens de vulneribus tuis. Amplius lava me ab iniquitate mea & à peccato meo munda me.

Pater: Ave: Anima Christi.

ACTUS per DIEM FREQUENTANDI.

Qui spernit modica, paulatim decidet Eccl: 19.

Nescitis, quia modicum fermentum, totam massam corrumpit. 1.

Cor: 5.

Domine tu omnia nôsti, tu scis, quia amo te. Jo: 21.

Qui ut filius & non ut servus obedit Deo, etiam in minimis timet offendere. S: Basil:

Fugiamus modica mala, magna siquidem ab illis nascuntur. S:

Chrysost: in c: 7. ad Rom:

Beatus vir, qui inventus est sine macula Eccl: 31.

S.

§. S E C U N D U S.

De Cæcitate Spirituali.

OMnium planè malorum & errorum, in quovis statu & Ordine hominum, origo, est cæcitas Spirituality, seu defectus debilitæ reflexionis, & luminis, juxta Prophetam. *Desolatione desolata est omnis terra, quia nullus est, qui recogitet corde.* Jerem; c. 12. proinde maximè ei obviandum videretur.

Juvabit ad id exequendum unica, quæ sequitur

M E D I T A T I O ima.

De Cæcitate Spirituali.

Prel: 1. Audi DEUM minitantem Pharaoni: Ego excæcabo & obdurabo cor Pharaonis.

Prel: 2. Pete à DEO, ut cognoscas gravitatem pænæ obcæcationis, utque nunquam eâ puniaris.

P U N C T U M imum.

Quid pæna Obcæcationis?

Considera obcæcationem consistere, in subtractione gratiæ illuminantis, quam DEUS suô justô judiciô subtrahit ob peccata & defectus nostros, ut talis neq; ex Concionibus, neq; ex Colloquiis Spirituality, neq; ex admonitionibus Superiorum, neq; ex usu Sacramentorum, neq; ex lectione libri Spirituality ac similibus, quidquam proficiat, illaq; invitè, cum fastidio ac nausea agat. Unde obcæcatio est, ultima peccatoris, in hac vita pro peccatis pæna, post quam non nisi restat infernus. Examina tu tuas lectiones, exhortationes, Colloquia &c, & vide, utrùm saltem non habeas dispositionem ad ejusmodi cæcitatem. Deprecare DEUM, né te & alios ejusmodi pænâ puniat; subice te potius omnibus aliis pænis, modò te DEUS ab hac eximat.

PUNCTUM 2dum.

Per quæ Cæcitas inducitur?

CONsidera imò: induci cæcitatem mentis, per neglectum & dissimulationem gratiarum DEI excitantium, & prævenientium, ordinatarum à DEO ad vitandas imperfectiones. Tales enim gratiæ, sunt lumen ad illuminationem animæ, quo extincto, nihil, nisi cæcitas manet animæ. Si itaq; Religiosè, non vis cæcutire, stude, nè extinguas in te hæc lumina, sed in claritate accensorum DEI luminum, semper ambules.

2dò: Inducit hanc cæcitatem, perversitas iudicii, vi cuius aliquis salutaria, censet esse noxia, & noxia prosequitur ut bona; sicut accidit quandoq; in oculo malè disposito, qui pro nigro representat album, pro albo rubrum. Hujusmodi sunt, qui Colloquia sancta, & illos, qui talia proponunt, averfantur, & vanis, curiosis, inhiant. Item, qui Sanctiores fugiunt & dissolutioribus associantur.

3tò: Inducitur plerumq; cæcitas, per respectus, & rationes humanas, sperantes, timentes, differentes, dissimulantes, per amicitias dulciter persuadentes violationem Regularum, & Sanctarum Consuetudinum, per hos enim respectus sæpè despicitur Deus; & rationes humanæ rectam rationem pervertunt, amicitiaq; ejusmodi, interdum sunt inimicæ Deo. Si vis Religiosè in lumine Cæli semper ambulare, contemne tales respectus, & rationes.

4tò: Neglectus meditationum, examinum, lectionis libri Spiritualis, ex quibus omnibus lux affulget animæ.

5tò: Inducitur per peccata gravia, præsertim in Religione commissa, nec statim expiata, potissimum autem per superbiam, & peccata luxuriæ. Vide, utrùm aliqua ex his, in te non reperiantur, time, nè tandem cæcitate puniaris.

PUN-

PUNCTUM 3tium.

Quis modus evitandi Cæcitatem?

Considera: qui vult evitare cæcitatem, debet imò secundùm cõfiliã Christi in Evangelio expressa, vitam suam ordinare, Christus enim dicit: *Qui sequitur me, non ambulat in tenebris.* 2dò: debet curare rectam in omnibus actionibus intentionem, & totum se voluntati divinæ dirigendum tradere. 3tìdò: debet observare Superiorum monita, directionem Religionis; hæc enim prælucebunt ei ad omnia mala vitanda, & recta prosequenda. Resolve te ad hæc. Pete à Christo, ut te illuminet. Propone proponenda.

COLLOQUIUM.

AD Christum passum, rogando eum, per oculos Sangvine & livore offusos, & velatos, ut aperiat oculum mentis nostræ.

Pater: Ave &c. Anima Christi.

ACTUS EJACULATORII.

Per viscera misericordiæ tuæ illuminare his, qui in tenebris, & in umbra mortis sedent, ad dirigendos pedes nostros in viam pacis. *Luc: 1.*

Illumina oculos meos, nè unquam obdormiam in morte, nè quando dicat inimicus, prævalui adversus eum. *Psal: 11.*

DEUS meus, illumina tenebras meas. *Psal: 17.*

Cor meum conturbatum est, dereliquit me virtus mea, & lumen oculorum meorum, & ipsum non est mecum. Nè derelinquas me Domine Deus meus. *Psal: 37.*

§. TERTIUS.

De Periculis excidendi à fine.

Multa quidem faciunt periculum excidendi à fine & via Cælestis sapientiæ, nonnullorum tamen duntaxat, frequentius occurrentium periculorum, notitiam habere expedit, ut sic prævisa
jacula

jacula minus feriant, & faciliùs feliciùsq; evitentur. 1. mum periculum oritur ex tentationibus, quas vincendi ars discenda est. 2. dum: ex amore proprio inordinato, cui extirpando incumbendum. 3. tium ex passionibus immortificatis, quarum mortificationi & moderationi cura adhibenda. 4. tum ex habitibus vitiosis, qui radicitus evellendi. 5. tium. ex tepiditate, quæ sedulò excutienda.

De singulis procedent sequentes meditationes.

P E R I C U L U M *imum.*

Ex Tentationibus occurrentibus.

UT paratum semper ad fortiter resistendum inveniant tentationes viatorem Religiosum, accurrata meditatione se præmuniat.

M E D I T A T I O

De tentationibus.

Præl: 1. Colloca te coram DEO dicente per Ecclesiasticum c. 1. *Fili accedens ad servitutem DEI, præpara animam tuam ad tentationem.*

Præl: 2. Pete gratiam & auxilium DEI ad vincendas omnes tentationes.

P U N C T U M *imum.*

Nemo liber à tentatione.

CONsidera imò: nullum esse statum hominum in mundo; nullum locum tam securum, quo tentator non pertingat, nullam ætatem immunem à tentationibus. Claustra etiam Religiosa ita obferari nequeunt, ut variis tentationibus præcludatur via. Est Religio Cælum, sed et in Cælo deliquit irremediabiliter Angelus. Est Religio Paradisus, sed & in paradisum penetravit tentator, ad cujus persuasionem primi Parentes, innocentiam abliguriverunt. Est Religio Cætu Apostolorum, sed & in hoc Cætu prævaricatus est Judas. Neq; viri Sancti à tentationibus liberi vivunt, imò quò sanctior quis invenitur, eò validiore impetu contra eum insurgit

furgit tentator. Sicut pyratae, non vacuas, sed pretiosioribus mercibus, onustas naves, acrius avidiusq; impetunt, & oppugnant ut diripiant.

Considera 2dò: quòd aliquos DEUS permittat tentari statim ab initio suae conversionis, alios in medio itineris ad perfectionem, nonnullos in decursu vitae. Imos quidem ut statim ab initio stabiliantur, & obfirmentur in virtute, atq; suae imbecillitatis notitiam acquirant; humiliterq; de se discant sentire. Illos vero qui maturuerunt in servitio DEI, permittit tentari, ut fructuosius probentur, eorumq; virtus expoliatur, sicut igne expolitur aurum. Ultimos deniq; ut per tentationes purius emundentur à vitiis, & maiorem ex tentationibus proventum, libi faciant in viam aeternitatis. Vide quantà tibi ubiq; opus sit vigilantia: quantà de tuis viribus diffidentia: quantò DEI auxiliò ne succumbas: quantà Beatissimae & Sanctorum protectione: Curasne ista omnia? Implorasne auxilium DEI: recurrasne ad Christum Crucifixum, Beatissimam, & Sanctos? Cautene in omni loco & occasione procedis? Cogita quomodo hucusq; in tentationibus te gessisti? & quomodo in posterum gerere debeas. Agnosce coram DEO tuam negligentiam. Confitearis tuam imbecillitatem. O Domine confiteor, & lugeo coram te imperfectum meum, fragilis sum, infirmus sum, tu fortitudo & virtus mea es Domine. Ego arundo ventò agitata, ego folium quod ventò rapitur. Adjutor & liberator meus es tu Domine. DEUS in adiutorium meum intende. Domine ad adjuvandum me festina.

P U N C T U M 2dum.

Cur DEUS permittat nos tentari?

CONSIDERA varias rationes ob quas DEUS permittat, variis tentationibus nos probari. Ima est, ut virtutum nobis à DEO infusarum, nempe fidei, spei, charitatis, mansuetudinis &c elu-

ceat exercitium. Nam sicut ensis, & alia arma, nullo usu exercitata, rubiginem contrahunt, ita arma Spiritualia ut S. Bernardus ser: 27. in Can: ait. *Stellæ in nocte lucent in die latent, sic vera virtus, quæ sæpe in prosperis non apparet, eminet in adversis.* 2da: ut discamus artem præliandi. Hinc S: Paulus hebr: 11. de servis DEI loquitur. *Fortes facti sunt in bello.* 3ta est ut tentationibûs impellamur, ad orationem frequentem, ac recursum ad DEI auxilium petendum. 4ta: ut deveniamus in notitima, virium propriarum. Sicut S: Augustinus in Psal: 60. ratiocinatur. *Profectus noster per tentationem fit nec quisquam sibi innotescit, nisi tentatus.* 5ta: ut tædîo hujus vitæ, multis periculis, ac tentationibus expositæ, afficiamur, & ad Patrem Cælestem aspiremus. 6ta: ut firmiûs radificentur, in animis nostris virtutes, & maximè humilitas, ac patientia. 7ma: ut per tentationes expientur peccata præterita. 8va: ut diligentiores & excitatores inveniamur in Divinis ut S: Greg: 1: 19. moral: c: 15. ait: *Malæ quæ nos premunt hîc, ad DEUM ire compellunt,* 9na: ut DEUS nostram indolem experiatur. Sicut enim militia explorat militum robur, vires, animum, tolerantiam, fortitudinem &c. quid quisq; vel pati possit vel aggredi ausit, ita vita humana experimentum sumit de quovis homine, quid agere vel sustinere valeat. 10ma ut homo magis perficiatur per tentationes, & merita augeat. Hisce rationibûs expensîs, vide, qualem inveniunt te tentationes? qualem ex illis fructum animæ percipis? Certasne ut fortis Christi miles? Nonne aliquando iisdem succubuitis? Implora DEI auxilium ut eos fructus, ex tentationibus percipias, ad quos DEUS illas permittit.

PUNCTUM 3tium.

Quibûs modis & artibûs utitur adversarius ad nos tentandos.
Côta quibûs fraudibus utitur dæmon, ad tentandos homines
 Reli-

Religiosos, ac debellandos. 1^{mo}: incipit ordinariè à minimis, ut sensim ad majora, tandemq; ad maxima deducat. Sic Judæ imprimis persuasit, amorem pecuniæ, deinde furta, tandem traditionem Christi ejusq; venditionem. Item Davidi persuasit curiositatem, in videndo, deinde cogitationem morosam, deniq; gravem lapsum. Similem artem adhibet, ad seducendum Religiosum, nam si quem vult extrahere ex Religione, non statim illi proponit desertionem illius, sed priùs adducit eum, ad neglectum meditationum & examinum, ad impatientias ex accidentibus circumstantiis, Officiorum, dispositionum non secundum suum placitum, ad longiores apprehensiones, ad tædia, tandemq; ad deferendam vocationem. Similibus fraudibus utitur ad persuadenda alia peccata. 2^{do}: quandoq; sub prætextu boni insinuat malum, transfigurans se in Angelum lucis, sic sub prætextu observantiæ Religiosæ, suadet odia, ac alia charitatis fraternæ læsiva. 3^{tiò}: interdum diutius cessat à tentationibus, ut Religiosum ex improviso adoriatur, & minùs vigilem inveniat, faciliusq; frangat. Vide quomodo pervigilem te esse doceat, in obsequio **DEI**, quomodo in omnibus cautum, ac timoratum, quomodo etiam minimi defectus non sint contemnendi, ne ad graviora devolaris, nam qui spernit modica, paulatim decideret. Despera de tuis viribus. Pone spem in **DEO** tuo.

P U N C T U M 4^{um}.

Quis modus resistendi tentationibus?

Considera 1^{um} modum resistendi tentationibus propositum à Christo discipulis, esse Orationem, & vigilantiam. *Vigilate & orate, ne intretis in tentationem.* Ubi itaq; ingruit tentatio, statim recurrendum ad Orationem, ad Christum Crucifixum, Beatissimam, S: Angelum Custodem. 2^{us}: memoria præsentis **DEI**. *Vivit Dominus in cujus conspectu sto.* 3^{tius}: modus, vitando

otium, 4tus modus memoria novissimorum, mortis, iudicii, inferni &c. juxta effatum Divini Spiritus. Memorare novissima & in aeternum, non peccabis. 5tus modus, exercitium amoris Dei & timoris. Si autem ingruat tentatio molesta non est cadendum animo, sed fiducia in Deo ponenda, qui non patitur nos tentari; supra id, quod possumus, simul tamen diffidendum sibi, ac suis viribus, & tota spes in Dei auxilio reponenda. Deinde antevertendae tentationes, adhibitis earum contrariis, principiisq; earum obstandum. Tandem contra tentationes illecebrosas sciendum, quod illae fugâ & contemptu, & aliquid ferè agendo vincantur. Vide utrum hisce mediis usus sis, in tentationibus. Propone in posterum fortiter, cum gratia Dei resistere, & eos modos adhibere.

COLLOQUIUM.

Cum Christo Domino, qui propter nos per omnia tentatus est, ut te ex omni tentatione eripiat, & adjuvet ne unquam adversarius contra te praevaleat. Ne per mittas me separari à te. Ab hoste maligno defende me.

Cum Beatissima affectu S: Xaverii. O Domina opitulare, non ne opitulaberis? sub pallio maternae protectionis tuae conserva me, in vita & in morte.

Pater: Ave: Anima Christi.

ACTUS EJACULATORII.

Domine, Domine, virtus salutis meae, obumbra super caput meum in die belli. *Psal: 139.*

Adjuva me & salvus ero. *Psal: 118.*

Dominus, custodiat me, ab omni malo, custodiat animam meam Dominus *Psal: 120.*

PERICULUM 2dum.

Ex Amore proprio inordinato.

Quantum periculum timendum sit, ab amore proprio inordinato. Constat imò ex sensu Christi requirentis ad sui seque-

lam; omnimodam sui abnegationem, dicit enim Matth: 16. *Si quis vult venire post me, abneget semetipsum.* Constat 2dò ex sententia SS: Patrum S: Basilii apud Lyr 1: 2. Apoph: 1. ait. *Stipendium amoris proprii mors est initium. omnis mali.* Et S: Aug: c: 26. Man: *Si totum hominis bonum amare Deum, totum hominis malum est amare seipsum.* Item Tho: à kem: de imit: 1: 3: c: 27. *scito quod tui ipsius amor magis nocet tibi, quàm aliqua res mundi.* Seria itaq; cura adhibenda est ut extirpetur, in quem finem sit.

MEDITATIO

De Amore proprio.

Præl: 1: Constitue te ad pedes Christi, in forma discipuli audientis Magistrum dicentem. Si quis vult venire post me, abneget semetipsum, & tollat Crucem suam.

Præl 2: Pete à Deo gratiam exuendi amoris proprii.

PUNCTUM I. um.

Quid amor proprius? qui illius Actus?

Considera imò: quod amor proprius consistat in inclinatione voluntatis, ad proprium bonum appetendum, seu est appetitio, & æstimatio sui, ex qua homo inclinatur ad sollicitè inquirendas commoditates suas in victu, vestitu, habitatione, officiis, functionibus, honore, plausibus, sociis &c. ad fugiendas verò incommoditates, in his omnibus, ad evitandos contemptus, humiliationem sui &c. Si itaq; Religiose desideras exui amore proprio, noli te ipsum appetiari, noli æstimare, quid enim in te pretiò & æstimatione dignum invenies? Vide tuum nihilum, agnosce vilitatem, expende labilitatem? pondera infirmitatem? est, unde te contempnas, est, unde odio habeas, non est autem, unde appeties?

Considera 2dò: Actus amoris proprii, cuius communitati in tolerabiles, & execrabiles esse. imò: nolle cuiquam subesse aut illi tantum cui suadet suum commodum, 2dò: in omni labore,

officio, actione, suum intendere ac quærere commodum. 3tò: velle ab omnibus honorari, & æstimari, videri, laudari, nullumq; contemptum & confusionem sustinere. 4tum: optare otium, & in sua functione supplentes. 5tò: appetere pulchra, curiosa, & honorifica, fugere viliora. 6tò: terrenis inhiare, vanitatibusq; & sensualibus oblectari. 7mò solatia à creaturis emendicare. 8vò: quæ molesta sunt & tribulationem generant impatienter ferre & querulari. 9nò: in omnibus seipsum quærere. Vide & serio expende, quam exosi sunt partus amoris proprii. Examina conscientiam tuam, an in tuis actionibus, & in tentationibus non reperiantur? non quæriscné tua commodat? tui æstimationem? Erubescere, propone, seriam adhibere curam, in extirpando ac debellando tuæ salutis hoste.

PUNCTUM 2dum.

Quæ motiva amoris proprii extirpandi?

CONsidera 1mò: amorem proprium esse radicem, & fontem omnium vitiorum, & causam rebellionis passionum hinc, enim procedunt iræ, tristitiæ, tædia, viscosa adhesio ad Creaturas &c. Nonne iustum est, ut Religiosus, omnî studiò extirpet, tam noxiam radicem, amoveat à se tantorum malorum semen?

2dò: Amor proprius impedit cultum Dei, amore enim proprio infasciatus, non attendit ad ea, quæ Deum spectant, sed quærunt quæ sua sunt, etiam cum contemptu Dei, cum violatione præceptorum, ac consiliorum ejus. Si tibi cordi est cultus, ac honor Dei, ejura amorem proprium.

3tio: Quia obcæcat hominem, ut non consideret quidnam expediat, ac liceat cogitare, loqui, agere, sed eum præcipitat in omne nefas. Unde S: Paulus 1. Corint: 2. ait.: *Animalis homo non percipit ea, quæ sunt Spiritûs.* Et S: Thomas amorem proprium, fontem omnis mali vocabat, ex quo quamdiu fluxerit, nihil aliud, quàm exitium, ac pestis timenda sunt,

4ta: Quia hominem nunquam finit esse quietum, semper vult esse turbatum, consequenter, reddit eum ineptum, ad omnia bona. Rectè S: Catharina Senensis dixit *Tantum quisq; vivit Deo, quantum moritur sibi.* Vide utrum hæc omnia moveant te ad exuendum amorem proprium.

P U N C T U M 3tium.

Quæ mediâ exuendî Amoris proprii?

Considera 1^{um} medium exuendi amoris proprii esse contemptum sui ipsius, ac odium, quidni te odio habeas, cum nullus capitalior hostis tuus esse possit, quam tu ipse tibi. Neq; enim dæmon ipse tibi nocere posset, nisi tu ipse volueris. Cesset propria voluntas, & infernus non erit; docet S: Bernardus.

2^{dum} medium est, Perfecta sui ipsius resignatio in voluntatem ac dispositionem Divinam, & superiorum, sive quò ad officia sive quò ad locum, sive quò ad Socios, sive quò ad victum, vestitum, habitationem, cum bona reflexione in oratione Dominica, illa verba pronuntiando. *Fiat voluntas tua, sicut in Cælo & in terra.*

3^{tium} medium est, Oratio fervens & mortificatio assidua quam nobis Sanctus Pater noster, in omnibus quarendam præscribit, sicut enim ferrum ignis calore, & malleorum ictibus excussa rubigine renovatur, ita ferventis orationis, & mortificationis ictibus assiduus, amoris proprii rubigo excutitur.

4^{tum} Medium est, Contemplatio frequens Passionis Christi, constansq; amor Christi Crucifixi, & Beatissimæ; uterq; enim hic amor omnem profanum ex corde excludit amorem, & odium sui ipsius persuadet. Utere his mediis, & omni conatu allabora, ut extirpes vitiosum amorem proprium.

C O L L O Q U I U M.

Cum Christo Cruci affixo, vestibus & carne exuto, ac inter dolores agonizante, rogando ut ipse per suam mortem faciat in te emori

emori amorem proprium, & solo Spiritu Christi, te faciat animari & vivere.

Pater: Ave: Anima Christi.

ACTUS SÆPIUS USURPANDI.

Quid mihi est in Cælo, & à te quid volui super terrā, Deus in æternum. Psal: 27. Regi sæculorum immortalī, & invisibili soli Deo, honor & gloria 1. Tim: 1.

Tuus sum ego, salvum me fac ab amore proprio Ps: 118. Deus meus, ut jumentum sum apud te, & ego semper tecum Ps: 12.

Qui amat animam suam, perdet eam, & qui odit animam suam, in hoc mundo, in vitam æternam custodit eam Joan: 12. Stipendium amoris proprii mors est, initium omnis mali S: Basil:

Qui Christi sunt, carnem suam crucifixerunt cum vitis & concupiscentiis suis. Ad Galat: 5.

PERICULUM 3tium,

Ex Passionibus immortificatis.

Dluturna & ferè continua mortificatione opus est, ut rebelles, & immortificatæ passiones, in suo officio contineantur, & rectæ rationis dominio subiciantur ne in præceptis incautum abripiant hominem. Unde Spiritus S: monet. *Post concupiscentias tuas non eas, si præstes animæ tuæ concupiscentias ejus, faciet te in gaudium inimicis tuis.* Eccl: 18. Imprimis autem notitia illarum comparetur, prævideaturq; meditatione, modus eas moderandi.

MEDITATIO

De Passionibus immortificatis.

Præl: 1. Colloca te coram Christo, tanquam Magistro tuo docente te. Si quis vult venire post me abneget semetipsum & tollat crucem suam.

Præl: 2. Pete à Deo gratiam, compescendi ac mortificandi passionis tuas.

PUN-

PUNCTUM I. imum.

Quid, & quot sunt passiones?

COgita passionem juxta D: Joannem Damascenum, esse motum sensibilem, seu sensitivum, potentiae appetitivae, ob imaginationem boni vel mali. Cum enim imaginatio, repræsentat homini, rem aliquam ut bonam, sed absentem v.g. excellentiam nominis, divitias, honores, exsurgit in homine passio, quæ vocatur desiderium, quando repræsentat eidem homini, rem ut bonam præsentem, exsurgit passio gaudii, quando repræsentat non nisi ut bonam sine reflexione, ad ejus præsentiam, vel absentiam, v.g. repræsentat aliquam pulchritudinem; exsurgit passio amoris. E contra; si repræsentetur per imaginationem aliqua res ut mala, exsurgit passio fugæ, si repræsentetur ut mala præsens, exsurgit passio tristitiæ. Tandem ad repræsentationem rei malæ, absq; reflexione, ad ejus præsentiam, vel absentiam, exsurgit passio odii. Ex his collige, quod potentia appetitiva, seu appetitus sensitivus, feratur in res creatas, non prout hæc sunt in se, sed prout eas imaginatio repræsentat, & apprehenduntur esse, proindeq; homo sæpe errat, nisi ejusmodi motus recta ratione gubernet, ac moderetur. Unde S: Basil: in Proverb: monet, *fluctus sunt animi passiones, quibus si virtute occurras, tutus vitæ gubernator existeres, sin minus velut navigium compagibus dissolutum jactatus, in peccatorum pelagus corrues.* Vide utrum tu non sequaris, tui appetitus inclinationes & motus? utrum ad rectæ rationis judicium revoces, omnes naturæ propensiones? utrum te non abripiant in perversum appetitiones tuæ? invoca auxilium DEI. Ego egenus, et pauper sum, DEUS adjuva me. Ingemisce cum S: Paulo. *Infelix homo sum, quis liberabit me, de corpore mortis hujus?* Cogita 2dō appetitum sensitivum duas habere potentias, seu partes, concupiscibilem & irascibilem. In appetitu concupiscibili, sex numeran-

tur passiones, amor, odium, desiderium seu concupiscentia, fuga seu abominatio, gaudium seu delectatio, dolor seu tristitia. In appetitu verò irascibili, sunt quinque passiones, spes, desperatio, audacia, timor, ira. Expende quænam ex his passio, in te prædominetur, quæ te magis conturbet. Adhibe diligentiam, in ea mortificanda. Implora Divinum auxilium ad illius extirpationem.

PUNCTUM 2dum.

Quæ mala & pericula proveniunt, ex passionibus immortificatis.

Cogita 1mò, nullum esse, nullumq; fuisse peccatum in hominibus, quod non ex immortificatis passionibus processerit. Sic peccatum primorum parentum, ex inordinato desiderio sciendi bonum & malum, atq; ex appetitu Divinitatis, quam suadebat seductor dæmon. *Eritis sicut Dii.* Peccatum Judæ, processit ex nimio amore, & desiderio pecuniarum, *fur erat, loculos habebat.* Peccatum David processit ex videndi curiositate. Peccatum desertionis imæ à DEO vocationis, plerumq; fit, aut ex inordinato amore suæ excellentiæ, aut ex amore sensualium, & sic de cæteris. Expende & tu peccata tua & nullum invenies, quod non processerit, ex inordinatis & immortificatis passionibus.

Cogita 2dò: quod passiones immortificatæ, nunquam hominem quietum esse permittant, semper enim in se ipso per rebelles passiones, turbatur & agitur, velut fluctus maris, constituturq; in magno periculo, ne dæmon ejus animam possideat, & sibi subijciat. Hinc sacra scriptura ait. *Sicut pisces hamò & aves laqueo comprehenduntur, sic homo in tempore malo.* Quemadmodum enim pisces faciliùs in turbida aqua capiuntur, & aves tempestuoso ære comprehenduntur, ita & homo quando plus turbatur, faciliùs à dæmone subjugatur.

Cogita 3tò: passiones immoderatæ, præsertim amor illicitorum,

torum, eorumq; desiderium, item timor, tristitia, ira, detrudunt hominem à statu & dignitate Creaturæ rationalis, ac belluis illum assimilant, juxta illud. *Homo cum in honore esset, non intellexit, comparatus est jumentis insipientibus.* Proinde constituunt hominem in eo statu, in quo remedium salutiferum animæ, aut adhiberi nequit, aut difficillimè potest. Conspiciunt hominem in præsens damnationis periculum, perturbatus enim passionibus immortificatis, nec cogitare quidquam boni, nec agere valet. Expensis tantis malis ex immortificatione passionum provenientiis, reflecte te, supra tuas passiones, & vide quæ potissimùm in te vigeat, in quo exorbitet amor, odium, audacia, timor, tristitia, desiderium &c. Erubescere coram DEO, admirare DEI Providentiam, quòd hucusq; non sis consumptus. Deplora statum animæ tuæ. Propone seriàm mortificationem passionum tuarum.

P U N C T U M 3tium.

Quæ media moderandi ac mortificandi passiones?

COGITA primum medium ad mortificandas passiones esse Orationem, quâ imploretur gratia & lumen DEI ad cognoscendam dignitatem DEI, animæq; nostræ, & rerum æternarum æstimabilitatem, rerum verò caducarum, & transeuntium vilitatem, ut eâ cognitione dirigamur in viam Domini. Abstrahamus cor, & affectus nostros à voluptatibus, & ibi sint fixa corda nostra, ubi sunt vera gaudia.

Cogita 2dò: quandocunq; passio aliqua commovetur, statim recurratur ad Christum passum, qui in sua passione dedit exemplum, quomodo temperanda sit tristitia, ira, odium &c. ut *S: Ber: ser: 43. in Can: ait: Passiones Christi me erigunt, in adversis, in prosperis deprimunt, & inter læta & tristitia tutum præbent ubiq; ducatum.* Dum ad iram incitaris, dic, quid hæc sunt quæ mihi occurrunt sustinenda, per respectum ad ea, quæ

Christus pro me passus est &c. amor meus Crucifixus est, dum tristis Spiritus te angit, respice Christum in horto mœsum, & audi dicentem: non mea, sed tua fiat voluntas.

Cogita 3tò: optimum medium est ad mortificandas passiones, si continua adsit vigilantia, ne erumpant, prævideanturq; & evitentur occasiones, in quibus novit quis commoveri suas passiones. Ad hoc sunt examina, horaria & diurnæ reflexiones &c.

Cogita 4tò: Efficaciter etiam occurritur immoderatis passionibus per exercitium actuum contrariorum erumpenti passioni. Sic dum excitatur amor alicujus creaturæ profanus, eliciatur actus amoris DEI dicendo *DEUS meus & omnia. Amo te super omnia vel: Quis ut DEUS, vel illud Psal: Quid mihi est in Cælo, & à te quid volui super terram, præter te Deus cordis mei, & pars mea Deus in æternum.* Dum ingruit mæror, dic. Ego autem gaudebo & exultabo in DEO JESU meo. DEUS exultatio mea. Dum mens desperabundis conturbatur cogitationibus. In te Domine speravi, non confundar in æternum.

Cogita 5tò: adhibendum & illud medium est ad mortificandas passiones, ut quotiescunq; te per aliquam passionem exerrare adverteris, nunquam id in te impunitum relinquant, assignes tibi pœnitentiam juxta qualitatem delicti, vel ut toties percutias pectus, vel visites SSm: Sacram: Beatissimam, vel toties osculum terræ figatur, non tamen in præsentia aliorum, vel tot actus contrariæ virtutis eliciendi. Vide utrum hucusq; aliquo ex his medio usus fueris. Propone in posterum.

COLLOQUIUM.

INstituatur cum Christo Domino, per omnia passio, rogando ut ille vulneribus suis sanet vulnera nostra, detq; gratiam utendi passionibus ad animarum nostrarum salutem. O JESU toto corpore lacerate, & in omnibus membris, vulneribus ac doloribus replete.

plete. En ego in quo à planta pedis usq; ad verticem capitis non est sanitas, supplico bonitati tuæ. Sana me Domine, & sanabor, erue animam meam, ab inimicis meis, ne perdant me rebelles passionem meam.

Pater: Ave &c. Anima Christi.

ACTUS SÆPIUS USURPANDI.

Circumdederunt me mala, quorum non est numerus, comprehenderunt me iniquitates meæ, & cor meum dereliquit me, complacet tibi, ut eripias me. Domine ad adiuvandum me respice *Psal: 39.* Domine miserere mei, sana animam meam quia peccavi tibi. *Psal: 40.* Exsurgat Deus & dissipentur inimici ejus, & fugiant, qui oderunt eum à facie ejus. *Psal: 67.*

H O R A Q U I E T I S D A N D A C O N S I D E R A T I O N I

Supra Passiones.

Constitutus sub pedibus Crucifixi, pete ut hanc considerationem, fructuosè peragas, in cognitione & debita passionum consideratione.

I. Cogita primam appetitûs concupiscibilis passionem esse amorem sensibilem. Vide itaq; utrûm ad aliquam creaturam non propendeas amore inordinato? an non adhæreas viscerè alicui amico? an nimium non afficeris famæ? aut honori proprio? aut pecuniis? aut alteri rei creatæ? Vide item quando? & ubi hæc passio maxime exeritur? quæ damna Spiritûs adfert? imò enim amor inordinatus impedit cultum Dei. 2dò: impedit profectum in virtute. 3tîdò: impedit quietem, ac pacem internam, & externam, quia juxta S: Ignatium Constit: p: 8: est gravissimus & capitalis, omnis ordinis & unionis, hostis. Comprimisne illum contemptu earundem rerum, vel abstractione affectûs ab iisdem rebus, & elevatione ipsius in Deum, dicendo cum Psalte: *Quid mihi est in Cælo, & à te quid volui super terram, præter te Deus cordis*

dis mei, & pars mea, Deus in eternum? Habemus Exemplum S: Patris Ignatii, qui omnem amorem inordinatum prorsus à se amandavit ut Bartolus l. 4. Vit: §. 27. testatur. Et S: Xaverius l. 1. Apoph: II. S: Borgia omnia contraria amori proprio, & desiderabat & adhibebat, live in victu, live in habitatione, live in Officiis.

II. 2da Passio est desiderium rei futuræ sensibilis. Non experirisne, in te aliqua desideria Dei voluntati & rationi disformia? Quando? & ubi hæc passio notabilius exardescit? quem modum adhibes in ea comprimenda? Converte hæc vana desideria, in desiderium videndi Deum, in desiderium perfectionis propriæ, in desiderium gloriæ Divinæ.

III. 3tia Passio gaudium ex aliqua re præsentis. Vide an te oblectet laus hominum, & plausus? an successus rerum temporalium hanc passionem in te non excitet? Reflecte te, quando potissimum hæc passio dominari gestit? quibus mediis eam moderaris? Dic potius cum Beatissima: *Exultavit Spiritus meus in Deo salutari meo.* Aut cum Propheta Habacuc; *Ego autem gaudebo in Deo JESU meo.*

Cum Franciscus Costerus Novitius, proclivis ad risum deferretur ad S: Ignatium, quod sæpe rideret, vocato ad se Francisco dixit: *Francisce, audio te sæpe ridere.* Costerus demissis oculis, expectavit objurgationem. Sanctus verò Pater sic eum allocutus. *Ego dico tibi fili mi, ut rideas & gaudeas in Domino, quia Religiosus nullas habet causas mæstitiæ, multas verò letitiæ.*

P: Antonius Madridius, ad primam lacerae vestis assumptionem, tanto gaudio imbutus est, ut affirmaret in tota vita nihil sibi jucundius accidisse hist: Soc: p: 2. l: 7.

IV. 4ta Passio, est odium immoderatum rei alicujus v. g. odium personæ, officii, loci, mansionis &c. Vide utrum non possedat

dit cor tuum? utrūm exterius etiam non ostendis odium alterius? Expende utrūm iustum sit. odisse Imaginem Dei, pretium Sangvinis Christi? Cum maiori emolumento facies, si teipsum oderis?

Burgensis quidam cūm odiū contra nonnullos fovisset, ad mortem, cum pro illo preces persolverentur in Templo, Christus Crucifixus, manus suas retrahens, & auribus inferens, dixit. *Non pepercit non parcam.* Spec: Exem: Ibidem narratur de quadam muliere, odium diutius fovente, cui cum in extremo morbo adferretur viaticum, ac porrigeretur, ad parietem se avertit, dicens. *Sicut me averti ab hominibus, sic Deus se avertet à me, nec unquam misericorditer aspiciet: atq; miserabiliter exspiravit.*

V. 5ta Passio est fuga dum quis fugit laborem, confusionem, diffi cultates, contemptum apud homines. Vide an fugienda illa sunt servo Christi, quæ Christus in se suscepit?

VI. 6ta Passio est tristitia, de re aliqua afflictiva in præfenti. Vide an moderaris hanc passionem? Cogita nihil adimi per tristitiam afflictionis, sed magis augeri, & sanctitatem lædi. *Spiritus enim tristis exsiccat ossa.* Cogita potius hanc avertisitatem venisse de manu Patris amantissimi, cui major cura de te, quàm tu illam de teipso habere potes. Cogita dignum te maiori afflictione, ob commissâ delicta. Cogita hac afflictione maiora tibi bona parari à Deo. Tædeat te hujus vitæ, quæ nequit esse sine afflictione. Belarminus Cardinalis, de seipso fatebatur. Cūm essem Religiosus, nesciebam, quid in vita esset tristitia, factus Cardinalis nescio quid sit lætitia. P: Ralhazar Alvarez, dicebat in domo Dei, neminem tristem esse debere: Vit: c: 23. S: Franciscus Seraphicus si quem de suis tristem conspexit, vehementer objurgabat, dicens. Oportet eos, qui mundo, carni, dæmoni, non verò Deo, serviunt, esse tristes, non autem Fratrem Minorem. Lyra: in Apoph:

VII. In appetitu irascibili ima passio est ira, Vide ne des
ira

iræ locum in corde, in ore, fronte, in oculis, alijsq; externis indicis. Expende qua de causa, & in quibus occasionibus, exardescere incipit in te ira? quomodo illam comprimis? recordarisné JESU mansuetissimæ invocasné ejus auxilium? Recogitasné Apostoli Eph: 4. monitum? *Sol non occidat super iracundiam vestram.* U-
surpa S: Ambrosii Orationem ad Deum, Objice Domine contra tam amarissimum iracundiæ malum, suavissimum sapientiæ tuæ bonum, in quo specialiter animarum nostrarum salus collocatur, cum per Evangelium dicitur. In patientia vestra possidebitis animas vestras prec: ante Mis: stude ejus mortificationi. Tum quia mortificatio iræ, signum est perfecti viri, immortificatio verò, indispositum ad omnia bona facit, viliissimumq; reddit hominem. Tum quia ira dissimilem Deo & Christo efficit. Tum quia gravissima infert animæ damna & corpori nimis nocet, omnibusq; exosum reddit. Tum quia mortificatio iræ ædificat alios. Sic Joannes Ferdinandus, Amaguntii verba faciens ad populum, quia salivam, in os suum, à quodam Japone conjectam patientissimè suscepit, fuit causa ejus conversionis: hist: Soc: I: II. 19.

Franciscus Soarez in disputationibus verborum aculeis lace-situs, nullum unquam commoti animi signum dedit bibl: Scrip:

VIII. 2da Passio ejusdem appetitûs est audacia, non prodís-ne eam repugnando Superioribus audacter? aut inconsultè & præcipientanter, majora tuis viribus aggrediendo? Nosce teipsum, tuamq; infirmitatem.

IX. 3tia Passio est timor: Vide in quibus occasionibus timor te angit? non omittisne bona opera ob vanum timorem? memor esto JESU in horto paventis. Time Deum & alia minùs timebis, spera in Deo, & dic cum Psalte: Dominus salus mea. quem timebo. Non timebo mala, quoniam tu mecum es

X. Quarta tandem & quinta passio spes & desperatio. Vide
utrum

utrum & hæ passionibus te non infestent? prævide earum occasiones, pete victoriam à Deo.

PERICULUM 4tum.

Ex Habitibus Vitijs.

Vitiosus habitus, habet se per modum catenæ, quâ illigatas animas dæmon trahit in perniciem, ut constabit ex infra dicendis; optimum itaq; consilium Magister ille Spiritus, Thomas à kempis, omnibus usurpandum de Imit: l. 1. c. 11. præscripsit, dicens: *Resiste in principio inclinationi tuæ, & malam dedisce consuetudinem, nè forte paulatim ad maiorem te ducat difficultatem. & addit rationem infra c. 13. Quando enim diutius ad resistendum quis torpuerit, tantò in se debilior quotidie fit, & hostis contra eum potentior, Hinc Maxim; in Ser: de S: Joanne Bapt: canit: Qui non assuescit virtuti, dum juvenescit, à vitijs nescit discedere, quando senescit. Si quos igitur vitiosos habitus, in se adverterit Viator Religiosus, non segnitè cum iis certamen ineat, ut vincat.*

MEDITATIO.

De Habitibus Vitijs.

Prel: 1: Imaginare te stare, ante S: Paulum docentem: Renovamini Spiritu mentis vestræ, & induite novum hominem, qui secundum Deum creatus est in iustitia & Sanctitate veritatis.

Prel: 2: Pete gratiam renovandi te per expoliationem omnium habituum vitiosorum.

PUNCTUM 1um.

Quid habitus vitiosus?

Considera habitum vitiosum esse quandam facilitatem ex actibus frequentatis vitii alicujus productum, ad similes actus exercendos. Unde quò quis plures actus alicujus vitii ponit, eò facilius in eadem vitia labitur, atq; per consuetudinem, causas sibi necessitatem peccandi, ut S: Aug: l. 8. Con: c. 5. confitetur: *ligatus eram*

eram non ferrò, sed mea ferrea voluntate. Velle meum tenebar inimicus, & inde mihi catenam fecerat, & constrinxerat me, quippe ex voluntate perversa, facta est libido, & dum servitur libidini, facta est consuetudo, & dum consuetudini non resistitur, facta est necessitas. Et S: Gregorius hom: 31. super Evangelium ait. Usitata culpa obligat mentem, ut nequaquam surgere possit, ad rectitudinem conatur, & labitur, quia ubi diu sponte perstitit, & ibi cum noluerit, coacta cedit. O! duram necessitatem! Verò S: Chrysostomus dixit: Antiqua consuetudo, antiquus tyrannus. Vide, utrum & tu, alicujus vitii non contraxeris consuetudinem? Obsta principiis, nam serò medicina paratur, teste S: Augustino, qui, in Psal: 30. ait, vincere consuetudinem, dura est pugna. Clama ad Deum cum Propheta. Eripe me de luto, ut non infigar, libera me ab aliis, qui oderunt me, & de profundis aquarum. Psal: 68.

PUNCTUM 2dum.

Quanta damna ex habitibus vitiosis?

Considera periculosissimum esse, alicui vitio assuescere, illiusque habitum contrahere. Imò: ex eo, quia talis, qui assuevit alicui vitio, possidetur à dæmone, eumque impellit ad illicita, quando & ubi voluerit, non secus, atque auceps aviculam filio tenens.

2dò: Ex eo, quia per habitum, seu consuetudinem vitiosam obcæcatur homo in intellectu, ut non præcognoscat, quid agat & agere debeat; obduratur in voluntate, deduciturque ad infelicem statum impotentiae, à peccato abstinendi. Ut, Ethnicus licet, Plinius agnovit, dicens: Desinit remedio esse locus: ubi fuerunt vitia, mores fiunt. lib: 25. c: 2.

3tiò: Quia per consuetudinem vitiosam incurrit homo præsentissimum damnationis periculum; facile enim in puncto mortis instigante dæmone, inclinabitur voluntas ad vitium sibi propositum, cui assueverat per vitam.

4to: Quia ut S. Augustinus in Ench: c: 8: docet peccata quàmvis magna, & horrenda, cum in consuetudinem venerint, aut parva esse, aut nulla creduntur.

5to: Quia ait S. Basilus: sicut morbi corporis, inveterati, non nisi longa & acri curatione sanantur, sic peccata inveterata, diuturnâ patientiâ, assidua oratione & acerrima animi contentione curari oportet.

Exhorresce tanta pericula, in quibus constituit hominem vitiosus habitus. Expende utrum aliquem non contraxisti? adhibe curam, ut eum cum Dei gratia, absq; dilatione extirpare contendas. Pete auxilium Dei.

PUNCTUM 3tium.

Quæ media extirpandi vitiosos habitus?

CONsidera: unum remedium extirpandi vitiosum habitum, est, per cessationem ab actibus ejus vitii perpetrandis. Sic, qui contraxit habitum carpendi famam, vel mentiendi, cesset ab his. &c.

2dum Medium est per exercitationem suâ, in virtute contrariâ vitiosæ consuetudini. Sic superbus, multum de se sentiens, exerceat se in humilitate, in vituperio & contemptu suâ. Iracundus, suis potius irascatur defectibus, & alienos patienter ferat. &c.

3tium Medium est, per generosam suâ victoriam juxta illud Tho: à kem: l: 1. c: 25. de Imit: Tantum proficies, quantum tibi vim intuleris.

4tum Medium: frequens, & fervens ad Deum oratio, ejusq; auxilii imploratio; multum quoq; juvabit, si quis, per sedulam meditationem, inspexerit fæditatem vitii, occasiones illius evitandi præviderit &c. Recurratur item sæpius ad Beatissimam juxta consilium S. Bernardi dicentis hom: 2. Super missus est: Si inturgant venti temptationum &c. Si jactaris superbie undis, si ambitionis, & detractionis, si emulationis, respice stellam, voca Mariam, Et inseris

us: in periculis, in angustiis, in rebus dubiis, Mariam cogita, Mariam invoca; non recedat ab ore, non recedat à corde, ut impetres ejus Orationis suffragium, non deferas conversationis exemplum &c.

5^{um} Medium est, sincera & cum accuratissima dispositione Confessio facta; sicut enim cibum noxium, ac pestilentem jam bili permixtum, non aliter, quàm per violentum vomitum ejicere possumus, ita inveteratum peccatum, si ab eo nolumus interfici, nisi per Confessionem sinceram, ejici non potest. Expende omnia hæc media, & ad illa diligenter adhibenda, te excita, tum amore Dei, tum desiderio salutis tuæ. Implora Dei auxilium, Beatissimæ patrocini-um & Sanctorum Patronorum subsidium.

COLLOQUIUM.

1^{us} imò Ad Christum Crucifixum: O! bone JESU tu dixisti: cum exaltatus fuero, traham ad me omnia, rogo te per omnes dolores tuos, trahe me ad te, & abstrahere omnes affectus meos, ab omnibus rebus creatis, tibi soli adhæream, te solum amem, in tuum amore vivam, & moriar, qui amore meum dignatus es in Cruce mori. Fiar, quæso, mors tua, mors vitiorum meorum. Et qui nudus in Cruce pendere voluisti, da gratiam expoliandi me omnibus vitis, da, si tibi placet, moralem impeccabilitatem. *Anima Christi.*

2^{dò}: Fiat ad Patrem æternum: O! Pater misericordiarum, Deus meus, qui plasmasti me, miserere mei. Aufer à me spiritum nequam, & da Spiritum tuum bonum petenti. *Pater noster.*

3^{tiò}: Ad Beatissimam, rogando, ut illa te sub pallio suæ protectionis, defendat ab omni incurso diaboli & vitiorum. *Ave Maria.*

ACTUS EJACULATORII.

Vide humilitatem meam, & laborem meum & dimitte universa delicta mea. *Psal: 24.*

Erravi sicut ovis, quæ perit, quære servum tuum Domine. *Pf: 11.*

Exipe me de luto, ut non infingar, libera me ab iis, qui oderunt me

me & de profundis aquarum. Non me demergat tempestas, neq;
absorbeat me profundum. *Psal: 68.*

P E R I C U L U M 5tum.

Ex Tepiditate.

CUM non dormientibus proveniat Regnum Cælorum, nec otio
& desidia torpentibus, beatitudo æternitatis repromittatur, ut
docet S: Leo Ser: de apparit: Ex altera verò parte, vitium tepiditatis, illis potissimum sit periculosum, qui in stadio virtutis & perfectionis currunt; merito in ejus extirpationem totis viribus, cuivis Religioso Viatori, incumbendum esset.

M E D I T A T I O

De Tepiditate.

Prel: 1. Collocabo me in Conspectu Sanctorum, serventer & hilariter operantium, ac Deo servientium, multosq; labores in Indiis, Anglia, ac Sinis subeuntium.

Prel: 2. Petam gratiam exemplò Patrum nostrorum viam perfectionis serventer decurrendi, & omnem teporem excutiendi.

P U N C T U M 1um.

Quid Tepiditas seu Acedia?

COnsiderandum, quòd tepiditas sit fastidium, nausæq; boni Spiritus, hoc est operum illorum, quæ, ad laudem, & obsequium Dei ordinantur, animæq; salutem & perfectionem promonent, idq; ob laborem, qui in his operibus subeundus esset, ea opera refugit: qui enim cum acedia & tepore laborat, sentit dolorem, ac mærorem, atq; tedium & fastidium sustinet, sive dum incipit agere, sive dum agit aliquid Spirituale v. g. Orationem, meditationem, lectionem, examina, mortificationem, humiliationem, verbi Divini auditionem, colloquium pium &c: atq; acedia hoc est ingenium: odisse omne bonum Spirituale, fastidire, nauseare. Unde Sancti Patres, tepiditatem comparant cum languore

guore corporis insanabili, & longa tabe; miserum enim reddit, quem afficit. & vitam ejus Spiritualem consumit. Comparant eam cum febris interna, hectica depascente interiora hominis, vigorémq; omnem auferente. Cum gangrena, quæ, si semel invaserit hominem, per totum corpus se diffundit & tandem enecat. Cum lethargo conficiente & perdente hominem, quo laborans certo morietur, nec tamen sentit se mori. Ut verò major hujus vitii horror concipiatur, malitiâq; ejus penetretur, considerandum ynd: omnes creaturæ, cum delectatione, & inclinatione, ad suum finem, & terminum, ad quem sunt creatæ, tendunt. Sic lapidis omniâq; corpora gravia, cum inclinatione tendunt ad ima deorsum. Ignis cum inclinatione tendit fursum, & sic de aliis. Et homo, qui ad hunc nonnisi finem conditus est, ut Deum laudet, amet, illi serviat & salvus fiat, cum fastidio & aversione ad ea tendit. Quanta hæc debet esse naturæ humanæ per peccatum corruptio? & quantus requiritur labor, ut illa rectificetur?

Considerandum 2dò: homo compositus est, ex anima rationali, tanquam parte præstantiore, digniore, honoratior, & ex corpore, tanquam ex parte viliore, abjectior; deberet ergo homo, ad illa opera, quæ animam concernunt, promptius, hilarius se conferre. & in illorum tractatione contentari magis, quàm in operibus, ad utilitatem corporis spectantibus. Tepiditas verò hunc ordinem pervertit, ut homo posteriora opera, lætus, & avidè prosequatur, illa verò cum fastidio & tædiis peragat.

Considerandum 3tiò: Opera Spiritûs æterna sunt, & æternam felicitatem secum trahunt. Corporis verò peritura; ut Apostolus monet: Qui seminat in benedictione, de benedictione metet, qui seminat in carne, corruptionem metet. Exhorrescamus itaq; ac detestemur tepiditatem, & ab ea liberari per JESU Christi vulnera petamus.

PUN-

PUNCTUM 2dum.

Quæ damna, & pericula adfert tepiditas?

Considerandum: plurima damna & pericula, provenire Religioso homini à tepiditate. 1mò: Continua vitæ inquietudo, nemo enim, in tædio, tristitia ac nausea, quietus vivere potest. 2dò: Quia tepidus, tentatur frequentius, cum & ipsum fastidium boni Spiritualis sit gravis tentatio. 3tio: Tepidus crebrius vincitur, imò perpetuo superatur; qui bonum animæ semper averfatur, etiam dum illud agit, peccat, quia illud agendo, in ipsa actione nauseam admittit. 4to: Tepidus Religiosus sanatur difficilior; nam tepidorum medicina, non est, nisi gravis & publica ruina. 5to: Tepidus Religiosus deseritur periculosior, nam etsi omnis desertio Dei, periculosa est; tepidorum tamen periculosissima, quia alii peccatores, ipsa sui peccati malitia evidenti, facile possunt moveri, & manus aliquando excitanti gratiæ porrigere, sed tepidus cum sibi sanus esse videatur, nec stimulos gratiæ recipit, imò sibi non necessarios credit. Quid igitur restat, nisi ut deseratur, & qui sordescit, sordescere adhuc permittatur. 6to: Tepidus Religiosus moritur timidior, quæ enim securitas illi sit in morte, qui de nullo bono opere, teste conscientia, securus est? Conscius enim sibi est, quod laborem effugiebat virtutis, Obsequia Divina nauseabat, eaq; perfunctorie peregit, vitam magis politicam & superficiale, quam verè Religiosam vixit. 7mò: Tepidus Religiosus salvatur difficilior, quomodo enim facile salvari potest, qui salutis opera misere & negligenter operatus est. Hisce expensis exhorrescamus tantorum malorum fontem, acedam Deumq; omnibus viribus, per merita JESU, Beatissimæ & Sanctorum Omnium obsecremus, ut nos à tanto malo liberet, fervorem verò Spiritus accendat, in cordibus nostris.

PUN-

PUNCTUM 3tium.

Quæ media excutiendi teporis?

I. **M**edium est: frequens beneficiorum Dei consideratio, quibûs nos liberalissimè prævenit & adamavit, tum in ordine naturæ, tum etiam quoad dona supernaturalia. Non fecit taliter alteri nationi, sicut nobis fecit Dominus Deus noster. O! quàm ferventer servirent Deo alii, si hæc dona illis contulisset.

2dum Medium: Sunt meditationes rerum Cælestium, non ex usu, & consuetudine factæ, sed ex desiderio proficiendi, in virtute, meditationes ferventes, in quibus exardescat ignis divini Spiritûs; meditationes fructuosæ, cum reflexionibus practicis supra actiones proprias per proposita efficacissima.

3tium Medium: Serius examinum, & lectionis libri Spirituales usus. **4tum Medium:** Recta in omnibus intentio, & ardens in Deum amor, studiumq; placendi eidem in omnibus. **5tum Medium:** Accuratus Eucharistiæ usus, & frequens ejus visitatio. Excitemus nos ad hæc media usurpanda. Petamus gratiam à Deo.

COLLOQUIUM.

O! Deus, qui ignis es inextinguibilis, accende cor meum tepidum ignitâ vî amoris tui, ut tibi deserviam omnibûs diebûs vitæ meæ, & excusso omni tepore, alacri Spiritu curram per vias justificationum tuarum. *Pater: Ave: Anima Christi.*

ACTUS SÆPIUS USURPANDI.

Justorum semita quasi lux splendens procedit & crescit usq; ad perfectam diem. Prov: 4.

Solitudine non pigri, Spiritu ferventes, Domino servientes. Rom: 12.

O! quantus fervor omnium Religiosorum, in principio suæ institutionis fuit. Tho: à kem 1: 1. c. 25. de Imit.

Quò liberaliores nos erga Deum ostenderimus, eò, ipsum quoq; erga nos liberaliorem experiemur S; Ign: in Const:

Diligam te Domine fortitudo mea, Dominus firmamentum meum, & refugium meum & liberator meus *Psal: 17.*

O ignis! qui semper ardes & nunquam extingueris, O amor! qui semper ferves, & nunquam tepescis, accende me, accendar à te totus, ut totus diligam te S: Aug: Sol: c: 19.

C A P U T 3tium.

De Adjumentis & Præsidis.

Contra Pericula & Impedimenta in Via Sapientie.

Adjumenta & Præsidia hic exponenda juvabunt Viatorem Religiosum, tum ad removenda impedimenta oriunda ex peccatis, tum ad evitanda pericula. Præsidium 1mum erit ex aliquot remediis ad evitanda peccata efficacibus. Præsidium 2dum consistet in recogitatione novissimorum. Præsidium 3tium in conversione debita ad Deum pænitiâq; salutari.

§. PRIMUS

P R Æ S I D I U M 1mum.

De Remediis ad evitanda peccata efficacibus,

M E D I T A T I O

De Remediis ad evitanda peccata.

Præl: 1: Statue te in conspectu Dei dicentis ad te, declina à malo & fac bonum.

Præl 2: Pete gratiam cognoscendi media, vitandi peccata, & iis constanter utendi.

P U N C T U M 1mum.

Memoria præsentie Dei efficax medium contra peccata.

Considera & persuade tibi, nullum efficacius remedium, ad evitanda omnia peccata, quàm sit memoria præsentie Dei, ex his rationibus. Imò: Quia si secundum Psalterem, oblivio Dei præsentis, est fons omnium peccatorum; ita enim loquitur: *Non est Deus*

M

in

*in conspectu ejus, inquinatae sunt viae ejus in omni tempore. Certè à contrario memoria praesentiae Divinae omnibus peccatis pracludit viam. 2dò: Quia, quod nos juvat ad vincendas tentationes, & ab omni periculo defendit, illud facit, ut evitemus peccata. Atqui nihil est praesentius, ad superandas omnes difficultates & tentationes, effugiendâq; pericula, quàm sit memoria Dei praesentis. Ut Propheta Psal: 22. pronuntiat, ubi ait: *Exi ambulavero in medio umbræ mortis, non timebo mala, quoniam tu mecum es.* Igitur memoria praesentiae Dei, multum confert ad evitanda peccata. 3tò: Constat id ipsum ex autoritate & testimonio SS: Patrum, ex quibus Clemens Alexandrinus lib: 3. de pedag c: 5. ait: *hac solùm ratione fit, ut quis nunquam labatur, si Deum sibi ipsi semper adesse existimet.* Et S: Hieronymus in c: 24. Ezech: *memoria Dei excludit omnia peccata.* Item S: Augustinus hom: 77. *Opus est, ut ille, qui peccare non vult, praesentem Deum sibi cogitet ubiq; 4tò Patet ab exemplis. Sic enim Susanna evitavit peccatum, & gravem tentationem, dicens: Melius est mihi incidere in manus vestras, quàm peccare in Conspectu Domini.* Hòc item mediò S: Paphnutius Thaidem meretricem & S: Ephr: altam procacem mulierem sanavit. Vide nunc, quàm frequenter in diem, Dei memoriam renoves? Nonné in singulas horas, ad inchoationem saltem actionum notabilium posses esse memor Dei praesentiae? Erubescere negligentiam tuam. Propone saepius in diem Dei memor vivere, dic: *Vivit Dominus, in cujus conspectu sto. vel cum Psalmista: Providebam Dominum in conspectu meo semper.**

PUNCTUM 2dum.

Sanctus timor Dei & horror peccati, removet à peccatis.

Considera inter alia evitandi peccati media non postremum esse, si quis semper conservet timorem Dei, & horrorem peccati, qui enim aliquid timet, omnem diligentiam & modos congruos adhibet

hibet, ut illud evitet. Unde cum in Hispaniis spargeretur rumor de nostris, quod utantur herbâ quadam, ad sui conservationem à periculis peccandi. Interrogatus P. Araosius noster illius Regni Provincialis, quanam esset hæc herba? respondit non aliam esse, nisi timorem Dei. Studeas itaq; Religiose, comparare hunc Sanctum timorem Dei, & horrorem peccati, cujus comparandi hi possunt esse modi. imò: elicias frequenter actus amoris Dei super omnia; quia hic actus, si sit supernaturalis, non solum delet omnia, peccata. sed etiam continet virtualiter omnem horrorem, & detestationem omnis peccati. 2dò: in singulis præparationibus ad confessionem Sacramentalem, & in quotidianis examinibus imò & meditationibus, obfirma animum contra omne peccatum per protestationem, resolutionemq; ad omnia mala sustinenda & ipsam mortem, quàm ut deliberatò offendas Deum.

3tio: Imbue mentem cogitatione & reflexione de novissimis, nempe cogitatione mortis, Judicii Dei, inferni, æternitatis &c. Reflecte te, utrùm hanc cogitationem sæpiùs renoves, utrùm timorem Dei conserves? Resolve te ad hæc, & propone constans studium, ad inducendum hunc timorem in animum tuum.

P U N C T U M 3tium.

Plena sui projectio in Dei & Superiorum dispositionem.

CONsidera optimum & efficacissimum esse medium vitandorum in Religione peccatorum, nihil agere ex suo arbitrio, nullamq; dispositionem, live quò ad Officia, live quò ad locum, live quò ad socios, live quò ad quascunq; occupationes eligat Religiosus, sed totum se tradat dirigendum Deo, per superiores in omnibus. Nullus enim potest præscire circumstantias occurrentes peccatorum, à quibus nos Deus amovebit, si ex ejus directione vivere voluerimus. *Facta*, dicit Psaltes, *cogitatum tuum in Deum, & ipse te enutriet.* Et Psal: 90, asseveranter dicit: *Qui habitat in adjutorio*

*Altissimi, in protectione Dei Cæli commorabitur, dicet Domino, susceptor meus es, & refugium meum, Deus meus sperabo in eum, quoniam ipse liberavit me de laqueo venantium. Et inferius: Quoniam in me speravit, liberabo eum, protegam eum. Credimusné promissionibus Dei? fidimusné sapientiæ ejus, omnia prudentissimè ordi-
nanti, ac bonitati omnia nobis bene volenti?*

Abnegemus itaq; propriam voluntatem, & curam de nobis in sinum Dei deponamus. Melius ipse de nobis disponet, quàm ipsi nobis voluerimus.

COLLOQUIUM.

SUScipe Domine universam libertatem meam, accipe memoriam, intellectum, voluntatem. Accipe corpus & animam meam, quidquid habeo, vel possideo, tu mihi largitus es, id tibi totum restituo, ac tuæ prorsus voluntati trado gubernandum: Quid quid vis, quando vis, ubi vis, quomodo vis, ego volo, quia tu vis, in me, de me, per me, non mea, sed tua sapientissima fiat voluntas.

Pater: Ave: Anima Christi.

ACTUS SÆPIUS USURPANDI.

UTinam dirigantur viæ meæ, ad custodiendas justificationes tuas. Psal. 118.

Doce me justificationes tuas, viam justificationum tuarum instrue me. Psal. 118.

*Gressus meos dirige secundum eloquium tuum, & non domine-
tur mei omnis injustitia. Psal. 118.*

Miserere mei Domine, quoniam infirmus sum, sana me Domine, quoniam conturbata sunt ossa mea. Psal. 6.

§ SECUNDUS PRÆSIDIUM 2dum.

In Recogitatione Novissimorum.

*Quantum sit, & quam efficax prælium contra omnia peccata,
recogitatio*

Recogitatio novissimorum, edocuit Spiritus Sanctus Eccl. 7. dicens: *In omnibus operibus tuis memorare novissima, & in æternum non peccabis.* Proinde nè Religiosus Viator tantò destituatur præsidio, frequentior illi sit Recogitatio Mortis, Recogitatio Judicii, Recogitatio Purgatorii, Recogitatio inferni, ac tandem Recogitatio Cæli.

Recogitatio Mortis.

Duplici Meditatione hæc Recogitatio concludetur.

IMA **E** Arum exponet, quid sit mori? quæ certitudo mortis? quis modus moriendi? & quid post mortem? 2da explicabit qualitatem mortis, tum Justorum, tum peccatorum. Convenienter hic illud Jobi usurpari potest. *Unde sapientia venit? & quis est locus intelligentiæ? abscondita est ab oculis omnium viventium. Perditio & mors dixerunt: auribus nostris audivimus famam ejus.* Job: 28.

M E D I T A T I O ima.

De mortis Quidditate, & Circumstantiis.

PRæl: 1. Colloca te in forma moribundi ad pedes Crucifixi.

PRæl: 2. Pete gratiam fructuosæ meditationis, ex qua concipias Spiritum perfectè vivendi, & te ad Sanctam mortem parandi,

P U N C T U M imum.

Quid sit mori?

C Ogita imò: mori, est deferere, pro omni tempore mundum, in quo vixisti, Patriam, in qua natus es. Urbem, in qua habitasti, domum, quam incoluisti, triclinium, in quo manducasti, lectum, in quo quieviisti, hortum & campos, in quibus ambulasti, & omnia locorum spatia, ita, ut in nullo eorum amplius consistere valeas. Vide, nè in vita, ulli afficiaris loco, quo expeditior exire possis, serva indifferentiam, nullumq; appetas, nullum à Superioribus evincas manendi locum, sed ibi tantum consistere libenter velis,

ubi te obedientia collocaverit. Quid enim in morte proderit, in hac vel illa Urbe habitasse? Religiosi nihil interesse debet huminè an sublimè putrescat?

Cogita 2dò: Mori, est dicere ultimum ac perpetuum vale Parentibus, Fratribus, Consanguineis, amicis, familiaribus ac omnibus hominibus. Nullus tunc erit, qui te comitari, nullus, qui tecum in Regionem umbræ mortis procedere velit. Cur itaq; viscose adhæres Consanguineis, amicis? Cur propter illos plura, quàm in gratiam Dei facis, nunquid non cum Deo tibi æternum vivendum? Abstrahere cor tuum ab omnibus Creaturis, & Deum ama super omnia. Audi Thomam à kem: monentem. *Fac nunc tibi amicos, venerando Dei Sanctos, & eorum actus imitando, ut cum afe- ceris in hac vita, illi te recipiant in æterna tabernacula.*

Cogita 3tiò: Mori, est deserere omnia bona corporis, fortunæ, naturæ, & spoliari omnibus plausibus, æstimationibus, honoribus, affectibus, ut præcinit Job: *Nudus in hunc mundum venisti, nudus exibis.* Peribunt tunc simul & semel omnes voluptates, deliciae, convivia, spectacula, ludi, peribunt omnia, quæ oculos oblectant, quæ aures suaviter mulcent, quæ nares opere recreant, quæ palato sapore blandiuntur, quæ tactum molliter afficiunt. Et quid hæc omnia oblectamenta, juvabunt morientem? quid juvabit multa vidisse? audisse? in deliciis vixisse? dum ex hoc angustiari magis oportebit in morte. Bene Thomas à kem- pis docet: *Disce nunc mori mundo, ut tunc incipias vivere cum Christo, disce nunc omnia contemnere, ut tunc possis liberè ad Christum pergere.*

PUNCTUM 2dum.

De Certitudine & incertitudine mortis.

COgita 1mò: nihil certius ac infallibilius esse, quàm sit mors. Illa omnia, quæ tibi disponis in futurum, sive circa successum studiorum

studiorum, sive circa Officia, sive circa locum mansionis, sive circa gratias humanas, omnino incerta sunt & fallibilia. Nonne disponebat ille Evangelicus dives, bona sua in plures annos, dicens: *Anima mea, habes multa bona in plures annos.* Et audiit: *Stulte, hac nocte repetent animam tuam &c.* Incerta item sunt tua desideria, tuæ spes, hoc certissimum, quia morieris. Et tu omnes curas ad alia incerta convertis, & mortis immemor vivis.

Cogita 2dò: Certissimum quidem est, quod tu morieris & DEUS scit annum, mensem, diem, horam, momentum, quo tu exabis de hac vita. Scit item locum, modum, & omnes circumstantias mortis tuæ. Sed tibi hæc occulta esse, & te incertum de his omnibus, relinquere voluit, ut semper & in omni loco, in omni occupatione vigiles in adventum Domini. Vide in tanto negotio, ne obdormias; & siquidem ignoras diem, horam, locum, modum mortis tuæ, semper paratus esto, & taliter vive, ut nunquam te imparatum mors inveniat. Et quæ est præparatio tua? nec blandire tibi. Voluit DEUS, ut lateret nos hora mortis, quo sic viveremus, tanquam quotidie morituri, ideo enim latet ultimus dies, ut observentur omnes dies. Hodie ergo te vitam Religiosam inchoasse cogita, hodie quoq; finituum, & juxta hæc vivere propone. O Domine toties me peccantem, & non me penitentem, timor mortis conturbat me. Da Domine gratiam, ut semper & ubiq; vigilem inveniat me hora mortis.

PUNCTUM 3tium.

Various moriendi modus hominum.

CONsiderandum imò: alii moriuntur bene instructi Sacramentis, alii absq; iisdem decedunt. Et tu quid tibi promittis? Cum taline dispositione ad Sacramenta accedis, ut merearis, ne sine illis mortem oppetas? Expende, quas dispositiones, tibi providisti? vel nunc saltem in his Collectionibus providere debes? ut quam devotissime Sacramenta accipias. Con-

Considerandum adò: aliqui moriuntur in præsentia Sacerdotis, imò & plurimum Religiosorum pro se orantium, & se tunc in illo puncto juvantium, alii decedunt destituti hoc beneficio; tu quid speras? Itane observas Sacerdotes, & alios Correligiosos? ut tibi illos DEUS, pro illa hora provideat? Vide, ut cum omnibus reverentissimè procedas, nulli te molestum facias, & DEUS hanc tibi præstabit gratiam, ut multos protunc invenias intercessores.

Considerandum 3tò: aliqui moriuntur in exercitio variorum affectuum, fidei, spei, charitatis, doloris, gratiarum actionis, plenissimæ resignationis in Divinam voluntatem, timoris DEI, ardentissimi desiderii videndi Deum, abrenuntiationis omnibus creaturis, & earum affectibus, humiliationis suæ, invocationis Beatissimæ & Sanctorum. Alii decedunt absq; talibus affectibus. Tu quid tibi promittis? habesne dispositos affectus in morte eliciendos? usurpansne illòs frequentius, ut sic tempestivè assuescas sanctè mori. Adest nunc tempus in Collectionibus, ut hæc provideas, & ordines in futurum.

PUNCTUM 4tum.

Quid cum homine post mortem?

COgita imò: vix morietur Religiosus homo, divulgabitur mors illius partim per sonum campanarum, partim per indicationem suffragiorum. Et hunc rumore audiendo viventes rari erunt, qui præter vanam, & inutilem admirationem bene precabuntur defuncto, dicentq;: *Requiescat in pace.* Suffragia etiam, si quæ erunt, aut perfunctoriè absolventur, sicut & nos solemus, aut omittentur. Disce ergo ô homo Religiose, non fidere in vita amicis, tuam ipse sedulo opereris salutem. Si enim tu ipse negliges, quis eam diligentius curare poterit. Rectè Thomas à Kempis monet: *Noli confidere super amicos & proximos, nec in futurum*

futurum tuam differas salutem, quia cuius obliviscuntur tui homines, quàm æstimas, melius est nunc tempestivè prævidere, & aliquid boni præmittere, quàm super aliorum auxilio sperare.

Cogita 2dò: etiam amicissimi, & familiarissimi hominum, horrebunt cadaver demortui, & tanquam fætidum, ejici domò curabunt. En huc deveniunt illæ familiaritates, illi plausus, adulationes, æstimationes. O vanitas vanitatum! Contemne omnia tempestivè. Quære in Cælo veros amicos, & constantes, qui te nec in morte; nec post mortem deserent.

Cogita 3tò: Jam tunc homo neq; pedibùs uti poterit ad ambulandum, neq; oculis ad videndum, nec ullo sensu ad operationes eorum, alienis humeris inferetur sepulchro. Dum itaq; tempus suppetit, benè utendum est sensibùs. Vide quomodo illis utaris?

Cogita 4tò: Sepelietur corpus, & saxò obturabitur, non ampliùs, nisi ad iudicium DEI surrecturum, simul autem sepelietur & memoria demortui, vix enim aliquis ejus memoriam, præsertim in sacrificiis, ac Orationibus habebit. Et hoc minus est; illud apprehensione dignum: in cujus æternitatis portu consistet anima tua, dum egredietur è corpore? Felixné an infelix æternitas illam suscipiet? O æternitas! o anima! cur te negligimus?

COLLOQUIUM.

CUM Christo Crucifixo, moriente, rogando, ut ille morte sua sanctificet mortem nostram, ut per sui agonis acerbitatem, repleat nos dulcedine sua, in instanti mortis nostræ.

Pater; Ave &c. Anima Christi.

ACTUS SÆPIUS USURPANDI.

Quis est homo, qui vivet, & non videbit mortem?

Putredini dixi: Pater meus es, Mater mea, & Soror mea vermicibus. *Job; 17.*

N

Nudus

Nudus egressus sum, de utero matris meae, & nudus revertar illuc. *Job: 1.*

Qui se quotidie recordatur esse moriturum, contemnit praesentia, & ad futura festinat. *S: Hiero:*

Cor meum conturbatum est in me, & formido mortis cecidit super me. *Psal: 54.*

MEDITATIO 2da.

EX RECOGITATIONE MORTIS.

De Qualitate mortis, tum Justorum, tum peccatorum.

Prel: 1: Constitutio loci, in medio, Sancti, & male morientium.

Prel: 2: Petenda gratia, pretiosa in Conspectu DEI mortis.

PUNCTUM 1mum.

Pretiosa mors Sanctorum. Psal: 115.

COgita imò: quod pretium mortis Sanctorum oriatur imprimis ex parte DEI. Tum quia per illorum mortem, completur illa altitudo divitiarum Sapientiae DEI, in coördinanda serie praedestinationis Sanctorum. Sperasne istud pretium mortis tuae? Examina opera, si illud tibi promittunt, & observa *S: Petri doctrinam Ep: 2: c: 1: Fratres satagite, ut per bona opera, certam vestram vocationem faciatis.* Tum quia haec Sanctorum mors, empta est infinitò pretiò sanguinis Christi. Quomodo hoc pretium sanguinis applicas tibi, in usu Sacramentorum? Cura, ut ex imagine mortis Christi, derivetur etiam pretium in mortem tuam. Tum quia Sanctis, de thesauris donorum suorum providet DEUS auxilia efficacía, quibùs juventur, & ad perseverentiam deducantur. Non optasne & tu tibi haec auxilia in morte? Tum deniq; saepe in eorum solatium mittit Sanctos suos, & Angelos, imò quandoq; & ipse Angelorum Dominus assistit moribundis. Quis tam pretiosam mortem non desiderabit? vis illam obtinere o Religiose humilia te nunc, & esto vilis in oculis

oculis tuis, nec refugias vilificari ab omnibus, & in omnibus; sic enim pretiosior eris coram DEO.

Cogita 2dò: Oriri hoc pretium mortis, ex lucro, quod obtinent Sancti per mortem suam. Tum quia, per eam intrant ad veram vitam, & quidem aeternam, confirmati in gratia omnî pretiò majore. Desiderasne de hac, transire ad vitam aeternam? Quid hucusq; pro ea obtinenda fecisti? tum quia, per illam inveniunt requiem à suis laboribus, & securitatem: Cessant enim tunc pericula peccandi, cessat rebellio carnis, cessant inimicorum insidiæ. Tum deniq; per hanc mortem intrôeunt in aeternitatem omnium bonorum. Hæc omnia lucra, in morte Religiose habebis, si te nunc pro Christo perdideris, si præsentis vitæ illecebras, mundi & carnis commoda, arbitratus fueris ut stercora. Resolve te ad hæc omnia, & firmiter servanda propone. Noli modò quærere quietem, & otium, ut in felici aeternitate, requiescas suavius & gloriosius.

Cogita 3tiò: Oriri hoc pretium mortis, ex multis meritis, & virtutum ornamentis, quæ, tunc, Sancti, ex hac vita transferunt in aeternam. Omnia enim alia peribunt, quæ & ipsi contempserunt, & sola opera eorum gloriosa, sequentur eos. Hæc cura Religiose, ut facias tuam mortem pretiosam. Pete à DEO: Moriatur anima mea Domine, morte justorum, & fiant novissima mea, horum similia &c.

PUNCTUM 2dum.

Mors peccatorum pessima. Psal: 33.

Cogita imò: pessimam mortem peccatorum, ex ipsa morte. Tum quia, per illam peccatores spoliantur omnî bonò, tum naturali, tum supernaturali, tum hujus, tum alterius vitæ. Tum quia, coguntur deserere omnia solatia illa, ob quæ Deum relinquunt. Tum quia, vermis conscientiæ, tunc potissimum eas ex-

N₂

cedet.

edet. Tum quia, dæmonum aspectus, prædæ inhiantium, & scelera totius vitæ exprobrantium, eos mortiferè terrebit. Tum quia, metus poenarum imminentium, eos enecabit. Nè tali morte Religiose moriaris, eduxit te DEUS ex mundo nequam, de periculis peccatorum. Vide itaq; nè in statu mortuorum mundo, vivat in te mundus, & tu moribûs mundanis vivas mundo, facilè enim Deus eradicabit te de loco sancto, & ipsa Dei dona, erunt Carnificina tuâ. Time, & cum timore operare salutem tuam.

Cogita 2do: mortem impiorum pessimam esse ex eo, quia per eam ultimatò projicit eos Deus à facie sua; hoc malum, est super omne malum. Unde deprecatur David: *Nè projicias me à facie tua.* Psal: 50. & 26. *Nè avertas faciem tuam à me, & nè declines in ira, à servo tuo.* Ute vadas & tu tantum malum, provideas Deum in conspectu tuo semper.

Cogita 3tio: ex eo quoq; pessimam esse mortem peccatorum, quia est inchoatio pessimæ æternitatis, tamdiu non finientæ, quamdiu Deus, erit Deus; malum est carere bono creatò, sed pessimum carere in æternum; malum est à Deo projici, sed pessimum, projici in æternum; malum est pænas subire graves, sed pessimum, subire in æternum, malum est, excludi à Cælo, sed pessimum excludi in æternum. Quorum omnium quia mors peccatorum, inchoatio est, ideo pessima est. Tali morte morientur, qui mundanis & politicis, sua quærentibûs, & non æternis principiis ac rationibûs reguntur & vivunt. Vide, de quorum numero sis, & proponenda propone.

PUNCTUM 3tium.

Qualis tua mors?

Cogita 1mo: qualem tua vita promittit tibi mortem? mere-
risne mortem sanctorum pretiosam? quod ei pretium per tu-
as actiones addis? Erubescere, Deplora dies vitæ tuæ malos. E-
lue

lue lacrymīs peccata. Converte totum cor ad Deum & salutem procurandam.

Cogita 2dò: Puniri plerumq; Religiosos à Deo in morte, per hoc, ut, sicut salutem suam in vita Religiosa, negligenter procurabant, & sicut non erant ordinati in vita, parì modò sine cura salutis seria, disordinate moriantur. Sicut negligenter orabant in vita, ita negligenter orent in morte. Mors enim, est umbra vitæ. Vis Religiose in morte totus orans inveniri, & angelans ad DEum, in vita iis assuescas; vis reperiri absq; peccato, cave illud in vita.

Cogita 3tiò: Religiosos, qui in Religione turbulentè vivunt, suntq; graves, & molesti superioribus, æqualibus, & inferioribus, qui neq; ipsi pacati vivunt, nec alios in pace vivere sinunt, puniri in morte, ut vel extra domum Religiosam, desolatissimi moriantur, vel morte turbulenta & periculosa, ut non tam decedant, quàm exturbentur de vita. Time pœnam hanc Religiose, sed magis cave culpam, vive pacatus cum omnibus, ut requiem æternam consequaris.

COLLOQUIUM.

CUM Christo Crucifixo. In manibus tuis Domine sortes meæ. Et præsertim ultima illa fors & alea, quæ jaciatur de aternitate mea. Miserere ergo tunc mei Domine. In manus tuas Domine commendo Spiritum meum! *Pater: Ave: Anima Christi.*

ACTUS SÆPIUS USURPANDI.

MORIATUR anima mea, morte justorum, & fiant novissima mea horum similia. Balaam: Num: 23.

Timentī Dominum bene erit in extremis, & in die defunctionis benedicetur. *Ecl: 1.*

Præiosa in Conspectu Domini mors Sanctorum ejus. *Psal: 115.*

Non potest malè mori, qui bene vixerit, & vix bene moritur, qui malè vixerit. S: Aug: N₃ Nihil

Nihil sic revocat à peccato, quàm frequens mortis meditatio. S: Aug:

Nemo sibi vivit, & nemo sibi moritur; sive enim vivimus, Domino vivimus, sive morimur, Deo morimur, Rom: 14.

Mihi vivere Christus est, & mori lucrum. Phil: 1.

H O R A Q U I E T I S D A N D A C O N S I D E R A T I O N I

Supra examen quotidianum.

Positus ad Pedes Crucifixi, pete gratiam fructuosæ Considerationis.

I. Duplex est examen, unum generale, in quo examinatur conscientia, ex omnibus defectibus, in singulis diei actionibus contingere solitis. Alterum particulare, quod circa aliquod particulare vitium extirpandum, versatur. Habesné in usu utrumq; istud Examen? Et tamen hac viâ, posset evitari districtum Dei judicium, juxta illud 1. Cor: 11. *Quòd si nosmet ipsos dijudicaremus, non utiq; judicaremur?* Certus item esses, quòd satisfactas tuæ gravi obligationi, quâ urgeris, ut tendas ad perfectionem. P: Petrus Faber, primus Sancti Ignatii Socius, examen vocabat Confessionem Spiritualem. De quo etiam Propheta, videtur enuntiâsse, Psal: 115. *Beati, qui faciunt judicium, & justitiam omni tempore.*

2. Distribuisné tibi examen generale in quinque puncta? in quorum imò: deberet fieri accurata gratiarum actio, pro beneficiis à Deo acceptis, illorumq; recognitio, & quidem particulatim. In 2do, Petitio luminis, ad peccata cognoscenda, & deslenda, quod, tantò ardentius faciendum esset, quantò nobis clariùs constat, quòd minùs luminis habeamus, ad proprias culpas perspicendas, quàm ad alienas. In 3to: puncto: exigenda est à se ipso ratio, cogitationum, verborum, ac operum, singulas horas diei, & actiones, sedula reflexione percurrendo. Monet autem S: Laurentius Justinianus. *Quisquis, virtutum amator est, suū diligens inquisitor sit.* In 4to: dolor de peccatis commissis, eliciendus. In 5to: firmum propositum concipiatur.

3. Quam in his omnibus adhibes diligentiam? quomodo defectus commissos revocas in memoriam? advertisne statim ad occasiones, & circumstantias singulorum, præsertim notabilium defectuum? ut eas in posterum efficacius devites? Quantum temporis tibi tribuis excitando in te dolori, & odio peccatorum? proponisne tibi motiva & incitamenta ad fructuosius faciendum? Prævidisne remedia vitandorum defectuum, præcipue graviorum? Injungisne tibi pœnam pro defectibus? eluisne illos in sanguine & satisfactionibus Christi.

4. Examinasne etiam motus animi interiores, quibus mens per diem movebatur? discutisne intentiones singulorum operum tuorum? S: Ignatius, ut refert Rib: l: 5. Vit: c: 1 singulis horis, animum colligere consueverat, ac sepositis curis, examine conscientiam discutebat. Eodem studio fervebat S: Xaverius, sæpius accuratissime perscrutans, intimos animi recessus, utq; id ipsum alit in praxi haberent, hortabatur.

5. Mutasne modos faciendi examen, ut tædia evites? Nunc quinque illa puncta, applicando ad quinque Christi vulnera: Ad vulnus dextræ manus, gratias agendo, quod te hæc manibus plasmaverit, vulneribus redemerit, aperiens manum, benedictionibus repleverit, & tanquam de fonte omnium gratiarum, in te tot dona effuderit. Ad vulnus manus sinistræ, tanquam ad solem illuminantem omnem hominem, in hunc mundum venientem, petendo lumen. Ad vulnus lateris, tanquam ad speculum, perspicendo defectus proprios. Ad vulnus dextri pedis, dolorem; ad vulnus sinistri pedis, propositum eliciendo, & cum Magdalena pœnitentiam agendo. Nunc item te in Tribunali Dei statuendo, & ibi audiendo, tum beneficia tibi præstita enumerari, tum tuam ingratitudinem ob tot defectus redargui. Nunc, examen faciundo per modum Confessionis, coram Deo, Beatissima, ac Sancto Angelo Custode

Custode. Tandemq; juxta exigentiam circumstantiarum, temporis, vel festi, alium & alium modum formando.

6. Observasné S: Ignatii Regulas, & industrias in eum finem præscriptas? Insistisné in actuali disquisitione plus dolori & emendationis proposito, quàm discussioni defectuum? cùm totus examinis fructus, in emendatione morum consistat? ad quem dolor serius, propositum efficax, plus, quàm omnes aliæ industriæ conducunt.

7. Non retraherisné à Constantia hujus exercitii? & non abjicisné animum, dum adverteris te sæpius in eodem defectus recidere?

Quantum ad Examen Particulare.

8. Nôstine ejus puncta? 1um est, ut manè, serium propositum concipias, vitandi aliquem certum defectum, aut virtutem exercendi. 2dum, ut quoties te in eum defectum labi adverteris, doleas de lapsu, pectori manu admota. 3tium, ut destinato tempore numerum lapsuum examines, & adnotes. 4tum, ut diem cum die, hebdomadam cum hebdomade, conferas. 5tum, ut pænitentiam pro numero lapsuum, tibi injungas.

Observasné hæc omnia in examine particulari?

9. Æstimasné tam efficacissimum medium, ad plantandas virtutes, & extirpanda vitia? & habesné tempus determinatum constanter hoc examine utendi? V: Berchmans aiebat, nullum, examine particulari præstantius esse remedium vitiis exscindendis, aut virtutibus acquirendis. Unde Joannes Ortunus, usq; ad diem præviam morti, id ipsum adhibebat. Et Joannes de Cannas, reliquit libellum, in quo à triginta annis, accuratissimè, annotata erat materia pro examine particulari.

RECOGITATIO JUDICIORUM.

Siquidem duplex judicium, unumquemq; mortalium expectat, nempe particulare, in quo singuli seorsim judicabuntur, & universale

niversale, in quo omnium simul opera examinabuntur. De singulis, separatæ procedent Meditationes.

M E D I T A T I O ima.

De Judicio Dei particulari.

Prel: 1. Collocatio loci in Conspectu severi Judicis.

Prel: 2. Petenda gratia concipiendi timoris Dei Judiciorum, quo impellamur ad perfectiorem vitam.

P U N C T U M imum.

Timenda sunt judicia Dei.

IMprimis enim hunc timorem incurrit nobis sacra Scriptura, pluribus locis, tremendum judicium Dei prædicans. Sic illud: *tremendum est incidere in manus Dei viventis.* Item Psalter ait: *Domine, nè in furore tuo arguas me, neq; in ira tua, corripas me &c;* 2dò: Eundem timorem Judiciorum Dei, efficaciter nobis perluadere potest, circumstantia personæ judicantis. Ille enim qui judicaturus est, est Omniscius; proinde nihil eum latere potest, nihil coram illo occultari. Est item Omnipotens, qui non solum corpus potest occidere, sed etiam animam mittere in gehennam; & hunc timere jubet Christus. Deinde, est Justissimus, qui nullo respectu ducitur, nulla supplicatione movetur, nec ullo modo corrumpi potest; insuper est Altissimus, ac supremus Judex, à quo, non datur appellatio.

Tandem, est æternus, ejusq; decreta semel prolata, nunquam sunt mutabilia. Quis non timeat te ô Judex tremendæ Majestatis! 3tiò: Idem nobis suadere potest, circumstantia personæ judicandæ, quæ est creatura vilissima, multis peccatis obnoxia, nullius boni ferax &c; 4tò: Exempla magnorum sanctorum, ad eum timorem nos provocare poterunt. Si enim columnæ Cæli contremiscunt, quid nos vacuas arundines agere non expediet? Sic S: Hieronymus, semper sive vigilaret, sive dormiret, sive quid-

piam aliud ageret; concutiebatur timore Judiciorum Dei, videbaturq; sibi audire illam feralem tubam: *Surgite mortui ad Judicium.* Item S: Hilarion, cum moreretur, sic animam suam alloquens perhibetur: *Anima mea, septuaginta annis Deo servivisti, & adhuc egredi times?* Timuerunt & alii Sancti. Ergone nos peccatores securi vivemus? Concipiamus itaq; timorem, & toti contremiscamus coram Deo, cui nota sunt omnia peccata nostra, & vilitates nostræ.

PUNCTUM 2dum.

Quæ materia judicanda?

IMprimis, omnia peccata, sive cogitationum, sive oris, sive operum, sive omissionum facta in tota vita, proferentur in medium, & de illis judicabitur, nisi illa aboleverimus per seriam pœnitentiam. 2dò: Omnia dona & talenta, nobis à Deo concessa, omnes gratiæ excitantes &c: omnes dotes tum naturales, tum supernaturales, omnes sensus & potentiæ corporis & animæ, erunt materia Judicii Divini, examinabitq; Deus, quomodo singulis usi sumus? quæ lucra meritorum per singula collegimus? O! quàm gravissimum erit ad hæc omnia respondere. 3tio: Examinabitur usus Sacramentorum; quam preparatione, quo fervore, quâ gratiarum actione, adhibitus est? 4to: etiam omnes justitiæ nostræ vocabuntur in judicium; juxta illud: *Cum accepero tempus, ego justitias judicabo.* O! quàm imperfecta, quàm multis scaten-tia defectibus, perversis depravata intentionibus, tunc apparebunt opera nostra! 5to: totius vitæ nostræ tempus adducetur in judicium; juxta illud: *Vocabo adversum te tempus* Tbreh: 1. Ex singulis momentis rationem reddere debebimus, quomodo illa & in quibus operibus collocavimus? quot otiose consumpsimus? vanitati dicavimus? &c: Hæc considerando, quis non contremiscat? quis non paveat? Confige Domine timore tuo carnes meas, ut timeam à judiciis tuis.

PUN-

PUNCTUM 3tium.

Quis modus facilitandi, & evadendi districtum Dei Judicium?

PRimum nobis modum proponit Christus in Evangelio, qui nec falli, nec fallere potest; ubi dicit: *Nolite judicare, & non judicabimini, nolite condemnare, & non condemnabimini; dimittite, & dimittetur vobis.* Tu ergo ô homo! nullum unquam judices, nullum condemnes, nullius intentiones discutias & examines, nullius sermonem & actiones, in malum sensum detorqueas, nullum censures, tibi ipsi attende, utpote tu de teipso responsurus Deo, si vis evadere ultionem Dei. 2dum modum proponit nobis Apostolus; ubi dicit: *Si nosmetipsos dijudicaverimus, non utiq; judicaremur?* Habet quisq; tot commoditates & occasiones, seipsum judicandi; nempe bina in diem examina, præparationes ad Confessiones &c: modò id cum omni diligentia, ut S: Pater monet, quisq; exequatur. 3tius Modus, est frequens contritio, ac dolor de peccatis etiam Confessionis. 4tus: est balneatio suâ, suarumq; actionum in sanguine Christi, lacrymisq; omnium pœnitentium, & oblatio meritorum. satisfactionumq; Christi, pro suis delictis. 5tus: Patienter, hilariter, fortiter, omnia adversa, & difficultates, in tota vita contingentes, sine querelis, sine murmuratione, perferendo. 6tus: Modus, accuratissimus Sacramentorum usus. Vide jam, utrùm hisce mediis usus fueris? in posterum quomodo uti debeas? dispone.

COLLOQUIUM.

Cum Christo Judice rogando illum, per iniqua, quibus ille condemnatus est, judicia, ut misereatur nostri in suo Judicio. Juste Judex ultionis, donum fac remissionis, ante diem rationis.

Pater: Ave &c. Anima Christi.

ACTUS SÆPIUS USURPANDI.

Confige timore tuo carnes meas, a judiciis enim tuis timui. Ps: 118.

Q₂

Judex

Judex ergo cum sedebit,
 Quidquid latet, apparebit,
 Nil inulium remanebit.
 Quid sum miser tunc dicturus?
 Quem Patronum rogaturus?
 Cum vix justus, sit securus?

Judicabit Orbem terrarum in justitia, & populos in æquitate *Psal: 47.*

Non intres in judicium cum servo tuo, quia non justificabitur in Conspectu tuo, omnis vivens. *Psal: 142.*

Si nos ipsi disjdicaremur, non utiq; judicaremur? 1: *Cor: 11.*

Si iniquitates observaveris Domine, quis sustinebit? *Psal: 129.*

Ex Recogitatione Judiciorum.
 MEDITATIO 2da.

De Judicio Universalis.

Præl: 1. Imaginare cum S: Hieronymo; quod audias feralem tubam, excitantem omnes ad Judicium: *Surgite ad Judicium.*

Præl: 2. Pete gratiam fructuosæ Meditationis de Judicio, & concipiendi timorem Divinæ Justitiæ.

PUNCTUM 1um.

Præcedentia immediatè Judicium universale.

CONsidera præcipua ex iis, quæ immediatè præcedent Judicium universale. imò: Signa erunt in Cælo & elementis, sol enim & luna obscurabuntur, ærem furiosæ tempestates conturbabunt, fulgura, tonitrua, procellæ, venti perstrepent. In mari sonitus fluctuum personabit, terra motibus concutietur, subvertentur urbes, homines arescent præ timore. Igne exurentur Palatia, Civitates, Pagi, Sylvæ & omnia. Quis ad hæc non contremiscent? quis non paveat? 2dò: ad sonum tubæ aperientur monumenta,

menta, mortui resurgent, sive corpora resumendo; quid putas, quid anima damnati, in assumendo suo corpore enormissimo, cui in vita indulgebat, loquetur? certe maledicet illi: O! corpus maledictum, propter tuam ego sensualitatem, oblectationem, commoditates, scditates, damnata sum! Pereat illa dies & nox, quâ in utero Matris formabaris! Utinam extinctus fuisset, antequam essem! &c. Jam verò anima iusti benedicet Deum: Sit benedictus Deus, qui te mihi associavit, ad colligenda merita, per mortificationes, vigiliis, jejunia! &c. 3tò: Apparebit signum Crucis, ad cuius conspectum clamabunt damnati: *Montes cadite super nos, & colles operite nos.* Iusti autem: O! Crux ave, spes unica! 4tò: Veniet Christus cum Majestate, cui occurrent iusti, damnati autem frement præ invidia; dicentes: *Nos stulti, vitam illorum aestimabamus insaniam &c.* Et ecce quomodo computati sunt inter *Filios Dei.* Et ubi illa superbia nostra, divitiæ, oblectationes, natales &c? transierunt omnia. Vide, ex quorum numero velles esse, & in quorum numero reponit te vita tua! Age seriò penitentiam. Contemne omnia transitura. Desidera Cælestia & æterna.

PUNCTUM 2dum.

Quale Iudicium universale?

CONsidera præcipua ex iis, quæ agentur in iudicio. 1mò: Qui propter Christum omnia reliquerunt, & eum secuti sunt, sedebunt iudicantes alios; ô quanta felicitas Religiosorum! 2dò: manifestabuntur omnia peccata toti mundo; ô quanta dementia nolentis confiteri peccata! 3tò, Separabuntur iusti ab iniustis, seu agni ab hædis, & tu Religiose in qua parte stabis? Non potuit se continere à lacrymis V: P: *Młodźiánowski*, consistens in valle Josaphat, & hæc cogitans, ut innuit in sua peregrinatione. 4tò: Tandem feretur decretum tota æternitate immutabile, ad iustos quidem in hanc formam: *Venite benedicti Patris mei, possidete*

Regnum &c. injustos verò: Discedite à me maledicti, in ignem æternum: Ubi expende singula verba utriusq; sententiæ: Vos, qui parvultis Vocationi meæ, venite ad possessionem Regni, vos qui tota aviditate currebatis ad malum, discedite. Cogita, quam tu audies sententiam? Timeo Domine rejici à te in æternum, ideo, Juste Judex ultionis, donum fac remissionis, ante diem rationis.

PUNCTUM 3tium.

Quæ post decretoriam sententiam?

Considera 1mò: Evangelii Verba: *Et ibunt hi in supplicium æternum, Justi autem in vitam æternam.* Expende imprimis: *ibunt, idest nunquam perventuri ad finem suæ infelicitatis. Ibunt, nunquam redituri ad Deum, ad Cælum, ad Sanctos. Ibunt, idest nunquam cessabunt progredi in pænis æternis.* 2dò: Expende: *hi, idest illi, qui se indignos fecerunt omni nomine.* 3tò: In supplicium æternum, pro momentaneis vanitatibus, voluptatibus &c. Similiter expende, quòd justī pro exiguis laboribus, pro victoria suā brevissima &c. invitentur ad possessionem Regni Cælestis.

Considera 2dò: Quò animò, quibûs ejulatibûs damnati se-
parabuntur a justis? quibûs oculis spectabunt amici, Magistri,
Parentes, Religiosi, suos amicos, discipulos, filios, conreligio-
sos ferri in Cælum, & se trahi ad inferos? O Religiose! dum
vita suppetit, contemne omnia terrena, age pro Deo & Cælo,
nè te serò pæniteat!

COLLOQUIUM cum CHRISTO.

O Christe JESU! per illa judicia, quibus apud Caiphā & Pi-
latum judicari, & condemnari pro me, voluisti, miserere mei.
Cum veneris judicare, noli me condemnare.

Pater: Ave: &c: Anima Christi.

ACTUS SÆPIUS USURPANDI.

OMnes stabimus ante Tribunal Christi. Itaq; unusquisq; nostrum,
pro se rationem reddet Deo. Rom: 14. An-

Annuntiabunt Cæli iustitiam ejus, quoniam DEUS Judex est. *Psal: 49.*

Lacrymosa dies illa,
Quâ resurget ex favilla;
Judicandus homo reus,
Huic ergo parce DEUS!

Domine, dum veneris judicare, noli me condemnare. *Job: 10.*
Quid faciam, cum surrexerit ad Judicium DEUS? & cum
quæsierit, quid respondebo illi? *Job: 31.*

RECOGITATIO PURGATORII.

POtissimum recogitanda est gravitas penarum Purgatorii, ut
ex illa inferamus, quanta sit malitia peccati venialis. Adin-
veniendus item aliquis modus juvandi animas purgatorii, & me-
dium, illud evitandi. Sit igitur.

MEDITATIO

De Purgatorio.

Præl: 1. Colloca te coram Animabus purgatorii, inter ignes
purgatorii, & tormenta, ejulantibus & clamantibus. *Misere-*
mini mei, miseremini mei, saltem vos amici mei!

Præl: 2: Perenda gratia fructuosæ Meditationis de pænis
purgatorii.

PUNCTUM imum.

Gravitas penarum Purgatorii.

PRæmissa actu Fidei de purgatorio, considera gravitatem pæ-
narum purgatorii. imò: ex eo, quia animæ patiuntur illas,
separatæ à visione DEI, Societate Christi ac Beatissimæ, & San-
ctorum omnium contubernio. Grave est filio amanti Patrem,
etiam ad breve tempus à Patre, grave amico, à sui amici præ-
sentia separari, quanto gravius est animabus, ab illo desidera-
bilissimo DEI vultu conspiciendo arceri, à tam amantissimo
Patre,

Patre, & omnium bonorum fonte, avelli. Compatere animabus. Pete à DEO, ut illas faciat, in suum conspectum venire. Ostende eis misericordiam tuam Domine, & salutare tuum da eis. Excita in te desiderium videndi Deum. 2dò: quia animæ in purgatorio, exules à Patria, amicis, consanguineis, à carne & sanguine relictæ, in doloribus, nullum sibi auxilium præstare possunt, & quàmvis multa patiantur, nihil tamen per hæc merentur. Ergo nos eas juvemus, & ipsi, dum tempus habemus, operemur bonum. Per omnia enim, quæ quisq; in hac vita agit bona, aut patitur, mereri potest, & animas juvare. 3tò: Ex eo etiam gravitas pænarum purgatorii colligitur, quia in purgatorio eadem sunt pænæ, quæ in inferno, & quandòq; graviores, excepta perennitate; superant tamen omnia tormenta, dolores, afflictiones hujus mundi. Consultiùs itaq; videretur, quamdiu vivimus, peccata per penitentiam expiare, & leviores afflictiones, fortì & generosò animò superare, sufferrèq;, quàm, ad purgatorium expianda peccata reservare. 4tò: ex eo insuper sunt graves illæ pænæ, quia illas patiuntur animæ sinè ullo solatio, auxilio; rarus equidem est, qui pro illis satisfaciat Justitiæ Divinæ. Si itaq; illo tempore optamus nobis affutura auxilia, præstemus nunc aliis, dum vivimus: qualì enim mensurâ menti fuerimus nunc, tali remittetur nobis. 5tò: Ex eo deniq; aggravari pænas purgatorii, quia animæ, vident nunc clarissimè, quàm facilè eas evitare potuissent, si medià, à Christo, & Ecclesia, provisà adhibuissent, dum in carne militarent, nos itaq; non negligamus, nè tunc affligat nos negligentia nostra.

PUNCTUM 2dum.

Quis modus juvandi animas?

COgita imò: plures animas esse in purgatorio, quæ pænas patiuntur propter defectus capitis & cogitationum. Ut ergo
 eas

eas juves ô Religioſe, collige guttas ſanguinis, de capite Chriſti ſpinis coronati deſtuentes, collige omnes aculeos ſpinarum, infixos Capiti Chriſti, & offer Patri æterno, ac Juſtitie ejus, pro animabus hiſce. Repræſenta dolores, & inclinatum caput Chriſti in cruce, ad expiandos defectus earum animarum; Simul autem cura, nè tuum caput ſit erectum per ſuperbiam, ſit durum per inobedientiam. Ordina item cogitationes tuas, ut ſint ſanctæ, & multum juvabis prædictas animas.

Cogita 2dò: Plures animas pati in purgatorio, ob oculorum & aurium abuſum. Collige lacrymas oculorum JESU cum ſanguine miſtas, offer DEO Patri, ad eluendos eos abuſus. Repræſenta eidem Patri, ſanguine ac livore offuſos oculos Chriſti, & aures ſpinis laceratas, tot blaſphemiis impletas, & roga, ut miſereatur earum animarum, propter JESU oculos & aures. Tu ſimul impone legem oculis tuis, nè curioſè vagentur, & ſepi aures tuas, nè auſcultent rumores vanos, ob amorem & ferendum auxilium iſis animabus.

Cogita 3tiò: non deeſſe animas in purgatorio, quæ ob guſtus & linguæ abuſum pænas purgatorii ſuſtinent. Offer pro illis Patri æterno, illud fel & acetum, quò, Chriſtus in Cruce potabatur. Offer Chriſti ſitim, & admirabile in tota paſſione ſilentium. Repræſenta aridas fauces, & hians in agone os; roga, ut earum miſereatur. Tu autem linguam tuam, ſtriçtò ſilentio coërceas, & guſtum à ſapidis mortifices, ut DEUS eas animas, Cæleſti gloriâ exſatiet.

Cogita 4tò: eſſe item ibidem tales animas, quæ ob manuum non rectum uſum, excruciantur; offer pro illis extenſa Chriſti in cruce brachia, & clavis perforatas manus. Collige ſanguinem de vulneribus manuum profluentem, & unà cum doloribus manuum repræſenta in ſatisfactionem, & abolitionem de-

fectuum, earum animarum: tuas quoq; manus affige cruci, tanquam clavīs, Regulā de tactu, & Regulā de non dandis & non accipiendis rebus sine facultate; & sic feres auxilium animab9.

Cogita 5tò: Inveniri quoq; animas in purgatorio, propter effusionem cordis sui, in varios creaturarum affectus; ut pro illis satisfacias, collige sanguinem cum aqua, de latere Christi effusum, offer DEO, apertumq; lanceā latus, & cor repræsenta. Atq; tuos affectus, abstrahere ab omnibus Creatis, transfer in DEUM.

Simili viā, satisfacies pro illis animabus, quæ patiuntur propter defectus commissos per pedes, aut per indulgentiam corpori suo, ejusq; immortificationem, colligendo sanguinem de omnibus corporis Christi membris manantem, & applicando animabus purgatorii, repræsenta DEO, vulnera Corporis Christi, pro illis, simulq; tui corporis mortificationem statuendo. Quid enim efficacius juvare potest animas, quàm sanguis & merita Christi, atq; oppositæ illarum animarum defectibus, virtutes, à viatore exercendæ?

PUNCTUM 3tium.

Quis modus, evadendi, vel alleviandi Purgatorii?

CONsidera, efficacissima evadendi, vel alleviandi purgatorii media, esse hæc, 1mò: Offensarum suarum ex corde remissio, nulliusvè vindictæ, sive à DEO sive ab hominibus requisitio, juxta infallibile Christi effatum: *Dimittite & dimittetur vobis.* 2dò: fortis & Religiosa omnium, in Religione occurrentium tribulationum & afflictionum, sine querelis sustentia: talis enim, par Martyribus efficitur. 3tò: qui in vita, specialiter, Christo passo & Crucifixo compatitur, evitat dolores purgatorii. 4tò: Ufus Sacramentorum accuratus, & actuum amoris DEI, atq; contritionis, plurimum minuit de purgatorio. Similiter, diligens u-

sus

sus Indulgentiarum. 5to: Tandem, qui in vita, animarum purgatorii curam habet, earumq; liberationem per pia opera, & mortificationes promoveret, earundem auxilium, post mortem experietur. Resolve te ad hæc omnia, & propone,

COLLOQUIUM.

Cum Christo Crucifixo, rogando, ut ille sanguine suo eluat omnes maculas expiandas per purgatorium, extinguatq; ignes purgatorii. Cum Beatissima, ut illa sit nobis propitia, in vita & in morte.

Fidelium animæ, per misericordiam DEI, merita & mortem Christi, Intercessionem Beatissimæ & Sanctorum omnium, requiescant in pace. Amen.

Pater: Ave: Anima Christi.

ACTUS SÆPIUS USURPANDI.

Educ de custodia animam meam, ad confitendum nomini tuo.

Psal: 141.

Requiescant in pace. Requiem æternam dona eis Domine.

RECOGITATIO INFERNI.

Congruentissimè Spiritus Sanctus, errantes à via Cælestis sapientiæ, monet Eccl: 9: *Nec ratio, nec sapientia, nec scientia, erunt apud inferos, quò tu properas. Descendamus igitur, monente Propheta, Psal: 54: in infernum viventes, serâ meditatione, nè descendamus morientes; illius antra, & tormenta revisamus, ut horreamus, & fugiamus. Idq; duplici meditatione præstabis. 1ma ostendet: quis? & qualis locus inferni? quivve modus evadendi? 2da: penas inferni examinabit.*

MEDITATIO. 1ma.

De Inferni loco.

Prel: 1: Collocatio loci, ante sulphureum, ac tenebrosum carcerem, plenum animabus damnatorum.

P:

Prel:

Prael 2: Petenda gratia efficacis Considerationis de panis inferni, quâ excitari valeas, ad perfectiorem vitam.

PUNCTUM imum.

Quis locus inferni?

COgita 1mò: Infernum esse locum exilii æterni, in quo exultant animæ à Deo, ad cuius possessionem creatæ sunt, à Cælo, tanquam à Patria sibi destinata, à Christo, Beatissima, & Cælitibus, & ab omni universorum bonorum aggregatione. Non providebant, vivendo, Deum in conspectu suo semper, proinde æternum ejus visione carebunt. Inhærebant viscosè terrenis, ideo à Cælis & Cælitibus exulabunt. Disce ô Religiose, nunc coram Deo ambulare, ut cum illo regnes in æternitate, disce terrena contemnere, ut Cælestem Patriam consequaris.

Cogita 2dò: Infernum esse locum desolationis, doloris, egestatis, cruciatuum, & quidem sine fine tolerandorum. Unde Isaias clamat c: 33. *Quis poterit habitare cum ardoribus sempiternis?* O quanta dementia! propter breves hujus vitæ voluptates, perennibus addici cruciatibus! *momentaneum est*, quod delectat, æternum, quod cruciat. Fuge Religiose delicias transiuras, ut æternas obtineas.

Cogita 3tid: Infernum esse carcerem teterrimum, æternis undiq; seris & claustris obsecratum, ex quo nullus exiit in æternum. *Ex inferno nulla redemptio*, in quo omnia mala, sine intermissione patiendâ occurrunt. Confregisti miser ô homo! jugum Christi, nimium tuæ libertati indulgendo, & eâ ad offensam Dei abutendo, ideo æternum incarceratus & ligatus, gemere debes. O! JESU pro me ligate, in carcerem apud Caipham detru e, libera me à vinculis peccatorum, nè inferni trahar rudentibus.

Cogita 4tò: Infernum esse locum gemituum, odiorum, maledictionum, desperationis, ubi erit fletus & stridor dentium; Nihil

hil ibi ad solatium, nihil ad recreationem, universa ad afflictionem & tormenta, futura sunt. Torquebuntur ibi oculi monstris, ac objectis abominabilissimis, pro curiositate videndi; quidquid spectabitur, marorem adferet. Auditus torquebitur ejulationibus, maledictis, desperabundis clamoribus, pro abusu aurium. Gustus, fame, siti: *Famem patientur ut canes, bibent fel draconum.* Odo- ratus, horrendo fatore, Tactus exercebitur summis doloribus; transierunt illae omnes delectationes sensuum, quas avidè querebant damnati, & nunc sola restat afflictio, & dolor. Vide, ô homo, quàm amarum sit, dereliquisse Deum, ob fugaces & vanas censuram illecebras. Momento præterit, quod oblectabat, ærærum durabit, quod cruciat. Abrenuntia omnibus hujus vitæ vanitatibus, horre omnia sæculi oblectamenta, amplectere Christi Crucem, sustine in vita dolores, nè in hunc locum afflictionis perpetuæ devenias. Roga per JESU Christi dolores, & vulnera, nè te permittat infascinari, hujus vitæ solatiis, sed teum solatium sit, vivere & pati cum Christo, ac mori in Christo.

P U N C T U M 2dum.

Qualis Inferni locus?

COgita 1mo: Locum inferni, esse tenebrosam, & horridum, non ibi sol, non luna, non stellæ, aliæq; sydera, vel minimum lucis radium ministrabunt; ipse ignis inferni uret, non lucebit. Potest illud Jobi de loco inferni occinî: *Vadam, & non revertar, ad terram tenebrosam, & opertam mortis caligine, terram miserie, & tenebrarum.* O quàm vanum tunc apparebit, lucem, plausus, ostentationem hujus sæculi affectasse! Quid tunc proderunt illæ in vita excellentiæ, speciositates, affirmationes? Melius fuit ad tempus vilificari, in umbris humilitatis vixisse, quàm ad tenebras exteriores, in æternum descendisse.

Cogita 2do: Locum inferni esse intolerabilibus fatoribus ple-

num, quot ibi erunt corpora, tot fatulenta cadavera, pestilentiorum mephitis exhalantia, quam omnes cloacæ sordidissimæ hujus mundi; ita, ut teste S: Bonaventura, si vel unius damnati corpus, in hunc mundum exportaretur, omnes confestim domos, pagos, urbes, provincias, totum aërem, & universum orbem, pestifera lue inficeret. Quid itaq; facient tota æternitate, infinita damnatorum cadavera? à tot annorum millibus, igne tartareo tosta, qualis odor ille erit, qui ascendit ex sulphureis, igneis globis, ex putoribus execrandis, ex obcæno volutabro carnalium fæditatum? quid ibi aget delicatulus? ubi nam erunt flosculi toties naribus admoti? ubi aromata? ubi balsama? ubi odorifera suffimenta? Respondet Isaias Cap: 3: *Erit pro suavi odore, fietor. Cura itaq; Religiose, ut hic sis, Christi bonus odor, nè illis fætoribus, putrescere cogaris.*

Cogita 3tio: locum inferni, esse famis Patriam: famem patientur ut canes Psal: 58. sicut enim canes, præ famis magnitudine, occupantur circa sordes, cadavera, fimeta, & quæcunq; alia ejectamenta; sic impii, ut canes famelici, se ipsos mordebunt, & consumere, vorando contendunt, ut Isaias c: 9. inquit: *Erit populus, quasi esca ignis, Vir Fratri suo non parcat, unusquisq; carnem brachii sui vorabit.* O quanta illa erit fames corporis damnatorum! sed quantò major animæ? scient, in aula Cælesti, æterni Patris mente accumbentes, torrente voluptatis potari: scient, quòd ipse Dominus accinctus, ministrabit accumbentibus, & interim damnatorum animæ, præ fame ululabunt, nunquam de illa mensa etiam micam percepturæ. Frustra quis, post mundi delicias, speret Cæli convivium. Ah! quantò consultius fuerat, corpus macerare à vitis, quàm æterna cruciari fame.

PUNCTUM 3tium.

Quis modus evadendi inferni?

Cogita imò: Efficacissimum medium, evadendi inferni, si ita
nunc

nunc vivas, ut eductus ex inferno; & cum S: Borgia, in totam tuam vitam, illo principio regulaberis: *Infernus, domus mea est.* Gravis tibi videtur disciplina Religiosa! considera graviores esse domi tuæ, in inferno; incommoda habitatio? non ad gustum cibibus? non ad mentem vestitus? reflecte te, qualia hæc omnia haberet domi tuæ: *Infernus domus mea est.* Socii tibi intolerabiles videntur? nunquid non intolerabiliores dæmones & damnati? &c. 2dum Medium est, sæpe versari mente in inferno, spectando ibidem plures damnatos, propter pauciores & minores culpas, quam tuæ sint; & teipsum reum ac dignum aternis pœnis agnosce, atq; coram Deo, in contrito corde, confitearis 3tium Medium, servire Deo, per omnes actiones suas, ob solam ejus Bonitatem, ac dignitatem, & propter illam ipsam, non verò ob timorem pœnarum, vel spem præmiorum. 4tum Medium, sæpius omnes actiones vitæ suæ, balneare in sanguine, & vulneribus Christi, additumq; ejus passioni esse meditandæ. Propone hæc omnia. Pele à Deo auxilium.

COLLOQUIUM.

Cum Christo Crucifixo. Rex tremendæ majestatis, qui salvandos salvas gratis, salva me fons pietatis. Recordare JESU pie, quòd sum causa tuæ vitæ, né me perdas illâ die. Quærens me, sedisti lassus, redemisti, Crucem passus, tantus labor, non sit cassus.


Pater: Ave: &c: An: Christi &c:

ACTUS SÆPIUS USURPANDI.

TImor & tremor, venerunt super me, & contexerunt me tenebræ. *Psal: 54.*

Domine, quò ibo à Spiritu tuo, & quò, à facie tua fugiam? si ascendero in Cælum, tu illic es, si descendero in infernum, ades. *Psal: 138.*

MEDI-



MEDITATIO 2da.

De Pænis inferni.

Præf: 1: Colloca te coram foco sulphureo, animabus damnatorum pleno.

Præf: 2. Pete gratiam fructuosæ Meditationis de pænis inferni.

PUNCTUM 1mum.

De Pena damni in inferno.

COgita, pænam damni in inferno, illam esse, quæ aufert Deum summum bonum homini, ad cuius boni possessionem est creatus. Metire ô homo Deum! pretium ejus expende, bonitatis illius abyssos collige. Totum istum Deum, aufert tibi pæna damni, carebis Deo, & carebis in æternum, propter peccatum momentaneum. O verè non sunt condignæ delectationes peccati, in hac vita, ad futuram pænam damni! 2dò: Pæna damni privabit damnatum, charitate Dei, ejusq; gratiâ & amicitia, privabit visione & consortio Dei, Redemptoris sui; privabit omni fructu Incarnationis ejus, privabit Societate Beatissimæ & Sanctorum, omniumq; Electorum Dei, privabit lumine gloriæ Dei, donis ac dotibus omnibus supernaturalibus, item deliciis omnibus beatitudinis æternæ, ad quarum tamen fruitionem æternam, à Deo conditus, à Christo redemptus, omnibusq; mediis, abundanter instructus fuit, sed propter suæ proptiæ voluntatis infelicem libertatem, quâ abusus est, omnia perdidit. 3tiò: Pæna damni, privabit damnatum, omni solatiò hujus vitæ, etiam corporalis. Gutta n aquæ usq; hodie requirit, ille dives in inferno sepultus, nec obtinuit, nec obtinebit in æternum. Quis non formidabit ejusmodi pænam? Quis non eliget, omnia potius, hujus vitæ mala pati?

PUNCTUM 2dum.

De Pena sensus.

COgita, pænam sensus procedere ab igne, qui ita est vehemens, ut

nec

nec omnes omnium hominum lacrymæ, nec omnia flumina, ejus vel minimam scintillam extinguere valeant; & licet comburat damnatos, non tamen consumit. Singula ibi membra corporis, venæ, arteriæ, fibræ, intestina, viscera, & ossa, in stagno illo sulphurei incendii, tanquam spongia in medio mari, ardebunt igne inextinguibili. Et quis ex vobis, qui nihil, nisi delicias expetitis, qui ducitis in bonis dies vestros, habitare poterit cum igne devorante? 2dò, Procedet pæna sensûs à vermibus, de quibus S. Anselmus, in Elucidario sic ait: 3tia in inferno pæna est, vermes immortales, idest serpentes & dracones, visu & sibilô horribiles, qui ut pisces in aqua, ibi vivunt in flamma. Itaq; scaturiet undiq;, per nares, oculos, aures, os, examen fatidissimum vermium, qui perpetuis morribûs, omnia intestina, & singula membra, acerrimè vellicabunt. Molestus nunc vel unius vermiculi morsus, quantò acerbior erit, illa per tot vermes laniena? 3tiò: procedet à fæore, ex tot compactis halecum instar, & ardentibus corporibus exhalante. Miser, & miserabilis peccator, qui peccatorum suorum sordes, non exhorruit in vita, in æternum ad inferni cloacam dejicietur. 4tò procedet, à continuo rugitu, & gemitibus damnatorum. 5tò: procedet, ab omni genere acutissimorum morborum, cunctorumq; malorum aggregatione. Vide ô homo, nunquid non consultius, generosè & fortiter, hujus vitæ sufferre mala? & cum S: Augustino petere: *Hic ure, hic seca, modò in æternum parcas.*

PUNCTUM 3tium.

Æternitas pænarum.

CONsidera, pænam pænarum in inferno esse æternitatem, hæc enim, fons est rabiei, & desperationis; tolerabilius esset, gravissimis etiam torqueri Cruciatibûs, si illi sperarentur, saltem aliquando finiendi; sed quia hi nunquam terminabuntur, & sine o-

Q

mini

moi cessatione continuabuntur in æternum; hoc denuum est terribilium terribilissimum. Deme æternitati mille annos, deme mille millia annorum, deme tot sæculorum millia, quot stellas numerat Cælum, quot atomos ær, quot guttas Oceanus, nec unicum momentum æternitati detraxisti; ita enim manebit infinita, sicut ante fuit, manebitq; tamdiu, quamdiu perseverabit esse Deus. Apprehende hæc omnia anima mea. Unius momentaneæ delectationis, tota infelix æternitas, pana est. O DEUS! ergone unius diei febricula nobis molesta est? & in molli lecto, inter morsus pulicum durum videtur, per unam noctem decumbere? digitum ardenti candelæ admotum, unico quadrante tenere intolerabile? Ah! quid erit, semper, & æternum, à visione Dei exulare, igne atrocissimo urfi, die, noctuq;, mediam inter caliginem, fumum, ac sulphur, versari, excruciarî modis omnibûs, sinè ullo solatii levamento, inter ejulatus lamentabiles, ac rugitus damnatorum, in contubernio dæmonum vivere, desperatione rumpi, & rabie nunquam lenienda, ac sic vivere, æternum moriendo, & mori, æternum vivendo. Ergo, monente D: Bernardo, lib: de ani: c: 3. *Alterum è duobus eligamus, aut semper cruciari cum impiis, aut perpetuò letari cum Sanctis; bonum siquidem, & malum, vita & mors, ante nos sunt posita, ut, ad quod voluerimus, manus extendamus. Vide ô Religiosè, ut cum timore & tremore, certam tuam facias vocationem, gratulaberisq; tibi, quòd sis procul à laqueis, quòd sis in domo Dei, atq; onus Religionis libenter feras, quò à diaboli iugo liberaris.*

COLLOQUIUM.

O! Anima mea, æternitas te bona, vel mala manet, & in potestate tua est, cum DEI gratia, bonam consequi. Cur ergo non incipis, seriò pro Cælo laborare? quid tibi cum transitoriis vanitatibus? transibunt hæc omnia, quid te ex rebus mundi contrista-

tristabitur quid pro æternitate bona obtinenda grave erit? Æterne DEUS, qui me æternum creâsti, nò permittas me, quæso, perire in æternum.

Pater: Ave &c. Anima Christi.

E J A C U L A T O R I A

Oratio in Singulas horas.

O hora, quomodo transiisti! ô æternitas, quando, & quæ venies?
ACTUS SÆPIUS USURPANDI.

DOMINE, edue ab inferno, animam meam, salva me à descendentibus in lacum. *Psal: 29.*

Infernus domus mea est. S: Borg:

Quis poterit habitare cum igne devorante? *Isaie 33.*

Lata porta, & spatiosa via est, quæ ducit ad perditionem. *Mat: 7.*

Gehennæ meditatio, principium salutis. *Tertulianus.*

Fieri non potest, ut anima, de gehenna sollicita, citò peccet. S:

Chri: hom: 2. in Epist: ad Thessal:

Nullus ex his, qui gehennam habet ante oculos, incidet in gehennam. *Idem.*

Qui perfectè vivit, non habet, unde in inferno damnetur. S:

Ber: C. 4. de modo bene vivendi.

RECOGITATIO CÆLI.

PRævenienda nobis cogitatione Patria Cælestis est, ac mentis conversatione adæunda, antequam illam ingredi mereamur.

Non habentes enim in terris manentem Civitatem, ad illam, omnibûs votis & desideriis, ferri debemus, quam perennaturam credimus. Investigemus itaq; , quid Cælum? quid in eo agatur, & quæ ibidem gaudia?

M E D I T A T I O

De Cælo.

PRæl: 1. Videbo cognatum, defixis in Cælum oculis, clamantem: O quàm sors terra, dum Cælum aspicio! Q₂ PRæl:

Præl: 2: Petam gratiam, excitandi fervoris spiritualis, per desiderium Patriæ Cælestis.

PUNCTUM I^{um}.

Quid Cælum.

CONsiderandum 1^{mo}: Cælum, esse sedem DEI, & Sanctorum Patriam, in qua, omnibûs perfruuntur bonis; jam ibi non est fletus, neq; dolor, neq; mors ultra erit, non timor aliorum malorum &c. Quis non desiderabit ad tam amabilem & jucundam transire Patriam? non alia tamen via perveniendi, quam per magnas tribulationes, & dolores hujus vitæ. Sed quid hæc sunt, ad futuram gloriam? Si multa, & gravia perferunt homines, propter temporale lucrum, ac corruptibilem coronam, quidnâ nos, toleremus mala, propter æternam, & incorruptibilem gloriam? Non sunt condignæ passionibus hujus temporis, ad futuram gloriam, quæ revelabitur in nobis. *Rom: 8.*

Considerandum 2^{do}: Cælum, esse locum amœnitatis, & pulchritudinis ex quo Sancti, nunquam movebuntur. Superat autem omnia hujus mundi palatia, pulchritudines, suavitates, solatia, ita sicut Cælum, superat terras. Principes hujus mundi, magni æstimant, ampla, ornata palatia, picturas, peristromata; quantò plûs æstimandum est Palatium Cæleste, ad cujus comparisonem, omnia hujus mundi palatia, hirundinum nidi sunt, eorum stabula, case rusticæ &c. O! Cæleste Palatium quando perveniam, & manere incipiam in atrîis tuis? Finge urbes gemmeas: ad Cælum hæc nihil erunt. Cælestibus enim, omnes terrenæ gemmæ, & quæcunq; pretiosa, nequeunt comparari. Quantò itaq; Beati perfruuntur gaudiô, in tam nobilissimo habitantes Palatio. Sed in hanc Civitatem, nihil introibit coinquatum, nihil imperfectum, nihil tepidum. Videamus ergo, ut omnimodam perfectionem virtutis comparemus, quò sic idonei illâ domo, evadamus.

Consi-

Considerandum 3tio: Cælum esse Civitatem ornatissimam, mundissimam, muri ejus lapis pretiosus, & plateæ ejus, aurum mundum, singulæ verò portæ, singulæ Margaritæ. O quàm desiderabilis hæc Civitas est! Quid igitur hæreo in his terrenis? cur mentem & affectum non sublevo ad Cælestia? *Heu mihi! quia incolatus meus, prolongatus est.*

Considerandum 4to: Cælum esse Patriam luminum & gaudiorum, & omnis sinè intermissione lætitiæ. Quicumq; eam semel adeptus fuerit, nunquam ab ea, ejusq; bonorum usu ejicietur. Quantò ergo desiderio, ad illam Patriam anhelandum esset, ex hac lacrymarum valle. O quando veniam & apparebo ante faciem tuam DEUS meus? quando, tua fruar pulchritudine? quando exosculabor JESU mei gloriosa vulnera? quando stringam plantas Beatissimæ? Quando congratulabor, omnium Sanctorum felicitati æternæ? Cupio, ah cupio dissolvi, & esse cum Christo!

P U N C T U M 2dum.

Quid in Cælis agatur?

Considerandum 1mo: In Cælis suavissimam esse omnium inter se familiaritatem, ubiq; Divinæ laudes personant & in omnibus vicis ejus, Alleluja cantatur. Pulchritudo singularum Civium, est admirabilis, nam animabus referent divinitatem quâ pleni erunt. Post judicium autem universale, corporibûs fulgebunt sicut sol. Quanta voluptas, tot intueri quasi Deos, quot Beatos, suis locis, ordinibûs, ornatibûs, pulcherrimè dispositos & instructos: dignitate omnes sunt Filii Dei, Cives ac Reges Cæli, triumphatores mundi, carnis, demonis, sacrificium laudis perpetuæ, Deo immolatum. Prius tamen hic ornanda est anima virtutibûs variis, ut in Cælo, ejus resplendeat pulchritudo. Curasne hæc ornamenta animæ? Prius hic caro cum suis concupis-

scientiis, crucifigenda est, ut in felici æternitate, Solis lucem æmuletur. Vide, quas mortificationes adhibes, quibus modis atteris corpus tuum, ut spiritus subicias.

Considerandum adò: Civium illorum convictum, esse jucundissimum; singuli enim, nōrunt singulos nominatim, cum singulis, quando placebit, colloqui, agere familiariter, poterunt; singuli singulorum sentient benevolentiam, & amicitiam, omnes se se mutuo amore, sincerè prosequuntur, nec minùs gaudebunt de aliorum, quàm de suis propriis bonis. O! quàm bonum, & pulchrum, fratres habitare in unum. Hic illach aritas inchoanda est, ut ibi continuetur. Expende, quâ benevolentia, & reverentia, cum fratribus agere consuevisti?

Considerandum 3tiò: Civium beatorum totam vitam esse: contemplari, amore frui, delectari, exultare, laudare, benedicere, gratias agere, gratulari DEO, & Cælitibus universis. Et omnes ex ea contemplatione, ardentiq; amore in Deum, qui eos tantis bonis cumulavit, in perpetuas laudes atq; gratias erumpent. Laudabunt illum ex omnibus operibus, & beneficiis ejus, ex opere creationis, gubernationis, redemptionis, justificationis, ex operibus misericordiæ, justitiæ, ex præmio justorum, & pænis impiorum, ex omnibus occultis & manifestis judiciis ejus, deniq; ex tota rerum creaturarum dispositione. Omnia enim clarè cognoscentes, videbunt consilium DEI de singulis, ac præ magnitudine admirationis, voluptatis, & gaudii, de omnibus sigillatim laudabunt Deum, benedicent, glorificabunt, agent gratias immortales. Desidera eorum Cætui te adnumerari & æternum in iis actibus perseverare. Priùs tamen in hac vita iisdem assuesce, constanterq; ac fideliter, DEO servire per omnia contende.

PUNCTUM 3tium.

!Que Beatorum Cælitum gaudia ?

CONsiderandum imò: magnum fore gaudium Beatis ex eo, quod videbunt ex una parte liberationem sui à maximis malis, & periculis vitæ hujus; ex altera parte, securitatem de sua felicitate æterna. Videbunt infra se impios, flammis involutos æternis, tanquam struem lignorum ardentem. Videbunt pericula malorum, in quibus ipsi fuerunt, & per Dei misericordiam, non perierunt. Conferent suam felicitatem cum eorum miseria, & sic erumpent in gaudia, & laudes ejus. Et tu, ô homo: vide, ut vocationem tuam certam facias quantum ex te, longè autem ampliùs, totis viribùs obsequere, nutriti omnium, gratiæ, salvanti te, & suaviter ad omnia bona excitanti.

Considerandum adò: percipient item gaudia Sancti, ex dotibus corporis; fulgebunt enim corpora Sanctorum instar Solis, erunt immortalia, inviolabilia, impassibilia, agilia, atq; velocia instar fulminis, subtilia & penetrabilia instar radii solaris, ubiq; momentò temporis, consistere poterunt. Vide tamen, quod ad eas dotes, non per otium & delicias, sed continuam in omnibus mortificationem perveniatur.

Considerandum 3tìò: maximum Beatorum gaudium, futurum, ex visione & fruitione DEI: hoc enim gaudium, omnia alia superabit. Nam quò Deus est præstantior omnibùs, eò etiam gaudium, quod ex eo procedit, est majus præ omnibus. Gaudebunt enim Sancti, imprimis de donis Dei intrinsecis, quibùs ille nimium cumulatus est; nimirum, de illius infinita potentia, sapientia, bonitate, pulchritudine &c. Gaudebunt item, de bonis ejus extrinsecis, ut vg: de gloria Dei, quam habet ex humanitate Christi. Item, quam habet ex perpetuis laudibus, honoribus &c. Item, quam habet ex statu Beatorum, & splendore illius

Civita-

Civitatis. His consideratis, accendamus quàm maximè in desiderium Patriæ Cælestis, sed simul etiam in maximum ardorem amoris divini, fervorisq; in ferventissimo & absolutissimo ejus obsequio, ut hic incipiamus gustare, quàm suavis est Dominus. Postea verò satiabimur, cum apparuerit gloria ejus.

COLLOQUIUM.

O! Domine, auge fidem, auge amorem, auge æstimationem, auge desiderium beatitudinis Cælestis in me, & simul auge conatum, auge studium, auge robur, auge sapientiam, auge perseverentiam, ad negotiandum, ad laborandum, ad patiendum, ad moriendum, pro vita æterna. O amare! o ire! o sibi perire, & ad Deum pervenire! O domus Dei! o Civitas! ô Congregatio & Ecclesia Sanctorum, quis te dignè amabit? quis dignè æstimabit? laudabit?

ACTUS SÆPIUS USURPANDI.

Sordet mihi terra, dum Cælum aspicio *S: Ign:*

Satiabor, cum apparuerit gloria tua. *Psal: 16.*

Quàm magna multitudo dulcedinis tuæ Domine, quam abscondisti timentibus te. *Psal: 55.*

O Israël! quàm magna est domus Dei, & quàm ingens locus possessionis ejus. *Baruch: 3.*

Quàm dilecta tabernacula tua Domine virtutum, concupiscit, & deficit anima mea, in atria Domini. *Psal: 83.*

HORA QUIETIS

DANDA CONSIDERATIONI

Supra Timorem DEI semper conservandum.

Constitutus sub pedibus Crucifixi, pete gratiam fructuosæ Considerationis.

I. **M**axima cura Religiosi viatoris sit, ut semper & ubiq; conservet timorem DEI, monente Apostolo, Philip: 2. *Cum metu,*

metu, & tremore vestram, salutem operamini. Multa enim bona præstat animæ, timor DEI. Nam.

1^{mo}: Ex timore DEI potest quisq; haurire vitam spiritua-
lem, & in præsentī per gratiam DEI, & in futuro, per gloriam
in felici æternitate. Cūm Spiritus S: Prov: 14. doceat: *Timor
Domini, fons vitæ.* Et S: Aug: super Psalm: *Timor præsens, se-
curitatem generat sempiternam.* Arsenius, cūm nullum lacryman-
di finem faceret, rogatus, an non cum tot lacrymis securus ad
Deum accederet? respondit: Fratres mei metuo, & nec momen-
tō sinē metu fui, ex quo hanc vitæ normam secutus, me DEO
consecravi.

2^{dō}: Nihil efficacius est, timore Dei, ad expurgandam &
tuendam animam à peccatis, quod sapiens Prov: 16. declaravit.
Per timorem, declinat omnis à malo. Et Ecclesiastici 10. dicitur:
Non est major illo, qui timet Dominum. Item c: 23. *Nihil melius
est, quàm timor Dei.* Huic veritati subscripsit Mellissius Do-
ctor, de mod: bene viven: ser: 4. *Nihil nos magis removet
ab omni peccato, quàm timor, & amor Dei.* Anno 1545: Valliso-
leti, cum instar miraculi haberetur, Patres Societatis, cum o-
mni genere hominum versari innoxios, & Melchior Canus joca-
retur in Curia, haberi à Patribus herbam, per quam interime-
retur libido; hic rumor ad Regis etiam aures pervenit, proinde
Joannem de Zuniga Magistrum morum, misit ad Patres de hac
herba inquisitum, cui Pater Araozius Provincialis respondit,
omnino se habere talem herbam, quæ non modò contra libidinem,
sed etiam contra alia vitia præsentissimum sit remedium, eam au-
tem communiter: Timor Dei, nuncupari

3^{tiō}: Timor Dei, excitat sollicitudinem, & desiderium pla-
cendi Deo, & servandi ejus mandata studium, prout testatur sa-
piens Eccl: 1. *Qui timent Dominum, inquirent quæ beneplacita sunt*

ei. Ibidem. *Qui timent Dominum, custodiunt mandata ejus. Eo praedio usa est Susanna; cum enim invitaretur ad nefanda, timore Dei deterrita respondit. Melius est mihi, absq; opere incidere in manus vestras, quam peccare in conspectu Domini. Dan: 13.*

4to: Timor Domini affert fortitudinem, & generoso Spiritu replet mentem. Ut sapiens Eccl: 34. innuit. *Qui timet Dominum, nihil trepidabit & pavebit; quoniam ipse est spes ejus. Et Prov: 14. In timore Domini, fiducia fortitudinis. Idem S: Cyrillus in Isaiam scribens, expressit, ubi ait: Tenendum est: animam Dei timore, velut murò obseptam, fortem esse & quodammodò invictam. S: Bernardus, imus S: Francisci Socius, moriens dicebat: Nunc sentio, quid sit in Dei timore vixisse, nunc enim pro toto mundo, nollem me aliam vitam instituisse.*

5to: Timor Dei, tribuit jucunditatem. Tum quia, Deus voluntatem timentium se faciet. Psal: 114. Tum quia: Timenti Dominum, non occurrent mala. Eccl: 23. Tum quia timenti Dominum, bene erit in extremis. Eccl: 1. Tum quia, Timor Domini, sicut paradusus benedictionis. Eccl: 40. Tum quia, timor Domini, delectabit cor, & dabit letitiam & gaudium, & longitudinem dierum. Eccl: 1. Tum deniq; quia Regius Vates canit Psal: 30. *Quàm magna multitudo dulcedinis tuæ Domine, quam abscondisti timentibus te.*

6to: Timor D E I conservat in nobis omnes virtutes; & in via perfectionis, constantes facit. Unde sapiens, Eccl: 27. monet: *Si non in timore Domini, tenueris te instanter, citò subvertetur domus tua. Non frustra omnibus Sanctis, insinuat timorem Dei, Propheta: Psal: 33. Timete Dominum omnes Sancti ejus, quoniam non est inopia timentibus eum. S: Petrum de Alcantara, cum vox & vita iam deficerent, nondum saluberrimus hic timor deserebat. Cum enim unus Fratrum, algentem in Cilicio, vellet adducta veste operire, exclamavit: sine Fili, sine me, adhuc certandum est,*

non-

nondum extra ictum sumus, quid arma ponamus? Sub hoc timoris præsidio, vivere quisq; satagat, nî in arrepto perfectionis itinere, deficere velit. Bonam hac de te instructionem S: Augustinus in Psal: 32. dedit. *Si creaturæ sæviant! Deum time, non illas. Homo te odit? Deum time. Et sicut solus Deus amandus, vel propter Deum: ita solus Deus timendus, vel propter Deum.*

2. Expende Causas, ob quas Deum timere debeas. Abbas Elias tria dixit esse, quæ timorem incutiant cogitanti. 1. mò: Egressus animæ è corpore. 2. dō: Evocatio ad tribunal Dei. 3. tiō: proferenda à Judice Sententia. Sanctus verò Bernardus ser: 2: in Cant: censet: ideo timendum esse Deum: *Nè crucieris in gehenna, nè excludaris à gloria, nè deseraris à gratia.* Posset quidem blandiri tibi non nemo de innocentia vitæ, de immunitate à peccato. Sed audiet S: Joannem Evangelistam 1. Ep: c: 1. *Si dixerimus, quoniam peccatum non habemus, ipsi nos seducimus, & veritas in nobis non est.* Et Apostolum Gentium, 1. Cor: 4. *Nihil mihi conscius sum, sed non in hoc justificatus, qui autem judicat me, Dominus est.* Si autem post tot Confessiones exactè peractas, extimet quis propitium habere Deum, nondum tamen sine timore vivat, monente Spiritu S: Eccl: 5. *De propitiato peccato, noli esse sine metu.* Audiit S: Magdalena ex ore ipsius Christi, dimissa tibi peccata, & tamen usq; ad mortem suam, pro illis produxit pænitentiam. Rediit Petrus post suam negationem in amicitiam cum Christo; flere tamen cum vita desiit. Audiit David, ex ore Prophetæ, translatum esse à se peccatum; per singulas tamen noctes vitæ suæ, non cessavit lacrymâ rigare lectum suum. Judith: 8. *Vidua illa Judith, erat formosissima, quia timebat Deum valde, nec erat, qui loqueretur de ea verbum malum.* S: Hilariion Abbas, in extremis politus, dicebat. *Egredere anima mea, quid times? septuaginta annis servivisti Deo, & adhuc egredi times?*

R 2

S:

S: Chrysostomus, semper in conspectu suo voluit depictam inferni imaginem. Si itaq; hæc & aliæ Cæli columnæ contremiscunt, quomodo nos ventô agitatæ arundines, non concutimur timore?

3. Intellige, quò te hic timor deducere debeat? non in desperationis baratrum, non in vanas scrupulorum apprehensiones, & inextricabiles conscientiæ anxietates. Sed ejusmodi timor, hæc nobis præstare bona debet. 1mò: ut cauti vivamus, & cum sedula ad omnes circumstantias reflexione, quid? quomodo? & quando? & in cuius præsentia hæc & illa cogitemus, loquamur, & agamus? 2dò: ut evitemus, non solum peccata, sed etiam omnes occasiones peccandi. Vitemus etiam otium, negligentiam, ac tepiditatem, in omnibus operibus vitæ Religiosæ. Urgente nos ad id Spiritûs S: præmonitione, Eccl: 18 *homo sapiens, in omnibus metuet, & in diebus delictorum, attendet ab inertia.*

§. TERTIUS.

PRÆSIDIIUM ET ADJUMENTUM 3tium.

Conversio ad DEUM per Pœnitentiam.

AGnoscat Viator Religiosus, non contemnendam sortem suam, si constanter adhæserit Dei servitio, metuat infelicitatem, si cum Filio prodigo, Regionem longinquam petere voluerit. Quocunq; tamen passu, quis à Patre recesserit, vestigiis Filii prodigi; ei redeundum est ut ad pacem & tranquillitatem animi perveniat. 1ma, itaque meditatione, sors & infelicitas Filii prodigi expendetur. 2da: ejus conversionis circumstantiæ exponentur. 3tia meditatio, Veram pœnitentiam, conformabit conversioni Filii prodigi. 4ta: tandem, pacem & tranquillitatem animi persuadebit.

MEDITATIO 1ma.

De Filio prodigo.

Præl: 1: Colloca te coram Christo, narrante historiam de filio prodigo.

Præl:

Præf. 2. Pete gratiam fructuosæ Meditationis, ex qua concipias Spiritum semper adhaerendi Deo.

P U N C T U M 1^{um}.

Felicitas Filii, in domo Patris, manentis.

Considera, quanta felicitas hujus Filii, quamdiu intra domum adhereret Patri? imò enim sine sua cura, labore, & solitudine, in omni rerum abundantia, & affluentia vixit, sive quò ad victum, sive quò ad amictum, sive quò ad habitationem &c. 2dò. Ab omnibus honorabatur, ut Filius. 3tò. Domestici Patris inserviebant ei. 4tò. Inter viros honestos, ac honoratos versabatur. 5tò. Bene vestitus incedebat, & lautè volvebatur. Nonne & tua, Religiose, similis, aut major est felicitas, in domo Religiosa, adhaerenti, Deo? Per ingressum Religionis, factus es specialiter Filius magni Patris, Domini Dei, frater verò JESU Christi, accepisti jus ad Caelestem hæreditatem. Providet tibi Deus omnia commoda absq; tuo labore, & solitudine; ornavit te Deus tot donis, dedit tibi donum fervoris religiosi, ad serviendum DEO, ad contemnenda terrena, ad observationem Regularum. Versaris inter tot viros emeritos, Sanctos, prudentia & virtute, conspicuos. Alii Fratres, inserviunt tibi cum charitate, Æstimasne hanc sortem tuam? gratisne vivis Deo, quòd te in domo sua conservet? Non afficerisne cum Filio prodigo, tædiis, in domo Dei? non indulgesne cupiditatibus tuis, ut abeas in Regionem longinquam? Curasne conservare Spiritum, quo te Deus animavit in primo ingressu & vestis Religiosæ assumptione. Obsumma te in proposito vocationis tuæ.

P U N C T U M 2^{um}.

Summa infelicitas Filii, domum Patris deferentis.

Considera imprimis, ingratitude hujus Filii, in Patrem; qui accepta portione substantiæ, reliquit Patrem, contempsit

domum suæ felicitatis, ab. it in Regionem longinquam, & cum magno dedecore Patris, ac domûs suæ, omnia abligurivit. Cogita 2dò: infelicitatem ejus; ad tantam enim miseriam devenit, ut etiam pane caruerit, ex tam ditissimo Patris filio, factus est egenus, ut porcos pascere cogeretur, cuperetq; satiari de siliquis porcorum. O sortem infelicissimam! hoc ipsum fit cum omnibus, qui se à Deo elongant, suæ libertati, & cupiditatibus indulgent, dissipatis enim donis Dei, & illo primævo spiritûs fervore extincto, ad tantam egestatem Cælestium solationum perveniunt, ut siliquis impleri cupiant, hoc est, commoda sensuality, & oblectationes sensuum quærant, domum Religiosam deferant, & in mundo, apud Deum, & homines, contemptibiles vivant. Vide, utrùm mores tui ad eam infelicitatem non tendant? utrùm non magis ad sensuality, quàm ad spiritualia, propendeas? Pete à Deo, ut te, in primævo spiritûs fervore, conservet & augeat. Redde mihi Domine lætitiâ salutariis tui, & spiritu principali, confirma me.

PUNCTUM 3tium.

Conversio Filii ad Patrem.

CONsidera, quid moverit filium, ut rediret ad Patrem. 1mò: illum movit, egestas summa, ut ipse fatetur: *fame pereos.* 2dò: movit illum, domûs paternæ abundantia, quam recogitabat, dicens: *Quanti mercenarii, in domo Patris mei, abundant panibus.* 3tò: movit eum bonitas Patris, & spes de ejus Paterno erga se affectu, *Surgam, & ibo ad Patrem meum.* 4tò: deduxit eum ad patrem, animosa Confessio, & accusatio sui, atq; consilio, ad quam se generosè resolvit. *Surgam, & dicam: Pater, peccavi in Cælum & coram te, jam non sum dignus vocari filius tuus.* Hæc eadem, quemvis nostrum debent movere, ut se abstrahat à rebus terrenis, & ad Deum ejusq; unionem redeat. 1mò: Expende per seriam reflexionem, quòd, extra Deum, nihil est, nisi summa egestas, nihil enim crea-

creatum exsatiare potest, cor & appetitum nostrum. 2dò : recogitando abundantiam donorum, ac beneficiorum Dei, quæ in nos effudit. 3tò : considerando bonitatem Dei, quâ semper paratus est, ad nos recipiendos in sinum suum paternum. 4tò : si confiteamur peccata nostra, & confundamur de illis, ad omnem pro illis confusionem, & satisfactionem nos resolvamus. Vide, utrûm hîsce mediis, redeas ad Deum? Recogitasne sæpiùs vanitatem rerum temporalium? Bonitatem ac beneficia Dei, quibûs, te prævenit? Resolvistne te semper ad animosam Confessionem peccatorum, quæ facere non erubuit? Erigistne te, in spem de remissione peccatorum, de Divina pietate in te suscipiendo? Dic cum filio prodigo : *Surgam, & ibo. Ecce Domine defero, & abstraho me ab omnibus nugis, quæ me hucusq; detinebant, & totus rubore suffusus venio ad te. Peccavi in Cælum & coram te non sum dignus vocari filius tuus; sed fac me unum de mercenariis, fac unum de mancipiis tuis. O Domine! quidquid vides vinculorum, à creaturis, cordi meo injectorum, dirumpe hæc omnia, & ego sacrificabo tibi hostiam laudis.*

Pater: Ave: Anima Christi.

ACTUS EJACULATORII.

Surgam, & ibo ad Patrem meum, & dicam ei: Pater, peccavi in Cælum, & coram te, jam non sum dignus, vocari filius tuus. *Luc: 15*
Reminiscere miserationum tuarum Domine, & misericordiarum tuarum, quæ à sæculo sunt. *Psal: 24.*

Confitebor adversum me, injustitiam meam Domino, & tu remittes impietatem meam. *Psal: 31.*

Domine, ante te omne desiderium meum, & gemitus meus, à te non est absconditus. *Psal: 37.*

MEDITATIO 2da.

De Conversione peccatoris ad instar Filii Prodigii.

Præl: 1. Statue tibi ob oculos, Filium, humiliter ad pedes Patris prostratum

fratum, dicentem cum lacrymis: *Pater, peccavi, non sum dignus vocari filius tuus.*

Præl: 2. Pete gratiam, ut parâ animô & affectu, ad Deum, Patrem redeas, & pro delictis pœnitentiam agas.

PUNCTUM Ium.

Conversio peccatoris, similis conversioni filii prodigi.

Considera omnes circumstantias, in Conversione filii prodigi ad Patrem, intervenientes, ut illos observes in tui conversione ad Deû. 1mò enim, filius prodigus, vix est reversus in se, hoc est, vix ex illustratione Dei, agnovit, quòd à recto deviaverit; statim de Conversione ad Patrem cogitavit, nec differens de die in diem, de anno in annum, surgens absq; mora, ivit ad Patrem, & confessus est delictum suum. *Pater, peccavi &c.* erubuit, pœnitentiam egit, ità decet verè pœnitentem, ut citò convertatur, sine dilatione pœnitentiam agat, nec contemnat patientiam DEI, ex ejusq; bonitate, licentiam sibi peccandi faciat, procrastinationeq; augeat difficultatem suæ pœnitentiæ, Cùm enim quis non vult, dum potest, saepe punitur à Deo, ut non possit, cum voluerit. 2dò: Regionem longinquam deseruit; ità verus pœnitens, debet deferere, ac despiciere mundum, ejusq; vanitates, & omnia, quæ elongant à Deo. 3tò: dimisit porcos, & siliquas eorum. ità pœnitenti, dimittenda sunt peccata, spernenda & cum suis concupiscentiis, per varias mortificationes crucifigenda caro, detestandæ oblectationes sensuales. 4tò: Filius rediit in domum Patris sui; ità & pœnitens, collectis omnibûs suis affectibûs, quibûs vagabatur per creaturas, & plenè abstractis, debet mente & corde in domo Domini Dei versari, nempe in Templo, in Cælo, in orationibus. 5tò: Filius Centones suos deposuit; debet & pœnitens, deponere omnes pravos habitus, & inclinationes ad malum, debet se expoliare omni affectu peccandi; alioquin, suspecta ejus pœni-

pœnitentia. 6to: Filius induit vestem pretiosam, & pœnitens debet induere Christum, exuens opera tenebrarum. 7mo: Sicut filio prodigo, datus in manum annulus, ita & pœnitens, debet se Deo desponsare per firmum propositum & stabilem voluntatem non peccandi. 8vo tandem: Filius ad mensam Patris edit, ita & pœnitens virtutibus ornatus, & variis actibus præparatus debet accedere ad mensam Eucharisticam, filiali & fiduciali affectu. Vide, utrum tua Conversio ad Deum, ac pœnitentia, omnes has conditiones & circumstantias complexa est? Reliquistine mundum, non solum corpore, sed etiam animo & affectu? ut cum S: Paulo dicere possis: *Mihi mundus crucifixus est; hoc est: illum aversor & execror, tanquam patibularium. Displicentne jam tibi omnes sensualitates, non secus ac siliquæ porcorum? Desponsastine te Deo, per firmum propositum, & voluntatem, illi constanter adherendi?*

O Domine! nò permittas me separari à te.

PUNCTUM 2dum.

Conversio, debet esse cum satisfactione.

CONsidera, non sufficere ut quis cum filio prodigo deferat Regionem longinquam, seu mundum, veniat in domum Patris, accumbat ejus mensæ: requiritur adhuc, ut cogitet, quibus modis satisfaciat Patri, pro ejus offensis. Duplici autem viâ, hæc satisfactio fieri potest. 1mo: per actus internos, nempe per constantem aversionem à mundo, à carne, peccatis, tanquam à grege porcorum. Item per odium & detestationem sensualium, per mortificationem passionum iræ, odii, amoris, timoris &c. 2do: per actus externos pœnitentiæ, per jejunia, disciplinas, cilicia, per officia objecta, promptò animò suscipienda, & accuratè exequenda, purè ex amore DEI, tanquam amantissimi Patris, quem offenderas. Reflecte te, supra actus internos, & externos pœni-

S

tentiæ,

tentiæ, adhibeſné illos? quâ devotione? quo fervore? nonné plura opera pœnitentiæ, negligenter, ut Confefſiones, examina &c peragis? Erubeſce, deprecare Deum. Propone, accuratum ſtudium in his omnibus peragendis.

PUNCTUM 3tium.

Hæc ſatisfactio, ſit in hac vita.

CONſidera, neceſſariam eſſe omnino pœnitentiam! pro peccatis, vel in hæc vita, vel in altera ſubeundam. *Nihil enim coinquinatum intrabit in Regnum Celorum.* Et Deus, in anima, quæ eſt ſponſa Chriſti, nullam rugam & maculam patitur; faciliùs tamen in præſenti vita, aboletur peccatum per pœnitentiam, quàm in futura, hic enim ſpontaneè quiſq; facit pœnas, ibi autem, i-
pſa vindex juſtitia Dei, infligit. Magiſq; DEO placet, quadrans pœnitentiæ benevolæ in hac vita, quàm annus neceſſariò toleratæ in altera; & unus actus, liberè elicitus, aut iſtus inflit-
tus pro peccato, quàm graviſſima illius vitæ tormenta. Cur itaq; Religioſe non agis hic agenda, dum tempus tibi ſuppetit? Cur, Divinæ reſervas Juſtitia pœniendum? Cur tuam carnem, quæ te in tot nefanda pertraxit, non ſubjugas per pœnitentiam? cur illi blandiriſ, quæ animæ tuæ venenum, in tot oblectationi-
bus, propinavit? Ideonè meretur commoditates, quas ſectariſ? quia toties, ſiliquiſ porcorum eſt impinguata & increaſata, ut toties, adverſùs ſpiritum & Deum concupiſceret, & recalcitra-
ret? Concipe odium carniſ tuæ, contemne illam, tanquam ſpurciſſimum vermium ſaccum. Puni, in ſervitutem redige perpetuam.

COLLOQUIUM.

CUM Chriſto Crucifixo, petendo ab eo, ut ſuæ paſſionis ſtig-
ta, imprimat cordi tuo. O Bone JESU, imprime, quaſo, cor-
pori meo vulnera tua, & affige clavis Crucis tuæ carnem
meam.

am, nè unquam abstrahat me à te. Cum Beatissima; Sancta Mater istud agas, Cruc fixi fige plagas, cordi meo validè,

Pater: Ave: Anima Christi.

ACTUS EJACULATORII.

PEccavi, iniquè egi, impiè gessi, & nunc revertor ad te Deus, in universo corde meo, & tota anima mea 3. Reg: 8.

Adjuva me Deus salutaris noster, & propter gloriam nominis tui, libera me, & propitius esto peccatis meis propter nomen tuum. Psal: 76.

Iniquitatem meam, ego cognosco, & peccatum meum, contra me est semper. Psal: 50.

MEDITATIO 3tia.

De Vera Penitentia.

Præl: 2: Statue tibi ob oculos, Filium prodigum, humiliter ad pedes Patris prostratum, & confitentem peccata.

Præl: 2. Pete gratiam, ut exciteris, ad veram, & seriam penitentiam pro peccatis.

PUNCTUM Ium.

VEra penitentia, conformis conversioni Filii prodigi. Considera, quid filius prodigus, in suâ reconciliatione & conversione, cum Patre egerit; & tu illa ipsa adhibe, si vis tibi salutarem esse penitentiam. Imò: Filius prodigus agnovit suam indignitatem, dicens; *Non sum dignus vocari filius.* 2dò: cum magno rubore & suâ confusione accessit ad Patrem. 3tio: Filialem accepit fiduciam & spem de bonitate & benevolentia Patris. 4to: Confessus est, cum humili demissione, peccatum suum, dicens; *Pater peccavi.* 5to: Tandem omnia, quæ Pater præcepit, executus est. Stollam novam induit, annulum in manum accepit &c. Hæc est forma veræ penitentiae, debet enim penitens agnoscere suam indignitatem, omnia peccata in memoriam revocando, & seipsum,

coram Deo annihilando, debet de peccatis compungi, dolere, pro illis, confundi, & in corde contrito, cum magna fiducia, cum spe ac humiliatione sui, ad Deum accedere, omniaq; peccata confiteri, atq; satisfactionem pro illis facere, Vide utrum talis fuit & esse solet tua pœnitentia? Accedisne cum profundissima submissione, & rubore, ad confessionem? pręparasne te ad illam, per seriam conscientię discursionem? Confitearisne ita peccata, sicut ea tibi dictat tua conscientia? Deplora defectus & negligentias tuarum Confessionum. Propone accuratum earum usum.

PUNCTUM 2dum.

Pœnitentia vera, transformat hominem.

Considera, quod filius prodigus, post suum reditum ad Patrem, alius omnino apparuit, & fuit, quàm esset tunc, dum pasceret porcos, in Regione longinqua. Idem tecum debet facere vera pœnitentia, debet enim te, in alium transformare, ut verè possis dicere, non sum ille qui fui in mundo, non sum ita superbus, aliorum contemptor, vanus, iracundus, impatiens, immortificatus, loquax, sicut fui in mundo, jam alię sunt cogitationes in mente, alii affectus in corde, alia verba & sermones in ore, diligentius nunc sensus meos, linguam, oculos, manus, custodio. Vide, an cepisti talem pœnitentiam? an non idem, vel peior es, in domo pœnitentię, quàm fueris in sæculo? si itaq; optas, ut vera tua sit pœnitentia, muta te totum in alium, muta oculos, & lacrymis elue, quidquid maculę, aspectu contraxisti, muta linguam, os, manus, & instrumenta peccati, converte in instrumenta laudis Divinę, & tuę salutis. Pete id ipsum à Christo Crucifixo.

PUNCTUM 3tum.

Pœnitentia vera, debet esse constans in bono.

Considera, & apprehende vivaciter, quod pœnitentes veri, & prędestinati, nunquam redeunt ad pristinum statum infelicem peccati

peccati, à quo recesserunt, & per pœnitentiam ejurârunt. Sic filius prodigus, nunquam rediit, Regionem longinquam nunquam repetiit, ut pasceret porcos, & de filiquis saturaretur. Sic item, nunquam Matthæus, ad telonium resedit, à quo recessit per vocationem Christi. Sic Zachæus ad fraudes, & aliorum injurias non reversus, semel à Christo vilitatus. Sic Petrus, ad perjurium, Magdalena ad immunditiam, non redierunt, sed totâ vitâ suâ adhæserunt Deo, egeruntq; pœnitentiam. Et hoc attenta mente considerandum, quod Christus Dominus, teste Evangelio, omnes ad se recurrentes, semel sanavit, & neminem bis curavit. Sic, nullum leprosum bis mundavit, nullum cæcum bis illuminavit, & pluribus addebat: *vade & noli amplius peccare.* Vide, utrûm tua pœnitentia sit constans? utrûm non redeas ad ea, quæ semel evomuisti in Confessione? utrûm te in eadem non consicias pericula, & occasiones, in quibus peccasti? Toties te Deus sanat, in usu Sacramentorum, & cur eadem vulnera renovas? toties te illuminat, cur easdem tenebras repetis? cessa peccare, ut pœnitens coram Deo, non irrisor inveniaris. Deus utiq; non irridetur.

COLLOQUIUM

CUm Christo Domino, petendo ab eo, per ejus affixas manus & pedes Cruci, ut te quoq; constanter faciat sibi affigi, & nunquam à se separari.

Pete & à Beatissima, ut te sub pallio suæ protectionis conservet, & in sinu suo materno foveat, & nunquam labi permittat. Hoc ipsum commenda. S: Angelo tuo Custodi.

Pater. Ave. &c. Anima Christi.

ACTUS EJACULATORII.

PAter, peccavi in Cælum, & coram te, non sum dignus vocari Filius. Luc: 15.

Peccavi, injustè egi, iniquitatem feci. Tu qui pius es, miserere mei.

Jud: 7.

S 3

Delicta

Delicta quis intelligit? ab occultis meis munda me, & ab alienis, parce servo tuo. Psal: 18.

Delicta juventutis meæ, & ignorantias nō memineris, secundum misericordiam tuam, memento mei tu, propter bonitatem tuam Domine. Psal: 24.

MEDITATIO 4ta.

De pace, & tranquillitate Conscientiæ, post peractam Confessionem.

Præl: 1. Colloca te ad pedes Christi, loquentis ad Apostolos & omnes suos fideles. Non turbetur cor vestrum, nolite solliciti esse, nolite timere.

Præl: 2. Pete gratiam in tranquillitate, & pace interna vivendi.

PUNCTUM 1um.

Fide generatur tranquillitas animi.

Cogita: ut tranquillus vivas, debes imò credere, & hanc veritatem tuo cordi imprimere, quod Deus dederit Sacerdotibus legitimam potestatem, ut te ritè confessum, locò Christi absolvant, juxta illud Joan: 20. *Accipite Spiritum Sanctum, quorum remiseritis peccata, remittuntur eis.* & Matth: 18: *Quaecunq; solveritis super terram, erunt soluta & in Cælo.* 2dò: Si debitâ diligentia & bona fide, dolorosam peccatorū fecisti Confessionem, & à Sacerdote absolutionem accepisti, debes item firmiter credere omnia tibi à Deo peccata esse condonata, tanquam si ipse Christus te absolvisset, quia Sacerdos legitimus, ab ipso Christo constitutus Judex, te absolvit. Proinde dum audis Sacerdotem, te absolventem. Cogita à Christo dici, quod dixerat Magdalene: *vade in pace.* Omnes itaq; anxii timores, scrupuli, diffidentiae excludendæ sunt, & in tranquillitate ac pace vivendum. Credisne tu istis? cum talinè fide, accedis ad Sacramentum penitentiae? Elice actum fidei: Credo Domine omnia, quæ mihi de hoc Sacramento credenda, per Sanctam Ecclesiam proposuisti, in hac fide vivere, & mori desidero. S. Ro.

ſæ Peruanæ, Virgini innocentiffimæ, & multis mortificationibus ſe exercenti, ſollicitæ tamen de ſua ſalute, Chriſtus dixit: *Filia, neminem condemno, niſi volentem condemnari, tranquillò animò eſto.* (: Annus Cæleſtis 30. Auguſti) ſi itaq; tu efficaciter nolles condemnari, ad quid turbaris?

P U N C T U M 2dum.

Favor Chriſti in peccatores, auget tranquillitatem,

C Onſidera, quantus ſit favor Chriſti in peccatores, imò: ex ipſius Chriſti verbis, quibus dicit: *Nolo mortem peccatoris, ſed magis, ut convertatur, & vivat. Item, non veni vocare juſtos, ſed peccatores. Non eſt opus bene valentibus, medicò. Item: Venite ad me omnes, qui laboratis, & onerati eſtis.* 2dò: Ex parabolis, in hac ipſa de filio prodigo parabola oſtendit, quo affectu paterno, & benevolentia recipit peccatores. Item in parabola de ove per-dita ſuper humeros poſita, & drachma inventa, ubi addidit gaudium eſſe Angelis, ſuper uno peccatore pænitentiam agente. 3tiò: ex tot Sacræ Scripturæ, & aliis hitoriis. Rex enim David, graviter peccârat, & poſt pænitentiam, Deo gratus, & Sanctus efficitur. Sanctus Petrus, negaverat Chriſtum, & poſt lacrymas, Vicarius ſuus, à Chriſto eſt conſtitutus. Paulus eſt perſecutus Eccleſiam, & poſtquam pænitentiam egit, Vas electionis, & dilectionis Dei factus. Jacobus Eremita, enormiter cecidit, & poſt pænitentiam, iterum, miraculis clarificatus à Deo, & multi alii. Non diminuat itaq; cujuſq; ſpem & fiduciam in Deum, multitudo & gravitas peccatorum, quæ deflevit & deflet. Confide & tu Religioſe, nunquid enim te Deus vocâſſet ad Religionem, & tot beneficis cumulâſſet, ſi tuam animam non amaret. Reſice omnes cogitationes perturbantes. Noli audire hoſtem animæ inſurrantem, & ſcrupuloſas cogitationes ingerentem de malè peracta confeſſione, de omiſſis circumſtantiis &c. Excita ſpem firmiſſimam,

simam, & senti de Domino in bonitate. Intra in misericordias Domini, absconde te in vulneribus JESU, & dic salus mea es tu Domine, in te spero, & sperabo, & non confundar. Feci quod moraliter potui, de reliquo totum me committo, tibi Deo, & Salvatore meo: qui Pater, misericordiarum es.

PUNCTUM 3tium.

Continuata pœnitentia, & Sanctus timor, conservat tranquillitatem.

Considera. quod sicut excludi debeat anxius timor, qui perturbabat hominem, pacemq; animæ aufert, ita retinendus est semper, timor Sanctus, qui nos in humilitate, & fervore Spiritûs, in studio pœnitentiæ, & cæterarum virtutum conservet. Hoc tantum memoria præteritorum peccatorum apud te efficiat, ut nulli unquam homini te præferas, ut sis patiens, ut recognoscas, te propriis peccatis, dignum esse infernô. Dic tibi sapiens: quomodo audeo me præferre alicui homini, aut de illo conqueri, qui dignus sum flammis inferni cruciari & à dæmonibus torqueri &c. Cogita item, ut semper te exerceas in actibus pœnitentiæ, & ad id te excita exemplis Sanctorum. Certificatus fuit David per Prophetam de peccato sibi dimisso, & tamen non cessabat à fletu, execratione, & odio peccati, dicebatq;: *Lavabo per singulas noctes, lectum meum, lacrymâs meis stratum meum rigabo.* Clamabat ad Deum: *Miserere mei Deus, secundum magnam misericordiam tuam &c.* Item S: Petrus negationis suæ peccatum licet sibi remissum, deflevit totâ vitâ. Similiter Magdalena, quamvis à Christo audiret. *Remittuntur tibi peccata.* Tamen ad finem vitæ, deflevit ea, & ab omnibus rebus mundi, se amovens, continuam egit pœnitentiam, sic fecerunt & alii Sancti, procede eorum semitâ, & non errabis..

Dispone tibi in menses, septimanas, dies, varios pœnitentiæ actus. Cura, ut ad pulsum horæ, salutationi Angelicæ, addas actum amoris, doloris de peccatis. Propone, omnes anxietates evitare. Dic cû Jobo. *Domine, etiamsi occideris me, tamen ego in te sperabo.* Collo-

De pace & tranquillitate Conscientiæ,
COLLOQUIUM cum CHRISTO.

145

A Bluendo omnia, tui capitis, & cogitationum peccata, in sanguine defluente de capite Christi; omnia peccata oculorum tuorum, in sanguine & lacrymis oculorum Christi; Cor tuum & affectus, in sanguine & aqua de latere Christi exeunte; Manus & opera tua, in sanguine manuum Christi &c.

Pater Ave: &c. Anima Christi.

ACTUS EJACULATORII.

Ego autē in Domino gaudebo, & exultabo in Deo Iesu meo. *Hab. 3.*

Quā bonus DEUS, his, qui recto sunt corde. *Psal. 72.*

Miserere mei DEUS, miserere mei, quoniam in te confidit anima mea, & in umbra alarum tuarum sperabo. *Psal. 56.*

Ecce DEUS Salvator meus, fiducialiter agam, & non timebo, quia fortitudo mea & laus, Dominus, & factus est mihi in salutem. *Isa. 12.*

HORA QUIETIS
DANDA CONSIDERATIONI
Supra Confessionem Sacramentalem.

Positus ad pedes Crucifixi, pete gratiam fructuosæ Considerationis.

I. **Q**uam preparationem præmitis Confessioni? examinasne anticipatō accuratē conscientiam? elicisne actus congruos, huic Sacramento? Actum fidei, quod sit institutum à Christo ad remissionem peccatorum. Actum spei, quod licet sis indignus, propter bonitatem, misericordissimi Dei, & merita Christi, in hoc Sacramento inclusa, propitium tibi habebis Deum, omnesq; maculas animæ tuæ, elues in balneo, sanguinis Christi. Actum amoris Dei, præparantis tibi, tam facillima, & efficacissima media exsolvendi te omni vinculo peccatorum. Actum timoris, Justissimi Vindicis, humiliationis tui, dolorisq; acerrimi de commissis peccatis, ac propositum firmum, evitandi peccata omnia.

2. Præcognoscisne fructus hujus Sacramenti, ad concipiendam majorem ejus æstimationem, fervoremq; Spiritus & tui se-

T

dulam

dulam, ad illud præparationem? Considera bona ex usu Sacramenti pœnitentiæ provenientia. 1^mo enim oritur honor Dei, quia Sacrificium Deo gratissimum, spiritus contribulatus, & cor contritum Psal: 50. 2^do quia tranquillitas & robur animæ confertur ut Tho: à Kemp: 1: 1. c: 19. docet: Propter crebram de hoste victoriam, quæ per Confessionem obtinetur, & ipsum quidem pœnitentem audacem, hostem verò timidum, & viribus suis diffidentem efficit. Et S: Antonius de Padua ser: 2: in dom: 1. Quadrg: ait: *Confessio est terribilis immundis spiritibus.* 3^{ti}o cognitio sui & humilitas comparatur, atq; dæmonum conatus, & insidiæ eluduntur. Unde S: Bonaventura ser: 25. in Rogat: sic discurre. *Nunquam facilius, ab inimico devincimur, quam cum superbiendo ipsum imitamur, neq; vehementius eum prosterimus, quam cum humilitate Deum consequimur, neq; ei dolores aciores infligimus, quam cum plagas peccatorum nostrorum, confitendo & pœnitendo, sanamus.* 4^{to} augetur sanctificans gratia, aut recuperatur, illaq; omnia, quæ per peccatum pereunt, restituuntur. 5^{to}: acquiritur majus odium peccati, & facilitas eliciendi, actus contritionis, aliq; multa bona. Et sicut quò frequentius purgatur domus, mundior est, ita per Confessionem expurgatâ sapius conscientia, purior anima efficitur.

3. Curasne ut tuus dolor, & detestatio defectuum procedat, ex amore Dei? cujus amicitiam læsisti, in te ac alijs gloriam ejus per tuas imperfectiones impedivisti, ingratus ejus amorì exististi. Item ut magis detesteris offensas Dei, præ omnib; alijs malis, & ita detesteris, ut nullū prorsus sit peccatū quantumvis leve, de quo intimo dolore, non afficiaris, & à quo voluntatem omnino non avertas.

4. Invitasne Beatissimam, quæ est Refugium peccatorum & Mediatrix nostra, ut per illam accessum ad Filiū invenias? Similiter S: Angeli Custodis, & tuorū Patronorū uterisne intercessionē? Assumisne affectus, & devotionem omnium fructuosè pœnitentium?

5. Accedisne cum omni decencia, & reverentia, tum interna

tum externa, ad Confessionem? considerasne in ipso accessu, cum Deo te acturum, & locuturum, coram quo, ut Judice, te accusabis, in conspectu Beatissimæ & Sanctorum omnium.

6. Procurasne ut integrè confitearis, nihil eorum prætermittendo, quod conscientiam pungat & gravius afficiat.

7. Declarasne species peccati, & circumstantias, atq; adjuncta quæ culpam graviolem reddunt? Explicasne numerum etiam in venialibus, saltem gravioribus?

8. Curasne ut peccata narres cum rubore, & verecundia, nullas excusationes, & extenuationes admiscendo. Audi S: Ambrosium lib: 2: de Cain: c: 7. docentem. *Erubescere debemus peccatum, non defendere, quoniam pudore culpa minuitur, defensione cumulat.*

9. Unisne naturalem verecundiam, dicendi peccata in Confessione, cum verecundia Domini tui, in conspectu hominum nudati, ad flagellationem & Crucifixionem?

10. Patienter ac reverenter suscipis, si interrogeris, aut monearis in aliquo, à Sacerdote?


11. Renovasne dolorem, de omnibus peccatis tuis, sub tempore absolutionis? induisne tunc personam publicani, non audentis oculos suos levare in Cælum, & percutientis pectus suum. *Deus propitius esto mihi peccatori?*

12. Desiderasne in balneo sanguinis JESU, & in lachrymis omnium pœnitentium, elui omnes maculas peccatorum tuorum.

13. Post Confessionem statimne te confers ad Christum, cum gratiarum actione pro tanto beneficio, in usu Sacramenti tibi præstito? ne jure de te conqueratur, ut olim de illis leprosis mundatis, cum diceret: *Nonne decem mundati sunt, & novem ubi sunt?* Luc: 17.

14. Persolvissne quàm primū, injunctā tibi pœnitentiā & proposita facta in Confessione? instaurasne, ut ea efficacius exequaris?

15. Convertissne mentem ad futuram Communionem ut adjicias animum, te in omni modestia, & devotione continere, gratiamq; per Sacramentum pœnitentiæ susceptam cautiùs custodire?



P A R S 2da.

Progressus Viæ Cælestis Sapientiæ, *Per Viam Illuminativam.*

Hucusq; in imo ingressu Viæ Cælestis Sapientiæ hæsimus, amovendis obstaculis, evitandisq; periculis distenti, ubi prava, indirecta, & aspera, in vias planas deduximus. Nunc jam in lumine claritatis Sapientiæ Divinæ, ambulabimus, quod, nobis ipsa Incarnata Sapientia, suæ vitæ exemplis, & virtutum splendore accendet, juxta illud Sap: 7. *Deus Sapientiæ Dux est, & Sapientiam emendator, in manu enim illius, & nos & sermones nostri & omnis sapientia.* imò: Itaq; in Regno Incarnatæ Sapientiæ, sub vexillo illius, militare toto conatu satagemus, armati ejus gratiâ, & humilitatis præsidio, ad supremum militum ipsius Classem eluctaturi. 2dò: Ab ortu Incarnatæ Sapientiæ, ad progressum ulterioris vitæ, passim extendet Viator Religiosus. *Fustorum enim semita quasi lux splendens, procedit usq; ad perfectam diem.* Prov: 4. 3tò: Tandem ex occasu patientis Incarnatæ sapientiæ, luminosissimam æternarum veritatum, & perfectioris vitæ claritatem derivabit. *Beatus homo (dicit Spiritus Sanctus:) qui invenit sapientiam: viæ ejus, viæ pulchræ, & omnes semitæ illius pacificæ* Prov: 3.

C A P U T . . . imum.

De Regno, Vexillo & Armatura Incarnatæ Sapientiæ.

§. P R I M U S.

Exponitur Regnum Christi Considerandum.

pRel: 1: Specta Christum Dominum, Vicos, Oppida, Civitates circueuntem, & prædicantem Regnum suum. *pRel:*

Prael: 2: Pete gratiam nè obsurdescas, ad vocem, & vocationem Regis tui Christi.

P U N C T U M I m u m .

Rex Christus Dominus, contra hostes suos, invitat ad bellum movendum, totâ vitâ continuandum.

C O N S I D E R A , si Rex aliquis divinitus electus, in Principem & Ducem alicujus populi, sapientiâ, fortitudine, & omnibûs aliis Regiis dotibûs ornatûs, suaderet suis subditis, ut cum eo, contra rebelles hostes, magna sibi damna, & illis majora inferentes, ad bellum pergerent, promitteretq; verbô Regiô illis, se ad omnia incommoda primum futurum, omnibûsq; & singulis auxilium allaturum, non alio victu, vestitu, se usurum, nisi quibûs illi uterentur, & post victoriam, sui Regni participes facturum. Quid putas, illi subditi responderent, & respondere deberent Regi suo? nonne ultro offerrent se ad omnia? Sed quis ille Rex? Ecce Dominus JESUS Christus, quem Pater Aternus dedit nobis Regem dicens: *Hic est Filius meus dilectus, in quo mihi bene complacuit, hunc audite.* Venit ille mittere gladium, vultq; ut moveamus praelia, adversûs mundum, carnem, ac satanam, atq; adversus omnia vitia. Invitat te ad hæc praelia, verbô & exemplô, offert tibi commeatum gratiarum suarum, & annonam Corporis in Eucharistia, ipse prior omnes labores, sudores, & vulnera subiturus. Ipse ad omnia ardua præiturus. Ipse præcessurum se spondet, modò tu sequaris. Ipse tibi exemplum daturus est, omnium agendorum, & tandem se tibi coronam impositurum appromittit. Vide quid huic Regi respondebis? adinveniesne rationem non sequendi eum? quid te retrahet? quin ejus observes nutus, & directionem? adhucne amorî proprio & sensualitati illo suadente bellum non indices? Offer te ad cinnia. Protestare quòd nihil velis desiderare, agere, nisi, quòd Dux tuus Christus imperaverit. Hanc ipsam

promptitudinem voluntatis, in omnes Christi nutus pete à Deo. Perfice Domine voluntatem meam, ut nihil aliud velit, nihil aliud desideret, nisi quod tuæ placet voluntati.

PUNCTUM 2dum.

Quid nos movere debeat ad sequendum Christum?

Considera ad sequendum in omnibus Christum movere te debet. 1mò: voluntas Patris Æterni, quem ad hunc finem è Cælo misit, ut eum imitemur. Idem tibi puta dici, quod Moyfi: *inspice & fac secundum exemplar, quod tibi in monte monstratum est.* Exod: 25. Gratias age Deo Patri pro hoc exemplari, pete gratiam humiliter, imitandi Christum constanter. 2dò: movere nos debet, ipse Christus, ad sequendum se invitans; juxta illud. Joan: 13: *Exemplum dedi vobis, ut quemadmodum ego feci, ita & vos faciatis.* Item *Qui sequitur me, non ambulat in tenebris, sed habebit lumen vite.* Et Joan: 12. *Si quis mihi ministrat, me sequatur, & ubi sum ego, illic minister meus erit.* O quanta hæc dignatio! quanta gratia! Rex Cæli & terræ, mihi dicit, fac quod ego, vitam institue, qualem ego. Quis Regum terræ dicit hoc suo ministro? & si dicere, quis non libentissimè id ageret? Cogita itaq; quis te invitet ad sequendum se quàm sit sapiens? qui novit tuam imbecillitatem & necessitates? quàm sit omnipotens, qui potest te in omnibus juvare? quàm sit misericors, ut tibi compatiatur; quàm bonus, mitis & adhuc non exultas de tali Rege & Domino? adhuc in ejus obsequio languescas? ô bone JESU, nolo alium Regem, nisi te Dominum meum, & Deum, tibi servire, te sequi desidero, trahe me, quæso gratis tuis, ut proximè secundum mensuram gratiæ tuæ, sequar te.

3tiò: Movere te debet ad hanc imitationem Christi, tui ipsius bonum, in hac enim imitatione consistit perfectio tua. & eò es perfectior, quò illi similior. Deinde hac ratione magis amorem Christi,

Christi, tibi concilias, ille enim magis te amabit, & majora dona conferet, quod similior illi fueris. O Domine JESU illumina me, & omnes homines, ut te cognoscentes & magis amantes, insatiabili & ardenti desiderio, imitemur te. Noverim me Domine, noverim te, nec aliud quæram præter te!

PUNCTUM 3tium.

In quibus potissimum imitandus Christus?

CONSIDERA hæc maximè esse, in quibus Ducem nostrum Christum, imitari debeamus. 1mo: Abnegatio sui quæ consistit, in abdicatione amoris proprii, de quo superius meditatio est proposita. 2dò: Amor Crucis, ac fortis generosq; tolerantia adversitatum, afflictionum, atq; omnium injuriarum undecunq; veniant. 3tiò: In vera Spiritûs paupertate, castitate, & obedientia &c. Vide quantum in his omnibus profecisti: quàm prope per imitationem ad Christum accessisti: Resolve te ad hæc omnia: & dic:

IN COLLOQUIO.

EN ô Rex Supreme, ac Domine universorum, tuâ ego licet indignissimus, fretus tamen, gratiâ & ope, me tibi penitus offero, meâq; omnia tuæ subjecio voluntati, attestans coram infinita Bonitate tua, in conspectu gloriosæ Virginis Matris tuæ, totiûsq; curiæ Cælestis, hunc esse animum meum, hoc desiderium, hoc certissimum decretum, ut quàm possum proximè te sequar, & imiter in sufferendis injuriis, & adversis omnibus, cum vera Spiritûs, tum rerum paupertate.

Pater: Ave: &c: An: Christi: &c:

ACTUS SÆPIUS USURPANDI.

Tu es ipse Rex meus. *Psal: 48.*

Deus meus es tu, confitebor tibi, Deus meus es tu, & exaltabo te.

Psal: 117

Tu Dominus altissimus super omnem terram, nimis exaltatus es super omnes Deos. *Psal: 96.*

Exal-

Exaltabo te D/uis meus Rex, & benedicam Nomini tuo in sæculum, & in sæculum sæculi. *Pfal: 144.*

Regi sæculorum immortalis, & invilibili, soli Deo honor & gloria 1. *Tim: 1.*

Confitebor tibi Domine Rex, & collaudabo te Deum Salvatorem meum, confitebor Nomini tuo, quoniam adjutor factus es mihi. *Ecclesi: 51.*

Militia est, vita hominis super terram. *Job: 1.*

Benedictus Dominus Deus meus qui docet manus meas ad prælium & digitos meos ad bellum. *Pfal: 143.*

Magister sequar te quocunq; iëris, *Luc: 14.*

Nulla est certior, tutiorq; ratio, recta ac sine errore, ad perfectionis apicem perveniendi, quàm peritum itineris sequi Ducem. S: Xaverius.

Domini elegisti hodie, ut sit tibi Deus & ambules in viis ejus. *Deut: 26.*

§. SECUNDUS.

De Vexillo Christi,

UT clariùs cuiq; innotescat pretium Vexilli Christi, etiam vexillum adversantis Ducis, explicandum est, inde enim quivis intelliget, cui Duci militet, & cujus sequatur consilia.

MEDITATIO

De Duobus vexillis.

Prel: 1. Statuamus ante oculos mentis, ex una parte Christum, Ducem, sub vexillum Crucis vocantem homines, & ex altera parte Luciferum ad sua castra invitantem.

Prel: 2. Petamus gratiam, ut habeamus exploratas fraudes mali Ducis, & ad illas evitandas, imploremus auxilium, ut semper sub vexillo Christi militemus.

[PUN-

PUNCTUM I^{um}.
DUX CHRISTUS.

*Expenduntur circumstantiæ, personæ, loci, Affeclarum, ac legum
Ducis Christi.*

1^{mo}: Circa Personam Ducis Christi, expendendum est, quod sit speciosissimus formâ, præ filiis hominum, proinde ille unicè amandus. 2^{dò}: Quod sit sapientissimus, qui scit quando, & quæcunq; expediant. 3^{tiò}: Est potentissimus, in cuius nomine omnes hostes, faciliè superantur. 4^{tò}: Est suavissimus & amabilissimus, quia id summè desiderat, ut omnes vitam habeant & abundantius habeant, & nullius vult mortem, & quia omnibus suppeditat auxilia, & robur, virésq; addit suis militibus, ut vincant. 5^{tò}: Est veracissimus, & in promissis fidelissimus, cui tutò quisq; credere potest. Quis tali Duci non adhærebit? quis illum non sequetur?

2^{dò}: Circa locum, expendendum. 1^{mo}: Quod juxta Hierosolymam suæ Crucis vexillum erexerit, Dux Christus, ut ostenderet sua obsequia, visionem pacis præstare. *Non est autem pax impiis & rebellibus.* Illis autem qui Christum sequuntur, omnia sunt plena pacis & quietis. 2^{dò}: In campo amæno, hilarem enim & amænum, decet esse Christi servum. Unde S: Pater noster in suis Regulis requirit, ut Societatis Filii serenitatem in vultu præferant, nihil torvum admittant. 3^{tiò}: In proximo passionis suæ loco, castra metatus, ut demonstraret, ex passione sua maxima nobis subsidia, & auxilia, ad fortiter decertandum, cum hostibus provenire.

3^{tiò}: Circa affeclas, & ministros Christi, expendendum est. 1^{mo}: Quod ministri hujus Ducis, sunt Sancti Angeli quibus de uno quoq; nostrum mandatum est, ut nos custodiant, in omnibus viis nostris, illi nos interiùs excitant, à malo abstrahunt ad bo-

num movent. Videamus ut illis obtemperemus in omnibus. 2dò: Sunt omnes Viri Apostolici, & curam animarum habentes, tum sanâ doctrinâ instruentes, tum bonô exemplô trahentes ad Christi sectanda vestigia. Cui itaq; nondum convenit docere verbô, doceat exemplô.

4tò: Circa leges Christi expendendum, quòd hæ, per omnia sunt contrariæ legibus Ducis infernalis. 1mò: Lex Christi docet, ut ii, qui volunt sequi Christum; in humilitate, suâ abnegatione, & contemptu vivant. 2dò: ut Crucem ferant, ut carnem suam cum concupiscentiis crucifigant. 3tiò: Ut mortificationem, in suo corpore, semper portent. 4tò: Ut Christum in omnibus imitentur. Videamus? utrùm non sint consonæ rationi, leges istæ, æstimemus illas, & exequi conemur.

PUNCTUM 2dum.

Dux Infernalis.

IMaginemur intueri nos Ducem impiorum in campo Babylo-nico constitutum, ut palam sit, solam confusionem & disordinem in vita impiorum inveniri. 2dò: In Cathedra ignea, & fumosa, elatum; semper enim sublimia appetit, & suis persuadet, igneq; concupiscentiæ ac iræ, suos succendit, atq; fumos vanitatis propinat. 3tiò: Horribilem figurâ, vultuq; terribilem, qui tamen à multis amatur. 4tò: Ministri hujus Ducis sunt, qui tanquam leones circumeunt, quærentes, quem devorent. Sunt item homines mali, sive pravô exemplô alios corrumpentes, sive consiliô malum suadentes, sive à virtute per irrisionem, sugillationem, persecutionem, deterrentes, sive ab observatione legum divinarum, aut humanarum retrahentes. sive tandem principia politica, mundana, instillantes. 5tò: Leges hujus impii Ducis sunt. 1mò: Ut hi, qui eum sequuntur, excutiant jugum Christi, & sinè Deo, sinè lege vivant. 2dò: Ut in omnibus obsequantur suis cupidita-

cupiditatibus. 3tò: Ut suis inclinationibus sensualibus, ac appetitui serviant, illaq; faciant, ament, desiderent, inquirent, ad quæ illos appetitus suus ducit. 4tò: Ut vanitati ac terrenis immergantur,, de æternis non cogitent &c. Quis non exhorrescat ad ejusmodi leges?

PUNCTUM 3tium.

Cui Duci quis adhæreat?

CONsidera imò: quòd illi Christo adhæreant, qui non acquiescunt carni, & sanguini, qui exiunt omnem mundi, & rerum terrenarum affectum, qui diabolo, & ejus operibus renuntiant, qui Christi insignibûs induuntur, seipsos abnegant, optant contumelias, falsa testimonia, & injurias æquò, ac fortî animò patiuntur, sumunt scutum fidei, virtutem humilitatis, mansuetudinis, aliàsq; virtutes colunt, & sectantur, ac leges Christi observant.

Considerandum 2dò: quòd Duci impiorum adhærent omnes peccatores, nempe avari, gulosi, luxuriosi, invidi, iracundi &c. maxime tamen filii superbæ, hoc est: homines superbi, elati, de se multum præsumentes, sui honoris æstimatores, vanitatis sectatores, ambitiosi, superbia enim potissimùm tenet peccatores in Castris dæmonis, persuadens iis, né humili confessione, peccatorum suorum, excutiant jugum impii ac superbi Ducis.

Expendamus itaq; , sub cujus Ducis signis hucusq; militavimus? Cujus leges implevimus? non fuimusné aliquando ministri, mali Ducis sive malò exemplò alios depravando? sive iniquis, ac perversis principiis imbuendò? sive transgressionem legum perluadendo? sive virtutis alienæ sugillatione, perfrictione, alios à virtute & perfectione avocando? Detestemur impium Ducem, cum ejus legibus, ac operibus, aversemur ejus prava dogmata. Advolvamur plantis Ducis Christi, illi nos totos dedicemus, illum deprecemur. Né projicias me à facie tua, & Spiritum Sanctum né auferas à me. *Pater: Ave;*

U2

Adjutor

Adjutorium nostrum in Nomine Domini, qui fecit Cælum & terram. *Psal.* 123.

Fortitudo & laus mea Dominus, & factus est mihi in salutem: iste Deus meus, & glorificabo eum. Deus Patris mei, & exaltabo eum. Dominus quasi vir pugnator, omnipotens nomen ejus. *Exod:* 25.

Dux fuisti in misericordia tua, populo quem redemisti *Exod:* 15.

Dominus solus Dux ejus fuit, & non erat cum eo Deus alienus. *Deut:* 32.

Multi dicunt animæ meæ, non est salus ipsi in Deo ejus. Tu autem Domine susceptor meus es, gloria mea, & exaltans caput meum.

Psal. 3.

Domine Deus virtutum, converte nos, & ostende faciem tuam, & salvi erimus. *Psal.* 79.

§. TERTIUS.

DE ARMATURA MILITUM.

Incarnatæ Sapientiæ.

Quemadmodum in prælio secularis militiæ, nihil sine armis perfici potest, ita nec sub vexillo Incarnatæ Sapientiæ, quidquam præstatur boni, absq; gratia. Bene de illa Magister Spiritus Thom: à kemp: de im: t: l: 3. c: 55. differit. Opus est gratiâ tuâ & magnâ gratiâ, ut vincatur natura, ad malum semper prona, ab adolescentia sua, Et Inferiùs Ipsa fortitudo mea, ipsa consilium confert. & auxilium. Cunctis hostibûs potentior est, & sapientior universis sapientibûs. Cùm vero multiplex sit Gratia Dei, hic potissimum de Gratia Sanctificante.

MEDITATIO

De Gratia DEI.

Præl: 1: Colloca te in conspectu S: Patris Ignatii orantis: Amorem tui, cum gratia tua mihi dones, & dives sum satis.

r. el: 2. Pete lumen Dei, ad cognoscendam excellentiam gratiæ Divinæ, & illius fervens studium. PUN-

PUNCTUM 1^{um}.*Quid Gratia DEI?*

CONsidera 1^{mo}: Gratiam sanctificantem esse, vitam supernaturalem animæ, sicut ipsa anima est vita naturalis corporis. Ad hanc gratiam, nobis dandam, Filius DEI, venit in terras, juxta illud. *Ego veni, ut vitam habeant & abundantius habeant.* Proinde idem fit cum anima nostra, abscedente gratiâ, quidquid fieri videmus cum corpore, abeunte anima, nam sicut corpus absq; anima, est cadaver omnibus horrendum, & abominabile, ita & anima absq; gratia, fit DEO & Cælitibus abominabilis.

Considera 2^{do}: Sicut homo cognoscitur vivere per animam ex actibus vitalibus naturalibus, vg. motione, actione, locutione &c. Itâ & anima vivit per gratiam, si elicit actus supernaturales, fidei, spei, charitatis, doloris, humiliationis sui &c.

Considera 3^{to}: nullum actum nostrum, nullum motum supernaturalem, posse esse meritorium, nisi à gratia, 1^{mo} quid quid boni solidi & veri in homine est, omnia procedunt à gratia, nam ut S: Paulus ait: *Gratiâ Dei, id sum quod sum.* Nihilq; habeo aut habere possum, verè æstimabile, nisi gratiam, & id quod à gratia procedit. Vide quanti tu gratiam DEI æstimas? quomodo illam curas? O si cognosceret homo illius pretium, non facile illam perderet, & eam rebus omnibus mundi, ac vitæ suæ præponeret.

PUNCTUM 2^{um}.*Excellentia Gratiæ DEI.*

CONsidera excellentiam gratiæ DEI 1^{mo}: ex eo, quia est beatitudo vera, quæ in hac vita haberi potest, per illam enim posidemus Deum, & posidemur à Deo. 2^{do}: quia per illam effici-mur filii Dei adoptivi, & ratione illius accipimus jus ad gloriam Cælestem, tanquam hæredes: tem filii debitam. 3^{to}: quia per gratiam,

gratiam constituimur amici DEI, juxta illud Joan: 15. *Vos amici mei estis.* 4^{to}: quia per gratiam DEI, tantam acquirit anima pulchritudinem, ut omnes aliæ creatæ pulchritudines, nec comparari illi queant. 5^{to}: quia gratia verè divitem facit animam; per illam enim comparatur vita æterna. Ex his infer, quantum æstimare debeas gratiam Divinam, quantò illam studiò & diligentia curare, atq; in ejus conservatione desudare. Et tu nonne sapius illam pro modica voluptate, aut aliis nugis commutasti & perdidisti?

PUNCTUM 3^{tium}.

Conservatio Gratiæ Divinæ.

CONsidera, quàm sollicitam curam adhibere debeas, ut gratiam DEI, in te conserves: prout sapiens monet Prov: 4. *Omni custodiâ serva cor tuum, quia ab ipso vita procedit.* Et certe, si cor hominis naturale, tantò costarum & pectoris murò, est munitum, certò cor rationale, id est voluntas gratiâ DEI ornata, multò fortius muniendum est; quia gratia, id est vita supernaturalis, longè præstat naturali, & vita æterna momentaneæ. Omni itaq; custodiâ servanda est hæc vita, atq; animæ thesaurus; præsertim cum illum in fictili vase portemus, inter tot occasiones, pericula, & hostes. Sequamur Consilium Climaci, qui jubet constituere ante anuam cordis, Custodem, DEI timorem, qui nihil illicitum permittat intrare, nec ipsum cor in amores inordinatos diffuere. Vide, quam tu vigilantiam adhibeas supra cor tuum, quos Custodes constituisti gratiæ Divinæ, ne illâ priveris: Deplora defectus & negligentias tuas. Pete gratiam à DEO, custodiendi semper cordis tui.

IN COLLOQUIO.

O! Domine da mihi sanctum timorem tuum, ut semper custodiam legem tuam, ut moriar potius millies, quàm perdam gratiam tuam

tuam posside me, & regna in me. Salvum fac servum tuum in gloria DEUS meus sperantem in te.

Pater; Ave; Anima Christi.

ACTUS EJACULATORII.

A Morem quæso tui, cum gratia tua mihi dones & dives sum fatis. *S: Ign:*

Gratiâ DEI sum id, quod sum. *1. Cor: 15.*

O! beatissima gratia quæ pauperem spiritu, virtutibus divitem facis, & divitem multis bonis, humilem corde reddis. *Tho: à Kemp: l: 3: c. 55.*

S. QUARTUS.

DE PRÆSIDIO MILITUM.

Incarnate Sapientiæ.

AB humilitate præsidium petat, quisquis securitati suæ consulere tutò velit. Audiamus *S: Chrysostomum hom: 20: in act: Apost: de illa differentem: Nihil humilitate potentiùs, fortior est petrà, solidior adamante. & in majori securitate nos collocat, quàm queant, vel turres. vel urbes, vel muri; omnibùsq; diaboli machinamentis sublimior facta, insuperabiles facit. Addit S: Greg: lib: moral: Perit omne, quod agitur, si non in humilitate solidatur. De illius itaq; gradibus sit,*

MEDITATIO

De Tribus Gradibus humilitatis.

Præl: 1. Constitue te ad pedes Christi Crucifixi, exinaniti propter nos usq; ad mortem Crucis.

Præl: 2. Pete gratiam rectè cognoscendi gradus humilitatis, & eos consequendi.

PUN-

PUNCTUM 1^{um}.*1^{us} humilitatis gradus.*

Considera primum humilitatis gradum, consistere in hoc, ut quameunq; legem, sive divinam, sive humanam, obligantem sub peccato mortali, sanctè observemus, per quod humiliemur sub potenti manu DEI. Talis enim observatio mandatorum graviter obligantium, est vera humilitas, quia est subiectio creaturæ rationalis, suo Creatori, tanquam supremo Domino & Legislatori, cum recognitione supremæ ejus potestatis. Videamus itaq; utrùm non iustum sit, ut omnia Dei mandata servemus, præsertim: cum iis tantùm promittat vitam æternam, qui ea servant usq; ad finem. Debemus itaq; illum habere animum, illud decretum, ut etiam oblatiō totius mundi dominiō, & abjecto vitæ discrimine, non resolvamus nos, ad transgressionem ullius præcepti, graviter obligantis, sive cogitatione, sive verbō, sive opere. Obfirmemus igitur, cor & mentem nostram, ut nunquam mortaliter peccare velimus. Audiamus Christum in Evangelio dicentem. *Qui diligit me, mandata mea servabit.* Petamus ad id auxilium & gratiam DEI, offeramus nos potius ad omnia patiēda, & ad ipsam mortem, quàm ut amplius violemus, mandata DEI, subiciamus nos DEO nostro, tanquam Legislatori & supremo Domino.

PUNCTUM 2^{um}.*2^{us} Humilitatis Gradus.*

Considera 2^{um} humilitatis gradum consistere, ut quisq; fixo animo ad divitias & paupertatem, honorem & ignominiam, brevitatē vitæ & longitudinem, æquè sit propensus, ubi æqualis est Divinæ gloriæ, & propriæ salutis occasio, utq; in nullo casu, sive creatæ felicitatis jactura, sive mortis conditione propolita, adducatur quisq; ad committendum etiam peccatum veniale. Ità enim subiectus quisq; vivere DEO, supremo Domino suo, debet, ut

nun-

nunquam deliberatè velit committere peccatum veniale ob ullam rem creatam. Vide, utrùm talis sit tuus animus. Srasné in hoc gradu humilitatis, & subjectionis tuæ erga Deum? Excites te ad odium peccati venialis hīs motivis.

1mò: quia per illa offenditur Divina Majestas. 2dò: quia maculat animam, redditq; indignam conspectu DEI. 3tiò: quia minuit fervorem charitatis, & impedit profectum spiritualem. 4tò: quia sternit viam ad mortale. 5tò: quia debilitat vires voluntatis, ut nequeat & multa bona agere, & fortiter tentationibus resistere. 6tò: quia aufert veram animi pacem. 7mò: impedit lumina Spiritūs Sancti. 8vò: quia venialibûs offenditur persæpe proximus, & læditur charitas.

Hiscæ & aliis motivis, excita te ad firmum propositum non peccandi venialiter deliberatè. Pete ad id gratiam Omnipotentis Dei.

P U N C T U M 3tium.

3tius Humilitatis Gradus.

COnsidera 3tium humilitatis gradum consistere in hoc, ut licet laus DEI par foret; ob amorem tamen & imitationem Christi, eligam potius cum eo paupere, spreto, illuso, pauperiem, contemptum, & insipientiæ titulum amplecti, quàm opes, honores, & sapientiæ æstimationem. Hic est supremus gradus perfectionis, & perfecta imitatio Christi, in heroicis virtutibus. Excita te ad eum consequendum. 1mò exemplò Christi, à juventute in laboribus, & doloribus usq; ad mortem. 2dò: quia omnia, quæ tibi etiam gravissima in vita occurrerint, sunt divini amoris in te argumenta, *quos enim amat, castigat*, ut sic abstrahat à terrenis, purget à vitiis & exerceat in virtutibus. 3tiò: quia majora & graviora, merentur tua peccata. 4tò: hac via Christus & omnes Sancti processerunt & ad vitam æternam pervenerunt. Tunc vis alium tra-

mitem tenere, & non errare. Roga Christum, ut te trahat post se, quò sic curras, in odorem exemplorum ejus.

COLLOQUIUM.

CUm Sanctissima Trinitate, petens ab ea spiritum bonum, spiritum humilitatis perfectissimæ.

O! Pater misericordiarum, DEUS totius consolationis, da mihi spiritum bonum petenti: spiritum perfectæ humilitatis. Fili DEI Unigenite, qui spiritum tuum reddidisti in manus Patris, da mihi spiritum promissum à Patre.

Veni Sancte Spiritus, & emitte Cælitus, lucis tuæ radium.

Pater: Ave: &c: Anima Christi.

ACTUS SÆPIUS USURPANDI.

Villior fiam plus, quàm factus sum, & ero humilis in oculis meis, & gloriosior apparebo. 2. Reg: 6.

Ego autem sum vermis, & non homo, opprobrium hominum & abjectio plebis. *Psal. 71.*

Excelsus Dominus, & humilia respicit, & alta à longe cognoscit. *Psal. 137.*

Sacrificium DEO Spiritus contribulatus, cor contritum & humiliatum Deus non despicies. *Psal. 50.*

Absq; demissione animi, perfectaq; tui ipsius cognitione, nec tibi nec aliis prodesse poteris, nec Deo charus eris, nec dignus, quem Societas JESU diutius ferat. *S. Xaverius.*

Elegi abjectus esse in domo Dei, magis, quàm habitare in tabernaculis peccatorum. *Psal. 83.*

Humiliare DEO & expecta manus ejus. *Eccl. 23.*

Gloriam præcedit humilitas. *Prov. 15.*

HORA

H O R A Q U I E T I S
D A N D A C O N S I D E R A T I O N I

Supra Memoriam Intellectum & Voluntatem

Collocatus ad pedes Crucifixi, petes gratiam fructuosæ Reflexionis, supra potentias animæ, donumq; utendi illis perfectè

MEMORIÆ BONUS USUS.

I. **E**Xpungatur de tabulis memoriæ, omnis, mundi, rerumq; secularium species. Tradantur oblivioni Consanguinei, amici, Socii, Parentes, nisi in sola ad Deum, pro illis Oratione memorandi. Obliterentur imagines commoditatum, notitiarum, occupationum, quibus in mundo distrahebamur. Omnium deniq; quæ retro sunt, obliviscamur. Vide, utrùm hucusq; cogitatione non verferis domi? utrùm exclusisti de memoria, rerum præteritarum species? an illas etiam in Colloquiis ultrò non renovas? Elue hæc omnia sanguine JESU, de vulneribus fluente, sepelias memoriæ omnium sub pedibus Christi Crucifixi.

2. Sæpiùs renovanda memoria peccatorum præteritorum cum magna animi amaritudine & dolore, sæpius juventutis delicta lacrymâ eluenda. Frequentiùs cum pœnitente Davide ingemiscendum: *Peccatum meum contra me est semper. Psal. 50.*

3. Non infrequenter usurpanda est memoria novissimorum, mortis, judicii, Inferni, æternitatis, ad quam nos excitat Spiritus Sanctus. Eccl. 7. *Memorare novissima & in æternum non peccabis.* Designa tibi tempora, quibus eorum memoriæ refrices v.g: dum horam audis, dic: O hora quomodo transiisti! o! mors, quando & quæ continges? o! æternitas quando & quæ venies?

4. Exercenda item memoria in jugi ubiq; præsentis Dei intuitu & consideratione, ut cum Psalte meritò gloriari quisq; valeat. *Providebam Dominum in Conspectu meo semper, quoniam à dextris est mihi, nè commovear. Psal. 15.* Similiter in contemplanda

effigie Christi Crucifixi, ut monet Spiritus S: *Gratiam Fidejussoris, ne obliviscaris, posuit enim pro te animam suam. Eccl: 29.*

Tandem Beatissimæ & Sancti Angeli Custodis, ubiq; tibi assistentis.

Intellectus bonus Usus.

I. **A** Movendæ sunt ab intellectu vanæ apprehensiones & contemnendæ, nec ex illis absq; justo fundamento formanda de rebus judicia; unde perturbationes descendunt in animam, mæroresq; ac vani timores.

1. Intellectus assuefiat judicare de rebus, juxta cujusq; meritum, ne pluris æstimet media, quàm finem, non magis temporalia, quàm æterna, bona corporis, quàm Spiritûs. In majore pretio habeat Deum, quàm creaturas.

3. Intellectus debet esse ornatus luminibus Divinis, hoc est notitiâ de rebus ad Deum & animam spectantibus. Hæc autem lumina trahuntur ex Sanctis meditationibus, ex lectione librorum Spiritualium, ex diligenti Sacrarum Concionum aut Exhortationum auditione, ex Colloquiis cum Patre Spirituali.

4. Ad intellectum spectat, ut rectè voluntatem dirigat, tanquam dux Cæcum, id autem præstat repræsentando ei pulchritudinem virtutis, peccatorum enormitatem, retrahendo illam à malo, & urgendo ad amplectendum & faciendum bonum: juxta consilia & doctrinam Christi in Evangelio expressam, & non ex principis mundi falsis.

Voluntatis bonus Usus

1. Nihil inconsideratè, nihil ex impetu naturæ, & inordinatè amplecti debet, sed omnia ex Consilio rectæ rationis & juxta debitum rerum ordinem.

2. Voluntatis intentio, debet esse recta in omnibus, non suum commodum, aut gustum aut laudem prospiciens, sed solam Dei gloriam ejusq; beneplacitum.

3. Debet item voluntas omnia terrena contemnere proptet Deum, & plura agere ac pati.

4. Debet item voluntas nostra, semper subjici voluntati Dei, eiq; conformari, ejus Providentiæ ac dispositioni se regendam tradere, cum omni indifferentia ad res omnes.

5. Debet esse constans in bono perficiendo, nec sit velut arundo quovis vento agitata, aut folium, quod minimo etiam auræ flatu rapitur.

§. Q U I N T U S. D E T R I P L I C I C L A S S E.

Militum Incarnatæ Sapientiæ.

EA militantium sub vexillo Incarnatæ Sapientiæ indoles esse debet, ut quacunq; non contenti virtute, ad summum perfectionis contendant eluctari gradum, & inter primos in Castris Heroës, quibus nec labor gravis, nec pati difficile, censeri velint. & certè ut Tho: à kemp: l: 3: c: 3 ait: Si pro vana re, die noctuq; fatigari non timetur; prohi dolor! pro bono incommutabili, pro præmio inæstimabili, pro summo honore & gloria interminabili, vel ad modicum fatigari pigritabitur?

M E D I T A T I O

De tribus religiosorum Classibus.

Prel: 1: Colloca te ad Pedes Christi docentis viam perfectionis, & proponentis mediâ salutis.

Prel: 2. Pete gratiam à Deo, per quam illumineris, quomodo in negotio salutis & perfectionis gerere te debeas.

P U N C T U M I m u m.

Ima Classis Religiosorum.

Considera, sicut in quolibet statu, varix sunt Classes hominum de sua salute cogitantium, quorum aliqui negligenter, alii accuratius

curatiùs, alii adhuc ferventiùs illam curant. Ita in cæteribus Religioforum, non omnes Religiosi æquali passu ad perfectionem contendunt. Unde S: Pater Ignatius, tres illorum classes assignat. In prima Classe illi constituuntur, qui cupiunt expugnare suum amorem, desiderant extirpare vitia, acquirere virtutes v. g. patientiam, humilitatem, castitatem, obedientiam &c. Vellent subiecti Deo vivere, nulla tamen ad id consequendum media adhibent, nullam difficultatem frangunt, & præter inania desideria, nihil aggrediuntur salutaris. Optant esse patientes, sed nullam volunt tolerare injuriam. Vellent esse subiecti, sed nullas leges observando. Et hi sunt similes illis infirmis, qui ita appetunt sanitatem, ut respuant medicinas omnes, quibus, si non utantur, nulla ratione sanari possunt. Sunt similes illis faucibus, qui curari exoptant, nullatenus tamen membri corrupti & pestilentis in reliquum corpus virus suum diffundentis, abscissionem pati volunt. Sunt item similes illis naufragantibus, qui ex naufragio enatare volunt, tabulam tamen sibi oblatam, quâ salventur, nunquam arripiunt, & sic miserè pereunt. Sunt deniq; similes illis militibus, qui intendunt referre victoriam de hostibus, nolunt tamen arma sumere, & cum eo decertare. Vide tu, utrùm non consistas, in horum numero? adhibesne media ad perfectionem consequendam necessaria? servasne tuæ Religionis Regulas? vivisne ex præscripto illarum? Exequerisne illa, quæ toties proponis in Confessionibus, & meditationibus? Erubescere tuam ignaviam. Excita te ad bona opera & exequenda proposita?

PUNCTUM 2dum.

2da Classis Religioforum?

CONsidera in 2da Classe illos esse Religiosos, qui plura quidem agunt, multa sustinent, ad acquirendam perfectionem media adhibent, omnia tamen ex suo sensu & arbitrio, non ex directione &

ne & ordinatione Ducis sui, imò eum ad vota sua trahere student. Proinde ea tantum ad obtinendam salutem, & perfectionem suam media adhibent, quæ, & quando, & quatenus sibi placent; pro libitu suo vivere volunt, sine directore, sine monitore, sine punitore. Tamdiu item sunt quieti in Religione, quamdiu omnia ad mentem suam habent, sive à Superioribus sive ab æqualibus. Ubi autem aliquid acciderit contrarium suo sensui, commodo, reputationi, omnia querelis, murmurationibus, doloribus implent, fautores suæ causæ inquirunt, quasi non sufficeret illis, solis esse malis. Tandem volunt quidem placere Deo, sed ita, ut simul placeant & hominibus. Volunt obire officia, sed ita, ut suo honori nihil decedat, alioquin impatientes erunt, animum abjicient, neglectim omnia agent. Tales Religiosi similes sunt ægris, qui cupiunt sanari, & medicinas sumere volunt, sed illas tantum, quæ sibi sapiant, & placeant, non quas medici præscribunt, quò fit, ut in majus periculum incident. Tu Religiose, si vis sincerè perfectus vivere, & tuam salutem verè intendis obtinere, hæc media usurpa, quæ tibi in Regulis præscribuntur, non quæ amor proprius excellentiæ, aut commoditatum dicat. Itanè hucusq; facti? propone.

PUNCTUM 3tium.

3tia Classis Religiosorum.

CONSIDERA 3tiam Classem Religiosorum, qui strenuè contra amorem, & vitia decertant, studio perfectionis sedulò incumbunt, & media à Religione præscripta accuratè observant. Juxta voluntatem Dei, & Superiorum dispositionem vivunt. sui abnegationem in omnibus quærunt, solidarum virtutum exercitio student, & quidem purè ob gloriam & beneplacitum Dei. In nulla re seipso, aut aliquam creaturam, sed Deum propter Deum quærunt. Tales Religiosi sunt optimè constituti, suarq; juxta Cor Dei, & verè

verè Religiosi. Et tu Religiose ut sis talis, excita te his motivis. 1mò: quia tales, siquidem non à suo placito & arbitrio, sed à sola Dei Providentiâ pendere volunt, semper per vias rectas, ducuntur ad omnem perfectionem, & errare non possunt. 2dò: Quia stabiles & firmi sunt in sua vocatione, studioq; virtutum. 3tiò Quia efficiuntur aptissima Dei instrumenta, ad suam & proximorum salutem procurandam; cum enim non quærant, quæ sua sunt, sed quæ JESU Christi, & soli Deo fidant, Deum habent in omnibus speciali modo cooperatorem. 4tò: Quia fruuntur perpetua animi tranquillitate. 5tò: Quia conformantur Christo, qui venit non suam voluntatem facere sed Patris. Exhibeamus itaq; nos tanquam ministros Dei, per gloriam & ignominiam, per infamiam & bonam famam, à dextris & sinistris.

COLLOQUIUM.

Dile affectu Christi in horto Getsemani orantis: Pater non mea, sed tua fiat voluntas. Vel cum S: Paulo: Domine, quid me vis facere? Item ora Christum: Cognitor omnium Domine, qui omnes electos tuos nôsti, adnumera me illis, pone me Magister bone in Classe servientium tibi perfecto corde, né frustrem vocationem meam.

Pater: Ave: Anima Christi.

ACTUS SÆPIUS USURPANDI.

Obsacro vos ego, vinctus in Domino, ut dignè ambuletis vocatione, quâ vocati estis. *Ephes: 4.*

In toto corde meo, exquisivi te, ne repellas me à mandatis tuis. *Psal: 118.*

Doce me facere voluntatem tuam, quia Deus meus es tu *Psal: 142.*

Qui aliud quærit, quàm Deum & animæ suæ salutem, non inveniet, nisi tribulationem & dolorem. *Thom: à kemp: l. 1. c. 17.*

C A P U T 2dum.

De Ortu & Progressu Incarnatæ Sapientiæ.

UT viator Religiosus facilius feliciusq; progrediatur in via Cælestis Sapientiæ, sedula investiget Consideratione vias Incarnatæ Sapientiæ, quæ, de seipsa enuntiavit: *Ego sum via, veritas & vita.* Et imò Incarnationem ejus expendat 2dò. Nativitatis circumstantias exploret, indeq; imitationis formam accipiat. 3tiò: Fugam illius prosequatur in Ægyptum. 4tò: Privatam ejusdem vitam introspeciat. 5tò: Tandem prodeuntem in publicum, & populo prædicantem consideret, & salutaria loquendo imitetur.

§. P R I M U S.

Expenditur Incarnatio Sapientiæ.

TRia hic potissimum discenda, imò: Quid Incarnatio? 2dò: Quæ illius causa? 3tiò: Quæ perfectiones divinæ potissimum manifestantur per Incarnationem? quibûs satisfaciet.

M E D I T A T I O

De Incarnatione Filii Dei.

Præf: 1. Constitue te coram Sanctissima Trinitate; consultante de reparatione hominis per peccatum perditum, decernenteq; Incarnationem Filii Dei.

Præf: 2. Petitio gratiæ ad cognoscendum intimè Mysterium Incarnationis, indeq; ferventiùs amandi Deum, & studiosiùs serviendi eidem.

P U N C T U M 1um.

Quid Incarnatio?

Considera Incarnationem Filii Dei esse descriptam, in illo Evangelio, in quo dicitur, Rex fecisse nuptias Filio suo. Pater enim Æternus misertus humani generis depravati per fraudem demonis, & misere pereuntis, misit Filium suum Unigenitum, ad
Y
sublevan-

sublevandum hominem, desponsatq; fecit cum natura humana per unionem hypostaticam, ita, ut unus idemq; Christus esset Deus & homo, per quam Incarnationem Verbi, elevata est natura humana ad summam dignitatem, & excellentiam Dei. Vide ô homo! quantum te Deus dilexit, qui, né perires, Filium suum Unigenitum, inter alia dona tibi dedit. Sic Deus, ait Evangelista, dilexit mundum, ut Unigenitum suum daret. Sic te adamavit Filius Dei Unigenitus, ut seipsum pro te, in Sacrificium Patri Æterno offerret. Oblatus est, quia ipse voluit. Sic Spiritus Sanctus tuam salutem appetiavit, ut ipse Salvatoris ac Redemptoris tui corpus in Utero Virginis de Sanguine ejus purissimo formaverit. Quis non obstupescet, ad tantam divinæ Bonitatis dignationem? nonné æquum est, ut cum Psalmista quisq; admirabundus dicat! Quid est homo! O Deus! quia sic magnificas eum, aut quid est Filius hominis, quia sic apponis erga eum cor tuum? Adora Sanctissimam Trinitatem. Gratias age pro tanto beneficio amoris, stude redamare semper amantem te Deum.

Cogita item, quàm reverenter debeas habere naturam humanam, quam sic Deus in suo Filio elevavit. Ideo enim Deus factus est homo, ut homo particeps fieret naturæ Divinæ, sicut ergo non decet, ut Regiæ dignitati admotus, ad pascendos porcos, aut filiquas porcorum descendat, ita non decet, ut tu naturæ hujus, quæ est in Christo dignificata, prostituas iniquis facinoribus dignitatem. Vide, utrùm illam in te non profanasti? Erubescere, deplora, deprecare Deum, ejura omniâ indigna. Contende gratus vivere Christo, per ejus imitationem.

PUNCTUM 2dum.

Quæ Causa Incarnationis?

CONsidera varias causas Incarnationis Filii Dei una est: sicut Deus, in puniendo Angelorum peccato, manifestavit suam Justitiam,

sticiam, ita etiam, in salvando & redimendo homine, per Filii sui Incarnationem & passionem, voluit ostendere divitias misericordiae suae, & infinitae charitatis. Ideo autem misericordiam in homine ostendit: Tum quia hic fraude serpentis inductus est ad peccandum. Tum quia alii homines non propriâ, sed sui Parentis malitiâ peccârunt. Tum quia, ne Deus frustraretur suo fine, ob quem, hominem condiderat, si nemo salutem consequeretur.

2da causa est: quia non potuit Deus efficacius suum Regnū propagare, & firmare in cordibus hominum, quàm per hanc excelsivam charitatem Incarnationis Filii DEI. Porro Regnum DEI, in his duobus potissimum consistit, nempe, ut homines cognoscant Deum, & ejus perfectiones. Deinde, ut ex sincero amore, voluntariè se illi subiciant, eiq; serviant.

3tia: ut per Incarnationem Filii DEI, manifestata DEI in nos charitas efficacissimè nos excitet, ad Deum ex toto corde, & viribus amandum. Vide jam, quomodo gratus vivis, pro tanta Dei misericordia? Regnatne in te Deus? regnatne in tuis cogitationibus, in tuo corde & affectibus, in tuis operibus? Reflecte te, quomodo, & an in te sunt subjecta omnia voluntati DEI? Excitavitne te tantum DEI beneficium, & amor, in suū amorem. Erubescere, Deprecare Deum. Elice actum amoris DEI, super omnia, & dic: Tu Domine scis, quia amo te, & desidero magis, ac magis amare Te.

P U N C T U M 3tium.

Quae perfectiones Divinae potissimum manifestantur per Incarnationem?

CONSIDERA imò: per Incarnationem innotescere imò: Infinitam Bonitatem Dei, quâ se summè communicat naturæ humanæ, dum eam, in unam personam conjungit, & cum toto genere humano cognationem contrahit.

2dò: Innotuit charitas DEI in nos, neq; enim Deus majus donum potuit dare homini, quàm cum dedisset Filium suum, & si hunc dedit, ut dicit Apostolus, quomodo non omnia nobis cum eo donavit?

3tò: Innotescit misericordia DEI, quâ ipse in persona sua, ad miseras nostras reparandas, descendit, earumq; particeps fieri dignatus est.

4tò: Innotescit Justitia, quâ in se debita peccatorum nostrorum transtulit, & pro illis, ex rigore Justitiæ superabundantissimè satisfecit.

5tò: Manifestatur Omnipotentia, per quam fecit Deus tam admirandum opus, ut Deus fieret homo, & homo Deus.

6tò: Ostenditur Sapientia Dei, adinveniens modum, res a deo dissitas, ut sunt Deus & homo, æternum & temporale, immortale & mortale, possibile & impossibile, ita arctè in unam personam conjungendi. Item conciliandi infinitam misericordiam cum infinita justitia.

7mò: Tandem innotuit infinita Sanctitas, & aliæ virtutes, dum Deus homo, factus est nobis exemplar omnis sanctitatis, & perfectionis, omniumq; virtutum ad imitandum.

Adora has omnes Dei perfectiones, lauda Deum ob illas, ama eas, gratias age, quòd te Verbum Incarnatum, in illarum cognitionem deduxerit. Desidera & à Deo pete, ut illas, omnes homines cognoscant, & ament Deum ob eas. Stude imitari perfectionem Christi Domini.

COLLOQUIUM.

AD Sanctissimam Trinitatem, gratias agendo Patri æterno; quòd Filium suum miserit ad tuam salutem procurandam. Filio Dei, quòd se demiserit ad nostram infirmitatem. Spiritui Sancto, quòd supervenerit in Beatissimam.

Bene-

Benedicta sit Sancta Trinitas, & indivisa Unitas, confitebimur ei, quia fecit nobiscum magnam misericordiam suam. Gloria Patri & Filio & Spiritui Sancto &c.

Pater: Ave: Anima Christi.

ACTUS SÆPIUS USURPANDI.

Nonne Deo subjecta erit anima mea? quoniam ab ipso salutare meum. *Psal: 61.*

Videns Deus homines omnino carnales effectos, tantum eis dulcedinis, in carne exhibuit, ut durissimi cordis sit, quisquis eum affectu toto, non diligit. *S. Bern: in serm.*

§. SECUNDUS.

De Nativitatis Circumstantiis.

Duplici Meditatione examinabuntur circumstantiæ Nativitatis Incarnatæ sapientiæ, ex quibus Viator Religiosus progressus & perfectionis suæ formam habere poterit. *1ma* Meditatio indagabit, cur Christus natus? cur ei non erat locus in diverforio? Cur nascatur in stabulo? *2da*; Conformabit vitam Religiosi, nascenti Incarnatæ Sapientiæ.

MEDITATIO. *1ma.*

De Nativitate Christi.

Præl. 1. Colloca te in stabulo Bethléémico, ad præsepe Domini tui pro te nati.

Præl. 2. Pete gratiam fructuosæ meditationis, de Nativitate Christi, ut tu quoq; Deo renascaris.

PUNCTUM *1mum.*

Cur Christus natus?

Considera causas Nativitatis Christi. *1ma*: Est Filius DEI, qui ab æterno ex Patre genitus est, DEUS de Deo, consubstantialis Patri, voluit in tempore nasci homo, ex Virgine Ma-

tre, ut & homo, qui semel natus est mundo, iterum renascatur Deo. Juxta illud Christi, Ioan: 3: *nisi quis renatus fuerit denuò, non potest videre Regnum Dei.* Vide, quomodo tu renatus es Deo, cogitatione, affectu, verbò, opere? Relucetne Deus in omnibus tuis intentionibus, operibus? &c. Stude renasci per omnia Deo, ut nihil, nisi Deum spires.

2da Est, quia voluit ostendere, quòd Dei deliciae sint, esse cum Filiis hominum. Et tu cur alibi, quàm in Deo tuas quæris delicias? Contemne omnia, ut soli Deo per amorem uniaris.

3tia: Factus est Filius Dei caro, ut hominem à carne abstraheret, jamq; homo non nisi ea saperet, quæ sunt Spiritûs? Et tibi sapiuntne Spirituality? non adhæresne carni, & ejus commodis?

4ta: Filius Dei factus est homo, ut tu desinas esse vetus homo, sed ambules in novitate vitæ.

5ta: Descendit in terram, ut hominem ad Cælum elevaret, neglectis terrenis. Vide, utrùm jam cor abstraxisti à terrenis? an tua conversatio sit in Cælis?

6ta: Natus est, ac datus nobis parvulus, ut securiùs ad eum accedamus. Et nos in oculis nostris aliorumq; optemus fieri parvuli. Expende, an hos omnes fructus Nativitas Christi in te obtinuit. Esne parvulus in oculis tuis? accedisne fiducialiùs ad parvulum JESUM? Ah JESU mi! quidnî toto me evolem in amplexum tuum, qui tam benevolè ad me descendere dignatus es. Relinquo omnia, te sequor, ad te propero, tibi toto me adhærere cupio.

PUNCTUM 2dum.

Cur non erat ei locus in diversorio?

CONSIDERA imò: Ex eo id factum, quia diversorium solùm propter hospites, quò divertunt, aliò transitori, & non semper mansuri. Deo autem homini, non est congruus ille locus, ubi hospitem

spitem duntaxat agere cogitur. Displicet Deo tale cordis domicilium, in quod ita recipitur, ut expediatur. *Domum tuam decet Sanctitudo, in longitudinem dierum. dicit Psalter Psal: 29.* Et tua mens qualis? constanterne servit Deo? longiusne cogitatio tua cum Deo moratur?

2dò: Quia diversorium à divertendo dicitur ex eo, quòd à recta via divertunt hospites; averfatur Deus tales flexuositates, ad eos non nisi se recipit, qui recto sunt corde. Examine quilibet suum cor sincerum ad omnes?

3tò: Quia in diversorio frequenter jurgia, clamores audiuntur; in tali autem loco, non est locus infanti Deo. In pace enim locus eius.

4tò: Quia in diversorio nunquam locus mundus conservatur, sed semper novis hospitibus advenientibus, novæ sordes advehuntur. Deus autem amat munditiem; illi cordi adhæret, quod purum est, juxta illud: *Beati mundo corde, quoniam ipsi DEUM videbunt.*

5tò: Quia in diversorio omne genus hominum & brutorum hospitatur, omnia autem excludere debet, qui Deum suo in corde recipere desiderat, juxta illud Psalmi: *Quid mihi est in Cælo? & à te quid volui super terram, præter te Deus cordis mei & pars mea Deus in æternum?* Examina conscientiam, & cor tuum, an in iis non reperitur aliquid ex his, quòd excludat Jesum. Vnde, quanta puritas? quanta quies cordis? non admittitne vanas perturbationes? Cogita, an soli Deo cor & mens tua pateat?

P U N C T U M 3tium.

Cur nascitur in stabulo?

COnsidera Christum nasci in stabulo, ex eo. imò ut advertat homo, ad quam vilem, & infelicem sortem eum detruserit peccatum, ex sublimi filiationis Dei statu, cum illum brutis similem effecerit

effecerit accinente Psalte. *Homo cum in honore esset, non intellexit, comparatus est brutis insipientibus. Quærit itaq; cum Deus infans inter bruta.*

2dò: Nasctur Filius Dei in stabulo, né etiam animalis homo, ab eo deterreatur, sed fiducialius ad eum accedat, in spirituales evasurus.

3tiò: Ut nos doceret contemptum mundi, ejusq; vanitatum, honorum, æstimationum, commoditatum. Potuit Christus nasci in Regum penetralibus, in divitum Palatiis, omnibus affluens comoditatibus; potiùs tamen elegit pauper & humilis in loco vilissimo nasci. Imitari né Christum, in electione omnium, quæ domi vilissima fuerint ad tuum usum, prout Regula docet; non appeti né potius honoratiora, excellentiora? vide, ut Spiritu Christi vivas, si vis ejus inveniri. Pete eundem spiritum ab ipso parvulo Jesu;

COLLOQUIUM.

CUm Beatissima, rogando, ut emundet cor tuum, illudq; præparet suis affectibus ad recipiendum Jesum, ac tandem ut illum reponat in corde tuo, foveat & conservet. Accede item ad parvulum Jesum & dic: O JESU DEUS cordis mei, & pars mea DEUS in æternum, nihil quidem est abjectius & sordidius corde meo, ad complementum tamen dignationis tuæ, ut non habeas, quò te amplius demittas, recipio & reclino te in corde meo. O cor meum! tempus est, ut immuteris, jam abhinc nihil spira, & nihil respira, nisi Jesum.

Pater Ave; &c. Anima Christi.

ACTUS SÆPIUS USURPANDI.

Parvulus natus est nobis, & Filius datus est nobis. *Isa. 7.*
Verbum caro factum est, & habitavit in nobis. *Joan. 1.*
Spectosus formâ præ filiis hominum, diffusa est gratia in labiis tuis, propterea benedixit te Deus in æternum. *Psal. 44.*

Ipsè

Ipse saluum faciet populum à peccatis eorum. *Matth: 1.*

Esse sine JESU gravis est infernus, & esse cum JESU, dulcis Paradisus. *Tho: à Kemp: l: 1. c. 8.*

Ex omnibus caris, sit Jesus solus dilectus specialis. *Th: à Kem: l. 1. c. 8.*
JESU tibi sit gloria, qui natus es de Virgine.

MEDITATIO 2da.

De Imitatione Christi nati.

Præl: 1: Statuamus nos in stabulo Bethleemitico, spectando Ideam vitæ Religiosæ, in Christo infante.

Præl: 2: Petenda gratia, conformiter Christo vitam Religiosam ordinandi.

PUNCTUM 1um.

Vita Religiosa debet esse conformis Christo, in præsepio, deposito.

EXpendendæ omnes circumstantiæ vitæ Religiosæ, in Christo adumbratæ. 1mò: habitatio ejus in oppido ignobili, extra civitatem in antro stabuli. Ergone Religiosus tantum speciosas expetet Civitates & mansiones? 2dò: Lectus ejus durum præsepium. Ita & Religiosus non debet mollia sectari. 3tò: Infans Jesus in pervio ventis stabulo reclinatus. Sic & Religiosus, injurias ventorum ac frigoris sustinere debet, & illis sufferendis asuescere. 4tò: Infans Christus modico lacte pascitur. Ita & Religiosus modico cibò contentari debet, nec exquisitas affectare dapes. 5tò: Infans Christus ejectus ab hominibus non habens locum in divorio. Nec Religiosus appetere debet acceptationes apud homines, potiusq; illius desiderium sit pro nihilo haberi & ab omnibus contemni. 6tò: Infans Deus homo, inter bovem & asinum, ut Religiosus discat ruditatem hominum agrestium sufferre, & cum illis potius, quàm cum magnatibus conversari. Examinemus jam vitam nostram: utrum in his singulis punctis conformetur Christo Infanti?

PUNCTUM 2dum.

Vita Religiosi debet esse conformis Christo Infanti fasciis ligato.

EXpendendum est 1mò: Quòd Christus voluit, ligari fasciis, ut nos in libertatem Filiorum Dei assereret, & a vinculis peccatorum liberaret. Videat quisq; Religiosus, quomodo ei hæc libertas filiorum Dei arrideat? utrùm se novis peccatorum vinculis non implicet? varijs occasionibus & periculis se ipsum exponendo. Expendendum 2dò: Infans JESUS habet ligatas manus, & tu Religiose patierisne tuas esse dissolutas? Cur illas non religat Regula Sancti Patris, de non accipiendo, & non dando quovis, sine facultate? cur non adstringit Regula de tactu, quam quoties violasti? Expende: Cur manus tuas non detinet Regula de modestia? ut manus tuæ in incessu non sint dispersæ, aut seminantes, nihil aliud, nisi solos defectus collecturæ. Expendendum 3tiò: Habet puer JESUS ligatos pedes, & tuos tenetne Regula de incessu, de non ingrediendis cubiculis? suntne restricti ad solam viam mandatorum, & perfectionis decurrendam? &c. Expendendum 4tò: Christus se permisit alienis ligari manibus, & tu Religiose Superiorum ac Dei voluntate te circumscribi patierisne? Expendendum 5tò: Vilibus Christus circumducitur fasciis. Et tu Religiose eligisne viliora, in tuum usum? prout Regula à te exigit &c.

PUNCTUM 3tium.

Vita Religiosi debet esse conformis Jesu tacenti & lacrymanti.

EXpendendum, quòd Filius Dei, Sapiencia increata & pro nobis incarnata, voluit nobis apparere muta & infans, ut doceret Religiosum hominem, linguam vinculis silentii religare. Potuit Infans Christus de cunis etiam, melliflue perorare ad omnes, maluit tamen tacere, & ante tempus suam Sapienciam non ostentare, ut Religiosus discat, tempus esse tacendi, tempus loquendi, nihilq;

hilq; ad perfectionem vitæ magis conducere, quàm taciturnitatem. Vide, quantos defectus loquacitas inducit: quantas perturbationes in Communitate, in te ipso. &c. Et discè à parvo Jesu strictam silentii observationem, si vis postea tempore congruo, ad cor loqui hominum, si vis attentè orare vocaliter, si vis, ut tuæ in omnibus Deus benedicat linguæ. Expendendum 2dò: Filius Dei tacet, & Cælum totum applaudit, canentibûs Angelis: *Gloria in excelsis*, prædicantibûsq; Christum tacentem. Sic ex taciturnitate, magna Dei gloria assurgit; sic cùm homo de seipso taceret, Cælum in ejus laudes effunditur. Vide ô Religiose! ut illa, quæ ad tuam laudem spectant, subtriceas, & Cælum te laudabit. Expendendum 3tiò: Plangit puer Jesus, & ejus ocelli lacrymis suffunduntur, ut tu Religiose, tuos oculos ab omni curiositate submoveas, & discas potius hic, cum Jesu lugere. Beati enim qui lugent, quàm cum mundo ridere ac lætari.

IN COLLOQUIO.

Accede ad Beatissimam & parvulum Jesum, cum omni submissione & adoratione, petens, ut ille, qui est Creator tuus, recreare ac reformare te dignetur, ad suæ Imaginis similitudinem, ut vivas tu, jam non tu, sed vivat in te Christus. Pete item intercessionem Sanctissimæ Matris, ac S: Josephi, ut eorum interpositione post has Collectiones, ambules in novitate vitæ.

ACTUS SÆPIUS USURPANDI.

EGo sum lux mundi, qui sequitur me, non ambulat in tenebris, sed habebit lumen vitæ. *Joan: 8.*

Ego sum via, veritas, & vita. Nemo venit ad Patrem, nisi per me. *Joan: 14.*

Eligendum est, magis totum mundum habere contrarium, quàm Jesum offensum. *Tho: à Kemp: l: 1. c. 8.*

Plus homo nocet sibi, si Jesum non quærit, quàm totus mundus & omnes sui adversarii. *Tho: à Kemp: l: 2: c: 7.* Zz 5.

§. TERTIUS.

Prosecutio Fugientis in Ægyptum.

NON alacri pedum cursu, sed excitato virtutum passu, indubiè, fugientem licet Incarnatam Sapientiam consequetur viator Religiosus, cujus si institerit vestigiis, fortem se in sufferendis præsentis vitæ vicissitudinibus, indifferentem ad percipienda Dei dona, tolerandasq; tribulationes, prudentem in evitando furore alieno, ac tandem promptum ad labores inveniet. Ut monet Spiritus S: *Eccl: 9: Fili concupiscens Sapientiam, conserva justitiam, & DEUS præbebit illam. Et cap: 6: In omni animo tuo accede ad illam, & in omni virtute tua conserva vias ejus (id est Sapientiæ:)*

MEDITATIO

De Fuga Christi in Ægyptum.

Præl: 1. Specta Beatissimam, cum S: Josepho & parvulo JESU accingentem se viæ, & progredientem.

Præl: 2: Pete gratiam imitandi virtutes relucens in his personis.

PUNCTUM 1mum.

Varietas & vicissitudo contingens in vita humana, forti animo sufferenda.

CONSIDERA nunquam hanc vitam esse stabilem, sed semper variis mutationibus obnoxiam; nunc Deus nos prosperis, nunc adversis exercet, ut nostram probet virtutem & animi constantiam: Beatus enim ille, quem nec prospera evehunt, nec adversa deprimunt. Ad eam in quocunq; eventu æquanimitem & fortitudinem, exemplum dedit nobis Christus, statim à sua infantia. Expendamus vicissitudines Christi nati, cui nunc prospera, nunc adversa occurrebant. Nam 1mò: Gloriosum fuit Christo, dum magnificaretur à Pastoribus tanquam Deus in stabulo, dolorosum autem, dum circumcideretur in Templo tanquam peccator. 2dò: honori-

honorificum Christo fuit, dum Reges ab Oriente, magno comitatu venerunt, cum muneribus adoraturi, tanquam supremum universorum Regem; periculosum verò, dum ab Herode quæreretur ad necem. 3^{id}: Plenum gaudio & solatiis, dum à Simeone & Anna, extolleretur in Templo; non vacuum dolore, dum ab Angelo suaderetur fuga in Ægyptum. Expende imprimis, quomodo Christus, Beatissima, & S. Joseph, tum in prosperis, tum in adversis se gesserant, quos neq; adversitas deiecit, ac in querelas solvit, neq; prosperitas arrogantes fecit. Vide & tu, quomodo te geras, in utraq; fortuna & conservasné humilitatem, si in prosperis si in adversis & addisné patientiam, si tribulatio occurrat? Persuade tibi, quòd hoc sit impossibile, ut semper in hac vita, prospera tibi eveniant. Si enim Deus nec suæ Matri, nec sibi talem vitam ordinavit, in hac peregrinatione; certè & tu non speres ejusmodi privilegium. Proinde subijce te ex toto, voluntati Divinæ, ab ejusq; manu, omnia cum magna submissione, & gratiarum actione acceptare velis.

PUNCTUM 2dum.

Indifferentia tum ad dona Dei, tum ad locum, aliasq; tolerandas persecutiones, discenda est à Sanctis Viatoribus in Ægyptum.

Considera, quòd Angelus non Beatissimæ apparuit, non illam, sed Sanctum Josephum, qui longè inferior fuit, allocutus est: nihil tamen hisce movebatur Beatissima, ut & tu discas non invidere, nec turbari, si mediocres, aut minores perfectione, virtute, doctrinâ, talentis, meritis, officiis, ad sublimiora promoveantur, te prætermisso aut despecto. Nulli rei creatæ afficaris, & quidquid tibi acciderit, non te conturbabit.

Considera. 2^{id}: Quomodo Christus statim à juventute persecutiones sustineat. In terra nativitatis suæ, pulsus est à diversorio in stabulum, e stabulo in Ægyptum, postea ex Ægypto in

Nazareth redire iubetur. Ut & tu, à teneris vitæ Religiosæ, assuescas tribulationes pati, & ad illas semper te præpares, ut item condiscas indifferentiam, quò ad loca, mansiones &c, ut in quavis mundi plaga sis paratus vivere, ubicunq; te superiorum dispositio collocaverit, etiam si procul à Patria, ab amicis, Consanguineis. Estne in te hic Christi Spiritus? estne indifferentia? pete eam à Christo. Considera 3tò: potuit Christus non fugiendo evadere Herodis iras, sed eidem fortiter resistendo, eumq; ipso nutu prosternendo; maluit tamen benignè ejusdem devitare iras, cedere furori, ut doceret, quòd objurgantibus, reprehendentibus, persequentibus non resistere, non vindictam de illis expetere, sed patienter sufferre, passioni eorum condescendere, furori cedere, ac nos ab oculis illorū submovere, bonumq; pro malo reddere debeamus. Vide, utrū huic virtuti, hucusq; studuisti? nonne potiùs ad minimum verbum, etiam leviter lælivum, excandescere consuevisti? Confundere corā Christo, pete spiritum patientiæ, & fortitudinis, in quavis persecutione. Propone imitari Christum.

P U N C T U M 3tium.

Unde vivebant in Egypto?

CONsidera potuisse Christum uti miraculis, & omnium Ægyptiorum trahere ad se affectus, ex quo Beatissimæ & S: Josepho omnia commoda providissent; noluit tamen eo medio uti, sed potiùs Beatissima, & S. Joseph labore manuum suarum vivebant, & parvulum JESum fovebant. Successu temporis cum cresceret JESus, & ipse labore & obsequiis, juvabat S. Matrem, omnemque domus mundiciem curabat, ut nos doceret, quòd non quietem appetere debeamus, sed usq; ad mortem in laboribus, & obsequiis constanter perseverare. Ad laborem, non ad otium, & vana Colloquia, venimus ad Religionem. Excitemus nos ad id exemplō Christi, Beatissimæ & S. Josephi. Obsequamur S. Patri, né in domo nostra per nostram ignaviam otio locum demus,

IN COLLOQUIO.

PEte à JESU & Beatissima ac S. Josepho, ut te doceant quomodo in hac peregrinatione vitæ te gerere debeas, ut non exeres à semitis justitiæ, & à Patria Cælesti

Pater: Ave: &c: An: Christi: &c:

ACTUS SÆPIUS USURPANDI.

DA locum Christo, & Cæteris omnibus nega introitum. Cum Christum habueris, dives es, & sufficit tibi, Th: à Kem: l. i. c. i. Pauperrimus est, qui vivit sine JESU, & ditissimus, cui bene est cum JESU, Tho l. i. c. 8.

Omnia habemus in Christo, & omnia in nobis Christus. S. Ambr:

S. Q U A R T U S.

De Introspectione absconditæ Incarnatæ Sapientiæ.

Abscondi voluit Cælestis Sapientia, & in occulto tantisper latere, ut studiosius quæreretur, & gloriosius inventa retineretur. Inquirat Princeps ille Orientis, vir rectus & timens Deum: Unde Sapientia venit? & quis est locus intelligentiæ? Job 18. Et respondit: abscondita est ab oculis omnium viventium. Paulò autem antè dixit: Trahitur sapientia de occultis: Introspeciat itaq; viator Religiosus absconditam Incarnatam Sapientiam, ut eam inventam sibi gratuletur.

M E D I T A T I O

De Vita Christi privata & abscondita.

Prel: 1. Constitue te in illa domuncula Nazarethana, ubi Christus usq; ad trigelimum ætatis annum vixit absconditus.

Prel: 2. Pete gratiam imitandi Christum.

P U N C T U M I m u m.

Abscondita vita Christi, Idea vitæ Religiosæ.

Considera imò: Cur Deus Filium suum Incarnatum de Cælo misam, propter docendum, & convertendum genus humanum
voluerit

voluerit usq; ad trigessimum annum privatam ducere vitam, & intra angulos domunculæ Nazarethanae contineri, ac latere? Nonne convenientius videretur ad gloriam DEI, si statim inter homines versaretur, prædicaret veritatem, miraculis floreret. Adora in his, consilia DEI inscrutabilia, & discce imò: quod DEI gloria promoveatur, non per excellentias, non per apparentias, non per miracula, & illustres labores, sed per id, ut facias id, quod Deus à te fieri vult, per superiorum dispositionem. Non placent DEO tui labores etiam maximi, si non egeris illa, quæ & quando DEUS vult, ut agas. Vide, utrum in omnibus actionibus tuis non potius tuum placitum, commodum, excellentiam, quam DEI voluntatem sequaris, & intendas. Discas 2dò: etiamsi & tu sis vocatus ad eum finem, ut tuæ & proximorum salutem, ac perfectionem incumbas, non debes tamen, ante tempus evolare ad conversationes; prius domi delitescendum, prius meditationibus, lectionibus, sapientiâ imbuendus animus, multis doctrinis illuminandus intellectus, virtutibus excolendi proprii mores, antequam ad institutionem progressaris proximorum. Sicut Propheta monet *Psal: 126: Vanum est vobis ante lucem surgere, surgite postquam sederitis.* Quomodo enim cæcus ducatum aliis præstabit? quomodo ignarus, & rudis, docebit? quomodo de virtute & Sanctitate nihil habens, alios sanctificabit?

Considera 2dò: Filius DEI post gloriam, quam ab Angelis & Pastoribus in nativitate retulit, post adorationes Regum, post prædictiones laudabiles Simeonis, post insignem profectum, in gratia & Sapientia coram DEO & hominibus, in angulo Nazarethanae domus privatus delitescit, ingloriusq; manet; nec tamen turbatur, aut querulatur, ut & tu Religiose patienter, & humiliter sufferre discas, si aut post gloriosa munia, & officia honorifica peracta, detrudaris in angulum, obliuioni tradaris, vel ut inutile pondus relinquaris. Nunquid tu melior Filio DEI? aut si non

appliceris ad eas Cathedras, Scholas, Collegia, ad quæ, te tua talenta, tuæ dotes promovent. Sufficiat tibi angulus Domus Religiosæ, cum latente JESU. Non plus vales Christo, neq; majorem ex te Deus habebit gloriam, quam habuisset ex Christo, si statim apparuisset inter homines; & tamen tamdiu illum DEUS latere voluit. Trade te regendum voluntati Divinæ. Gaude, si tua vita sit cum Christo & in Christo abscondita.

PUNCTUM 2dum.

Abscondita Christi vita, Idea abnegationis sui, & humilitatis Religiosæ.

CONSIDERA 1mò: quodd Filius DEI, Sapiëntia æterni Patris, ita in privata vita exinaniverit semetipsum, ut in Conspectu hominũ, non solum voluerit apparere inutilis, abjectus, insipiens, sed etiam eò rem deduxit, ut pro tali haberetur, ut fabri filius vocaretur, & multos sibi obloquentes audiret: *Unde iste didicit literas?* Et tu Religiosæ ubiq; tua talenta jactas? sciolus videri cupis? intolera bilẽq; tibi videtur, si imprudentiæ aut inscitia à quoquam argua ris? si tuæ dotes ac doctrina taxentur? si alicui longè etiam doctiori postponaris? Erubescere coram Christo sic exinanito, tuam elationem, deprime tuam arrogantiam. Pete Spiritum abnegationis tui.

CONSIDERA 2dò: Christus cum esset tantæ dignitatis & Sapiëntiæ, non ingerebat se in conversationem cum Magnatibus, non censurabat aliorum doctrinam & talenta, quamvis omnibus præcelleret, non eligebat in templo & alibi primos accubitus, sed dum se conferret ad templum, ad locum viliorem secessit, & tanquam unus de plebe ubiq; versabatur, in nulla re singularis esse expetit. Vide Religiosæ, utrũ similis in te demissio, utrũ supra alios evolare non contendas? utrũ singularitates in communitate non ambias? Confundere, deplora defectus, imitare Christi submissionem.

PUNCTUM 3tium."

Vivendi, Christi modus in vita privata.

CONsidera compendium vitæ Christi absconditæ ab Evangelista descriptæ: & erat subditus illis, quasi tota vita illius esset executio obedientiæ, ut tu Socie JESU, non alium vivendi modum tibi ordines, nisi continuam obedientiæ executionem. Intue-
re cum S: Bonaventura, Christum humilia obsequia obeuntem in domo Nazarethana, nunquam otiosum, in orationibus Dei pernoctantem. Conspice, quâ modestiâ ad mensam sedeat: quâ submissione & alacritate domum purget? ad olera descendat? quomodo prudenter, circumspectè in omnibus procedat? quâ promptitudine suæ Sanctissimæ Matri, & suo nutritio S: Josepho obtemperet Dominus universorum? Compara ejus vitam cum tua vita. Erubescere defectus tuos, excita te ad Christi exempla imitanda. Implora id ipsum à Domino JESU, Beatissima, & S: Josepho.

Pater noster: Ave Maria.

ACTUS SÆPIUS USURPANDI.

ESTo parvus in oculis tuis, ut sis magnus in Oculis Dei. Tanto enim eris apud Deum pretiosior, quanto fueris in oculis tuis despectior. *Isidor: in Syn:*

Perfice Domine gressus meos, in semitis tuis, ut non moveantur vestigia mea. *Psal: 16.*

Deus præcinge me virtute, & pone viam meam immaculatâ. *Psal: 17.*

§. TERTIUS.

Apparens & prædicans Incarnata Sapientia docet modum agendi cum Deo & hominibus.

QUALIS inter homines vivere debeat Viator Religiosus, discat ex vita Incarnata. Ut verò fructuosè inter eos degat, assuescat domi, Sancta & utilia loqui: In lingua enim, Sapientia dignoscitur. *Ecd: 4.*

De

DE VITA INCARNATÆ SAPIENTIÆ. MEDITATIO

De Gestis Vitæ Christi Predicantis.

Prel: 1. Cogita Christum te spectare, vicos & castella obeuntem, turbis prædicantem; & cum hominibus conversantem.

Prel: 2. Pete gratiam imitandi Christum.

PUNCTUM I. um.

Imitanda Christi gesta erga Deum.

Considera vitam Christi, & actiones ejus, per ordinem ad Patrem Æternum, ut illas imiteris. 1mò: cùm esset in opere prædicationis, erat pernoctans in Oratione Dei. Et tu præmittisne ad Deum Orationem, antequam prodeas ad conversandum cum Fratribus? ad Catechisandum populo? Vide, quo desiderio, punctualitate, & alacritate descendas ad meditationem, aliaq; pietatis opera. 2dò: Ipse dixit de se ad Apostolos, quòd ejus cibus esset, facere voluntatem Patris. Et cur fastidiò afficeris in exequenda voluntate Dei? cur illam in adversis non pateris? 3tiò: In iis, quæ Patris erant, sedulus inveniebatur, etiam relictis Parentibus, dum remansit adhuc puer Hierozolymis. 4tò: Omnia referebat in gloriam Patris, & in Nomine Patris, omnia opera faciebat: *Ego non quero gloriam meam, sed honorifico Patrem meum.* 5tò: Deliderabat & procurabat clarificare Patrem Æternum, dum dicebat: *Pater clarifica Nomen Tuum.* 6tò: Omnia præcepta Patris servabat, cohortans Apostolos ad eandem observationem, addens: *Sicut ego Patris mei præcepta servavi, & maneo in ejus dilectione.* 7mò: Obediens factus Patri usq; ad mortem, mortem autem Crucis. 8vò: Ex iis, quos ipsi dedit Æternus Pater, non perdidit quenquam. His expensis vide, quomodo tu homuncio miser agas cum Deo tuo? Christus æqualis Patri, Deus de Deo, in assumpta humanitate ita egit cum Patre. Tu autem quàm irreverenter, procedas in operibus

ribus, Deum concernentibus, quàm refractarius vivas illius voluntati? quàm irrefragatus? Erubescere, dole, & firmiter obfirma animum, ut in his omnibus imiteris Christum.

PUNCTUM 2dum.

Imitanda Christi gesta, in conversando cum hominibus.

Considera imprimis, antequam Christus prodiret ad convertendos homines, secessit in eremum, ibidemq; quadraginta diebus & noctibus perseveravit in jejunio, ut te religiose doceret, quomodo te parare debeas ad fructuosam conversationem cum hominibus, nempe per jejunia & orationes. 2dò: Suavissimus erat erga omnes, & ipso intuitu suo laetificabat; proinde, si qui tristarentur, dicebant: Eamus & videamus Filium Mariæ. 3tò: Neminem spernebat, sed omnes, etiam peccatores, & corpore agros vocabat ad se, etiam sibi ingratos: *Venite ad me omnes*, & benignè recipiebat. 4tò: Nulli adulabatur, sed omnibus, juxta exigentiam rei, veritatem exponebat, cumq; opus foret, reprehendebat. 5tò: Honores, æstimationes fugiebat, nec admisit electionem suam in Regem. 6tò Indefatigabiliter sudabat, circa salutem omnium, sine ullo respectu commoditatis suæ, aut intuitu recompensationis. 7mò: Non erat affixus uni loco, sed pertransibat benefaciendo & sanando omnes. 8vò: Misericordissimus supra indigentes fuit, dicens: *Misereor super turbam*, totumq; se impendit obsequiis hominum. Estne tibi animus in his omnibus imitari Christum? Excita te ad id, tum dignitate Christi, tum obligatione vitæ tuæ Religiosæ; ad hoc enim venisti, ut Christum imitareris.

PUNCTUM 3tium.

Imitanda Christi gesta, quæ ad seipsum.

Considera vitam Christi per respectum ad ipsum Christum, ut & tu similis illi, in te ipso efficiaris. 1mò: erat humillimus, ita, ut de se diceret: *Ego vermis & non homo*, ego inter vos, sicut

is, qui ministrat, 2dò: Erat pauperrimus, non habens, ubi caput reclinaret. 3tò: Erat verecundus ac modestus. 4tò: Non implicabat se curis mundi, id etiam suis suadens; nè solliciti sitis corpori vestro &c. 5tò: Semper in exercitio versabatur. 6tò: Tot & tanta faciens miracula vitabat ea propalare, statim ad gloriam Patris referebat. 7mò: Pacatissimè cum omnibus vixit, nec malum pro malo cuiquam reddidit. Vide, utrùm tu talis sis per respectum ad teipsum. Excita te ad singula. Pete, ut exprimas Christum in teipso.

C O L L O Q U I U M.

Cum Christo Domino, gratias illi agendo, quòd dignatus sit esse exemplar omnium virtutum, & pete gratiam, ut eum imiteris.

Pater: Ave: &c: Ans: Christi: &c:

ACTUS SÆPIUS MENTÈ VOLVENDI.

Sic luceat lux vestra coram hominibus, ut videant opera vestra bona & glorificent Patrem vestrum, qui in Cælis est. *Matth: 5.*
Spectaculum facti sumus, mundo, & Angelis, & hominibus.

1. Cor: 4.

Domine Deus meus da cordi meo, te desiderare, desiderando querere, quærendo invenire, inveniendò amare. *S: Aug: med: c: 1.*

Aliis curæ esse non potest, qui sibi ipsi non est, neq; aliorum commodis servire, qui sua negligit. *S: Xaverius.*

De Consuetudine bona loquendi.

Non erudietur, qui non est Sapiens in bono. *Ecc: 21.*

Sapientia aperuit os mutorum, & linguas infantium facit disertas. *Sap: 10.*

M E D I T A T I O.

De Usurpandis Spiritualibus Colloquiis.

Præl. 1. Colloca te coram Christo, sanante linguam hominis muti, de quo Evangelium testatur, quòd sanatus loquebatur rectè.

Prel. 2: Pete à Christo, ut etiam tuam linguam sanet, quâ rectè loquaris Spiritualia in recreationibus.

PUNCTUM I. umum.

Utilitas Colloquiorum Spiritualium.

Considera: immam utilitatem Colloquiorum Spiritualium esse hanc, quia Christum ad loquentes adducunt, & medium inter illos constituunt. Ita ipse Deus promittit, apud Isai: 65. *Adbuc loquentibus illis, dicam: ecce adsum.* Et Christus Dominus Matth: 18: *Ubi duo, vel tres fuerint congregati in nomine meo, ibi sum in medio eorum.* Expendenda hic sunt tria verba, primum: *in nomine meo*, hoc est, propter me, ad colloquendum de me, de mea vita & moribus, de meis laudibus, & negotiis ad me pertinentibus. 2dum: *ibi sum.* Non dicit ventiam illuc, ero ibi, potero, vel soleo adesse ibi, sed ait: *sum*, quasi nullam moram possit facere, quâ mox præsens adsit piis Colloquiis. 3tium: *in medio eorum*, id est: inter illos, aut in cordibus uniuscujusq;. Habetur hujus rei exemplum in illa apparitione facta à Christo euntibus in Emmaus; inter duos adfuit Christus medius, & fuit in corde illorum, his ipsis fatentibus: *Nonne cor nostrum ardens erat in nobis, dum loqueretur in via, & aperiret nobis scripturas?* Non desunt & alia exempla in vitis Sanctorum, ex quibus, sicut probatur DEUM adesse pia loquentibus, ita, diabolum interesse vana loquentibus.

2da Utilitas est, quia per talia Colloquia discimus, quomodo in posterum cum proximis agere debeamus.

3tia Utilitas est, quia etiam Sancti DEI & Angeli ad talia Colloquia Spiritualia convenire solent, recedunt autem a profanis sermonibus. Sic de S: Aloisio legitur, quod a nonnullis Sanctioribus fratribus videretur in locum recreationis introducere secum Beatissimam Virginem, de qua frequentissima habebat Colloquia.

Notum

Notum & illud exemplum, quo refertur, Sanctum quendam scilicet fuisse videre, quotiescunq; Fratres in Colloquiis, res sanctas & utiles tractassent, toties Angelos lantos, inter illos fuisse moratos, at ubi primum leviuscula intulissent in sermones, mox Angelos tristes abire, porcos autem grunnientes in medium eorum venire solitos. Videat quisq;, quales Sermones libenter audiat? quales inferat in recreationem? cuinam associetur? Angelisné? an porcis?

4ta Utilitas est, quia Colloquia Sancta excitant mentes nostras ad studium virtutum, ad fervorem in spiritu, ad fugam malorum, & ad omne bonum prosequendum. Sicut enim teste S: Paulo 1. Cor: 15. *Corrumpunt bonos mores Colloquia mala;* ita Sanctis colloquiis instaurantur mores. Consulat quisq; suam conscientiam, utrum non sentiat bonis Colloquiis excitari se ad bonum. Æstimemus itaq; bona Colloquia, né tot utilitatibus privemur. Proponamus, nihil vani & curiosi nos tractaturos in recreationibus, nisi illa, quæ salutis nostræ conducent, & fratrum ædificationi servient.

PUNCTUM 2dum.

Honestas cujusq; invitat ad Sancta Colloquia.

CONsidera, quod honestas exigat a quovis nostrum sermones bonos ac de rebus piis. Quid enim magis decet nostrum statum, quàm Religiosa loqui? Certè status noster talis est, ut toti, quanti sumus, DFO consecrati vivamus, & à mundo translati, mundanorum obliti, mundo adversarii simus: utquid ergo linguam nostram sæcularem esse volumus? Bone DEUS! Si quem indutum veste sæculari vel calceis, aut pileo, in forum prodire, aut inter Fratres, Superiorum ordinatio urgeret, quantus ille apprehensionibus torqueretur? quantum erubesceret, quantum mortificari se quereretur. Et tamen quando per tot dies & an-

nos Religionis, linguam sæcularem leviusculam, nugatoriam habet & portat; nihil inde erubescit, quasi verò non majus esset probum, linguam, quàm vestem sæcularem portare. Expende Religiose, quantum excandesceres, si tibi quis objiceret: mundanus & sæcularis es: nullum enim sæcularitatis signum majus esse potest, quàm loquela. Sicut Christus dixit: *ex ore tuo te judico serve nequam.* Cur itaq; non erubescis id esse, quod de te non vis audire? Cogitate Fratres: si ad vos loquentes veniret Christus vel Beatissima, vel Angelus, vel Sanctus Ignatius, & inquireret: *qui sunt hi sermones, quos confertis ad invicem? nonné unusquisq; animò suò confunderetur, & erubesceret in talium rerum narratione se deprehensum esse?* proinde, quòd tunc quisq; erubesceret de se audiri, hoc eum pudeat loqui; semper enim adest nobis præsens DEUS, & Sermonum nostrorum Judex.

PUNCTUM 3tium.

Quanta necessitas Colloquiorum Spiritualium?

CONsidera, quòd ipsa necessitas deberet & nos cogere loqui de Spiritualibus. Imò: Quia non sunt nobis liciti sermones alii, præterquam pii. Vetat enim illos tum lex DEI: *de omni enim verbo otioso, quodcunq; locuti fuerint homines, reddent rationem de eo, in die judicii,* dicit Christus Dominus. Tum lex nostra Religiosa, quæ improbat, & proscribit tales sermones. Tum Professio & status noster, qui cùm est Spiritualis, omnia etiam nostra vult esse spiritualia, consequenter & Colloquia, quæ si vana fuerint, & corda erunt, ac per consequens omnia alia, scilicet & Professio, & vota, vana. 2dò: Cogit nos necessitas loqui de pijs rebus, quia nostra vita, non est solitaria, sed conversativa. Ex instituto cum hominibus agere & loqui, eosq; ad bonum sermonem promovere tenemur; quomodo autem id facere poterimus, si cum externis, vana tantum & sæcularia loquemur? Nescimus

sciemus enim spiritualia, cum nec modum, nec usum eorum acquisivimus, utpote nunquam, aut raro domi ea pertractantes, quæ sunt Spiritus. Et tamen Apostolus monet ad Ephesios 4to: ut *sermo ex ore vestro procedat bonus, ad ædificationem fidei, ut det gratiam audientibus.* hinc. 422.

IN COLLOQUIO.

Petes à Christo JESU, felle & acetò potato, ut imbuat linguam tuam sanctis sermonibus, tribuatq; tibi gratiam, né unquam linguam tuam profanes sermonibus vanis, quam ille toties in Eucharistia, suo sanguine & corpore consecrare non desinit.

Pater: Ave: &c: Anima Christi.

ACTUS SÆPIUS USURPANDI.

Domine labia mea aperies, & os meum annuntiabit laudem tuam. *Psal. 50.*

Os iusti meditabitur Sapientiam, & lingua ejus loquetur iudicium. *Psal. 36.*

Dixi: custodiam vias meas, ut non delinquam in via mea: *Pf. 88.*

De Fructu oris sui unusquisq; replebitur bonis. *Prov. 12.*

HORA QUIETIS

DANDA CONSIDERATIONI

Supra doctrinas Spirituales, sive ex Concionibus, sive ex libris Spiritualibus colligendas.

Constitutus sub pedibus Crucifixi, pete gratiam fructuosæ Considerationis, ut te excites ad salutarem auditionem & lectionem doctrinæ Spiritualis.

I. Vide, quâ intentione audis Conciones? exhortationes? aut legis librum spiritualem? num non ob solam vanitatem, aut curiositatem? vel ob fallendum tempus, aut consuetudinem meram? Cura, ut intentio sit cognoscendæ ex his, & implendæ voluntatis Divinæ. Præmitte Orationem ad DEUM, ut DEUS

det Concionatori, efficaciam verborum ad loquendum ad cor auditorum, aperiat autem aures cordis tui & aliorum ad audiendam vocem Domini. Dic cum Psalte, *Deus meus illumina tenebras meas.* Psal: 17. *loquere Domine, quia audit servus tuus.*

II. Sub tempus Concionis, vel lectionis, cogitasne DEUM ad te loqui, per suum legatum? vel per Epistolam ad te exaratam? Sic S: Augustinus ser: 6: de Pass: *Cum oramus, ipsi cum Deo loquimur; cum vero legimus, Deus nobiscum loquitur.* Num identidem suspiras ad Deum, ut te, & alios illuminet, & accendat, juxta illud Psal: 118. *Lucerna pedibus meis verbum tuum, & lumen semitis meis.* S: Aug: l: 8. Conf: c: 12: fatetur, quod in tenebris hæreticorum manens, sit illuminatus lectione sacra, ad quam illâ voce inductus: *tolle, lege.* Similiter S: Justinus Martyr, de se ipso, in dialogo contra Triphonem, refert, quod lectione bibliorum, omnes infidelitatis tenebras propulsaverit.

III. Num ex dictis in Concione aut lectione, colligis aliquem fructum, dictaq; tibi applicas? num in aliquem affectum erumpis? aut propositum facis? Audi S: Bern: de Schola Claustri: differentem. *Quid prodest lectione continua tempus occupare, Sanctorum gesta & scripta transcurrere, nisi, ea etiam masticando, & ruminando succum eliciamus, & transglutiendo, usq; ad cordis intima transmittamus?*

IV. Num finitâ Concione, vel lectione, agis DEO gratias pro doctrina? num conservas? & quamdiu? in corde, fructum ex semine verbi divini? Ruminasne audita vel lecta? allicisne te ad executionem illorum quæ didicisti? Fuit quidam de Societate nostra (ut refert Barry) qui ante mortis articulum affirmavit: nihil unquam aut legi aut audiui de rebus gestis Sanctorum, quod aliquoties in vita non sum conatus exequi, in quantum vitæ hujus conditio permetteret. Poterisne tu id ipsum in morte testari de te ipso?

V.

V. Habesne quotidie certum ac determinatum tempus legendi libri Spiritualis? hæc tamen lectio, est cibus confortans animam. Congruum ergo esset, ut, sicut corpus suo cibo reficitur, ita & anima suô alimentô non destituatur, ne deficiat. Hinc S: Bernard: de vita solitaria. *Certis horis certæ lectioni vacandum est, fortuita enim & varia lectio non edificat.* Et S: Hieronymus addit. *Ama scientiam, & studia scripturarum, & carnis vitia non amabis.*

Gutta cavat lapidem, non vi, sed sæpè cadendo,

Sic homo fit Sanctus, non vi, sed sæpè legendo.

VI. Qualem librum tibi eligis? Eunne, qui solum intellectum pascat, & nullum voluntati, ad varios affectus, fomentum suppeditet, vel ex quo fabulas non fructum animæ colligas? Preut S: Paulus 2: Tim: 4: nonnullos reprehendit: *A veritate quidem auditum avertent, ad fabulas autem convertentur.* Audi S: Hieronymum de seipso Epist: 21. ad Eust: Virg: c: 13. referentem: *Miser ego (inquit) lecturus Iulium ieiunabam &c. Subitò raptus in spiritu ad tribunal iudicis pertrahor, ubi interrogatus de conditione, Christianum me esse respondi, & ille qui præsidebat, mentiris, ait: Ciceronianus es non Christianus, ubi enim thesaurus, ibi & cor tuum. Illico obmutui, & inter verbera (nam cædi me jusserat) clamare cæpi & ejulans dicere: Miserere mei Domine, miserere mei. Nec verò sopor ille fuerat, aut vana somnia, quibus sæpè deludimur; testis est tribunal illud, ante quod jacui, testis iudicium triste, quod timui, viventes fateor me habuisse scapulas, plagas sensisse post somnum.*

VII. Non afficerisne tædio, & nausæa in legendo libro Spiritualis? Vide quid S: Ephrem tr: 1 de vit: Spir: n: 92 dicat: *Quando te à lectione rerum Spiritualium abhorrere videris, admonitionesq; Spirituales fastidire, tunc animam tuam in gravem incidisse morbum noveris.*

VIII. Habesne collecta tibi motiva, & incitamenta, quibus ad legendos libros sacros inciteris, maximè in occurſu teporis ab ea ſancta occupatione te retrahentis? Hæc autem eſſe poſſunt. 1mò: Quia per lectionem ſacrorum librorum acquiritur major notitia DEI, ſui ipſius cognitio, in rebus agendis prudentia. 2dò: Quia lectio Spiritualis eſt ſummè neceſſaria ad ſalutem animæ, & ut S: Chryſoſt: Con: 2 de Laz: ait: *Non poteſt fieri, ut quiſq; ſalutem aſſequatur, niſi perpetuò verſetur in lectione Spiritualis.*

3tò, Quia lectio ſacra plurimum confert ad vitam Spiritualem animæ conſervandam, nempe ad tuendam gratiam ſanctificantem, ad augendas virtutes, homine Religioſo dignas.

4tò: Quia, ut Ludovicus Bloſius in ſpec: Spir: c: 10 § 5. ait: Si Sacræ lectioni convenienter intendis, ſæpè majorem fructum refers, quàm ſi orares.

5tò: Quia ſtudio lectionis Sacræ, eſt ſignum prædeſtinationis, juxta illud Chriſti: *Qui ex Deo eſt, verba Dei audit.*

6tò: Quia lectio Sacra ad multa eſt utilis. Tum quia eſt utilis ad animam reſciendam, quæ pabulò lectionis nutritur, & impinguatur. Tum quia eſt utilis ad Colloquia ſpiritualia inſtituenda, & ad optima conſilia danda. Tum quia eſt utilis ad dæmonis inſidias cognoscendas, & effugiendas. Tum quia eſt utilis ad defectus noſtros cognoscendos: lectio enim Sacra, eſt ſpeculum, noſtros pandens defectus.

7mò: Quia lectio Sacra, ad magnam ſanctitatem promovet. Multi enim lectione Sacrà in viros Sanctos evaſerunt. Sic S: Dominicus, S: Ignatius, S: Philippus Neriſ, qui inſtitutionum primùm atq; collationum ſpirituali meditatione ſuccenſus. S: Gregorius Nazianzenus, fatetur, ſe, lectione Sacra, in alium virum mutatum. S. Thereſia &c.

IX. Habesné Patrem Spiritualem, cui te candidè & sincerè aperias & conscientiam tuam manifestes? atq; secundum ejus directionem, omnem animæ & vitæ tuæ statum ordines. Cura omni filiali affectu ad illum recurrere, nihil interius conservando, quod illi non reveles, si vis semper habere pacatam & securam conscientiam. Tali enim viâ Deus vult, ut procedamus ad Cælestem Patriam, alioquin in periculo sumus aberrandi. Anno 1587. Quidam, v. ce quidam, cum faceret disciplinam, sensit sibi eam detineri; tum vox audita: ut quid innocens corpus maceras & durius tractas? jam indulgentiâ Dei abolita sunt peccata tua, *qui te delegit sibi in filium & Regni Cælestis heredem.* hanc schedam in qua conscripsisti peccata (parabat enim tunc Confessionem generalem) offer ad Templi fastigium, lapidemq; illi & prunas superimpone. Quo ipse facto, postridie rediens, nec schedam, nec prunas invenit. Persuasit item eidem, ut se desciceret de alta turri, cumq; id fecisset absq; omni offensa, præsumere cepit tanquam Sanctus, Deo dilectus, & ejus Filius. Auxit ejus amertiam adoptionis formula, quam ei veterator attulerat, tanquam à Deo missam. Paulò post deseruit cænobium, dissolutus ac flagitiosus vixit, & tandem Mediolani vix ad mentem & disciplinam Religiosam reversus. P: Nad: v. t: Prædest: Sig: 1.

C A P U T 3tium.

De occasu Patientis Incarnatæ Sapientiæ.

NULLI bi fructuosius morabitur Viator Religiosus, quàm in contemplanda passione Incarnatæ sapientiæ, ex qua, quicquid virtutū & perfectionis vitæ luminū deliderare potest, facile obtinebit, ut annuit S: Ponaventura de Pass: dicens Si vis ô homo, de virtute in virtutem, de gratia in gratiam, de bono in melius proficere; quotidie, quanta potes devotione, mediteris Dominicam Passionem; nihil enim in anima ita operatur universalem Sanctificationem: si-

cut meditatio Passionis Christi. Nos, his præmissis duabus meditationibus de memoriali Passionis Christi, præcipua tantum ejus mysteria prosequemur.

§. PRIMUS.

De Memoriali Passionis Christi.

Ad perennem Passionis suæ memoriam, reliquit nobis Christus suum Corpus in Eucharistiæ Sacramento. de Quo.

MEDITATIO ima

De Institutione & Usu Eucharistiæ Sacramenti.

Præl: 1. Colloca te sub pedibus Apostolorum assistentium Christo instituenti Eucharistiæ Sacramentum.

Præl: 2. Pete gratiam cognoscendi beneficium Christi, in Eucharistia exhibitum, & hanc Eucharistiâ Sanctè utendi.

PUNCTUM imum.

Quæ præmittenda ante Usus Eucharistiæ?

Considera, quæ Christus egit ante institutionem Eucharistiæ Sacramenti, ut tu quoq; pari viâ te præpares ad ejus usum. imò: Ait Evangelista, quod Christus posuit vestimenta sua, præcinxit se linteò, misit aquam in pelvim. &c. Per hæc docuit Christus te præparandi modum ad S: communionem; debes enim prius exuere habitus vitiosos, deponere odia, iras, amores noxios, & omnes affectus inordinatos erga creaturas, si quos habes. Debes præcingere te firmò proposito vitandi peccata & occasiones peccandi, item variis actibus virtutum, fidei, spei, Charitatis. Item, debes aquâ lacrymarum, & sincero dolore ac Confessione eluere præterita peccata. Præmittisne ista omnia ante quamlibet communionem? & quid te ab his impedit? addo: Lavit pedes discipulorum suorum. Et tu, memor Communionis futuræ, lavare debes non maculare pedes aliorum, hoc est, bene de omnibus sentire & loqui. Vide quomodo Dominus universorum, repper sub pedibus piscatorum,

piscatorum, sub pedibus Judæ, eorum pedes lavans & extergens, & disce omnium pedibus subjici, disce abjecta officia non effugere, admirare tantam Christi Domini humilitatem, pete gratiam imitationis? Et tu præmittisné Communioni aliquod humilitatis exercitium? Expende item quid tu cogitasses? quid egissess? si tunc adesses, & Christus accederet ad te, pedes tuos abluturus? quo affectu id ferres? cur similem affectum non habes in Confessionibus? in quibus te lavat Christus Sanguine suo. Erubescere, desine tuam ingratitudinem, pete à Christo, ut te totum lavet.

P U N C T U M 2dum.

Instituit Christus Eucharistiam & Missæ Sacrificium.

Considera, quòd Christus accipiens panem, benedixit & fregit dicens: *hoc est Corpus meum.* Similiter & Calicem dicens: *hic est Calix Sanguinis mei,* & tandem Apostolos instituit in Sacerdotes, dicens ad eos: *hoc facite in meam commemorationem.* Vide imprimis liberalitatem, & charitatem erga te, Christi, qui se tibi in cibum reliquit, & omnium bonorum suorum participem facere dignatus sit. Elice actum fidei de vera existentia Christi in Eucharistia. Item de instituto Missæ Sacrificio & Sacerdotibus. Protestare, velle te, in hac, & pro hac fide mori. Admirare Christi in te dignationem. Gratias age pro tanto ejus beneficio. Contende, ut tuo amore respondeas, ejus in te amor.

Considera item: si tunc adfuiss institutioni Eucharistiæ, & Missæ Sacrificio, quâ tunc reverentia, & submissione præsens illi adesses? cur itaq; eidem Sacrificio assistens, idem non præstas? confundere, & corrigenda corrige.

P U N C T U M 3tium.

Pascit Christus suo Corpore.

Considera: non sufficiebat Charitati Christi, ejusq; bonitati in nos, ut suum nobis relinqueret corpus spectandum, vilitandum, atq;

atq; in Eucharistia adorandum; sed etiam voluit, ut illo pascere-
mur, & enutrireretur in meliorem vitam, omnes virtutes & San-
ctitatem ex eo hauriendo & exsugendo. Quis non mirabitur
tantam bonitatem & liberalitatem in nos Christi? Quis Pater
aut Mater tam excelsivè amat Filium suum, sicut nos adamavit
Christus? Adhuncné illum non amabimus?

Considera 2da: Si tunc de manu Christi acciperes Eucha-
ristiam, quã id reverentiã, affectûs ardore, quantã lacrymarum
affluentia id præstares? Cur itaq; nunc tam tepidè, & imparatus
ad eum accedis. Erubescere, deplora defectus, propone omnimodam
preparationem.

COLLOQUIUM

Sit ex illa Oratione S. Patris: *Anima Christi*, reflexè dicta.

Pater: Ave:

ACTUS SÆPIUS USURPANDI.

Angelorum escã nutritivisti populum tuum, & paratum panem
de Cælo præstitisti sine labore, omne delectamentum in se
habentem, & omnis saporis suavitatem. *Sap: 16.*

Hic est panis de Cælo descendens. Qui manducaverit ex hoc
pane, vivet in æternum. *Joan: 6.*

Memoriam fecit mirabilium suorum, misericors & miserator
Dominus, escam dedit timentibus se. *Psal: 110.*

Panem Angelorum manducavit homo. *Psal: 77.*

Cibavit eos ex adipe frumenti, de petra melle saturavit eos. *Psf: 80.*

MEDITATIO 2da.

De Sanctissimo Eucharistia Sacramento.

Præl: 1: Colloca te sub infimo majoris Altaris gradu, coram
Venerabili Sacramento, illudq; adora profundissimè.

Præl: 2. Pete gratiam Sanctè & fructuosè meditandi de San-
ctissima Eucharistia, ad illiusq; Sanctum usum te præparandi.

FUN-

P U N C T U M I m u m .

Eucharistiæ Sacramentum, Spei nostræ anchora.

Considera, in Eucharistiâ, hunc latentem existere, qui vivens inter homines, obibat vicos, & oppida, ubiq; benefaciendo omnibus, ægros sanando, à dæmone obsessos liberando, leprosos mundando, cæcos illuminando, mutorum linguas & ora resolvendo, mortuos resuscitando, cum hac potentia & liberalitate adest in Eucharistiæ Sacramento. Cur itaq; cum simili fiducia & spe, non accedimus ad eum in necessitatibus nostris. Potuit uno Sarco-
phagi attactu illum Juvenem, qui defunctus efferebatur de Civitate, resuscitare à mortuis, & cur non poterit ferventiore Spiritu nos animare, ad sua obsequia? Potuit illa mulier duodecem annis patiens fluxum sanguinis, eadem horâ, qua tetigit fimbriam vestimenti Christi, salva fieri; & nos intra viscera nostra Eum suscipiendo, & tam arctè illius corpori uniti, non poterimus de Sanguinibus, & pravis inclinationibus nostris liberari? Potuit uno verbo tempestates maris sedare; & non poterit seipso, rebelles ac tumultuosas passiones nostras frenare, & earum impetus temperare? Quicumq; ad Christum inter homines viventem in aliqua necessitate recurrerant, omnes cum solatio, votorum potiti redibant. Tunè primus eris, quem non exauditum sine auxilio, à facie sua rejiciet? Absit Domine, ut vel ista cogitemus. Credo ego Domine, quia in hoc Sacramento verè sis Deus absconditus, omnia poteris. Credo te esse bonitatem infinitam, in qua omnis fiducia & spes mea. Et quàmvis sciam me undequaq; indignum auxilio & gratiâ tuâ, tamen in spe, & fiducia bonitatis tuæ, quâ omnes peccatores ad te appropinquantem recipiebas, & ego peccatorum maximus, ad te propero, petens, nè proicias me à facie tua, & Spiritum Sanctum tuum nè auferas à me. In spe illius bonitatis, quâ dixisti: *Venite ad me omnes, qui laboratis, & onerati estis, & ego reficiam*

faciam vos. En venio Domine lassatus in via iniquitatis, miserere mei, ô bone Deus! dignusné fui? quem tu creares, quem tu ad hunc usq; diem conservares? mundo per hunc Religiosum statum subtraheres, tot aliis bonis repleres? confiteor, nunquam me dignum fuisse; & tamen tu me, ex sola Tua bonitate, hîsce omnibûs cumulâsti; licet itaq; & in hoc Sacramento suscipere te, non sim dignus, tuarumq; gratiarum particeps fieri non mereor; venio tamen ad te, ut profitear fidem meam de tua bonitate, & spei meæ documentum faciam. Suscipe ergo, me filium prodigum, ô Pissime Pater, né repellas pauperculum servum. O Domine, qui dives es in omnes, qui invocant Nomen Tuum.

PUNCTUM 2dum.

Sacramentum Eucharistiæ: omnium bonorum Officina.

Considera in Eucharistiæ Sacramento contineri Divinitatem & Humanitatem Christi, & tanquam in Arca depositas virtutes, gratias & merita Christi. Hîc sunt omnia auxilia, & subsidia necessitatibus nostris, hîc omnes benedictiones; hinc suæ infirmitati robur trahere, hinc universa bona haurire quisq; potest. Una Communio potest quemq; maximâ sanctitate replere, quidnâ tam frequentes communionibus? Quæ itaq; causa, quòd nos ex tot Communionibus, parvum aut nullum fructum referamus? vix aliquid proficiamus? cur ad lumen accedentes, ab eo non illuminamur? igni appropinquantes frigemus? ex tot thesauris non ditamur, per medicinas morbi nostri non sanantur? Examinemus conscientiam nostram utrùm obstacula non ponamus? utrùm ex usu tantùm, finè debita præparatione, & mortificatione ad hac mensam non accedamus? confundamur, deploremus negligentias nostras. Proponamus seriam curam, & diligentiam, in usu Sacramenti hujus.

Pun-

PUNCTUM 3tium.

Christus in Eucharistia est idea virtutum Religioso homini congruarum.
 1mò: Est idea obedientiæ Religiosæ; ad prolationem enim verborum consecrationis, per os qualiscunq; Sacerdotis, sive boni sive mali, statim Christus sub speciebus Eucharisticis præsens existit, & manibus Sacerdotis tractari se permittit & reponi, in quocunq; loco Sacerdos voluerit. Talem S: P: à nobis obedientiam requirit, ut quisq; ad signum etiam voluntatis Superioris, omnibûs aliis prætermisîs, etiam literâ inchoatâ & non perfectâ, ad ea se conferat, ad quæ vocatur. 2dò: Est idea paupertatis; nihil enim in Eucharistia remanet substantiæ panis, aut vini; ita & Religiosus nihil proprium habere debet. 3tiò: Est idea Castitatis; fractis enim speciebus aut attritis, non frangitur, non atteritur, non maculatur Christus; talis & nostra conversatio esse debet, ut ex rebus creatis nullas in animam maculas, sive affectionum sive cogitationum attrahat, puritatem ubiq; spirantes. 4tò: Est idea patientiæ; sustinet enim omnes injurias, tum à malis Catholicis, tum à blasphemis hæreticis; nec tamen desinit esse in Eucharistia. Talem patientiam curet Religiosus, ut omnia sine querelis ac murmurationibus sufferat; à suo tamen officio strenuè exequendo non deficiat. 5tò: Idea indifferentiæ; in quocunq; enim loco, aut cujuscunq; indigno etiam ore reponatur, non repugnat. Talis indifferentia debet esse cujusvis Religiosi, sive quò ad locum, sive quò ad Socios, sive quò ad officia, ubicunq; per Superiorum dispositionem reponetur, nec repugnare, nec excusare deberet. 6tò: Idea humilitatis; eodem enim se modo habet, sive collocetur in villi mappa, sive in stanneo, sive in argenteo vel aureo portatorio, seu monstratorio, aut includatur in pyxide. Rogemus, ut has, ac alias virtutes imprimat, animabus nostris.

Pater: Ave: Anima Christi.

Cc2

ACTUS

ACTUS SÆPIUS USURPANDI.

Dominus regit me, & nihil mihi deerit, in loco pascuæ, ibi me collocavit. *Psal: 22.*

Parâsti in conspectu meo mensam, adversus eos, qui tribulant me. *Psal: 22.*

Percussus sum, ut fœnum, & aruit cor meum, quia oblitus sum comedere panem meum. *Psal: 101.*

HORA QUIETIS, DANDA CONSIDERATIONI

Supra Communionem Sacramentalem.

*Constitutus ad Pedes Christi Crucifixi, pete gratiam fructuose
Considerationis.*

PRæcognovistine fructus ex usu Sacramenti Eucharistiæ provenientes? ut sic majorem præparationem, & diligentiam adhibeas in eo recipiendo. Docet enim Sacra Theologia: quo quis cum majore & exactiore dispositione, præparationeq; accesserit ad hanc mensam Eucharisticam, eò uberiores percepturus sit gratiam ex opere operato, hoc est ex ipso usu hujus Sacramenti provenientes. Sicut quo capaciore vase, haurit quis ex puteo, eò; plus defert de aqua.

2. Fructus Eucharistiæ Sacramenti sunt hi. imò: datur nobis per modum cibi, ut innotescat cuiq; eosdem animæ ex usu hujus Sacramenti provenire fructus, quos corpus percipit ex cibo. Tum quia sicut cibus intimè conjungitur manducanti, ita Corpus Christi, communicanti, juxta illud Joan: 6. *Qui manducat meam carnem, in me manet, & ego in illo;* ex quo pater Christi insignis in nos charitas, cujus deliciæ sunt, esse cum filiis hominum. Tum quia sicut cibus conservat vitam corporis, illo enim diutius deficiente, deficeret anima à corpore, quæ est vita corporis; ita pariter per Eucharistiam conservatur gratia Sanctificans, quæ est
vita

vita Spirituallis, animæ, & sicut cibus dispensat Spiritus vitales per corpus, ut per illas vividius reddatur ad agendum, ita & Sacramentum Eucharistiæ tribuit animæ gratias excitantes, adjuvantes ad sanctè operandum. Tum quia, sicut cibus impedit calorem naturalem, nè sæviat in ipsam hominis substantiam, illamq; senlim sine sensu consumat, ita similiter Eucharistiæ Sacramentum, reprimit concupiscentiam carnis, aliasq; rebelles passionnes, nè animam nostram præcipitent in ruinam. Proinde Christus dixit: *sicut ego vivo propter Patrem, ita, qui manducat me, & ipse vivet propter me.* Joan. 6. Tum quia sicut per cibum acquiritur augmentatio; augescunt enim membra corporis, ita per usum debitum Sacramenti Eucharistiæ, augentur dona supernaturalia, & auxilia ad operationes Sacras. Tum quia sicut cibus facit hominem robustum, sine quo debilis esset ac infirmus; similem effectum præstat animæ Panis hic Angelicus, juxta illud Psal: 103. *Panis, cor hominis confirmat.* Robustior enim homo redditur, per usum hujus Sacramenti, ad difficultates in via salutis occurrentes superandas, ad tentationes & hostes vincendos. Unde S; Chrysostomus hom. 45. in Joan: dicit, quod tanquam leones ignem spirantes, ab illa mensa recedimus, terribiles diabolo effecti. Et Propheta Psal: 22. *Parasti in conspectu meo mensam, adversus eos, qui tribulant me.* 2dò: datur nobis per modum medicinæ præservativæ à futuris peccatis, quæ sunt mors animæ, & ad vires restaurandas animæ præteritis peccatis debilitatas, juxta illud Christi: *Nisi manducaveritis carnem Filii hominis, non habebitis vitam in vobis, qui manducat meam carnem, habet vitam æternam.* Joan: 6. 3tò: Quia usu hujus cibi Angelici cæcitas mentis ab animo tollitur, & anima recipit fontem omnis puritatis & Sanctitatis.

3. Quam præparationem præmittis ante usum Eucharistiæ Sacramenti: illud quippe hic usurpari potest, quod Dav. d de Templo

DEI enuntiavit 1. Paralip: 29: *Opus grande, neq; enim homini preparatur habitatio, sed DEO.* Unde S: Aloisius tribus diebus disponebat se ad rite percipiendam Communionem. S: Cajetanus octo horas dabat preparationi. Et P: Didacus Martinus nostræ Religionis præmittebat ducentos actus amoris DEI & adorationis ante Missæ Sacrificium. De S: Xaverio scribitur l: 6. vit: c: 1: quod in Sacrario sæpius pernoctaret, ut inde facilius in Templum digrederetur, & ante Sanctam Eucharistiam, majorem partem, Orationi daret, noctis.

4. Preparatio duplex ad Sacram Communionem, a SS: Patribus assignari solet, una remota, altera proxima.

Per remotam preparationem debet provideri puritas corporis & animæ. Ad quàm comparandam examinet quisq; imò suam conscientiam, juxta monitum Apostoli 1. Cor: 11. *Probet se ipsum homo, & sic de pane illo edat.* Si autem conscius sibi fuerit alicujus peccati gravis, præmittat Confessionem Sacramentalem, ut docet Concilium Tridentinum Sess: 13: c: 7: ubi ait. *Probationem necessariam esse, ut nullus sibi conscius peccati mortalis, quantumvis contritus videatur, absq; præmissa Sacramentali Confessione, ad Eucharistiam accedere debeat.* 2dò curandum est: ut venialia quoq;, saltem actu doloris aboleantur. Non desunt enim quidam Theologi, qui censent, accedentes ad Eucharistiam cum veniali, & cum affectu ad venialia, peccare venialiter propter irreverentiam Sacramenti. Certum autem est apud omnes, quod per venialia impediatur efficacia gratiæ divini, nè omnes fructus operetur in tali anima, 3tò: Comprimentendi sunt omnes motus passionum, amovendæ animi perturbationes & sollicitudines, atq; quivis affectus inordinatus ad res creatas exuendus, ut totus homo pacatus & composciscus inveniat. 4tò: Adhibeatur varia tum interna tum externa mortificatio, præsertim sensuum. Im-

prints

primis autem debet esse jejunos, nihil a media nocte sive cibi, sive potus delibans, accessurus ad Eucharistiam.

5. Præparatio proxima, consistit in exercitio actuum variarum virtutum. Imprimis tamen communicaturus excitet in se vivam fidem de illis omnibus, quæ de hoc Sacramento credenda proponuntur. 2dò: Occupet se communicaturus in exercitio humilitatis, & agnitione suæ vilitatis, ac indignitatis, tum in consideratione turpitudinis peccatorum, ut maximus illorum horror & odium concipiatur. 3tò: Eliciat quisq; actum timoris & reverentiæ tantæ Majestatis. 4tò: Progrediatur ad actum spei, doloris de peccatis. 5tò: Concipiat ignitum amorem DEI, & ardens desiderium Eucharistiæ, aliosq; juxta praxes datas, adhibeat affectus. Providè S: Ambrosius in Orat: ante miss: adjecit: *Quantâ cordis contritione & lacrymarum fonte? quantâ reverentiâ & tremore? quantâ corporis castitate, atq; animi puritate, illud divinum & Cæleste mysterium est celebrandum?*

6. Quam tamen gratiarum actionem adhibes post usum Eucharistiæ Sacramenti? & quanto tempore, cum Christo apud te, præsentem moraris? non avertisne aliò mentem & affectum? Transigendum esset saltem mediæ horæ tempus in adoratione & salutatione Christi intimè sibi præsentis, in gratiarum actione pro tanto beneficio. In amore JESU, in ablutione sui, & participatione donorum DEI, suo statui convenientium.

7. Curasne ita omnes vitæ tuæ actiones ordinare, ut per illas te disponas ad rite suscipiendam Eucharistiam, & gratias agas pro suscepta in ante? Visitasne sæpius eâ die Sanctissimum Sacramentum, qua communicas? & quâ devotione, qua grati animi tui expressione? De Seraphica V: Maria Magdalena de Pazzis Carmelitana Rho: l: 3: c: 1: n: 13: tradit, quòd in juvenili ætate à Matre communicante nequaquam, avelli potueris:

rit: qua de re interrogata, respondit: *latentis Dei vicinitate, intimum voluptatis sensum haurio, & incredibili divinitatis odore mirè recreor, quem sentio.* O utinam omnibus sic sapiat dulcedo Eu-
charistiæ! utinam ejus odor sic omnium attrahat corda!

§. SECUNDUS.

Primum Passionis Christi Mysterium præcipuum.

IN HORTO.

Plenitudo Sapientiæ est, timere DEUM. Eccl: 1:

MEDITATIO

De Imitatione Christi patientis in Horto Gethsemani.

Præf: 1. Colloca te coram Christo pavente, tristi, & cædiis afflicto.

Præf: 2. Pete gratiam tenerrimæ Compassionis & Imitationis Christi.

PUNCTUM primum.

Christus cepit pavere.

Considera: Christus Filius DEI, supremus omnium Dominus, Sanctissimus, innocentissimus, piissimus, mansuetissimus, omnibus benefaciens, humillimus, incipit pavere. Inquire causas pavoris? 1^o: Ut pro tuis in peccando resolutionibus & audaciis satisfaciat. Adhucne tu vilissimus terræ vermiculus audebis in conspectu DEI peccare, cujus conspectum Filius DEI factus homo, sic reveretur & timet? Confige Domine timore carnes meas. 2^o: a pavore & timore Christus incipit pro te satisfacere, ut & tu discas, unde pœnitentiam inchoare debeas. Timor te Judiciorum & justitiæ DEI vindicantis peccata omnium, ad constantes pœnitentiæ fructus, necessum est, ut impellat. 3^o: Timet Christus ob tua peccata, ut tu pro tuis concutiaris timore, & ferriam de illis agas pœnitentiam. 4^o: Pavet Christus, ut tu cum timore & tremore salutem tuam opereris. 5^o: Pavet Christus
ne tu,

né tu, usq; ad extremum vitæ halitum præfidas tibi. 6tò: Pavet Christus, ut tu totâ fiduciâ innixus Christo, non timeas tuos Spirituales hostes, & fortiter sufferas adversa. Vide, utrûm hic pavor Christi in horto omnes hos fructus in te induxit? Discisné ab illo pavente, semper & ubiq; timorem DE I conservare? Operarisné salutem tuam cum omni timore? effecitné in te pavor Christi, né tibi ac tuis confidas viribus, sed totam spem in Deo & ejus auxilio reponas. Reddiditné te fortem, & non timidum contra hostes tuos? Examina conscientiam tuam, & quidquid defectuosi inveneris, desle, deprecare Christum, roga, ut illos effectus in te operetur.

PUNCTUM 2dum.

Christus cepit tædere.

CONsidera: Christum voluisse in se tædia suscipere, né tu in Religiosis actionibus, in meditationibus, sacris, Exhortationibus, aliisq; operibus Spiritualibus, tædiô afficiaris. 2dò: Tædium Christus patitur, ut te tædeat vitæ imperfectæ, sensualitati deditæ, tædeat passionum immortificatarum, negligentiarum. 3tò: Cæpit tædere, ut nos doceat, cum quanto tædio terrenorum, expectare debeamus repromissam nobis vitam æternam, & ad illam ferventiùs aspirare atq; anhelare. 4tò: Afficitur Christus tædiis, né te tædeat in ærumnis, adversitatibus, doloribus, tribulationibus, pro Christo & salute tua sufferendis. Vide, utrûm ex Christi tædio, hos fructus collegisti? Recurrisné ad Christum tædiis affligtum, in tuis tædiis, quæ tibi in vita Religiosa occurrunt?

PUNCTUM 3tium.

Christus cepit mæstus esse.

CONsidera Christum mæstum, & audi dicentem ad Apostolos: *Tristis est anima mea usq; ad mortem.* Et inquire causas tristitiæ Christi. 1ma. Est, quia tu nimium ex rebus creatis oble-

D d

stabis

etabarís & effusas in illis quærebas lætitiás, & consolationes, propterea cor Christi, tantâ repletur tristitiâ. 2dò: Tristatur Christus, ut tu pro peccatis tuis salubriter contristeris, & animi dolorem concipias. 3tò: Tristatur Christus, omnes tristitiás tuas in se transferens, ut tibi æterna præparet gaudia, & quamdiu vivis, hilariter illi servias. 4tò: Tristatur Christus, né tu nonnisi inter solatia, & prosperitates vivere desideres. 5tò: Tristatur Christus, né te contristent, quæcunq; in vita Religiosa, tamen si etiam maximè ardua acciderint. Vide, utrùm aliquando ex corde compassus es Christo tristi? an ob ejus amorem abstinuisti ab aliquo creato solatio? Servisné Christo in lætitiâ? Christus ob tua peccata, tristis fuit usq; ad mortem, & tu quàm vehementer pro illis doles? Elice affectum amarissimæ contritionis. Offer Patri æterno hanc Filii DEI tristitiám pro peccatis tuis.

PUNCTUM 4tum.

Christus orat.

Considera: Christi Domini orantis circumstantias, ut eas orando imiteris. 1mò: Abstractus ab omnibus, quàmvis nullas distractiones pati poterat. 2dò: cum profundissima interna, externaq; humilitate, & reverentiâ, genibus flexis & in faciem ad terram usq; prostratus oravit. 3tò: Cum filiali ad DEUM fiducia, & amore, dicens: Pater! 4tò: Cum plena in divinam voluntatem resignatione. 5tò: Ita ferventer, ut totus sanguinem sudaret. Et tua Oratio habetné istas omnes condiciones? Itané attentè, reverenter, cum tantané ad Deum fiducia & fervore oraturus accedis? Erubescè, desle tuarum Orationum defectus, & negligentias. Offer Christi Orationem pro tuis tepiditatibus. Pete à Christo donum orandi.

IN COLLOQUIO.

Collige guttas sudoris sanguinei in terram defluentes, & applica

plica tuæ animæ. Offer Patri Æterno in ablutionem tuorum peccatorum. *Pater Ave: Anima Christi.*

ACTUS SÆPIUS USURPANDI.

TRibulationes cordis mei multiplicatæ sunt, de necessitatibus meis erue me *Psal: 24.*

Vide humilitatem meam, & laborem meum, & dimitte universa delicta mea. *Psal: 24.*

Repletus sum consolatione, superabundo gaudiô, in omni tribulatione nostra. *2. Cor: 7.*

Communicantes Christi passionibus gaudeamus, ut in revelatione gloriæ ejus, gaudeamus exultantes. *1. Petr: 4.*

Tristis est anima mea usq; ad mortem. *Matth: 26.*

Salvum me fac Domine, quoniam intraverunt aquæ usq; ad animam meam. *Psal: 68.*

§. T E R T I U S.

2dum Passionis Mysterium præcipuum-
APUD JUDICES

Qui rectus est, corrigit viam suam. Non est sapientia, non est prudentia, non est Consilium contra Dominum. *Prov: 21.*

M E D I T A T I O.

De Injuriis Christo illatis apud Judices.

Præf: 1. Colloca te coram Christo ligato, stante ante Judices.

Præf: 2. Pete gratiam compassionis & imitationis Christi.

P U N C T U M i m u m.

Christus iniquissimè accusatur.

CONsidera, quæ & quantæ calumniæ, Christo imponebantur, quòd esset ambitiosus, & appetens Regni, quòd tributa dare Cæsari prohiberet, quòd esset malefactor, everfor gentis, Templi demolitor, seditiosus, blasphemus, seductor, &c. hæc illi objicie-

D d 2

bantur

ebantur falsò, & quidem in facie Principum Judæorum, ante tribunal præsidis Pilati, in aula Herodis. JESUS autem ad hæc omnia tacebat, non refutabat falsitates, nec comminabatur vindictam, non redarguebat malitiam, sed patientissimè sufferebat omnia. Ut & tu Religiose discas falsa testimonia, iniquas etiam delationes, patienter, fortiter, & silentiò sustinere. Itané in similibus te geris?

Considera 2dò: Cur taceat Christus ad calumnias? 1mò: quidem, quia responsò dignæ non erant. Et quare nos ad indigna quandoq. responsis convitia, tacere nolumus? 2dò: Né ansam daret obstinatis hominibus, gravius peccandi; hæc & nobis taciturnitatem in calumniis persuadere deberet, né multiplicemus peccata adversarii, & nostra addamus, per quæ Dei Majestas offenditur. 3tiò: ut doceret nos patienter ferre opprobria, maximè cum conscii non sumus objectorum, & tolerata reddant nos coram Deo meliores. Vide, an tu patienter feras obrectationes aliorum? O quanta confusio nostra! quando Christus tot falsitates in se jactas mansuetissimè sustinuit! & tu vera de te dici non toleras! Erubescere, dole, obfirma animum ad imitandum Christum.

PUNCTUM 2dum.

Christus varias injurias sustinet.

Considera 1mò Christum alapis, colaphis & pugnis in faciem cæsum, ex quibus intumuit ille divinus vultus, livoribusq. obscuratus est. 2dò: Tota illa facies speciosissima sputis sædata, & deformata est. 3tiò: Tandem velata, ut libentiùs & petulantius illuderetur ei, Christusq. concuteretur. 4tò: Cum latrone Barabba comparatus, & à principibus Judæorum, atq. populo, eidem postpositus. Compatere Christo, & vide, utrùm tu faciem ejus in tua anima non sædaveris? utrùm ejus oculos non velaveris? peragendo illa in conspectu ejus, quæ in oculis hominum nunquam auderes. Erubescere, deprecare Christum.

PUN-

PUNCTUM 3tium.

Cur Christus has injurias pati voluit?

CONsidera imò: Ideo Christus alapas sustinere voluit, ut electi ejus viderent faciem Patris, & ipsius Christi in æternum. O mi JESU! quando ostendes mihi faciem tuam? non sum quidem dignus, delidero tamen & spero. 2dò: Ut satisfaceret pro nostra immodestia in vultu, pro signis iracundiæ, invidiæ, livoris &c. Vide, utrùm & tu non dederis causam tuis peccatis ad confusionem Christi.

Considera 2dò: Ideo Christus voluit sædari in facie, ut omnes animæ nostræ sæditates, deformitatesq; abstergeret; né itaq; eam amplius deformare audeas. 3tò: Voluit Christus sputis deformari, né nos forma alienorum vultuum oblectaret. Videamus, utrùm hos fructus, Christus passus inveniat in nobis. Erubescamus, deploremus defectus immodesti vultus nostri,

Pater: Ave: Anima Christi.

ACTUS SÆPIUS USURPADI.

QUI Passus es pro nobis JESU Christe, miserere nobis. Recogitemus eum, qui talem sustinuit à peccatoribus, adversus semetipsum contradictionem, & non defatigemur, animis nostris deficientes. *Heb: 12.*

Tu es patientia mea Domine. *Psal: 70.*

Concede mihi Domine, ut nulla tribulatione, angustia & dolore, à te recedam. *S: Franciscus.*

Doctrina Viri, per patientiam noscitur. *Prov: 19.*

In Patientia vestra possidebitis animas vestras. *Luc: 21.*

Nemini dantes ullam offensam, ut non vituperetur ministerium nostrum, sed in omnibus exhibeamus nosmetipsos, sicut Dei ministros in multa patientia. *2. Cor: 6.*

Verba iniquorum prævaluerunt adversum me. *Psal: 64.*

§. QUARTUS.

3tium Passionis Myſterium præcipuum.

IN FLAGELLATIONE.

Sapientia hos, qui ſe observant, à doloribus liberavit. *Sap: 10.*
 In theſauris ſapientiæ ſignificatio diſciplinæ. *Eccl: 1.*

MEDITATIO.

De Flagellatione Chriſti.

Præl: 1. Conſtitue te coram Chriſto, columnæ in medio fori
 Hieroſolymitani, alligato, & dire flagellato.

Præl: 2. Pete gretiam fructuoſæ meditationis, ex qua ad Compaſ-
 ſionem Chriſto, & tuæ Carnis mortificationem accendaris.

PUNCTUM IUM.

Chriſtus ad Flagella damnatur & nudatur.

CONſidera imò: damnationem Chriſti ad flagella fuiſſe in-
 quiſſimam, ignominioſiſſimam & crudelem. Fuit iniquiſſima,
 quia agnoverat Pilatus Chriſtum eſſe innocentem, viderat Judæ-
 os ex odio, & invidia inſtare contra Chriſtum; nihilominus ta-
 men addixit eum flagellis, ut & tu Religioſe dicas innocenter pa-
 ti, & ob defectus etiam inculpabiles, generoſè animò abſq; querelis,
 ſufferre aſſignatas pænitentias. Nō exprobravit Chriſtus Pilato, quòd
 injuſtè ſecum egerit, non querulabatur iniquè ſe damnatum. Vi-
 de & tu, an ſimiliter te geras etiam juſtiſſimè punitus. Fuit igno-
 minioſiſſima Chriſto; ille enim, qui apud omnes magnus Prophe-
 ta habebatur, & ſummopere æſtimabatur ab omnibus, tanquam
 malefactor publicis pænis ſubjicitur. Compatere JESU tantam igno-
 miniam forſi animò ſufferenti, & vide, utrùm & tu ſis paratus,
 pro Deo, pro virtute & juſtitia pati ignominiam. Pete à Chri-
 ſto eum Spiritum. Fuit tandem illa damnatio crudelis, quā nul-
 lus determinatus eſt numerus plagarum, ſed quamdiu placuit li-
 toribus,

toribus, sine commiseratione, lacerabant innocentissimam Christi carnem ita, ut totam vulneribus opplerent. Dura tibi videtur Religiose disciplina Religiosa; compara illam cum Christi flagellis, & expende, utrum illius non fuerit gravior, & tamen pro te libenter se subiecit Christus innocens. Cur itaq; tu homo peccator vis tam leve disciplinæ jugum excutere? Erubescere, implorare à Christo fortitudinem, & spiritum animosæ patientiæ.

Considera 2dò: quanto rubore suffundatur ille vultus Virgineus Christi, cum in conspectu totius Hierosolymæ, exueretur vestibûs, & nudus in omnium oculis appareret. Compatiamur Christo. Tu Domine, arbores foliis, prata herbarum varietate vestis, & te malitia hominum probrosè denudavit Simulq; expendamus causas, cur ita denudari voluerit. imò: ut tuam ô homo per peccata, gratiâ & donis Divinis spoliata, tegeret nuditatem. O quantas illi laudes & gratias referre teneamur! 2dò: Voluit totus rubore suffundi, in illa suâ denudatione, ut satisfaceret pro tot hominum impudentiis. Petamus à JESU, ut omnibus viventibus tribuat verecundiam, ne quidquam pudori contrarium audeant. 3tid: Ut nos doceret paupertatem Spiritûs, & animaret ad exuendos omnes rerum terrenarum affectus, & ad deponendum amorem proprium, extirpandasq; malas inclinationes, & habitus vitiosos, ad abjicienda opera tenebrarum, utq; induamur Dominum nostrum JESUM Christum, pauperem, mansuetum, humilem &c. 4to: Tandem voluit nudus apparere, ut nobis mereretur vestem Religiosam, vestem gratiæ divinæ, atq; gloriæ æternæ; æstimemus itaq; has vestes, Christi nuditate nobis comparatas, agamus Christo gratias pro illis, appretiemus illas præ omnibus Regum Purpur s. Rogemus, ut in veste Religiosa, & gratiæ, vivamus & moriamur.

MEDITATIO

PUNCTUM 2dum.

Christus columnæ alligatur.

CONsidera Christum, assertorem libertatis nostræ: adstringi columnæ. Alligantur illæ manus, quas aperiens Christus, implebat omne animal benedictione, quas extendens ad cæcos, illuminabat eos, quibus tangens leprosos mundabat, alligantur & pedes, quibus obibat vicos, & oppida, ubiq; benefaciens. Voluit Christus ligari, ut tu in libertate filiorum DEI ambulares, disrumperenturq; omnia vincula, quibus, mundo, carni, vanitati illigabaris? Poterisne exultans cum Psalmista, gloriari dicens: Dirupisti vincula mea, tibi sacrificabo hostiam laudis. Ereptine sunt pedes, seu affectus tui, de laqueis sæculi? Non permittisne te illaqueari variis rerum caducarum affectionibus? Roga Christum per ejus vincula, ut te absolvat, ab omni vinculo peccatorum. Cogita item Religionem tuam esse columnam, cui te alligare debet amor vocationis, & Regularum. Paterisne illis religari, ut omnia juxta earum præscriptum facias? Vide, cuinam potius conveniat, ligatum vivere, tibi, an Christo? permittit se Christus, ligari hominibus vilissimis; permittit & tu ligari te à Christo, aureis vinculis charitatis, votorum, Regularum, inspirationumq; divinarum. Offer his ligandas manus tuas, pedes, linguam, oculos. Dic cum Apostolo: *Ego victus in Domino, & vivere, & mori, volo.*

PUNCTUM 3tium.

Christus flagellatur.

CONsidera durissimam flagellationem Virgineæ carnis Christi, 1mò: ex eo, quia secundum nonnullos Authores, inflicta sunt Christo sex millia, sexcenta, sexaginta plagarum. O quanta ibi delicatissimi corporis laniena esse debuit! 2dò: Quia juxta quos-

dam

dam, in tres partes sunt divisi milites, ad flagellandum Christum, quorum aliqui virgīs, alii nodosis lorīs, nonnulli ferreis unguibus crudelissimè sæviērunt in Carnem DEI. Conspiciamus defluentem de toto corpore, copiosum sanguinem, cogitemus apparere in multis locis ossa, per abstracta carnis frusta. Compatiamur Christo per totum corpus vulnerato. Expendamus simul, quòd tanta crudelitas, tot plagæ, non amoverunt Christum à columna. Stat immotus sine ullo signo impatientiæ, sine querelis, sine animi suboffensi notâ. Discamus & nos, nullis cedere difficultatibus in obsequio DEI, quæ nos flagellare possunt in tota vita Religiosa. Discamus mortificationem portare in toto corpore nostro; nam si virginea Christi Caro, sic dilaceratur; justumné, ut nos corpora nostra, quæ sunt vasa iniquitatis, subducamus ab omni flagello? Proponamus mortificare membra nostra.

IN COLLOQUIO.

ADvolvamur pedibus Christi flagellati, rogando per vulnera & merita flagellationis ejus, ut nobis addat robur ad sustinendas afflictiones vitæ præsentis, nec permittat separari à Columna Sanctæ Religionis.

Pater: Ave: Anima Christi.

ACTUS SÆPIUS USURPANDI.

NOlo Domine vivere sine vulnere, cùm te video vulneratum

S: Bernard: apud Caraf: in fasc: l: 2. Conf: 13 n: 3.

Ipse vulneratus est propter iniquitates nostras, attritus est propter scelera nostra *Isaïæ: c: 53.*

Hīs plagatus sum, in domo eorum, qui diligebant me. *Zachar: c: 13.*

Peccavi peccatum grande, turbatur conscientia, sed non perturbatur, quoniam vulnere Domini recordabor. *S: Bern. ser 66. in Cant.*

Virga tua, & baculus tuus, ipsa me consolata sunt. *Psal: 22.*

A planta pedis usq; ad verticem, non est in eo sanitas, vulnus & livor, & plaga tumens. *Isa. 1.*

Ee

Ego

Ego in flagella paratus sum. *Psal.* 37.

Operuit confusio faciem meam. *Psal.* 68.

§. QUINTUS.

atum Passionis Mystrium præcipuum.

IN CORONATIONE SPINEA.

Sapientia humiliati exaltabit Caput illius. *Eccl.* 1.

Ego sapientia habito in consilio, & eruditus intersum cogitationibus. *Prov.* 8.

MEDITATIO

De Spinea Corona Christi.

Prel: 1: Constitue te ad pedes Christi spinis coronati.

Prel: 2: Pete gratiam tenerrimæ Compassionis & imitationis Christi.

PUNCTUM imum.

JESUS Spinis coronatus.

Considera, quòd Christus subduxerit se ab aurea corona, non submovit verò caput à spineo sermo, ejus aculeis usq; ad cerebrum, & ad oculos penetrantibus, totumq; verticem, frontem, aures, cruentantibus. Acutissimos dolores toleravit pientissimè, ostendens Regnum suum non fundari in auro, opibus, plausibus, sed in abnegatione, contemptu suò, in forti patientia; nè & tu appetas delicatus vivere, non attingi, molliter tractari, in omnibus tibi indulgeri. Placetne tibi in Regno Christi esse? non displiceat itaq; & in multis affligi, adversitatibus opprimi, spinis non rosis coronari. Sprevit Christus auream, acceptavit spineam coronam, ut nostras còargueret ambitiones, doceret contemptum vanitatum & æstimationum hujus mundi. Didicistine hanc Cælestem ab eo Sapientiam? Erubescere tam longam in schola Christi ignaviam tuam. Pete, ut Spiritu Christi animeris, & vivas.

PUN-

PUNCTUM 1^{um}.*Proprietates, ac circumstantiæ Spineæ Christi coronæ.*

CONsidera proprietates spineæ coronæ, quas in te exprimere contendas. 1^a Proprietas, quòd sit plena ignominia. Caput enim JESU, post tot labores, & obsequia hominibus præstita, & post tot beneficia & dona hominibus profusa, post tot sanatos infirmos, à spiritibus immundis liberatos, in cæcitate illuminatos, a lepra emundatos, à mortuis resuscitados, post tot sui Magisterii sudores, merebatur coronam gloriæ, omni auro & geminis pretiosorem: ingratitude tamen humana, offert illi coronam ignominia & opprobrii: ut & nos pro laboribus & obsequiis, non aliam in hoc mundo gratitudinem requiramus, non aliam coronam appetamus, nisi ignominia & persecutionum, totam mercedem, & præmia meritorum, ad Cælum reservando:

2^a: Proprietas coronæ spineæ, quòd gravissimum dolorem Christo affert: multi enim aculei spinarum, ad intima capitis penetrarunt, multi ad oculos transierunt, multi exulcerata cute in Cranio hæserunt, multi frontem exasperarunt, cruentarunt aures, defluebant circumquaq; frequentes rivuli sanguinis, opplebatur guttarum defluxus oculos, deformabat vultum, ut rectè Prophetæ vaticinaretur: *Non est species ei, neq; decor, & vidimus eum, & non erat ei aspectus, virum dolorum & scientem infirmitatem, & quasi absconditus vultus ejus.* Isaia 53. Vide, quantos dolores pro te Christus tulit; dignumné erit, ut tu velis delicatum esse membrum, sub capite spinoso? Expende quomodo Filius DEI caput suum æterni Patris dispositioni, usq; ad spinas & tribulos subiciat, ut & tu, judicium & intellectum tuum, divinæ in omnibus dispositioni subdas.

MEDITATIO

PUNCTUM 3tium.

Christus spinis coronatus, Rex noster esse debet.

Considera S: Bernardi doctrinam asserentis, multos de possidendo corde nostro concurrentes: *Venit avaritia, & vendicat in me sedem, jactantia cupit dominari mihi, superbia vult esse mihi Rex, luxuria dicit: ego dominabor.* Quid ergo in tali casu faciendum est? vide & audi S: Doctorem dicentem: *Ego autem quantum valeo, resisto, Dominum Jesum meum reclamo, & dico, non habeo Regem, nisi Dominum Jesum.* Resistisné & tu expugnantibus tuum cor vittis? clamasné ad Jesum, ut tibi auxilietur! Protestarisné, te non habere alium Regem, nisi Jesum & hunc spinis coronatum?

IN COLLOQUIO.

Collige sanguinem JESU, defluentem de capite JESU, & elue caput, & cogitationes tuas.

Pater: Ave: &c: Anima Christi.

ACTUS SÆPIUS USURPANDI.

Christo in carne passo, & nos eadem cogitatione armemur. 1. *Pet 4:*

Non decet esse membrum delicatum sub spinoso capite.

Caro nostra Caro Christi est, per hanc Regnum Cælorum possidemus S. Tho: Vill. ser: 1 in Nat: Dom:

A ratione alienum est, ut qui audierimus Dominum spinis fuisse coronatum, ipsi habeamus capita floribus redimita. Clem: Alex: lib: 2: c: 8.

Non habeo Regem, nisi Dominum JESUM. S: Bernard:

Factus sum in derisum omni populo meo, canticum eorum totâ die. Thren: 8.

Nemo certare volens, sine vulneribus coronam expectat S: Chrysost: ser: 29. Tom: 3.

Plenus est mundus spinis, in mundo sunt, in aère sunt, in carne tua sunt; spina, falsus frater, spina vicinus malus.

Considera lilia agri, quomodo inter spinas vigent & nitent. S:
Ber; Ser; 48. in Cant:

S. S E X T U S

5tum Passonis Myſterium præcipuum.

In Crucis Bajulatione.

Sapientia foris prædicat, in plateis dat vocem suam, in capite turbatum clamat. Prov: 1.

Sapientiam & disciplinam qui abjicit, infelix est. Sap: 3.

M E D I T A T I O

De Bajulatione Crucis.

Præl: 1. Intuere Christum Cruce onustum, & de Civitate in montem Calvariæ prodeuntem.

Præl: 2. Pete gratiam alacriter & fortiter portandæ Crucis tuæ, & Christum sequendi.

P U N C T U M I m u m .

Christus accedit ad Crucem portandam.

CONSIDERA, antequam Christus acceperit Crucem portandam, imprimis exiit vestem purpuream, & propriis induitur vestibus, ut discas: si volueris cum Christo portare crucem, necessum esse, ut prius exuas veterem hominem, omnesq; vitiosas inclinationes & affectus carnis, ac mundi; induas vero mores conformes Christo, nempe humilitatem, mansuetudinem, patientiam, viscera charitatis erga omnes, Spiritum paupertatis, obedientiæ. Voluerat Heraclius portare crucem Christi, nec tamen voluit, priusquam depolito Cæsareo ornatu, plebeium vestitum assumeret, & nudis pedibus incederet. Nec tu speres, constanter te portaturum eandem Crucem, nisi abjecta mundi vanitate, induas Christi virtutes. Vide, quibus vitiis sis obnoxius? quæ inclinationes validius te ad terrena deprimunt? exue omnes, transfer omnem affectum tuum

in Christum, exerceas te in virtutibus Christi. Pete id ipsum à Christo, ut te aptum efficiat ad portandam Crucem.

Considera 2dò: quanto affectu & alacritate. Quotò desiderio, licet gravissimum Crucis lignum, Christus acceptaverit, quanta teneritudine illud complexus sit, acceptumq; humeris imposuerit? sentisné Religiose in te desiderium Crucis? non fugisné illam? aut si tibi occurrerit, non amaróné animo, ac querulosó illam suscipis? Erubescere, dole, pete à Christo: O! Benignissime JESU da mihi gratiam, omnem Crucem, cum desiderio expectandi, & cum gaudio amplectendi.

PUNCTUM 2dum.

Christus bajulat Crucem.

CONsidera, quomodo Christus exhaustus, post tot itinera, quibus ab uno Judice ad alium ducebatur, viribus destitutus ob profusionem sanguinis, in crudeli flagellatione, & spineæ Coronæ dolores, totiusq; Corporis vulnera, libenter subiecit humeros tanto Crucis oneri, non se excusavit evidenti infirmitate virium, non conquestus contra tantam hominum in se, malitiam, sed mansuetissimus, patientissimus procedebat, cum imposito sibi pondere; ut & tu Religiose discas non conqueri, de nimio labore, quòd tibi multa onera imponantur, non concedantur ulli favores, quòd tui respectus non habeatur, quòd in omnibus tui mortificatio intendatur, & repressio. Amplectaris cum gaudio omnem Crucem, quam tibi ferendam imponit divina voluntas. Pete à Christo fortitudinem & generosam mentem.

PUNCTUM 3tium.

Christus invitatur ad Crucem portandam.

CONsidera & expende singula verba Christi, invitantis ad portandam Crucem Luc: 9. Si quis vult venire post me, abneget semetipsum, & tollat Crucem suam quotidie, & sequatur me. Ubi
cogita

Cogita imò, & examina voluntatem tuam, utrùm defaëto velis venire post Christum, venire inquam, ad possidendum Regnum Cælorum; scias itaq; non aliter id te consecuturum, nisi per abnegationem tuâ, & Crucis tolerantiam quotidianam. Parum est, semel, aut bis, uno vel altero die Crucem Christi ferre: qui vult venire post Christum, debet quotidie Crucem, sine intermissione per totum vitæ suæ cursum sive in suâ mortificatione, sive in occurrentibus adversis, constanter sufferre. Cogita 2dò: Paucos esse, qui Crucem portare velint, tum quia superbi & ambitiosi, tanquam ignominiosam fugiunt Crucem, v. g. nolunt ullam confusionem, humiliationem suâ sustinere patienter, nolunt aliis postponi &c. Tum quia delicati, & sensuales tanquam amaram Crucem, evitare conantur. Tum quia ignavi & torpidi virtutem Crucis ignorant, & laborem ejus declinantes, renuntiant illam portare. Unde S: Paulus, illacrymatur dicens: *Multi sunt inimici Crucis Christi, quorum Deus venter est, & gloria in Confusione ipsorum.* Vide tu, utrùm, non sis unus de illis? Pete à Christo: Trahe me post te Domine JESU, ut curram in odorem exemplorum tuorum. O! JESU Crucem bajulans, esto mihi in Deum. Non venter, non vanitas mundi, sed tua Crux sit gloria mea, desiderium meum, delicia mea.

Pater: Ave: Anima Christi.

ACTUS SÆPIUS USURPANDI.

SALVE Crux pretiosa, suscipe discipulum ejus, qui pependit in te, Magister meus Christus. S: Andr: apud: Sur: in Vit:

O bona Crux diu desiderata, & jam concupiscenti animo præparata. *Idem.*

Beati, qui persecutionem patiuntur propter justitiam, quoniam ipsorum est Regnum Cælorum. *Matth: 5.*

In paucis vexati, in multis bene disponentur. *Sap: 2.*

Sicut ovis ad occisionem ducitur, & quasi agnus coram tondente se obmutescet. *Isaie 53.*

Tollite

Tollite jugum meum super vos, & invenietis requiem animabus vestris. *Matth: 11.*

§. SEPTIMUS.

6tum Passionis Myſterium præcipuum,
IN CRUCIFIXIONE.

Sapientia filiis ſuis vitam inſpirat, & ſuſcipit inquirentes ſe. *Sap: 4.*
Per Sapientiam ſanati ſunt, quicunq; placuerunt Domino. *Sap: 9.*

MEDITATIO

De Crucifixione Chriſti.

Præl: 1: Colloca te in monte Calvario, ſub Cruce Chriſti.

Præl: 2. Pete affectum compaſſionis, & gratiam imitationis Chriſti Crucifixi.

PUNCTUM I. um.

Chriſtus Crucifixus exemplar Religioſæ mortificationis.

CONſidera caput Chriſti ſpinis cruentatum, ſanguine circumfuſum, humiliſſe inclinatum, ut & tu diſcas in hac vita, non aureas, nec molles, vel odoriferas, aut cum illis *Sap: 2.* diſſolutis juvenculis, roſeas, ſed ſpineam, doloribusq; non deliciis plenam eligere coronam. Vide, quam tibi, in hac brevi peregrinationis tuæ via, optas Coronam? illamné, quæ momentaneè delectet, ut æternùm cruciet? an quæ in tempore non nihil affligat, ut æternùm ſoletur? Decebitné ſub ſpinoſo Chriſti capite, vel ad momentum, te membrum eſſe delicatum? Erubeſce prioris vitæ tuæ delicias. Detrude de tuo capite, omnes tuarum cogitationum vanitates, & mundi illecebras, abjice unâ tecum ad plantas Crucifixi. Proteſtare, quòd malis uſq; ad mortem cum Chriſto cruciari, quàm cum mundo lætari, ac deliciis affluere. Compara caput tuum viliffimum & contemptiſſimum, cum capite Chriſti honorabiliſſimo, & omni cultu pretioſiſſimĩſq; coronis digniſſimo,

fimo, interim tamen humiliter inclinato. Audebisné tu caput tuum erigere? & altô superciliô alios despicere? cûm Dominus uniuersorum, caput suum in Cruce inclinet, & se totum voluntati Patris Æterni submittat?

Confidera 1dò: Aures Christi spinis circumseptas, & vulneratas, ut & tu sepias aures tuas, nec facilè eas, ad vana audienda convertas. Juxta monitum Spiritûs S: Eccl: 18. *Sepi aures tuas spinis, & linguam nequam noli audire.* Vide, quales aures tuæ? Confidera 3tò Oculos JESU, livore, lacrymâs, ac sanguine suffusos; illi sunt oculi, qui suo respectu omnes vivificabant. Viderat Christus Matthæum hominem peccatorem, videndo fecit Apostolum. Respexit Petrum, & solvit in lacrymas pœnitentiæ. Viderat Zachæum, & ejus domui salutem attulit. Utinam te quoq; simili respiciat aspectus. O Domine! respice in me & miserere meî, quia unicus & pauper sum ego. Psal: 24. Vide, utrûm non tua peccata, non tua impœnitentia, has de ejus oculis lacrymas cum Sanguine expressit? Indulgebisné adhuc curiositati oculorum, spectando Christi oculos, sanguine & lacrymâs suffusos?

Confidera 4tò vultum Christi lividum, consputum, colaphisatum, omni specie destitutum, ac felle & acetô potatum. Ille est vultus, in quem Angeli desiderant prospicere, cujus visione omnes Cœli cives beatificentur. Ecce qualis factus est! né & tu ab ejus intuitu excludaris, nè creatorum vultuum pulchritudine infascineris, præsentâ Patri Æterno hanc Christi faciem: Respice in faciem Christi tui, ut non respicias plures arenâ maris iniquitates meas.

Confidera 5tò: brachia Christi & manus, in Cruce extensas & clavîs transfixas. Istæ sunt manus, quæ ægros ab infirmitate sublevabant, mortuos ex sepulchro educebant. Istæ manus, in quibus omnia bona nostra, & sortes nostræ repositæ sunt, de qui-

bus omnia dona Cælestia in nos profluunt. Propter nos sunt Crucifixæ, ut & nos, manus nostras eidem Cruci affigamus, nec ad confringendū jugū mandatorū Dei extendamus. Extensis manibus expectat nos Christus in Cruce; & quousq; profugi ab eo per creaturarū abusus errabimus? quamdiu ad expectantem nos, non revertemur? Revertere, revertere, anima mea, ad Deum Redemptorem tuum!

Confidera 6tò latus & cor lanceâ perforatum, & expende, quantus tuī amor in hoc corde ardeat? dum propter te ultimam etiam, quæ sub corde latuit, guttam Sanguinis effudit. Et tuum cor quali ardet amore? Deiné an vanitatum? apertumné Deo & tibi Præpositis? ejice omnes affectus terrenos, & soli Christo consecra cor tuum, ejusq; amor.

Confidera 7mò gēua Christi attrita genuflexionibûs, allisioneq; ad terram, dum sub Crucis onere fatisceret, & disce, né tædio afficiaris, si diutius genuflexionibus fatigeris. Si laboribus frangaris. Vide pedes Christi perforatos, totum corpus lacertum, vulneribus à planta pedis, ad verticem capitis repletum, quàmvis illud esset innocentissimum, nullo nævo maculatum. Et tu tot peccatis sædatam carnem tuam curasné crucifigere cum suis concupiscentiis, per contnuas mortificationes? non ambulasné secundum desideria ejus? non fovesné illam delicatè in tuam perniciem? Excita te vulneribus Christi ad odium carnis tuæ. Fac illam Deo subiectam & Spiritui. Redige illam omni asperitatum genere in servitutem, né tibi dominetur. Ineas cum ea pactum, exemplò S; Petri de Alcantara, né ullam ei in hoc sæculo requiem præbeas.

PUNCTUM 2dum.

Christus Crucifixus, exemplar Religiosarum Virtutum.

CONFidera imò: quomodo Christus, Dominus Cæli & terræ, tractetur ab hominibus: conspuitur, conculcatur, colaphisatur, latroni postponitur, inter duos latrones Cruci affigitur, Crucifixus,

xus, ac inter acutissimos dolores positus, irridetur, blasphematur. His tamen Christus non irritatur, non irascitur, imo pro Crucifixoribus erat. O quanta Christi humilitas! quanta patientia! talisne tua Religiose? qui nullam tuam postpositionem sustinere vis, nullo verbo lædi; Erubescere, deprime tuum tumorem: deplora impatientiam. Desidera ab omnibus contemni, & pro nihilo haberi. Pete à Christo Spiritum veræ humilitatis & patientiæ.

Considera 2dò: Christum vestibus nudatum, non habentem, quo sitim suam refocillet, & ubi caput reclinet. O quanta Christi paupertas! utinam & tua Religiose assimiletur illi!

Considera 3tiò: multa Christo, falsò & calumniosè imponuntur; nullus tamen ausus est quidquam ei objicere, in materia castitatis. O quanta Christi castitas! cui nec hostes habent, quod vel falsò objiciant, itanè & tu Religiose, in omni conversatione tua procedis, ut nec inimicissimus inveniat, quod tuæ puritati opponat? Vide, ut cautè cum omnibus converseris.

Considera 4tò, quomodo Christus promptissimè executus omnia, quæ imperabant ei licet impiissimi Judices: obtulit manus & pedes ad clavos, corpus ad vulnera & lanienam, vitam ad mortem; in cunctis tractabilissimum se exhibuit, factus obediens, usque ad mortem, mortem autem crucis. O quanta obedientia! Itanè tu promptus es tuis Superioribus in obediendo! itanè tractabilis? quamvis non ita ardua tibi imperantibus. Confundere, dolo, abnegare temetipsum & voluntatem propriam. Subjice te plenè voluntati, & directioni Superiorum tuorum. similiter expende alias Christi virtutes, constantiam in Cruce sustinenda, fortitudinem in doloribus ferendis, amorem inimicorum, mansuetudinem in molestiis & injuriis sibi illatis. Et vide, ut huic exemplari assimileris.

PUNCTUM 3tium.

Christus Crucifixus: Solatium afflictorum.

CONsidera Christum tanquam fontem omnis dulcedinis, & exhilarationis tuæ, in occasionibus mæroris, & amaritudinum tuarum. 1mò: Enim in occasionibus apprehensionum occurrentium, sub tempus pœnitentiarum, sibi inflictarum, recurrat Religiosus ad Christum Crucifixum, & expendat, quanta ille innocentissimus passus est pro nobis: quot flagella sustinuit? vulnera suscepit, & quidem patientissimè, humillimè, sine murmuratione. Cur itaq; multò levior, quàm fuerit Christo, tibi gravis videbitur Religiosa disciplina? 2dò: Intolerabiles tibi videntur linguæ, aliorum obtrectiones, falsæ delationes, suspiciones, iudicia temeraria; statuas tibi ad tuum solatium Christum, inter ludibria, accusationes, illusiones, blasphemias, calumnias, animò pacatissimum, nulla passione perturbatum, modestissimum, amabilem. 3tiod: Graves cuipiam videntur superiores, molesti fratres; recogitet Christum à Judicibus spretum, & iniquè damnatum, à Populo & Principibus, Barabbæ postpositum, & inconcinnis vocibûs, dignum, qui Cruce tolleretur, proclamatum. 4tò: Occurrente cibo insipido occurrat cuivis Christus felle & acetò potatus; occurrente defectu in vestitu, habitatione, occurrat Christus nudus in Cruce, nec habens, quò caput reclinaret. Judicet enim quisq; cuinam magis conveniat, Christonè an misero homuncioni, frui comoditatibûs? Ejusmodi considerationibûs, facile quisq; amaritudines vitæ hujus dulcorabit, & Spiritu Christi animabitur ad ardua, fortiter & generosè ferenda.

C O L L O Q U I U M.

CUM Christo Crucifixo, rogando per ejus Crucem, & vulnera, ut tibi tribuat amorem Crucis, & desiderium quàm plurima patiendi. Per suumq; in Cruce exspirium, inspiret Spiritum, quò animatus merearis conformari Christo Crucifixo.

*Pater; Ave: Anima Christi,**ACTUS*

ACTUS SÆPIUS USURPANDI.

TOta vita Christi Crux fuit & Martyrium, & tu quæris requiem & gaudium? *Tho: à Kem: l. 2. c. 12.*

Qui non accipit crucem suam, & sequitur me, non est me dignus; *Matth: 10.*

Qui non bajulat Crucem suam, & sequitur me: non potest meus esse discipulus. *Luc: 14.*

Non est alia via ad vitam, & ad veram internam pacem, nisi via Sanctæ Crucis. *Tho: à Kemp: l. 1. c. 12.*

Vellem nescire quidquam, nisi Christum, & hunc Crucifixum. *Emmanobrega hist: Soc: P: 1: c. 4.*

Domine JESU Christe, DEUS cordis mei, per quinque illa vulnera, quæ tibi in Cruce, nostrî amor infixit, tuis famulis subveni, quos pretioso sanguine redemisti. *S. Xav:*

Nemo mihi molestus sit, ego enim stigmata Domini JESU in corpore meo porto, ad *Galat: c. 6.*

Desperarem itaque, sed non despero, quia vulnerum Christi recordabor. *S. Aug. ser: 74: ad Fratres.*

Ab sit mihi gloriari, nisi in Cruce Domini nostrî JESU Christi *Galat: 6.*

HORA QUIETIS
DANDA CONSIDERATIONI

De Patientiæ actibus & adjuventis.

Statue te in conspectu Dei, aut sub pedibus Christi Crucifixi. Pete gratiam utiliter instituendi hanc Considerationem.

I. IN afflictionibus cave apprehensiones, & cogitationes melancholicas, distrahe mentem seriis: & crede nihil in hac vita contingere mali, quod nos affligere debeat, præter peccatum. Unde cum Eudoxia multa minaretur Chrysostomo, responsum illi: *Chrysostomus nihil timet; præter peccatum.*

2. Si id, quod te affligit, præcessit, cogita: id factum est, infectum reddi non posse, ad quid ergo te affligis? Si autem futurum est? dic tibi, quod tempestivè affligi incipias, antequam afflictionis occasio veniat, utquid ante tempus affligeris?

3. In afflictione serva cor tuum in pace, & quiete; omnem fugiens cordis perturbationem; sicut monet Christus: *Non turbetur cor vestrum.* Joan: 14. Et Matth: 6. *nolite solliciti esse.* Nam juxta sacram scripturam: *Spiritus tristis exsiccat ossa.* juvabit te, si projicias te in sinum Providentiæ divinæ; juxta monitum S. Petri: *omnem sollicitudinem projicientes in eum, quoniam ipsi cura est de vobis.*

4. In quavis afflictione, maximè pone ori tuo custodiam, né verbò exerres, aut iracundò, aut murmuratoriò, aut alterius afflictivò, ut docetur Psal: 38. *Posui ori meo custodiam, cum confisteret peccator adversum me; obmutui, & humiliatus sum & silui, & inferius: opprobrium, insipienti dedisti me, obmutui, & non aperui os meum, quoniam tu fecisti.*

5. Nullum signum impatientiæ ostendas exterius, neq; exasperes vultum aut frontem contrahas: cave item, né torvò oculò aspicias, clames, &c.

6. Lætare interiùs, & complaceas tibi in divina voluntate, has afflictiones, tibi assignante, ut S: Paulum fecisse legimus 2. Cor: 12. *Placeo mihi in infirmitatibus meis, in angustiis.* Item c: 7. *Repletus sum consolatione, superabundo gaudiò in omni tribulatione nostra.*

7. Revoca tibi in memoriã Passionem Christi, dolores tot Martyrum, Sanctorum Patrum nostrorum afflictiones; nunquid tu aliã viã ad Cælum progredi desideras? Audi D: Paulum ad Hebr: 12 exhortantem: *Per patientiam curramus ad propositum nobis*

bis certamen, aspicientes in Authorem fidei & consummatorem Iesum &c. Audi Christum: In patientia vestra possidebitis animas vestras. Unde in afflictione dic: quid hæc sunt: quæ patior, ad illa, quæ passus est Christus & Sancti DEI.

8. Agnosce te majoribus afflictionibus dignum, propter peccata, & dic cum Propheta: *Iram Domini portabo, quia peccavi Ei. Mich 1.*

9. In tribulatione laudandus DEUS, & illi gratiæ agendæ: Sit nomen Domini benedictum &c.

10. Roganda à DEO patientia vg. cum Psalmista: *DEO subiecta esto anima mea, quoniam ab ipso patientia mea. Psal: 61.*

11. Desidera plus pati cum Xaverio: Amplius cruciari Domine, amplius &c.

12. Ne quæras tunc, & emendices a Creaturis solatiola, caveasq; à querelis.

13. Recurras tunc ad Christum Crucifixum, Eucharisticum. Juvabunt autem te ad patientiam hæc, 1mò: abstractio affectûs ab omni re creata, ex tali enim affectu omnes perturbationes oriuntur. 2dò: Aspicias Cælum juxta monitum Matris Machabæorum, dicentis: *Peto nate, ut aspicias in Cælum.* 3iò. Cogitando, quòd omnia ista brevi finientur. 4tò: Memoria Passionis Christi.





P A R S 3tia.

DECURSUS

Viae Cælestis Sapientiae

Per Viam Unitivam.

Postquam Religiosus Viator, in Ingressu viae Cælestis Sapientiae, omnia sui cursus amovit impedimenta, labelsq; expiavit; postquam in progressu ejusdem viae instruxit Intellectum, luminosis perfectioris vitae veritatibus, accendit praelucantibus Incarnatae Sapientiae exemplis animum, & congruas suo statui consecutus virtutes; tandem in decursu, 3tium istud, perfectae cum DEO unionis iter prosequendum est, ut ad æmulam Comprehensorum in Cælis felicitatem proximo gradu accedatur. Triplici autem potissimum passu ad eam cum DEO unionem perveniet Religiosus viator. 1mo: Gloriosae Resurrectionis & Ascensionis Incarnatae Sapientiae, diviniq; Spiritûs participatione. 2do: Dilectione DEI & proximi. 3to: Inviolabili religiosorum votorum nexu.

C A P U T 1um.

De participatione gloriosae Resurrectionis, & Ascensionis, diviniq; Spiritûs.
Participatio Resurrectionis ac Ascensionis, quæ per imitationem obtinebitur, viatori divinam inspirabit vitam. Et Spiritus Sancti adventus efficiet, ut unus sit Spiritus cum DEO. De singulis.

§. PRIMUS.

De Resurrectione Christi & ejus imitatione.

MEDITATIO

Præl: 1. Colloca te ad Sepulchrum Christi, ex quo gloriosissimus Christus resurgit. *Præl.*

Praeh. 2. Pete gratiam fructuosæ meditationis, ex qua possis inducere novam morum vitam, & in ea ambulare.

P U N C T U M 1um.

Christus Resurgens: spes resurrectionis nostræ.

Considera Christum Dominum, cum eductis è Limbo Patribus, venisse ad sepulchrum, in quo corpus ejus jacebat, & ostendit iis illa vulnera, & laniationem, quam subiit ex eorum amore. Vide, quomodo mirentur tantam Christi dignationem: qua submissione & affectu ei gratias agant: quo amore in illum ferantur; atq; cum dilaudent. Mox Christus suâ omnipotentiâ, collecto suo sanguine, in passione effuso, implet venas Sanctissimæ corporis, & vulsas carnis partes, & capillos suis locis restituit, tandemq; Sanctissima Anima illud corpus animavit, & in ictu oculi, ita transformavit, ut clariùs ac splendidiùs sole evaserit, admirantibûs & adorantibûs Sanctis illis de captivitate eductis. Credisne id anima mea? Credo Domine, credo. Tu adjuva incredulitatem meam. Elice actum gaudii de tanta gloria Christi Domini. Gratulare ei eandem. Excita in te spem resurgendi similiter in carne tua glorificanda per merita Christi. Expende autem, illos tantum cum Christo resurrecturos in gloria, qui in hac vita fuerint cum eo passi, juxta S. Paulum Rom. 8: *Si tamen compatimur, ut conglorificemur.* Resolve te ad patienda plurima pro Christo, ut returgas gloriosus cum Christo.

P U N C T U M 2dum.

Quis modus resurgendi, Christi?

Considera Christum resurrexisse a mortuis: 1mò, relinquendo feralem amictum, ita, ut non amplius moreretur, ut nobis præberet exemplum, & Idæam justificationis nostræ; ita enim a sepulchro peccati resurgere debemus, ut relinquamus antiquos vitiosos habitus, & occasiones peccandi. 2dò: Renovatum corpus,

G g

gloriosus

gloriosis dotibus ornatum reassumpsit. Et nos in justificatione nostra novam vitam gratiæ, perfectam, & omnibus virtutibus plenam inchoare debemus. 3tio: In glorioso corpore vulnera manuum, pedum, & lateris remanere voluit. Expende hujus rationes: Tum ut videas, vulnera, quæ hic patimur, futura esse ad majorem gloriam. Tum ut habeamus, quò refugiamus in nostris necessitatibus. Tum ut illa representet Patri æterno pro nobis. Tum ut in die judicii, sint ad exprobrationem damnatis, quæ illis ob eorum malitiam nihil profuerunt. Adora hæc gloriosa vulnera Christi. Roga, ut te intra illa recipiat & abscondat: Intra vulnera tua absconde me.

PUNCTUM 3tium.

Qualis nostra resurrectio debet esse in hac vita?

Considera, quomodo induere debeas, dotes gloriosi corporis Christi. 1mo: Sicut una dos gloriosi corporis fuit claritas; ita & nos præluere debemus proximis nostris, bono vitæ exemplo, & sanctæ conversationis. 2do: Sicut corpus Christi fuit impassibile, ita & nos debemus reddi impassibiles, per mortificationem sensuum & passionum nostrarum. 3tio: Sicut fuit corpus Christi agile, ita & nos debemus esse agiles in promptitudine obedientiæ, & operum obsequii Divini. 4to: Induamus Christi subtilitatem, per munditiam corporis & animæ Angelicam, & intimam cum DEO in spiritualibus exercitiis communicationem, & penetrationem. Excita te ad hæc, & pete a Christo donum illarum dorum, & gratiarum.

ACTUS SÆPIUS USURPANDI.

Laudate Dominum, quia bonus Dominus, psallite nomini ejus, quoniam suave. *Psal. 94.*

Vivat JESUS meus, & exaltetur Rex Salutis meæ.

Quis nos separabit à charitate Christi? tribulatio an angustia?

an fames? an nuditas? an periculum? an gladius? *Philipp. 3.*
 DEO gratias, qui dedit nobis victoriam per Dominum nostrum
 JESUM Christum *1. Cor. 15.*
 Vivit Dominus, & benedictus DEUS meus, & exaltetur DEUS
 salutis meæ. *Psal. 17.*

§. S E C U N D U S.

De Ascensione Sapientie Incarnate.

Præl: 1. Fiat loci collocatio in monte Oliveti coram Christo
 ascendente in Cælum aspicientibûs Apostolis.

Præl: Petenda gratia fructuosæ de hoc Mysterio meditatio-
 nis, & præcipuè ut ex illa exardescat cor ferventî desiderio Pa-
 triæ Cælestis.

P U N C T U M I m u m.

Cur de monte ascendit Cælus?

CONsidera, quòd Christus Dominus, eduxerit discipulos suos
 ad montem Oliveti, & videntibûs illis elevatus est, simulq;
 inquire causas, cur non ex planitie aliqua, sed ex alto monte vo-
 luerit Cælum ascendere? ima hujus rei causa potest esse: quia
 voluit nos docere, quòd ad magnam virtutem, & excelsam per-
 fectionem eniti debeat, qui rectà ex hac vita in Cælum ascen-
 dere cogitat. Vide tu, qualis tua virtus? qualis progressus in
 virtutum exercitio, & perfectionis cura? O quantum adhuc di-
 stas à perfecta humilitate, patientia, paupertate, castitate, o-
 bedientia! Erubescere, deprecare DEUM, deplora tuum tepo-
 rem. Excita te ad ferventius studium: *Dixi nunc capi.*

ada causa est, ut disceremus non in terrenis defixam esse de-
 bere mentem nostram, non mundanis inhærere cor, sed ab omni
 vanitate abstractos affectus, & cogitationes elevare in Cælum.
 In Cælis debet esse conversatio nostra, si illuc transferri exopta-

mus. Examinemus cogitationes & affectus nostros, in cælestibusne meditando occupantur? an caducis, & transitoriis afficiuntur? Colligamus omnia vota & desideria nostra, elevemus in cælum. Excitemus animam cum Psalte: *Convertere anima mea in requiem tuam, quia Dominus benefecit tibi. Placebo Domino in Regione vivorum. Psal: 114. Exardescamus desiderio cælestis Patriæ: Concupiscit & deficit anima mea in atria Domini. Cor meum & caro mea exultaverunt in Deum vivum. Psal: 83.*

3tia: Nè quis sibi blandiretur de facilitate obtinendi cæli, putaretq; sine labore ac occurrentium difficultatum victoria posse se illud consequi, duxit discipulos in altum montem, & post superatas itinere molestias, in cælum elevatus; ut & nos labore, & sudore inquireremus illam æternam beatitudinem. Audiamus S: Prosperum monentem; *Non otiosis aut dormientibus provenit Regnum Cælorum, non otio, & desidia torpentibus, æterna beatitudo ingeritur.* Et tu quid hucusq; egisti pro cælo? quid sustinuisti? Confundere. Pete à Christo, ut trahat post se cor tuum, & tribuat tibi Spiritum plura agendi & patiendi pro Nomine suo,

PUNCTUM 2dum.

Elevatis manibus benedixit eis, Luc: 24.

Considera, quòd Christus elevatis manibus benedixit discipulis suis, ostendens non terrenam se illis, quæ nec satiat, nec hominibus Sanctis sapere potest, sed cælestem largiri benedictionem; Et tu quam tibi optas? terrenasne divitias, quæ citò effluunt, an Cælestes desideras? vanamne populi auram, an Dei gloriam quæris? sensualianè oblectamenta te infatuant, an æternæ beatitudinis torrens voluptatis sitim accendit? hincne commoditates, an in Cælis perennem postulas requiem? Renuntia hisce omnibus transitoriis, pete supplex Cælestem à Christo benedictionem. Et vide, cum quanta submissione, & sui prostratione recipiant eam discipuli,
inclinata

inclina & tu caput tuum, demitte cor contritum & humiliatum; postula à Christo, ut ejus caelestis benedictio tecum semper maneat, & ubiq; te comitetur.

PUNCTUM 3tium.

Videntibus illis elevatus est. Act: i.

Considera, quo affectu immotis oculis euntem in Caelum Christum discipuli contempnentur? quomodo stupore & admiratione defixi, spectant eum, quem nuper Judæi conspuebant, conculcabant, odiis prosequabantur, & Cruci affigebant, nunc in tanta Majestate & potentia, caelum ascendere; qui humiliavit semetipsum, formam servi accipiens, factus obediens usq; ad mortem, ita gloriosè obsequentibus nubibus, ministrantibus Angelis, per aëra elevatur super sidera. Quis Christi non imitabitur humilitatem? quis in hac vita recusabit in abjectione, in contemptu jacere? quis pati & despici non cupiet? ut exalteretur & regnet cum JESU. *Videntibus illis elevatus est.* Non frustra Christus spectatores suæ elevationis & gloriæ, voluit habere Apostolos, ut scilicet illos similis gloriæ implens desiderio, ad pares provocaret labores. Sentisne in te desiderium gloriæ caelestis? cupitne animus tuus illic assistere, ubi se sperat sine fine gaudere? Audi D: Greg: hom: 37. in Evang. monentem: *Ad magna præmia perveniri non potest, nisi per magnos labores. Delectat ergo mentem magnitudo præmiorum: sed non deterreat certamen laborum.* Resolve te ad omnia vitæ Christi insignia, ad paupertatem, contemptum & dolores; & certus eris ejus coronæ, annuente Apostolô: *Non coronabitur, nisi qui legitimè certaverit.*

IN COLLOQUIO.

Gratulaberis Christo triumphos, post tot superatos labores & adversa. Ages gratias Deo Patri pro exaltatione Christi. Desiderabis eum videre & amare in cælo in æternum. Petes ab eo, ut

abstrahat cor tuum à terrenis, & ibi fixum faciat, ubi sunt vera gaudia. *Pater: Ave: Anima Christi.*

ACTUS SÆPIUS USURPANDI.

JESU Tibi sit gloria, qui victor in cælum redis, cum Patre & almo Spiritu in sempiterna sæcula.

Vivat JESUS in cælo triumphans.

JESU ascendens super omnes cælos, te adoro, te amo, te desidero, sis benedictus ab omnibus, super omnia.

§. TERTIUS.

De Spiritu Sancto.

UT participatio Divini Spiritûs comparetur; duplici meditatione ad id præparandus animus, quarum ima de adventu ejus agens, exponet necessitatem & media illius percipiendi. 2da. Fructus, quos operatur in nobis explicabit.

MEDITATIO. ima.

De Adventu Spiritus Sancti.

Prel: 1. Statuamus nos in ea domo & loco, ubi Sancti Apostoli, repleti sunt Spiritu Sancto.

Prel: 2. Petamus gratiam fructuosæ Meditationis de descensu Spiritûs Sancti.

PUNCTUM imum.

Necessitas Spiritûs Sancti.

CONsidera necessitatem imam Spiritûs Sancti esse, quia sine illo, ejusq; gratia, nullus homo vivere, nullus moveri, ac esse potest, spiritualiter, ac meritorie; in illo enim vivimus, in illo movemur & sumus. Hinc. S. Paulus 1 Cor: 12. docet: Nemo potest dicere: Dominus JESUS, nisi in Spiritu Sancto. Et S. Augustinus Ser: 2. Sent; ait: quod est anima corpori hominis, hoc est Spiritus S; Corpori Christi, quod est Ecclesia; atq; cuivis particulari membro

membro ejus. Debemus igitur ita, aut magis, prout animam nostram, diligere, custodire, ac conservare Spiritum Sanctum. Videamus, quæ est in nobis ejus dilectio? quæ diligentia in eo conservando, & custodiendo? confundamur, humiliemus nos, coram Spiritu Sancto, confiteamur negligentias nostras, invocemus eum.

2da Necessitas est, ut ab eo directionem habeamus in hac peregrinatione nostra, ne exerremus à viis rectis, juxta illud Psal: 142. *Spiritus tuus bonus deducet me in terram rectam.* Pensamusne à directione ejus? obsequimurne illius inspirationibus? Audiamus monentem Apostolum ad Galat. 5: *Spiritu ambulate, & desideria carnis non perficietis.* Et inferius *Si Spiritu vivimus, Spiritu, & ambulemus.*

3tia Necessitas Spiritus Sancti, ut doceat nos rerum pretia, illaq; æstimemus, quæ merentur æstimationem, prout sunt æterna, & salutem animæ nostræ concernentia, contemnamus verò caduca, & transitoria; ita enim sine Spiritu Sancto sumus, sicut esset mundus sine luce, aut in nocte domus sine lucerna; ubi nulla tunc agnoscitur rerum dignitas, & æquè aurum lutum conculcatur: imo, quæ putrida sunt, auri fulgorem induunt. Non subiacemusne & nos ejusmodi erroribus? Imploremus Divini Spiritus lucem, quæ illuminet tenebras nostras, & erudiat ignorantiam nostram, juxta promissionem Christi: *Ipse vos docebit omnia.*

4ta Necessitas, ut nos cum Deo uniat, & intimè illi adhære-re faciat, tum per intellectum nostrum, qui viva quædam Imago Dei fiat, ejusq; perfectionum, tum per voluntatem, inflammatis-simâs desideriis eam accendendo, amoreq; replendo, & ad omnes nutus ac dispositiones divinas inclinando, tum per mores, totamq; vitam Christo Domino conferrem, ut hac ratione, de virtute in virtutem progrediamur, donec videatur clarè Deus Deorum in Sion.

Veni

Veni Sancte Spiritus, effice hæc omnia in nobis. Simus quæso per tuam gratiam, unus cum DEO Spiritus; ut nihil aliud cogitemus, nihil spiremus, nihil velimus, nisi, quod DEO placet, ejusq; gloriam promoveat.

5ta: Necessitas est, ut addat vires & robur ad superandas tentationes, sine cujus auxilio velut arundo, ventô agitur, jactamurq; sicut pulvis à facie venti. Novimus, quàm infirmi fuerint Apostoli, ante adventum Spiritûs Sancti, & quàm fortes post illius susceptionem. Totis ergo præcordiorum desideriis anhelemus, ac suspiremus in Cælum, ut cum nobis perentibus mittat Pater æternus, licet indignis, propter infinitam bonitatem suam, mittat Filius DEI Unigenitus propter ineffabilem erga nos charitatem suam. Invocemus Sanctum Spiritum cum Ecclesia: Veni Creator Spiritus, mentes tuorum visita, imple supernâ gratiâ, quæ tu creâsti pectora. Assumamus affectus, devotionem, ardentissimâq; omnium Sanctorum corda, & in illorum affectu desideremus repleri Spiritu Sancto.

PUNCTUM 2dum.

Media recipiendi ac conservandi Spiritus S.

CONsidera medium recipiendi, ac conservandi Spiritûs Sancti. 1mo: Odium carnalium ac sensualium oblectationum: nam, ut ait Sanctus Chrysostomus hom: 24 in Epi: ad Hebr: Sicut aranearum stamina flatum venti non suscipiunt, ita anima sæcularis, nec homo animalis, gratiam poterit Spiritûs Sancti suscipere. Et DEUS decrevit. Gen: 6. Non permanebit Spiritus meus in homine, quia caro est. Expendat quisq; quantum se abstraxerit a sensualibus: videat, utrùm non sit infixus in limo profundius non abripiaturve sensuum illecebris? Cor mundum crea in me Deus, & Spiritum rectum innova in visceribus meis. Psal: 50.

2dum Medium est: fervens ac frequens Oratio; non aliter

enim

enim & Apostoli acceperunt Spiritum Sanctum, nisi præmissa longiori Oratione, ut legitur. Act: 1: *Erant perseverantes in Oratione unanimiter.* Et Christus. Luc: 11: promisit dicens: *Pater vester de Cælo dabit Spiritum bonum petentibus se.* Usurpantne sapius orationem? & quis in illa fervor? quæ applicatio?

3tium Medium: pacis & concordiae studium, quia sicut rectè S. Augustinus: Serm: 2: ad FF: in Erem: dicit: Sicut Spiritus humanus nunquam vivificabit membra, nisi fuerint unita, sic Spiritus Sanctus, nunquam nos vivificabit, nisi pace uniti fuerimus. Pacificène cum omnibus vivimus? vitamurne contentiones?

4tium Medium est: bonorum operum & virtutum exercitium; sicut enim lucernæ lumen fovetur oleo, ita Spiritus Sanctus, velut animæ lumen & ignis, nonnisi bonis operibus custoditur. Expende, quæ opera bona? quas virtutes exerces? habesne illas ac illarum actus dispositos, in horas, dies, ac menses? Erubescere segnitiam tuam. Propone & seriò instat exercitio variarum virtutum.

P U N C T U M 3tium.

Dona Spiritus Sancti.

COnsidera septem dona Spiritus Sancti. 1mum donum, Sapientiae, quo prægustamus gaudia Cælestia, juxta illud Psal: 33: *Gustate & videte, quoniam suavis est Dominus.* 2dum donum est scientiae, quo salutis via, divinæq; voluntatis regula cognoscitur & fraudes mundi, carnis, ac dæmonis deteguntur: 3tium, Intellectus, quo dubia, perplexitates, nebulae diffidentiae, & torpores in operando, credendo, & sperando pelluntur. 4tium Donum Consilii, quo media salutaria, ad evitanda peccata suggeruntur. 5tium: Fortitudinis, quo robur acquiritur ad superandas difficultates. 6tium Pietatis, quo cor emollitur ad bene operandum. 7mum. Timoris DEI, quo comprimitur timor mentis, & ani-

Hh

mus

mus compungitur. Vide, quantum egeas hisce donis: Pete illa à Spiritu Sancto, per omnes miserationes ejus.

Veni Sancte Spiritus &c. *Pater Ave.*

ACTUS MENTE VOLVENDI.

Nulla in discendo mora est, ubi Spiritus Sanctus Doctor adest.

V. Beda hom. 9: in Luc.

Veni dator munerum, veni lumen cordium.

MEDITATIO 2da.

De Fructibus Spiritus Sancti, quos operatur in nobis.

Prel: 1: Statue te in Cenaculo ad pedes Apostolorum recipientium Spiritum Sanctum.

Prel: 2: Pete gratiam recipiendi Spiritus Sancti.

PUNCTUM 1um.

Primus fructus Spiritus Sancti: Charitas.

Considera 1um fructum Spiritus Sancti, quem descendens in Apostolos, operatus est in eis, esse: sinceram & ardentem charitatem DEI. Spiritus enim Sanctus, est amor increatus & substantialis, quo Sanctissimæ Trinitatis Personæ, nempe Pater & Filius ad invicem, se diligunt; siquidem per Spiritum Sanctum, Pater æternus amat Filium & Filius Patrem æternum, & nos similiter teste S. Paulo per illum amamus DEUM nostrum. Nam juxta S. Fulgentium non possumus amare DEUM, nisi per ipsum DEUM: & prius oportet suscipere DEUM, antequam illum amare incipiamus. Ob eam rationem Spiritus Sanctus descendit in Apostolos in forma ignis, ut ostenderet se venisse ad accendenda corda Cælesti igne, quem Filius DEI succensurus erat, & de Cælo in terras missurus, juxta illud. *Ignem veni mittere, & quid volo, nisi ut accendatur?* Et sic Apostoli accipientes Spiritum Sanctum, senserunt in cordibus suis Cælestis flammæ incendia, quæ per orbem dispergebant, frigida hominum accenden-

do

do corda. Vide, an & tuum cor inflammetur igne amoris Divini? ardetne, & quibûs flammis cor tuum? erubescere coram Deo, & confitearis tepiditatem tuam, frigidumq; cor ad pietatem, virtutesq; exercendas. Concipe fervens studium Divini Spiritus, & charitatis per eum in corde tuo diffundendæ. Pete a Spiritu Sancto, ut inflammet cor tuum & saltem scintillam igniti amoris mittat in cor tuum. Veni Sancte Spiritus. Accende lumen sensibus, infunde amorem cordibus &c.

PUNCTUM 2dum.

Secundus fructus Spiritus Sancti: Zelus Gloriæ DEI.

Considera 2dum fructum Spiritus Sancti, esse ingentem zelum gloriæ Divinæ, quo Apostolos, in suo adventu replevit Spiritus Sanctus, cum illoq; zelo in totum orbem dimisit, ut ubiq; prædicarent magnum Nomen Domini. Et sic vix S. Petrus illo Spiritu donatus est, statim inchoavit concionem, & primo suo sermone, octo millia hominum ad fidem Christi adjunxit. Inaudita res & admiratione digna, quòd duodecem piscatores, non præditi Sapientiâ, non eloquentes, nec ullis talentis ornati, ipso tantum Spiritu repleti, in omnibus ferme finibus terræ fundaverunt in hominibus gloriam Christi Domini. Et ex illorum persuasione, tot argutissimi Philosophi, eloquentissimi Oratores, sapientes hujus mundi, Principes, Reges, Imperatores agnoverunt hunc esse DEUM, qui in cruce tanquam homo mortuus. Vide, quare tu ita negligis promovere gloriam Christi? nonne ex eo, quia parum, aut nihil amoris Divini, in corde tuo ignescat? quia Spiritus S. non est in te. Ah! Domine mi, totum me deberem impendere gloriæ tuæ propagandæ, & ecce ita negligens ac tepidus sum: imple itaq; me Spiritu tuo, ut te, toto me, totis viribus, omnibus diebus vitæ meæ, laudare, ac prædicare non cessem.

PUNCTUM 3tium.

Tertius fructus Spiritus Sancti: Fortitudo.

Considera 3tium Fructum Spiritûs Sancti, esse fortitudinem, & inexpugnabilem generositatem, firmitatemq; mentis, quàm Spiritus Sanctus indidit cordibus Apostolorum, ut nullis periculis, nullis tormentis, deterrerentur à prædicatione Nominis Christi. Illi Discipuli, qui olim timidi fugerunt à Christo, ex quibus primus Petrus, Princeps Apostolorum destinandus, & caput Ecclesiæ, ita ancillæ ostiariæ sermonem expavit, ut negaret Christum, illi inquam Discipuli, qui ob timorem Judæorum, diutius delituerunt, intra cænaculum congregati, tandem post receptionem Spiritus S: facti sunt fortes in bello, tanquam imperterriti leones nullis cedebant periculis, nullis persecutionibûs movebantur. Cum animi resolutione in conspectum tyrannorum veniebant, ut non solum minas, & verborum terriculamenta nihili facerent, sed etiam verbera ac tormenta quævis gravissima riderent. Ultro evolabant ad mortem, desiderando, sanguine suo consignare testimonium Fidei de vera Domini JESU Divinitate. Taliter immutavit adventus Spiritus Sancti Apostolos; & quare similes effectus in corde nostro non facit? Cur plus humanis respectibus deferimus, quàm Christi amor? cur tam forti animo non vincimus obstacula salutis & perfectionis? Erubescamus imbecillitatem nostram, petamus, ut nobis det donum fortitudinis ad superandas omnes adversitates.

Veni Sancte Spiritus,
 & emitte cælitus lucis tuæ radium.
 Veni Pater Pauperum,
 Veni dator munerum.
 Veni lumen Cordium.
 Sine tuo Lumine,

Nihil

Nihil est in homine,

Nihil est innoxium.

ACTUS SÆPIUS USURPANDI.

Spiritus Sanctum ne auferas à me *Psal: 50.*

O quam suavis est Domine Spiritus tuus! *Sap: 12.*

Emitte Spiritum tuum, & creabuntur, & renovabis faciem terræ

Psal: 13.

Redde mihi lætitiā salutaris tui, & Spiritu principali confirma me. *Psal: 50.*

C A P U T 2dum.

De Dilectione Dei & Proximi.

Certissimum est, & sic e Evangelii firmatum, Perfectionem hominis in amore Dei consistere; quia tamen amoris Dei pars sublimissima, & purissima est, conformitas cum Dei voluntate, a qua integritas pendet perfectionis consummata; ideo agendo de amore Dei, adjungetur meditatio 2da de conformitate voluntatis humanæ, cum voluntate Divina; Tertio commendabitur Devotio ad Beatissimam, illius amor. Quarto deniq; amor Proximi evolvetur.

§. P R I M U S.

De Amore DEI.

Quid sit verè amare DEUM! quæ necessitas & felicitas hominis? declarabit, quæ sequitur.

M E D I T A T I O.

Quid sit amare DEUM? quæ necessitas & felicitas.

Præl: 1: Colloca te in conspectu Dei, & omnium Sanctorum inflammatis cordibus amantium DEUM.

Præl: 2: Pete gratiam ardentissimè amandi Deum.

P U N C T U M 1mum.

Quid sit amare DEUM?

Confidera imò: quòd ille amet Deum verè, qui illum aesti-

mat & appretiat super omnia; eumq; præfert universis. Hinc quicumq; vult sincerè amare Deum, debet illum plus amare, quàm consanguineos, quàm amicos, quàm suas commoditates, quàm famam, quàm honorem, quàm vitam, ita, ut paratus sit potius hæc omnia perdere, quàm Deum vel minimo deliberato peccato offendere; debet item omnia, quæ sunt in mundo, averſari, odiò habere, & quandocunq; impedirent in amando Deo, vel periculum facerent amittendæ gratiæ Divinæ; abominanda sunt tanquam maxima mala, ac detestanda. & hæc doctrina Christi nobis in Evangelio relicta, ubi dicit: Qui non odit Patrem & Matrem, insuper & animam suam, non est me dignus.

Confidera 2dò: qui amat DEUM sincerè, non solùm paratus esse debet ad amittenda omnia terrena, sed etiam ad omnia potius adversa patienda, quàm ut vel minimum detrimentum amoris subeat. Talis amor fuit S: Pauli, qui dicebat. *Quis me separabit à charitate Christi? an tribulatio? an fames? an nuditas? an persecutio? an gladius? certus sum, quia nihil horum, neq; mors, neq; vita, neq; Angeli poterunt separare.* ad Rom: 8. Talis resolutio & magnanimitas fuit Omnium Sanctorum Martyrum. Videamus, utrùm & nos ita generosos fovemus Spiritus, utrùm tanta fortitudine præstamus. Ah! non apud unum fortassis plùs valet respectus humanus, propria commoditas, & libertas, quàm Dei amor. Nugæ quandoq; abſtrahunt nos ab amore Dei. Sumus tanquam folium, quod ventò rapitur. Erubescamus. Petamus robur & constantiam in amore Dei. Omnia enim fieri debent in charitate Dei, ut sint salutaria animæ. Hinc S: Paulus. 1. Cor: 13. ait. *Si habuero Prophetiam, & noverim mysteria omnia, & omnem scientiam, & si habuero omnem fidem, ita, ut montes transferam, charitatem autem non habuero, nihil sum, Et si distribuero in cibos pauperum, omnes facultates meas, & si tradidero corpus meum, ita, ut ardeam, charitatem autem non habuero, nihil mihi prodest.*

PUNCTUM 2dum.

Necessum est omnino, ut ametur Deus.

1^{mo}: OMne bonum connaturaliter amatur. Sic pulchra amantur; dulcia, illustria amantur; Deus autem est summum ac infinitum bonum; est enim summa pulchritudo, summa dulcedo, summa charitas, summa sapientia, summæ divitiæ &c. Omnes pulchritudines, charitates, dulcedines creatæ. sunt velut stilla ro-
ris antelucani ad Oceanum. Si itaq; has amant homines, multò magis debent amare Deum; præsertim cum bona creata sint defectibilia, mutabilia, non diuturna; Deus verò est bonum perenne, immutabile. Est pulchritudo immutabilis, suavitas indefectibilis, charitas inextinguibilis &c.

2^{dò}: Bonum, quòd suam bonitatem in nos diffundit, exigit amorem; si incredibile est, ut illæ personæ, à nobis non amantur, quæ nobis bene faciunt; et quomodo poterimus non amare Deum, qui cum sit in se summum bonum, maxima in nos diffundit beneficia, nos ipsos dedit nobis, creando nos ex nihilo, conservat nos, redemit, tot media ad salutem suppeditavit, ad Religionem vocavit, omnia creata ad obsequia nostra ordinavit. Nul-
lum momentum est, quo nos multis bonis non repleat. Ergonè tot beneficiis non excitabimur ad amandum Deum. Ergonè ingrati tanto benefactori vivemus? & his ipsis, quæ ex ejus beneficio habemus, ad illius offensam abutemur? O mirabilem bonitatem tuam Deus! sed mirabilem & malitiam cordis nostri, quod nullis tuis gratiis emollitur, nullis donis flectitur.

3^{tiò}: Consideranda est magnitudo beneficiorum Dei, tum ex dignitate Dei conferentis, tum ex vilitate hominis accipientis, tum ex ipsa donorum æstimatione, tum deniq; ex affectu & nimio amore dantis. Cogita ô homo! quis & quantæ perfectionis est ille, & Majestatis, qui dat? Deus est, se solo sibi sufficientissimus, nul-
lius

lius egens. Tu vilissima, indignissima creatura. Dat Deus quædam infinitæ dignitatis & æstimabilitatis dona, quale dedit Pater, cum mitteret Filium suum in terras, ut esset Magister, Pater, Pater & Advocatus omnium. Dedit Filius se ipsum in mortem pro nobis, & in cibum pro usu nostro. Dedit Spiritus Sanctus, & dare non cessat tot dona supernaturalia tot lumina, auxilia &c. Parumne nobis Deus dedisse videtur? Ah quanta obcæcatio & duritia cordis nostri! paucillum panis, si cani projiciatur, fidelem illum ab obsequiis habemus: & Deus tot suis beneficiis non potest apud nos emere vilissima obsequia nostra. Erubescamus, deploremus ingratitude nostram. Petamus à Deo, ut inter alia beneficia, & hoc nobis tribuat, ne ingrati ei, vivamus.

PUNCTUM 3tium.

Tota felicitas nostra in amore DEI.

CONsideremus, siquidem Deus nos creavit propter se; impossibile est, ut alibi quieti & felices vivamus, nisi in solo DEO. Hinc S: Augustinus: *Inquietum est cor nostrum, donec requiescat in te.* Nihil Deus plus desiderat ab homine, nisi cor ejus, nihil homini ad felicitatem quidpiam prodest, præter Deum. Habemus animam, quam solum summum bonum replere & satiare potest, cætera possunt eam occupare, & ad breve tempus distrahere, non tamen pacificare. Quid ergo alia curamus? cur soli DEO non adheremus? abstrahamus itaq; à creaturis omnes affectus nostros, transferamus in Deum, dicamus cum Psalte: Quid mihi est in cælo, & à te quid volui super terram? præter te Deus cordis mei & pars mea, Deus in æternum.

COLLOQUIUM ex S: Augustino.

DOMine spes Sanctorum, & turris fortitudinis eorum, Deus vita animæ meæ, per quam vivo, sine qua morior, lumen oculorum meorum, per quod video, sine quo orbor, gaudium cordis mei,

mei, & lætitia spiritûs mei diligam te toto corde meo, & totâ animâ meâ & totis medullis & visceribus meis, quia tu prior dilexisti me. Soliloq; c. 7.

ACTUS SÆPIUS USURPANDI.

Diligam te Domine fortitudo mea, Dominus firmamentum meum, & refugium meum, & liberator meus. *Psal: 17.*

Surgam & circuibō civitatem, quæram, quem diligit anima mea. *Cantico: 3.*

Mihi, adharere DEO, bonum est, ponere in DEO spem meam. *Psal: 72.*

§. S E C U N D U S.

De Conformitate cum Voluntate Divina.

Nulla alia maior cura viatoris Religiosi esse debet, quàm ut in suæ perfectionis gradu, & termino consistat, ad quem quia compendiosissima est via per conformitatem cum voluntate Divina, ut in cunctis rebus unum idemq; sit velle & nolle Religiosi, quod est Majestatis Divinæ; ideo hanc perfectionem ingeret, quæ sequitur.

M E D I T A T I O

De Perfectione Religiosi.

Prel: 1: Constitue te coram Christo Magistro perfectionis docente te in Oratione Dominica per illam petitionem: Fiat voluntas tua sicut in Cælo & in terra, viam compendiosam perfectionis Religiosæ.

Prel: 2: Pete gratiam cognoscendæ & implendæ voluntatis, Divinæ.

P U N C T U M I m u m.

Voluntas Divina; mensura omnis perfectionis.

Considera, quod voluntas Divina, siquidem est infinitè sancta;

& fons, ac origo omnis sanctitatis, ideo debet esse mensura atq; prima regula omnium aliarum perfectionum, ac Sanctitatum. Nulla enim actio, nullius creaturæ operatio, siue interna siue externa, est Sancta, si deflectat à rectissima & Sanctissima DEI voluntate. Vide, utrùm omnes cogitationes tuæ, intentiones, verba, opera, huic regulæ altissimæ conformentur? utrùm ab illa non deflectant? Erubescere, dole propone.

PUNCTUM 2dum.

Perfectio consistit in hoc, ut ea faciamus, quæ Deus vult.

Considera, ut perfectus quis efficiatur, requiritur, ut ea cogitet, intendat, dicat, operetur, quæ DEUS vult. Proinde perfectio Religiosi non consistit in jejuniis multis, in contemplationibus, ac orationibus productis, non in laboribus continuis, non in prædicationibus zelosis, non in conversione gentium, sed in exequendis illis, quæ DEUS vult. Omnia opera, etiam quæ optima videntur, si non conformantur ad voluntatem DEI, nec procedunt ex desiderio implendi voluntatem DEI, imperfecta sunt. Alia autem, quæ minima & vilissima reputantur, si fiant ex voluntate DEI, eidemq; conformentur, ad supremum sanctitatis gradum ascendunt. Quælibet res, suum tempus habet teste scriptura: Non semper est aptum tempus ad fundendas lacrymas pro peccatis, ad mortificandum corpus, ad orandum, ad laborandum, semper autem est tempus ad faciendam voluntatem DEI. Impletur autem hæc DEI voluntas, dum præcepta & consilia ejus observantur, dum obligationibus sui statûs & officii satisfacit, dum inspirationes Divinæ, & gratiæ excitantes acceptantur. Dum imperia Superiorum, & Directorum animæ exactè adimplentur. Vide, quomodo in his omnibus procedas?

PUN-

PUNCTUM 3tium.

Et, ut ita faciamus, sicut DEUS vult.

CONsidera: ad consequendam perfectionem Religiosam non sufficit, ut facias id, quod DEUS vult, sed insuper requiritur, ut facias ita, sicut DEUS vult; nam facere id, quod Deus vult, & non facere ita, sicut Deus vult; est rem bonam facere malè, consequenter, est nihil facere. Porro rem bonam facere ita, sicut Deus vult, est illam facere, cum omnibus illis circumstantiis, quæ illam Sanctam & perfectam reddere possunt. Imprimis enim debet fieri eo tempore, quo Deus vult. Hinc, si quis oraret tunc, cum esset laborandum, ac legendum, vel é contra si quis laboraret, aut legeret tunc, cum esset orandum; item si quis loqueretur eo tempore, cum esset silentium servandum &c. talis non ageret ita, sicut Deus vult.

2dò. In eo loco res bona est faciendà, in quo loco DEUS vult. Unde si Religiosus jejunaret ad mensam in triclinio & comederet in cubiculo, aut alibi, non faceret ita, sicut Deus vult. 3tiò Requiritur, ut adhibeatur modus ille in actione, talique modo res fiat, quali eam Deus vult fieri, hoc est cum ea prudentia, diligentia, fervore Spiritûs, perseverantia, cum qua Deus vult. Qui itaq; facit rem bonam, sed imprudenter, negligenter, absq; debita applicatione &c, ille non facit bene prout DEUS vult, consequenter locò præmii, iram DEI provocat, ac mereatur. Executias ergo singula opera tua, & vide utrùm omnia ita facias, sicut Deus vult.

PUNCTUM 4tum.

Idq; faciamus ideo, quia Deus vult.

CONsidera tandem ad perfectionem operum Religiosorum adhuc requiri, ut Religiosus non solum agat id, quod Deus vult, non solum, ut ita agat, sicut Deus vult, sed etiam ut ideo uni-

cū omnia agat, quia Deus vult. Debetq; voluntas Dei esse unicū ac speciale motivum omnium operum Religiosi, per quam etiam minima & aliās viliissima opera dignificantur ac sublimantur. Et hæc est brevissima, ac tutissima via ad eximiam perfectionem & sanctitatem. Ille Beatus, qui eā progreditur. Si itaq; operaris aliquid boni, quod Deus vult, & occurrit tibi in eadem operatione privatum commodum, aut solatium, aut vana gloria, necesse est, ut ab his omnibus avertas oculos, & toto intuitu solum Deum, ejusq; voluntatem spectes. Vult exempli gratiā Deus, ut ames proximum, & fratrem tuum, hic tamen amor, non debet procedere ex naturali inclinatione, non ob temporale aliquod bonum, aut propter aliquam vanitatem, aliamq; rationem humanam, sed ex Divina voluntate. Nam agere ex naturali inclinatione: brutorum est, agere ex ratione humana: Ethnicis Philosophis commune est; agere autem ex respectu dignissimæ voluntatis Divinæ: est hominum perfectorum. Vide, cui ex his tua opera accenseri debeant. Propone, nihil aliud operibus tuis spectare, nisi solam Sanctissimam DEI voluntatem. Cui te subijcies per illam S. P. Ignatii Orationem.

Suscipe Domine universam libertatem meam, accipe memoriam, intellectum, voluntatem, accipe corpus & animam, quidquid habeo, vel possideo, tu mihi largitus es, id tibi totum restituo, ac tuæ prorsus voluntati trado gubernandum.

Quidquid vis, quando vis, ubi vis, quomodo vis, ego volo, quia tu vis.

ACTUS SÆPIUS USURPANDI.

Domine, vita est, in voluntate tua. *Psal: 29.*

Doce me facere voluntatem tuam, quia Deus meus es tu. *Psf: 142.*

DEUS meus es tu, in manibus tuis fortes meæ. *Psal: 30.*

Dominus est, quod bonum est, in oculis suis faciat 1: *Reg: 3.*

Meus

Meus est cibus, ut faciam voluntatem ejus, qui misit me: *Joan: 4.*
Domine Rex omnipotens, in ditione tua, cuncta sunt posita, &
non est, qui possit tuæ resistere voluntati: *Esai: 13.*

§. T E R T I U S.

De Filiali affectu & devotione ad Beatissimam.

CUM totum nos DEUS habere velit per MARIAM, teste Mel
lissuo Doctore D. Bernardo de Nat: B. V., etiam hujus viæ
ac vitæ nostræ felicem decursum per illius manus obtinere à DEO
satagamus, ad eamq; omnem fiduciam & filialem affectum con-
cipiamus.

M E D I T A T I O

De Beatissima Virgine

Prel: 1. Statuamus nos ad plantas Beatissimæ, tanquam Filii
SSmæ Matris.

Prel: 2. Petenda gratia concipiendi filialis affectûs erga Be-
atissimam.

P U N C T U M i m u m.

Beatissima Virgo debet esse Mater nostra.

COnsidera motiva, quibus movearis ad assumendam Beatissi-
mam in Matrem, quorum i m u m est: quia hæc est voluntas
Christi Domini: sicut enim per passionem suam meruit nobis, ut
essemus Filii adoptivi ejusdem DEI Patris, cujus ipse est Filius
consubstantialis, ita etiam dedit nobis hanc potestatem, ut fiamus
Filii adoptivi ejus Matris, cujus ille est Filius connaturalis. Est
unde Christum laudemus, quòd nos ad tantam dignitatem eve-
xerit. Canamus illi: *Magnificat anima mea Dominum, & exulta-
vit spiritus meus in DEO salutari meo, quia fecit mihi magna, qui
potens est, & sanctum nomen ejus.*

2dum: Debemus illam agnoscere pro Matre, quia ipsa Beatissima id exoptat, sciens enim; quod simus sanguine Filii ejus regenerati, morteque redempti, ita nos tanquam pretium sanguinis sui Filii, aestimat, tantam curam nostram habet, ac si ejus Filii essemus. Gratias illi agamus pro ista dignitate. Subjiciamus nos ejus Maternae directioni, agnoscamus indignitatem nostram.

3tium: Debemus illam agnoscere pro Matre, quia illa est Mater totius Religionis nostrae. 1mo Enim ante illius Aram in Monte Serrato, in alium mutatus, & ibi primum Spiritum concepit S. P. N. Ignatius. 2do In Templo Martyrum die ipso assumptionis Primi Patres nostri vota nuncuparunt. 3tio In illius sacello ad Templum S. Pauli, publicam fecerunt professionem. 4to. Romae primum Templum B. MARIAE de Strada, in usum nostrorum celsit. 5to S. Ignatio Constitutiones scribenti saepe apparuit, & in iis describendis eum instruxit. 6to Laureti Nostris mansionem paravit. 7mo Patri Gutierrez apparuit, totam Religionem sub pallio suo conservans. Si itaque sumus aliqua particella Societatis, debemus filiali affectu ferri in Beatissimam, tanquam in Matrem nostram.

4to. Debemus cum gaudio illam in Matrem acceptare; magna enim dignitas, & honor noster est, quod possimus esse Filii Matris DEI, Reginae totius mundi, simul autem Fratres Christi Domini. Admiremur tantam dignationem DEI, Beatissimaeque benevolentiam, assumptis nos ad tantam dignitatem. Simul tamen sciamus eam aestimare, nec dissonis moribus profanare.

PUNCTUM 2dum.

Quas Maternas proprietates nobis testatur?

PRIMO, Illa post DEUM dat nobis vitam Spiritualem, impetrandu nobis gratiam sanctificantem, item gratias ad bonum excitantes,

tantes, unde statim à teneris quilibet nostrum experiebatur in se specialem affectum & propensionem erga Beatissimam.

2do: Illa multis nos submovet periculis, tum corporis, tum animæ. Illa per impetratas illuminationes, docet nos viam Domini, & modum progrediendi de virtute in virtutem. Illa nos, in sinu suo portat, ne labamur in graviora peccata, auxilia nobis obtinendo à DEO. Illa ab hostibus tuetur. Uno verbo: omnia dona DEI per ejus manus recipimus; teste enim S. Bernardo: *Omnia nos voluit Deus habere per Mariam.*

3tio. Illa nobis præparavit Religiosam vestem, ac illâ superinduit: quia licet nos visibiliter non monuerit, ut ingrederemur Societatem; tamen illius Materna pietate factum, quod nos in Societatem suam traxerit JESUS. Videamus, quantam Illi obligationem debemus pro hoc illius Materno affectu, quàm fideliter eidem servire teneamur.

PUNCTUM 3tium.

Quæ Filialis a nobis obligatio exhiberi debet Beatissimæ.

1ma: Obligatio filialis, honorare debito cultu Matrem. Et certè, quæ Mater dignior esse potest majore observantia & submissione nostra, quàm Beatissima, cui & Filius DEI, subditus esse voluit.

2da Filialis obligatio: obedire Matri, omnesq; nutus Matris observare. Et quomodo non obediemus Beatissimæ, quæ non nisi à nobis ea requirit, quæ DEUS vult?

3tia Obligatio: amare Matrem. Videamus, utrùm post Deum, non mereatur Beatissima maximum amorem?

4ta: Gaudere ex augmento & dilatactione cultûs & honoris Matris, ejusq; amplificandi curam habere. Considera, quantum per tuam industriam crevit honor Mariæ: sive per sanctos de ea sermones, sive per insinuationem devotionis, ac pietatis erga illam.

4ta: Fiducialis in omni necessitate re cursus ad Beatissimam, tanquam Matrem, traditioq; suâ in ejus directionem ac dispositionem.

6ta. Sæpius in ejus conspectum venire, eidemq; assistere. Consideremus, quomodo hucusq; eas obligationes inplevimus? & quomodo in futurum implere debeamus? Advolvamur plantis Sanctissimæ Matris, confiteamur indignos nos, qui vocemur filii. Rogemus, ut illa propter suæ Maternæ misericordiæ viscera, monstret se esse Matrem.

Pater; Ave: Anima Christi.

ACTUS SÆPIUS USURPANDI.

Salve Mater misericordiæ, *S. Bern.*

O! Domina opitulare, nonne opitulaberis? *S. Xavier.*

O! Regina præstantissima, sub tuum præsidium confugimus, sub alis pietatis tuæ protege & custodi nos. *S. Ephr: de laud. Vir:*

O! Mater DEI, memento mei, monstra te esse Matrem.

In manibus tuis ô benedicta, reposita est nostra salus. Recordare ô piissima miseriæ nostræ. *S. Bonav: in Psalt:*

§. Q U A R T U S.

De amore Proximi.

Tanta est conjunctio amoris proximi cum amore DEI, ut Sancta Theologia doceat ex eodem habitu supernaturali utrumq; amorem procedere; & S. Chrisost: hom: 16: in Matth: 22: dicat: *non potest hominem odisse, qui Deum amat, nec potest Deum amare, qui hominem odit.* Merito itaq; de illo nobis meditandum est, ut sic plenius uniamur DEO.

MEDITATIO

De amore Proximorum.

Præl: 1. Statuamus nos ad ad plantas Christi, tanquam Magistri
firi

fratris docentis, charitatem proximi: *Hæc mando vobis, ut diligatis invicem.*

Præf. 2. Petenda gratia intelligendæ & exequendæ doctrinæ Christi.

PUNCTUM I.

Quæ nos movere debent ad amorem proximi.

Cogita 1^{mo}: Quod Præceptum DEI, efficaciter quemq; movere debeat ad amandum proximum: quis enim huic Domino imperanti non obtemperabit? qui Ioan: 15: præcipit: *hoc mando vobis, ut diligatis invicem.* Vide, quomodo obtemperasti, hucusq; præcipienti Domino? amastine proximum sicut te ipsum? examina, qualis convictus tuus cum fratribus tuis, & aliis proximis? & in quibus deficiis, corrige.

Cogita 2^{do}: Id etiam quemq; movere debet, ut proximum amet, quia hic amor, est discretivum Filii DEI, ac discipuli Christi, ab omnibus aliis, juxta illud. Ioan: 13: *ex hoc cognoscent omnes, quia discipuli mei estis, si dilectionem habueritis ad invicem.* Quis non optabit discipulus Christi inveniri? non aliter tamen hæc tibi obtinget felicitas, nisi amorem habueris proximorum. Vide, utrùm tuum cor, non potius odiis, invidiâ, contemptu proximorum abundet, quam amore? Ejice omnia, charitati adversantia. Pete accendi cor tuum igne amoris.

Cogita 3^{to}: Quod amor proximi sit gratior DEO, quàm sacrificium; juxta illud Marci: 12. *diligere proximum, tanquam se ipsum, majus est holocaustis omnibus, & sacrificiis.* Vide, utrùm sic æstimes amorem proximi, sicut tibi æstimandum proposuit Christus. Erubescere, dolo, & propone abhinc majorem æstimationem illius.

Cogita tandem 4^{to}, quod & hæc movere debeant ad amorem proximi. 1^{mo}: Quia ejusvis hominis anima est imago
KE DEI.

DEI. Quis autem imaginem DEI contemnere præsumet? 2dò: Quia est sanguine Christi redempta, æternæ beatitudinis capax, ad eundem finem creata. Item eundem quisq; habet Patrem in Cælis, eâdem mensâ Sacramentali fruitur, in eodem Christi corpore residet, tanquam membrum huius capitis.

In eadem domo scilicet Ecclesia, & Religione manet. O quàm ponderosæ rationes adsunt amandi proximum! & cur illis non movemur? cur toties imaginem DEI lædere, & contemnere non veremur? confundamur, deprecemur DEUM & proximos. Statuamus emendationem in posterum, discamus semper in quolibet proximorum revereri imaginem DEI.

PUNCTUM 2dum.

Qualis debet esse amor Proximi?

COgita 1mò: Quòd rectus amor proximi, debeat esse universalis. Sicut enim Pater æternus facit oriri solem super bonos & malos, ita & nos absq; acceptione personarum, debemus omnes amare, omnibus bene velle. Talem amorem nos docuit Christus, qui omnes recipiebat sive pauperes, sive divites, sive senes, sive juvenes, sive sapientes, sive ignaros, sive amicos, sive inimicos, sive nobiles, sive ignobiles, sive formosos, sive informes. Nunquid Christus non æqualiter pro omnibus mortuus? nunquid non omnes sunt imago DEI? vide, utrùm non magis, ad hos, quàm illos fratres propendeas, utrùm particulares affectus, qui sunt pestis Religionum, non foveas? excute cor tuum ab omni affectu privato. Protestare coram DEO, quòd omnes in DEO & in omnibus DEUM amare velis. Roga id ipsum à DEO.

Cogita 2dò: Quòd amor proximi, salutaris, debeat esse efficax, & activus: non verbo enim, sed re, & veritate amandi sunt proximi omnes. Sicut Christus multa laboravit, & passus est

est pro salute nostra. Reflece te, quid hucusq; ex amore proximi egisti? quid amore ejus sustinuisti, etiam ab illo ipso? utrum potius illum verbo aut facto non exacerbasti? deplora defectus, & deprecandi illum fac propositum, &c.

Cogita 3tò: Quòd amor proximi debeat esse sincerus, non quærens, quæ sua sunt, non propriam commoditatem, mercedem, gratias, gratitudinem. Sic Christus multas sustinuit injurias, & ingritudinem ab iis, quibus benefaciebat, neq; tamen desistit iis benefacere. Videamus ergo, an talis amor noster, erga proximos? an à benefaciendo non deterremur ingritudine alicujus? Assumamus generosam mentem Filiorum DEI, ut à solo DEO expectemus mercedem & præmia.

Cogita 4tò: Quòd amor proximi debet esse constans, ut de Christo S. Joannes testatur: *Cum dilexisset suos, in finem dilexist eos.* Examinemus, qualis noster amor in proximos? non servitné tempori? Rogemus DEUM, ut ille, vero, & constanti amore repleat corda nostra.

PUNCTUM 3tium.

Qualem conversationem exigit amor Proximi.

Cogita 1mò: Quòd conversatio cum hominibus debeat esse rara, & brevis, juxta exigentiam necessitatis: nimia enim familiaritas parit odium, & contemptum. Hinc S. Ignatius consulebat taliter cum hominibus versari, sicut cum peste infectis. Et tu nonné semper velles cum hominibus versari?

Cogita 2dò: Quòd conversatio Religiosa debeat esse cum intentione recta, non ex pruritu loquendi, vel distractionis causâ, sed ob bonum salutis proximorum; hucné collimat tua conversandi intentio?

Cogita 3tò: Conversationem Religiosam debere esse prudentem & cautam; scire enim quisq; debet, quid loquatur: quid

agat? & quomodo? omnia cum reflexione & consilio aggredienda. Proinde Religiosi debent esse tanquam illa animalia Prophetica, plena oculis, ante, & retro. Sanctus Xaverius dabat nostris instructionem, ut sic agerent cum omnibus, tanquam illos scirent futuros inimicos. Tua quanta circumspectio in loquendo? & agendo cum Proximis? Desse defectus, & in posterum meliora propone.

Cogita 4to: Quod conversatio Religiosa debet esse modesta, & matura, non levis, non tetrica, cum ædificatione & suavitate sermonis, & actionum; debet item esse providens DEUM in conspectu suo. Curandum insuper, ut sit cum libertate spiritus, non servilis, cum assentationibus, approbationeq; illorum, quæ redarguenda sunt. Tandem né sit jactabunda suorum talentorum, dorum &c. Nihil enim magis offendit quemlibet audientem, quàm tumor & jactantia loquentis. Vide tuas conversationes, quales illæ? fructuosæné & ad ædificationem? an verò ad destructionem aliorum? Pete donum sanctæ, & fructuosæ conversandi cum proximis.

COLLOQUIUM cum SANCTISSIMA TRINITATE:
PATER æterne DEUS misericordiarum, da mihi, quæso, Spiritum bonum petenti, da spiritum charitatis.

Fili DEI unigenite, da mihi promissum à Patre Spiritum Sanctum. Veni Sancte Spiritus, & emitte Cælitus, lucis tuæ radium, accende lumen sensibus, infunde amorem cordibus.

Pater: Ave: &c: Anima Christi.

ACTUS SÆPIUS USURPANDI.

SUPER omnia autem charitatem habete, quod est vinculum perfectionis. *Coloss: 3.*

Verè magnus est, qui magnam charitatem habet. *Tho: à Kemp: l. 3. c. 3.*

Amor

Amor ab operibus magis pendet, quàm à verbis. *S. Ign: in l. Exor: Caritas benigna est, non æmulatur, non inflatur, non irritatur, non cogitat malum. Cor: 13.*

H O R A Q U I E T I S,
D A N D A C O N S I D E R A T I O N I
Supra Charitatem Proximi.

Statue te in conspectu Dei, aut sub pedibus Christi Crucifixi.

Pete gratiam utiliter instituendi hanc Considerationem.

I. EXpende actus charitatis proximi, quorum primus est, né malum iudicium formes de proximo, ac nullum condemnes apud te. *Nolite judicare, non iudicabimini Matt: 7.* Socrates dum se occasio offerret iudicandi de rebus ad se non spectantibus, dicebat: *quæ supra nos, nihil ad nos* L'aér 1: 6. Ita verus Religiosus, in occasione iudicii temerarii debet se alloqui: quid ad te? num te Iudicem Fratris Deus constituit? absit à me, ut quenquam iudicem.

2. Excusa apud te defectus Fratrum tuorum, & te ipsum accusa, vel si opus non potes, excusa intentionem, puta casum, puta subreptionem &c. De B: Aloisio ad probandam ejus Sanctitatem, Auditores Rotæ Romanæ, inter alia documenta, & hoc afferunt, quòd aliorum dicta vel facta, in meliorem partem excusaret, vel interpretaretur. *Lanc: op: 10 c: 20.*

3. Nullum unquam, etiam, qui tibi vilissimus videbitur, despicias, nullum contemnas Tum quia omnes ad Imaginem Dei facti sunt, tum quia eidem mensæ Eucharisticæ accumbunt. Tum quia unus sunt Patris Filii. Tum quia ad eundem finem ordinati, nempe ad laudandum Deum. Tum quia omnes eodem pretio sanguinis Christi sunt æstimati.

4. Nulli quidquam invidere, nullum contristare, gaudere cujusq; successibus, compati afflictis, ut Apostolus docet: *Gaudere cum gaudentibus, flere cum flentibus.* Et ad Galat: 5. monet. *Non*

efficiamur inanis gloriæ cupidi, invicem provocantes, invicem invidentes. S: Chrysost. hom: 45. in Joan: docet, quod invidia dæmone peiorem faciat, uni ait; *Invidus ipso diabolo magis diabolus est, invidet sathan hominibus, non socius, tu verò. homo cum sis, invides hominibus.* Hinc Zeno hortatur. *Fugiamus invidiam, obicem pietatis, obstaculum Regni Calorum, viam gehennæ, pignus, & primitias quasdam pænæ perpetuæ.*

5. Non obloqui cuiquam, nec defectus aliorum propalare, virtutes tantum laudare, & considerare, studeatq; quisq; ut sit apis mella colligens, etiam ex urticis, non araneus sugens toxicum etiam de rosis.

6. Cavere seminationes discordiarum, & curare, ut sit quisq; Angelus pacis, non sathanas rixarum excitator.

7. Nec verbò, nec risu, nec gestu quenquam impetere, aut lædere, vel contristare.

8. Blandè omnes alloqui, cum nullo rixari, nullum contristare.

9. Juvare omnes in necessitatibus, solari mæstos.

10. Particulares & inordinati affectus, tanquam pestis Religiosæ Charitatis sunt cavendi.

11. Ille est affectus inordinatus, quo quis amat plus amicum, quàm Deum, non faciendo scilicet ea, quæ sunt DEI, ob intuitum amici, ut ei placeat, & conservet ipsius gratiam.

2dò: Qui amat amicum non propter Deum, sed propter alias vanitates. Porro ille amat amicum, propter Deum, qui cum amat ob id, quod sit Imago DEI, quod sit pretium sanguinis Christi. Ille item est affectus particularis, vi cuius maiora amicitiae signa ostenduntur uni, quàm alteri. Quales affectus solent esse semen invidiarum, suspicionum, discordiarum, proinde fraternam charitatem lædunt.

CAPUT

C A P U T 3tium.

De speciali Religiosorum cum DEO nexu.

POtissimum Religiosi per accuratam silentii observationem ad magnam cum DEO unionem, perveniunt, ac per inviolabilia votorum vincula eidem adnectuntur. De illis itaq; meditationes proponentur.

§. PRIMUS.

De Silentio.

HOmo Sapiens tacebit usq; ad tempus, lascivus autem & imprudens non servabunt tempus. Eccl: 21: Et Spiritus Sanctus monet: Tace, & docebo te Sapientiam. Job: 33.

MEDITATIO

De accurata Silentii Observatione.

Prel: 1. Statue te coram JESU, apud Judices accusato, calumniato, & ad hæc omnia tacente. Jesus autem tacebat.

Prel: 2. Pete à JESU tacente gratiam cognoscendi, quam bonum sit ponere custodiam ori proprio.

P U N C T U M 1um.

Loquacitas: multorum malorum causa.

Considera loquacitatem esse: imò. Initium omnium in Religione perturbationum. Consulat quisq; conscientiam suam, quam multa jam in Religione à superioribus & æqualibus passus sit? & videat, qua de causa? nonné ob linguæ defectus? Agat quisq; tantum ea, quæ illi præscribit Religio, in taciturnitate cum omni diligentia, & nihil eum perturbabit. 2dò: Effusio loquendi facit, ut nihil saporis & dulcedinis percipiat Religiosus, sive ex meditationibus, orationibusq;, sive ex usu Eucharistiæ, ex quo oriuntur in animo amaritudines, desolationes, Spiritualium rerum nausea. Vide tu, utrum experiaris, quid sit conjungi DEO in oratio-

oratione? quid? gustare in Eucharistia, quàm dulcis sit amor Jesu. Expendeq; quid te impediât à degustanda dulcedine hac? Certè nihil, majus obstaculum ponit, quàm loquacitas. 3tio: Loquacitas est signum, & plerumq; causa immundi cordis, juxta illud num: 19: *Vas, quod non habuerit operculum, nec ligaturam de super, immudum erit.* Tale autem vas, est os hominis verbosi. 4to: quia loquacitas facit, ut homo facilè, ab hostibus superetur; ita docet Albertus. M. lib: de Virg: c: 3: ubi non est taciturnitas, ibi homo facilè ab adversario superatur. Et spiritus S. Proverb: 25: hominem loquacem comparat Urbi muris destitutæ, dicens: *Sicut urbs patens, & absq; murorum ambitu; ita vir, qui in loquendo, non potest cohibere Spiritum suum.* 5to: loquacitas facit, ut quisque facilè dissipet spiritum, quem cum labore collegit, utq; vana sit ejus Religio, juxta S. Jacobi doctrinam. Expende hos loquacitatis fructus, quàm sint mali, detestandi; & propone seriò cavere eam. Perte ad id gratiam DEI.

PUNCTUM 2dum.

Taciturnitas & silentium: multorum bonorum fons & origo.

Considera bona, quæ ex taciturnitate proventunt. 1mo: interna pax & donorum Dei communicatio. 2do: per silentium evitantur jurgia, & alia non levia peccata, insuperq; satisfit pro peccatis linguæ. 3tio: impetratur donum fructuosè loquendi, & concionandi ad corda hominum. 4to: impetratur gratia attentè, & sine distractionibus orandi; 5to: impetratur gratia Dei ex intimo affectu tempore agonizæ pronuntiandi Sacrosancta Nomina JESU & Mariæ, 6to: silentio addictis largitur Deus benedictionem, ut examina ex suis studiis, ac disputationes cum satisfactione omnium, & decore Religionis absolvant. Sicut enim Deus, aburgentibus linguâ ad loquacitatem, subtrahit ejus usum in necessitate, ita è contra juxta præscriptum Religionis, silentium servantibus, dat abundantem

abundantem gratiam loquendi in necessitate occurrente. Adhuc-
né hæc bona non æstimabis Religiose? nonné justum est, ut pro-
pter illa consequenda adames silentium, & omni loquacitati re-
nunties?

PUNCTUM 3tium.

Media ad servandum silentium.

Considera: 1um Medium servandi silentii esse, ut nunquam
otieris, sed omnia ex præscripto Religionis, quàm exactissi-
mè peragas. 2dum. Ut conventicula caveas, & societatulas, quæ
tibi necessitatem imponunt garriendi, deferas. 3tium Medium,
ut in singulas septimanas, statuas, specialem correctionem circa
speciale loquendi tempus, & locum. Sicq; tibi loqui in Refecto-
rio, scandalum, In alieno cubiculo, suspicionibus & interpreta-
tionibus obnoxium. 4tum Medium est, ut contrahas habitum &
consuetudinem, nunquam incipiendi loquelam longiorem, quàm
prius intingas linguam tuam, in vulneribus Domini JESU.

IN COLLOQUIO.

Statue te coram Sanctissima Trinitate, tanquam linguæ tuæ
creatricæ; pete ab illa, ut ponat signaculum super os tuum, nè
loquendo exerres, exerrando DEUM offendas.

Statue te coram Domino JESU tacente, & velatos oculos
habente, & pete, ut hoc ipso velo, os tuum adstringat.

Pete à Beatissima, ut tibi à Filio suo impetret gratiam san-
ctè loquendi, dum loquendum est, & religiosè tacendi, dum ta-
cendum.

Pater: Ave: Anima Christi.

ACTUS SÆPIUS USURPANDI.

Bonum est præstolari cum silentio salutare DEI. *Thren: 3.*

Qui vult vitam diligere, & dies videre bonos, coërceat linguam
suam à malo. 1. *Peir: 3.*

Et erit opus iustitiæ, pax, & cultus iustitiæ, silentium. *Isa: 32.*
 Qui moderatur sermones, doctus & prudens est. *Prov: 17.*
 Facilius est omnino tacere, quàm verbò non excedere. *Tho: à Kemp: l. 1. c. 79.*

§. SECUNDUS.

De 1mo Religiosi nexu cum DEO.

Per Paupertatem.

Non tibi displiceat Paupertas tua (hortatur S. August: verb: Apost: *1 Tim: 28.*) nihil eà potest diutius inveniri. Vis nosse, quàm locuples sis? Cælum emit. Beati pauperes Spiritu, quoniam ipsorum est Regnum cælorum. *Matth: 5.* Unde gloriatur Vates: Ego autem mendicui sum, & pauper. Dominus sollicitus est me. *Psalm: 39.*

MEDITATIO

De Paupertate Religiosa.

Præf: 1: Constitue te ad pedes Christi, in forma discipuli, & audi doctrinam ejus: *Nisi quis renuntiaverit omnibus, quæ possidet, non potest meus esse discipulus.*

Præf: 2 Pete gratiam renuntiandi ex animo & plenè omnibus terrenis, eorumq; amori.

PUNCTUM Ium.

Quid Religiosa Paupertas?

Considera; non omnem Paupertatem esse virtutem, nec quamlibet esse Religiosam paupertatem; quia inter mendicos est paupertas, & ordinariè non est virtus: vellent enim quàm plurima habere. Item avari, & parci, victu & vestitu pauperrimo utuntur; non tamen sunt pauperes Christi. Illa itaq; paupertas, est virtus Religiosa, quâ quis voluntariè, propter amorem DEI, expeditioremq; ejus cultum, necnon Christi imitationem, omnia bona creata terrena contemnit, desideriumq; habendi ea, & amorem

morem exuit, idq; ipsum juxta mentem suæ Religionis, votò firmat, solo necessariorum rerum usu cum dependentia, & arbitrio superioris, retento. Vide Religiose, & singula diligenter expende. Consecutusne es virtutem paupertatis Religiosa? reliquistine omnia? & quidem non ob alios respectus, tantum ob amorem DEI, & Christi imitationem? exuistine amorem omnium rerum terrenarum? nihilne habere cupis? contentusne vivis iis, quæ tibi providet DEUS in Religione? Examina conscientiam tuam, an adhuc non facias tibi spem redeundi ad relicta? an aliquid tibi in futuros usus non reservasti? abjice nunc omnia ad pedes Christi. Pete, ut ille te recipiat, & efficiat discipulum suum.

PUNCTUM 2dum.

Quotuplex Paupertas Religiosa?

Considera aliam paupertatem esse communem, seu communis, & totius Religionis, quæ pro varietate Religionum, varia & multiplex est, ad proprium Religionis cujusq; finem, & instituti rationem accomodata. Alia est particularis, quæ singulis personis alicujus Religionis, convenit, debetq; notitia illius comparari, ut sciat quævis persona Religiosa, ad quid obligatur vi sui voti. Hæc autem paupertas debet esse & rerum & Spiritus: nam vera & plena Religiosa paupertas, in his duobus consistit. Imò: Ut Religiosus nihil omnino suum proprium, nihilq; superfluum, nisi usum rerum necessariorum, cum facultate superioris habeat. 2dò: Ut nihil desideret habere, nec in defectu necessariorum turbetur, queruletur, sed hilari mente degustet fructus paupertatis. Vide itaq; & expende, quousq; in voti paupertatis integritate prosequenda deveneris? nihilne habes proprium? nihilne habere desideras? omniane, quibûs uteris, sunt cum facultate superioris? non reperiunturne apud te superflua? non tenerisne inordinato amore aliquarum reularum? Pete à

Christo, ut disrumpat omnia vincula, quæcunq; cor tuum illaqueant, ut illi in vera rerum & Spiritûs paupertate sacrifices hostiam laudis, & verus ejus discipulus evadas.

PUNCTUM 3tium.

Quæ proprietates paupertatis Religiosæ?

Considera paupertatis Religiosæ conditiones, ac proprietates, quarum ima est: ut Religiosus sine facultate superioris nihil prorsus habeat, tam penes se, quàm penes alium, neq; palam, neq; clam, tum pro se, tum pro aliis; alioquin erit proprietarius. 2da Proprietas, ut Religiosus non solum nihil habeat proprium, sed etiam nihil singulare, hoc est, non tale, quale alii in eadem communitate habere solent, sive in victu, sive in vestitu, sive in alia suppellectili. 3tia Ut Religiosus nihil præferat in cultu molle; qui enim mollibûs vestiuntur, in domibus Regum sunt, non in domo Christi pauperum. 4ta Paupertatis proprietas est, ut non quarat quidem Religiosus exquisitum nitorem, tum circa se, tum in rebus sibi in Religione concessis; conservet tamen omnem decentiam, cum modestia. Unde S. Bernardus profitebatur se paupertatem amare, sordes tamen odisse, & revera talis paupertas esse debet in domo DEI, in communitate Religiosa, quæ habeat decentiam, modestiam, honestatem, & ordinem. Proinde omnia, quibûs utitur Religiosus, sint decenter munda, & composita, sive in vestitu, sive in cubiculo &c. 5ta Paupertatis proprietas est, ut omni studio res ad usum concessæ conserventur, nec per negligentiam Religiosi corrumpantur. 6ta: Ut inopia paupertatis, hilariter sustineatur. Vide, an tua paupertas contineat omnes istas conditiones? Erubescere, quod ad paupertatem in Religione venisti, illam tamen in omnibus fugias, nec sunt dulces gutturi tuo fructus ejus. In domo paupertatis requiris commoditates, quas nec in sæculo haberes.

Excute

Excute hanc mentis cæcitatem; excute ignaviam, & pleno corde plenam paupertatis possessionem occupa. Postula à Deo Spiritum paupertatis, per JESU Christi vulnera. Implora suffragia Beatissimæ ac Sanctorum Patrum tuæ Religionis, in exquisitissima paupertate olim viventium.

Pater; Ave; &c: Anima Christi. &c.

H O R A Q U I E T I S D A N D A C O N S I D E R A T I O N I.

Supra varios Actus Paupertatis Religiosæ.

Constitutus ad pedes Crucifixi, pete gratiam cognoscendorum actuum paupertatis, & fructuosæ supra illos reflexionis.

I. **A** Mare paupertatem ejusq; effectus amore filiali tenere, & internè prosequi.

2. Revereri, tueri, appretiare, defendere, integram per omnia conservare tum in se, tum in aliis Religiosam paupertatem minutissimis etiam in rebus, eo modo, quo cives muros, aut castella conservare solent integra.

3. Nihil omnino, absq; facultate superioris dare, donare, domesticis, externisq; aut ab iisdem accipere.

4. In omnibus quantumvis parvis, non gravatè, sed libenter facultatem petere, & quidem cum indifferentia, imò cum inclinatione, ut negetur facultas, & gaudere, si negetur, non tristari, non conqueri.

5. Nihil habere penes se & interre culas suas, quod nolit quis sciri aut videri aut auferri à Superioribus, in aliorumq; usum converti, sed ab omnibus rebus affectum avulsum habere.

6. Nihil ex alienis cubiculis, vel etiam ex publicis locis accipere sine facultate Superiorum.

7. Nihil habere superfluum, nihil pretiosum, comptum, exquisitèq; nitidum, etiam cum facultate, aut permissu, dissimulacione,

latione Superiorum: nam superflua nec concedi possunt, nec concessa licita sunt, ipsa enim concessio illicita est; itaq; paupertatis amator, omnia superflua, in victu, vestitu, libris, cubili &c. refecabit.

8. In necessariis etiam viliora eligere; quanto enim Religiosus pauperius vestitur, dormit, inhabitat, tanto paupertati suae congruentius afficitur.

9. Non erubescere paupertatem, & nuditatem Christi, sed gloriari in Domino, in paupertate & rerum vilitate, quod tamen non jactabundè fieri debet, sed propter abnegationem majorem mundi; contemptum, ex internae humilitatis Spiritu, & filiali, in paupertatem amore.

10. Res vetustatem redolentes, laceras, amplecti, novis & integris praeferre, de illis gloriari, de his erubescere.

11. In distributione rerum non praevalere alios, sed sibi extremas res ab aliis abjectas offerri appetere, acceptare, eligere.

12. Incommoda & defectus necessariorum dissimulare, silentio tegere, amanter sustinere.

13. Non statim nec sollicitè indigentiae provisum velle, sed potius experimento probare, an sit vera indigentia? ac tandem modestè sedatèq; exponere, nec urgere; quod multò amplius servandum in provisione futurarum indigentiarum.

14. Non circumferre secum de loco in locum multam supellectilem rerum, sed quantum fieri potest, minus onustum migrare ac progredi.

15. Incumbere totis fiducia viribus, in Dei providentiam; tanquam infans in curam Matris.

16. Suspectum habere id omne, ac illo se spoliare, atq; abjicere, quod superioris notitiam consensumq; declinat, ac formidat.

17. Non libenter acceptare ea beneficia externorum, quibus in eos vel alios obsequium exhibitum, compensari probabiliter pu-

tatur. Quod autem puræ elémofynæ titulô obvenit, id gratanter, ac velut cælitus, Angelicoq; instinctu oblatum admittere.

18. In iudiciis de necessitatibus, non proprio regi sensu, sed superiorum arbitriô, iudicioq; eorum acquiescendum.

19. Exposita necessitate apud superiorem, nihil determinatum poscere aut suadere, non tempus, non locum, non personam, non rem, non modum, aut medium. Sed omnia arbitrio Superioris permittere, ut ille expensis omnibûs circumstantiis decernat, quod illi optimum videbitur in Domino.

20. Non exigere, nec curare, ut nostrâ causâ, sumptus fiant, etiam necessitatis gratiâ, multò minùs cupiditatis impertinentis causâ, quæ plus quandoq; necessitatis fictæ, quàm veræ continet.

21. Semper mendicatô, vel acsi mendicatô vivere, omniaq; tam petere, quàm expectare, quàm etiam accipere, tanquam mendicantes solent; quilibet enim Religiosus, qui votum paupertatis fecit, verè mendicum se omnium constituit.

22. Repositâ in futurum usum, apud se non servare, sed in communibus depositoriis conservanda reddere, ut, si quis eguerit, etiam uti possit; talia enim apud se servare, proprietatem re-
dolet.

23. Bene impressum menti habere, quôd Religiosus quidquid acquirit, non sibi acquirit; quidquid operatur, non sibi operatur, ac laborat, sed Religionî, & omnia ad dispositionem Religionis spectant.

24. In itineribus ex obedientia susceptis, vitare sumptus & onera, quàm maximè. Si Superior offerat viaticum, aliunde non conquiratur aliud. Sin autem aliunde oblatum iponte fueris, manibus Superioris consignandum est.

25. Munera nec cuiquam offerre, nec acceptare libenter; magis enim consonat Religio æ paupertati, habere nihil, quod donare

nare Religiosus possit. Nec quisquam erubescere debet, pauperem se profiteri, qui nihil habet, quod donet; si tamen aliquid donandum erit, illud sit à penù pauperum, neq; tanquam proprium detur; aliunde vero donatum, non sibi, sed Religioni accipiat, statimq; consignetur ejus manibus, cui talium rerum cura demandata est.

Hunc paupertatis Spiritum, in Christi, Beatissimæ, Sanctorum Apostolorum, vitis ac gestis expressum habemus, & quidem ad id, ut imitemur; hunc in regulis Societatis ac exemplis Patrum nostrorum efformatum legere possumus.

Investiget itaq;, & dispiciat quisq;, quantum sibi adhuc desit ad culmen Evangelicæ paupertatis, Christi; pauperis imitationem; conatumq; suum cum DEI auxilio exacuatur, ut illud assequatur.

§. TERTIUS.

De secundo Religiosi cum DEO, nexu, per Castitatem.

UT scivi, quoniam aliter non possem esse continens, nisi Deus det, & hoc ipsum erat Sapientia, scire, cujus esset hoc donum. *Sap: 8.*

O Castitas, quæ cor possidentis te, lætificas, & animæ ad Cælestia alas adjungis! ô castitas, quæ passiones minuis, & animum à perturbationibus liberas! ô castitas, quæ justos illuminas & diabolo tenebras offundis! &c. *S: Ephr: 1: 1, Ser: de Cast.*

MEDITATIO

De Castitate.

Præl: 1. Imaginare te in conspectu Angelorum stare, ad quorum puritatem S: Ignatius suis Regulis hortatur,

Præl: 2. Pete gratiam cognoscendi excellentiam castitatis, efficacemq; conatum adhibendi, quo Angelicam mentis & corporis puritatem consequaris,

PUN-

P U N C T U M 1^{um}.*Quid Castitas,*

Considera Castitatem consistere in puritate, munditia, ac integritate mentis & corporis. Ut Religiosus consequatur puritatem mentis, custodiat cor suum, ab omnibus cupiditatibus impuris, & aspectibus. Item imaginationem ab omnibus imaginibus inhonestis, mentem ab omnibus cogitationibus huic virtuti contrariis. Ut verò puritatem corporis consequatur, custodiat corpus suum, ab omnibus voluptatibus, & illecebris sensualibus, omnesq; sensus suos ab oblectamentis. Expende, consecutusne es hanc virtutem? conservasne puritatem mentis & corporis? Vide, purane tuæ cogitationes & imaginationes? Purane affectus & desideria? Purane oculi? aures? lingua? manus? Erubescere, deplora omnes sordes tuas, elue in lacrymis tuis & sanguine Christi omnes maculas sensuum, & cordis tui. Pete à Deo: Cor mundum crea in me Deus, & Spiritum rectum innova in visceribus meis.

P U N C T U M 2^{dum}.*Quæ excellentia Castitatis?*

Considera imam excellentiam Castitatis, quod juxta veritatis Divinæ oraculum, incorruptio faciat proximum Deo & Angelis ejus; sicut enim opposita castitati luxuria efficit homines brutis ac bestiis similes, ita Castitas efficit divinos. Et quid potest excellentius de castitate dici? proinde etiam miratur Sapiens. O quam pulchra est casta generatio cum claritate! immortalis enim est memoria illius, quoniam apud Deum nota est & apud homines. Sap: 4.

2da Castitatis excellentia, quia adhuc in hac mortali vita, elevat hominem ad eum vitæ statum, quem habiturus est in futuro sæculo, de quo Christus asserit. In Resurrectione neq; nubent, neq; nubentur, sed erunt sicut Angeli DEI.

3tia Excellentia Castitatis est, quia illam Deus summe æsti-

M. m

mavit,

mavit, volendo Matrem habere Virginem, & ex Virgine nasci. Item quos elegit in discipulos, voluit eos castè vivere.

4ta Excellentia, quia castæ animæ efficiuntur gratissimæ Deo habitationes, & Spiritûs S. Tempa, ut in iis libentiùs præ aliis Deus resideat.

5ta Est, quia castitas efficit maximè capacem animam donorum Dei, ac luminum ejus.

6ta Excellentia Castitatis est, quòd cum cultoribus puritatis libentiùs Cælites ac Angeli præsertim Custodes commorentur, & specialius eos tueantur. Sicut S. Agnes gloriatur: *Mecum habeo Custodem corporis mei Angelum Domini.* Vide, quantû æstimare debeas hanc virtutem? quantum de illius conservatione sollicitus esse? æstimasné illam? fugisné occasionem periculosas, huic virtuti obnoxias? obfirma animum in illius amore. Appretia eam.

PUNCTUM 3tium.

De mediis Conservandæ Castitatis.

CONsidera 1mum & efficacissimum medium esse statum Religiosum, qui plenus est mediis & auxiliis ad observandam castitatem, habetq; exclusa procul omnia pericula ejus. Deinde plurima, ad ejus curam continet invitantia exempla. Hinc Religiosis vix aliqua est difficultas in observatione castitatis, dummodo vivant juxta præscripta Religionis.

2dum Medium est: Accuratus usus Sacramentorum, præsertim Eucharistiæ, ubi fontem omnis puritatis recipit homo.

3tium Medium: fuga occasionum & familiaritatum.

4tium Meditationis, præcipuè de Passione Christi, de novissimis, constans & fervens studium.

5tum Directio & vigilantia Superiorum & Patrum Spiritualium, quibus, quò se sincerius aperit Religiosus, eò securius incedit.

stum Extirpatio amoris sensualium ac odium illorum.

7mum Conservandæ castitatis medium est, accuratum & con-
stans perfectionis Religiosæ, virtutûmq; Religioso statui con-
venientium studium. Castitatis enim Religiosæ, maximè proprium
est, omnium virtutum Societatem requirere; quia sine earum con-
sortio subsistere nequit; vix equidem aliqua virtus est, cujus
præsidio castitas non egeat. Sic multum conservatur humilitate,
timore Dei, temperantiâ, mortificatione interna & externa, Ora-
tionis studiô, & similibûs, sine quibus certò certius Castitas aut
diu non manet, aut si permaneat, Deo non placet; per quod ipsum,
in periculo ruinæ constituitur. Excita te ad hæc mediâ sedulò ad-
hibenda. Pete auxilium Dei, & Beatissimæ protectionem.

COLLOQUIUM cum CHRISTO.

O! JESU Virgineæ castitatis amator & auctor, te per omnia
viscera misericordiæ, & bonitatis tuæ rogo, ut Cor mundum
crees in me; quis enim mundum de immundo potest efficere, nisi
tu, qui idem ipse es. *Pater: Ave: Anima Christi. &c.*

HORA QUIETIS, DANDA CONSIDERATIONI.

Supra gradus Religiosæ Castitatis.

*Constitutus ad pedes Crucifixi pete gratiam fructuosæ reflexionis supra
gradus perfectæ Castitatis, auxiliûmq; eos consequendi.*

1. NUnquam consentire scienter & advertenter in ullam noxam
mortalem Castitati mentis corporisq; contrariam.
2. Parî studiô & diligentîâ vitare peccata etiam venialia pu-
ritati contraria, ideòq; nullis sæditatibus cogitandis vel imaginan-
dis advertenter immorari, sed ubi illas quis adverterit, statim
eas sic excutiat, prout excutitur scintilla ignis, in faciem vel ve-
stem insiliens.
3. Nullius objecti aut personæ intuitu, approximatione, con-

M m 2

versione

versatione moveri aut titillari, etiam obiter, statimq; se ab illa expedire; proinde utilissimum erit assuescere cum omnibus agere, omnes intueri, quomodo agimus cum statuis, aut eas intuemur sine ulla impuritatis, in mente vel sensu, nota, & sine ulla reflexione & descensu mentis ad impura. Proderit etiam taliter versari cum vivis, ut, quales sunt futuri post mortem, cogitemus.

4. Cavere, imò & immunem esse ab omni bruto mentis & carnis motu in vigilia; hoc enim rationi aduersatur. Illi autem cum Dei gratia perveniunt ad hunc gradum, qui mentem suam piis, aut etiam necessariis utilibusq; & propter Deum occupatam, & nunquam otiosam oscitantemq; habent. Qui enim mentem suam non occupant seriis, & ad Deum spectantibus rebûs atq; objectis cogitandis, si non mirentur, si mente impingant in sordes, quæ aut sponte in mente, phantasiâq; enascuntur, tanquam urticae in terra, ex neglectu culturæ, aut illæ ab hoste animæ facile oggeruntur, qui semper in vacantem domum divertere consuevit, annuente Evangelio.

5. Nihil pati in somnis, quod mentis corporisve puritati adversetur; id enim signum est defæcatæ mentis ac expurgatæ ab omni sæditate, & indicium vigilantis circa talem animam Divinæ gratiæ ac Angelicæ custodiæ, quæ arcens omnia impura, sola Sancta, aut Sanctitati non opposita admittat ad imaginationem dormientis hominis.

6. In audiendo vel loquendo, tractandeq; ejusmodi materias, quæ continent ejusmodi sensualia, brutâq; objecta, prout accidit in audiendis confessionibus, vel in doctrinâ de his materiis ad conscientias resolvendas, ita se gerere, & ita hæc tractare integrè, quasi de lapidibus, de ædificiis tractatio sermove haberetur. Castis enim casta sunt omnia. Quemadmodum radius solaris cum eodem nitere procedit per lutum, ac aurum, nihil de luto, sordium contrahens,

Sciendum.

Sciendum verò, quòd ad primum castitatis gradum omnes omnino tenentur, quo ruente corrumpit substantia Sanctitatis & votum sacrilegè frangitur. Ut autem in primo securè quis consistat gradu, necesse est, ut servetur & secundus gradus; his verò duobus diligenter observatis, paratur ad reliquos ascensus, adhibitis congruis mediis, & à Societate præscriptis, & in meditationibus insinuat. 3^{tius} & 6^{tus} gradus est summopere necessarius Religiosis Societatis, cum omni genere proximorum versantibus. Ad quos ritè tenendos, tum ipsa vocationis gratia, tum media efficacia præscripta mirificè adjuvant, ut non difficile sit iis, qui cum DEI gratia velint, Angelicam mentis & corporis puritatem conservare.

§. Q U A R T U S.

De Tertio Religiosi nexu cum DEO.

Per Obedientiam.

OMnis, qui audit verba mea hæc, & facit ea, assimilabitur viro Sapienti, qui ædificavit domum suam supra petram.
Matth: 7.

M E D I T A T I O

De Obedientiæ voto.

Præl: 1. Cogitate audire S. Paulum dicentem: obedite Præpositis vestris, & subiacete eis, ipsi enim vigilant, quasi rationem pro animabus vestris reddituri. *Hebr: 13.*

Præl: 2. Pete gratiam, ut possis obligationes obedientiæ, ejusq; perfectionem cognoscere, & cognitam implere, atq; sic votum ejus perfectè servare.

P U N C T U M I m u m.

Quid Obedientia?

Considera obedientiam à S. Thoma definiri, quòd sit virtus
M m 3 prom-

promptam hominis reddens voluntatem, ad implendam voluntatem præcipientis. Clarius à V. P. Drazbicki describitur, quòd sit virtus, qua homo, suæ propriæ voluntatis, suiq; ipsius regimini, arbitrio & curæ renuntians, omnem suâ curam & gubernationem, voluntariè in DEUM, ejusq; vicarios, Superiores suos refundit, & ad id votò perpetuò se adstringit, cupiens & paratus, & gaudens se à DEO, per Superiores suos, vicarios ipsius DEI, in omnibus gubernari. Quàndiu Religiose in sæculo fuisti, liberum erat tibi, hoc agere, quòd velles, hîc negotiis occupari, quibûs velles, in eo loco manere, cum his sociis versari, in quo loco te tua voluntas collocaret, & quibus hominibus te conungeret; nunc autem cum te servitio DEI addixisti, tuæ voluntati & arbitrio renuntiâsti, & multò magis, si votò hoc ipsum confirmâsti ac confirmare paras, jam non secundum tuum velle, & arbitrium vivere, agere, associari, sed omnia juxta voluntatem DEI, per Superiores tibi annuntiatam, operari debes. Illud sibi quilibet Religiosus, dictum putet, quòd Christus S. Petro dixit. Ioan: 21: *Cùm esses junior, cingebas te & ambulabas, ubi volebas, cum autem senueris, alius te cinget, & ducet, quo non vis.* Poteras in mundo, propriò regi arbitriò, & in tua erat potestate subicere te, vel non subicere alterius gubernationi & voluntati. Cùm autem jam id propter DEUM fecisti, spontaneum & rationabile, voluntatis propriæ sacrificium DEO offerendo, cave, ne quid ex oblati DEO, subtrahere præsumas. melius enim in mundo erat vivere, quàm in Religione non obedire, melius non vovere, quàm non reddere, quod vovisti. Considera item in Societate obedientiam non consistere in sola executione imperati à legitimo Superiore, sed etiam in subjectione voluntatis propriæ, & iudicii, ut idem velit subditus, idemq; intelligat, quod & Superior: exequendo scilicet imperata,

ta, cum abdicatione propriæ voluntatis, & iudicii, non considerando in Superiore illius ipsius personam, erroribus obnoxiam, sed personam Christi Domini, cujus ille nomine præest, & imperat, & Religiosi obedire debent. Vide, an paratus sis ad talem obedientiam, in Societate, totâ vitâ præstandam, offer te DEO plenè. Pete auxilium DEI.

P U N C T U M 2dum.

Fundamentum Obedientiæ.

CONsidera primum fundamentum obedientiæ Religiosæ constitut, in absoluto DEI, super omnes creaturas, dominio, & in absoluta, omnium creaturarum, ad DEUM subiectione. Ex quo DEUS est absolutus omnium Dominus, potest, quidquid, & quando vult, ordinare, aut statuere de omni creatura; hæc autem tenetur omni naturali jure subijci, & parere cuivis ordinationi Divinæ, & voluntati ac legi ejus. Hunc verò gubernandi modum, exercet DEUS per alias creaturas, quas præesse facit: *Omnis enim potestas est à DEO*: cui potestati, nolle subesse, nolle obedire, est nolle subesse ipsi DEO, nolle audire DEUM, juxta illud Evangelii: *Qui vos audit, me audit, qui vos spernit, me spernit*. Unde verus obediens in suo Superiore, non illius personam defectuosam, sed Personam & authoritatem, ac potestatem ipsius DEI considerare debet, à quo tanquam à causa principali, per hominem tanquam instrumentum DEI, procedunt omnes dispositiones, & imperia. Vide tuam hac in parte obedientiam, innititurne huic fundamento? agnoscisne in tuo Superiore DEUM? agnoscisne in ejus ordinationibus voluntatem, authoritatem, potestatem DEI? Damna & desse tuam inconsiderationem, & negligentiam. Propone emendationem. Implora DEI opem.

PUN-

PUNCTUM 3tium.

De secundo fundamento Obedientiæ.

Considera solidissimum obedientiæ fundamentum oriri tum ex inenarrabili imperfectione, ac infirmitate naturæ nostræ, atq; potentiarum animæ, intellectûs & voluntatis: quæ sine magno periculo errorum, & ruinæ, servire nobis nequeunt, ad nos ipsos gubernandos. Tum ex summa perfectione Divina, & sapientissima ejus providentia submovente nos, ab ejusmodi erroribus & ruina. Cum enim intellectus, & prudentia nostra sit imperfectissima, & vix aliquid evidenter cognoscere sufficiens, ut sæpius hæreamus dubiis, hæcne? an illa sint agenda? appetenda? sequenda? multæ insuper agendorum circumstantiæ, nos latent ignotæ; præsertim, quia plura intellectum nostrum, à vero, ad falsum detorquent, prout passio amoris, aliæq; passionες immortificatæ impellunt. Voluntas item nostra cæca, & libertas multis subjecta defectibus, ex se maligna & sedes omnis malitiæ, ad omne bonum tarda & difficilis, persæpe rectæ rationi rebellis, ad agendum bene, inefficax. Ut itaq; talibus malis, & periculis evitandis remedium haberetur, providit Sapientissimus DEUS, & suô exemplô docuit Christus obedientiam, ipse factus obediens usq; ad mortem, vî ejus abnegantes, nostrum judicium & voluntatem, soli Divinæ voluntati tanquam Sanctissimæ, rectissimæ, Sapientissimæ, dignissimæ, inhæreamus, & eam nobis per Superiores manifestatam exequamur. Quis igitur suo arbitrio, tam imperfecto & perverso? quis suæ voluntati tam infirmæ, tutò fidere volet? nonné consultius est, ut abrenuntiet suæ voluntati & judicio? & per votum obedientiæ, totum se DEO sacrificet, ejusq; Sanctissimam sequatur voluntatem? Certus es Religiose, quòd DEUS sit sapientior, quàm tu, sit melior, dignior, diligentior, quàm tu; amantior tui, quàm tu te ipsum ames; rectius ergo & prudentius ille

te

te gubernabit, & omnia circa te disponet, quàm tu tibi velles. Si enim Deus melior & sapientior, quàm tu: meliora tibi providebit, quàm tu tibi velle posses. Si Deus potentior, quàm tu; facilius illi erit, præstare & efficere omnia, ad vitam & salutem necessaria, quàm tu tibi præstares. Proinde bonitati ipsius confisus, omnem curam tui, in eum reponas, & omnem cogitatum tuum, iacta in Deum. Si Deus fidelior, quàm tu tibi essis; illius itaq; providentiæ te totum credere debes, utq; fidelis ejus servus inveniaris, toto conatu satagas. Si Deus tuus amantior, quàm tu ipse; ampliùs igitur de illius charitate, in te confidere, & in eo sperare potes, quàm à te ipso & amore proprio. Exue itaq; amorem proprium & totum te trade Deo. Si diligentior Deus circa te, quàm tu ipse; securiùs ergo in illius cura quiesces, quàm in tua. *Non enim dormitabit nec dormiet, qui custodit. Israel.* Si deniq; Deus dignior, quàm tu; utiq; digniùs est, ut illi tu potiùs, quàm tibi tuæq; voluntati obtemperes? & subsis? Expende hæc omnia diligenter, & te filium ac mancipium Divinæ Providentiæ recognoscere studeas, ipsiq; te totum committe, tuam sapientiam, potentiam, bonitatem, amorem abjice, Divinam autem ama, omnemq; sollicitudinem tuam projice in Deum, quoniam ipsi est cura de te.

COLLOQUIUM.

Per Orationem S. Ignatii: Suscipe Domine univers: &c.

HORA QUIETIS,
DANDA CONSIDERATIONI.

Supra Perfectiones Obedientiæ.

Constitutus sub pedibus Crucifixi, pete gratiam fructuosæ considerationis ac reflexionis, supra Obedientiæ perfectiones, earumq; donum consequendi.

I. Perfectio obedientiæ Societatis est: Superiorem, quicumq; ille sit, supremus, an medius, an infimus, doctus an indoctus,

Nn

præditus

præditus donis naturæ & gratiæ vel non præditus, locò Christi Domini agnoscere, eumq; internâ reverentiâ & amore tanquam Christum prosequi.

2. Perfectio obedientiæ Societatis est omnia imperata Superioris exequi integrè, promptè, fortiter, cum humilitate debita, sinè excusationibus, querelis, obmurmurationibus, sive illa sint levia, sive difficilia & sensui repugnantia.

3. Perfectio obedientiæ Societatis est: habere plenam interiùs resignationem, & veram abnegationem voluntatis propriæ, atq; judicij, conformando utrumq; cum eo, quod Superior vult sentit, & quidem in omnibus omninò rebus, ubi manifestum peccatum non cernitur.

4. Perfectio obedientiæ, Societatis est: relinquere Superiori liberam dispositionem de se, & de omnibus rebus suis, cum vera subjectione, nihil clausum occultumq; Superiori tenendo, nè conscientiam quidem propriam, neq; ejus judicio ullatenus repugnando, ut taliter uniti, meliùs in Dei obsequio, conserventur & progrediantur.

5. Perfectio obedientiæ, Societatis est: obedire etiã ad tenuissimum quodvis signum, quò voluntas Superioris exprimitur ac innotescit, & quidem punctualissimè.

6. Perfectio obedientiæ, Societatis est: ad vocem Superioris & ad signum campanæ ita promptum esse, ac si illa ipsa Christi vox esset, actione qualibet, atq; literâ inchoatâ, & imperfectâ relictâ.

7. Perfectio obedientiæ, Societatis est: non solum Societatis vel domûs Superiori, sed etiã subordinatis officialibus obedire, magna cum humilitate, in rebus omnibus ad eorum officium pertinentibus.

8. Perfectio obedientiæ Societatis; habere semper ob oculos Creato-

Creatorem & Dominum nostrum, propter quem, obedientia homini præstatur.

9. Perfectio obedientiæ Societatis est: obedire non in Spiritu & perturbatione timoris, quod est mancipiorum & jumentorum, sed in Spiritu amoris, quod proprium est filiorum, & ingenuæ mentis.

10. Perfectio Societatis: ad eum scopum vires omnes ac intentionem in Domino convertere, ut Sancta obedientia tum in executione exterius, tum in voluntate ac intellectu interiùs subditi, sit semper omni ex parte perfecta.

11. Perfectio obedientiæ Societatis est: obedire cum magna alacritate.

12. Perfectio obedientiæ Societatis est: obedire cum Spirituali gaudio, mentisq; exultatione, ex eo potissimum, quod certus sit, qui obedit, Dei voluntatem se facere.

13. Obedire cum perseverantia, quæcunq; injuncta fuerint, omnia Divina, Deoq; placita esse, sibi persuadendo.

14. Obedire cum judicii proprii abnegatione.

15. Quisq; persuadeat sibi, quod ii, qui sub obedientia Societatis vivunt, se ferri ac regi à Divina Providentiâ per suos Superiores linere debent, perinde ac si cadaver ac senis baculus essent, qui ad nutum volentis tractari se sinit.

16. Talis obedientiæ præter exemplum Christi & Apostolorum, habemus exempla domestica.

S. Franciscus Xaverius ita erat obedientiæ Studiosus, ut vix indicata S. Ignatii voluntate de missione Indiarum à se suscipienda, statim omnes difficultates & discrimina contemnens ad iter se pararet, nec minori alacritate illud aggrediretur. Et S. Ignatius adeo ejus obedientiæ confidebat, ut literis, quibûs eum ex India revocabat Romam, solam literam J. in calce adscripserit, non du-

bitans, quā ea sufficeret, ad iter pari alacritate remetiendum, quā antea fuerit susceptum. *Vit: l: 2. ac 6. c: 8.*

S. Franciscus Borgias non solum omnes suos Superiores magnā reverentiā colebat, sed etiam Fratris Marci à S. Ignatio sibi additi, omnes nutus observabat. In Ognateni secessu lapides, calcem, & ligna ad ædes construendas portare iussus, tam libenter & expeditè paruit, ac si Angeli vocem audivisset. *Vit: lib: 4. c: 3.*

S. Aloysius nullum unquam vel levissimum imperium praterivit. Erga Vicemanuductorem tantam reverentiam, & observantiam exhibebat, ut ipsum R. P. Generalem, vix majore colere posset. *Vit:*

MEDITATIO.

De Collectionum Terminatione.

Præl: 1. Statuamus nos, in Conspectu Dei, S. Patris, & aliorum Religionis Sanctorum.

Præl: 2. Petamus gratiam colligendi fructus, ex Collectionibus absolutis.

PUNCTUM imum.

Post absolutas collectiones perfectius est vivendum.

CONsideremus rationes, ut nobis id persuadeamus. Earum ima est: quia in collectionibus discere debuimus, ex Magisterio Spiritus Sancti, quid à nobis requirat Deus? quid vita Religiosa? quid propria cujusque salus & conscientia? illis autem intellectis, juxta hanc notitiam non agentes, similes reddimur illi servo cui Christus minatur *Luc: 12. Servus sciens & non faciens multis vapulabit.* & *Matt: 11. Vae tibi Corozaim, vae tibi Bethsaida, quia si in Tyro & Sidone factæ fuissent virtutes istæ, quæ factæ sunt in te, olim in cinere & cilicio penitentiam egissent.* Certè enim si istas doctrinas audirent sæculares, etiam Hæretici, fortassis ferventiùs Deo servirent.

2da Ratio est: quia in vanum tot dierum labor periret, si ex illo nullus fructus perciperetur. Quid enim prodest semper discere ædificare, & nunquam manus, ad extruendas ædes, ad-movere? Quid juvat si quis discat artem pictoriam, & nunquam penicillum moveat? Cui utilitati, artis medicariæ præcepta nosse, & nullius San tatem curare. Ita pariter quid profuit, in exercitiis Spiritualibus, condiscere viam Domini, ac modum rectè vivendi, & Religiosas actiones perfectè agendi, si hæc notitia non deducatur in effectum. Audiamus, quid Christus Dominus, Joan: 15. asserat. *Si non venissem, inquit ille, & locutus fuisset eis, peccatum non haberent.*

3tia: Quia ob id tantum nos Religio ab aliis occupationibus liberat, ut per collectiones novum Spiritum, & fervorem acquiramus. O quanta esset deceptio Religionis, si absq; fructu spirituali, ab his collectionibus rediremus? Videamus itaq; quos fructus ex iis efferemus? Videamus, ad quem finem creati sumus? & tendemusné ad eum omni conatu, labore, intentionibûs? Didicimus alia omnia creata data nobis à Deo, tanquam media, quæ nos juvent ad finem nostrum consequendum, nempe ad laudem & amorem Dei, nostramq; salutem obtinendam. Statuimusné, firma proposita, nullâ unquam creaturâ abutendâ, cum minimâ etiam offensa Dei? Intelleximus, quòd peccata impediunt nos, in querenda laude & amore Dei, ac salute nostra; qua itaq; diligentia & solitudine illa vitabimur? & omnes occasiones præscindemus? quod odium peccati concepimus? Consideratio de novissimis, de morte, Judicio, inferno &c: præsidium nobis asserre debet, adversus omnes insultus hostium; designavimusné tempus, locum, ac alias circumstantias, in quibus expedit eam considerationem, quàm frequentissimè renovare? quâ item constantiâ sub vexillo Christi stetimus? quò animò impium itineris comitem, te-

porem, exclusimus? quas virtutes in comitatum assumpsimus? Reflectamus nos supra omnia lumina, calitus nobis immissa, supra omnia proposita. Rogemus Deum, ut ille confirmet, quod est operatus in nobis.

PUNCTUM 2dum.

Reflexio supra gratias à Deo acceptas in his collectionibus.

1mò. **M** Agnum Dei beneficium, quia nos sanos per collectiones conservavit, 2dò: Quia hoc tempus, ad exercitia nobis suppeditavit, aliis id negando. 3tiò: Quia nos per gratiam Spiritus Sancti, in multis illuminavit & res saluti congruas edocuit. 4tò: Quia dedit occasionem varios exercendi Actus Virtutum, Fidei, spei, Charitatis, humilitatis, mortificationis. 5tò: Quòd nos saltem in aliquibus meditationibus, dulcedine suæ suavitatis visitaverit, horrorem & odium peccati dederit. Has & alias gratias, per hos dies liberalissimè effudit in nos Deus. Igitur magnificemus, extollamus Bonitatem Dei, agamus gratias, inviteamus Sanctos ad benedicendum Deum, Magnificate Dominum meum Sancti Dei, & exaltemus Nomen Ejus in id ipsum. Confiteamur indignitatem, ac ingratitude nostram. Rogemus, ut hæc sua dona conservet in nobis, & ad ea, quæ cognovimus, implenda, tribuat auxilium.

PUNCTUM 3tium.

Cognitio defectuum commissorum & eorum suppletio.

Consideremus, 1mò: Utrùm præscriptum ordinem temporis in absolvendis hisce exercitiis observaverimus? 2dò: Utrùm alicui exercitio tempus non subtraxerimus? 3tiò: Utrùm omnia cum sublimata intentione & alacriter peregrimus. 4tò: Utrùm fructus & lumina immissa adnotavimus, 5tò: Utrùm & quæ proposita fecimus

fecimus. 6to: Utrùm nos quandoq; non vicit somnolentia. 7mo: Utrùm silentium, modestiam, servavimus? hos & omnes alios defectus, suppleamus fervore Spiritûs, & affectibûs aliorum omnium, qui hæc exercitia Sanctè peregerunt, qui hoc ipso tempore peragebant, in toto Orbe. Eluamus in lacrymis omnium pœnitentium, & in sanguine Christi omnes defectuositates nostras, omnia nostra suspiria, vota, cogitationes, affectus, devotionem, uniamus cum Orationibus Christi, Beatissimæ, Sanctorumq; Omnium, & hæc aspersa sanguine Christi, deponamus, in vulneribus JESU, ut sic gratiora omnia fiant, in Conspectu Dei.

Memores etiam sumus indulgentiæ consequendæ:

Te D E U M Laudamus &c.



VIA

V I A
R E G I A

Ad

I N Q U I R E N D U M ,

Et

I N V E N I E N D U M

J E S U M.

Vestigiis Trium Regum

*Religiosam Juventutem innovando Spiritui
deditam*

D E D U C E N S.

RENOVATIO.

Spiritus ad normam Trium Regum.

MEDITATIO ima.

De Investigatione Christi à Renovaturo Spiritum, adinstar SS. Trium Regum.

Prel: 1. Spectabo tres Reges inquirentes Christum natum.

Prel 2: Petam gratiam imitandi tres Reges in Christo inquirendo.

PUNCTUM imum.

Quid inquirent Reges?

CONsidera, quòd tres Reges non inquirunt suum honorem, æstimationem, vanos plausus hominum: non inquirunt commoditates propria, sed inquirunt Christum natum: *Ubi est, qui natus est Rex Judæorum?* Vide tu Religiose, quid in tuis actionibus quæras? purené quæris Christum? an tua commoda, laudes, aliorum respectus? Examina singulas diei actiones, à prima surrectione, intendisné in Visitatione Sacramenti, in quotidianis meditationibus, manualibus, Officiis, ac functionibus, in lectione libri Spiritualis, examinibus, ac aliis invenire JESUM? non magisné te ipsum? tuq; amorem, quàm JESUM quæris? Et tamen Reges illi fuerunt gentiles, non habuerunt tam efficaciam media, ad quærendum JESUM, qualia tu habes in Religione. Erubescere coram DEO tuas pravas intentiones, in operibus diurnis. Retracta eas, protestare, quòd abhinc, nihil aliud velis, nihil aliud desideres, quàm Christum in omnibus quærere, & invenire. Quid mihi est in Cælo, & à Te quid volui super terram? præter te DEUS cordis mei & pars mea DEUS in æternum. Abrenuntio omnibus vanitatibus, abrenuntio amoris proprio, exuo me affectu omnium rerum terrenarum. Nihil aliud

aliud cogitare, nihil velle, nulli rei affici, nisi tibi DEO meo cupio. Tibi adhærere DEO meo, bonum est, DEUS meus & omnia.

PUNCTUM 2dum.

Quo conatu inquirunt?

CONsidera, quod Reges quærant Christum magno conatu, fortitudine, perseverantiâ: non illos abstrahit à quærendo Christo, longitudo viarum non deterrent pericula, & incommoda itinerum, non reducant respectus Regis Herodis, & totius Hierosolimæ, non revocat propriæ valetudinis prætenso, non temporis hyemalis inclementia. Senel egressi ad inquirendum Christum, constanter procedebant, fortiter superabant obstacula & in comoda, contemnebant respectus humanos, & tamdiu illum quæserunt, donec invenirent. Vide & tu Religiose, an pari constantiâ, fortitudine inquiras Christum? contemniscne omnes respectus humanos? paratusne ad omnia incommoda superanda? Excludiscne omnes vanos timores, in via perfectionis, & Christi inquisitione. Erubescet tuam pusillanimitatem. Pete à DEO donum fortitudinis & perseverantiæ in bono. Gratulare Sanctis Regibus ita generosum Spiritum, in Christo inveniendò, supplica iisdem, ut tibi similem Spiritum, & dona impetrent, à Christo JESU.

PUNCTUM 3tium.

Ubi quærent & inveniunt Christum?

CONsidera, quod Reges non invenerint Christum in palatio Herodis, & celebri civitate Hierosolima, sed in vili ac paupere stabulo, in duro præsepio, in fasciis stringentibus & ligantibus JESUM, in sinu Beautissimæ Matris. Et tu Religiose frustra tentas invenire Christum in deliciis, commoditatibus, otio, in affluentia rerum omnium. Non ibi debet quæri, nec ibi
inveni-

invenitur JESUS, sed invenitur in rerum egestate, & vera Spiritus paupertate, ut nihil desideres, nihil habere appetas, si-
vè in victu, si- vè in amictu, si- vè in habitatione, præter ea, quæ
tibi suppeditat Religio, imò ex his etiam viliora, abjectiora eli-
gere, aut saltem in tuo desiderio & animo habere deberes. Si
vis Religiose sincerè invenire Christum? quære eum in mortifi-
catione continua, tum exteriore, tum interiore, in observatione
regularum, in sinu B. Virginis, hoc est, in Castitate, promptaq;
in omnibus obedientia. Ibinè hucusq; Christum quæsisisti? E-
rubesce, deplora, quòd dies tot absumpsisti, & non invenisti
Christum, pauperem, modestum, humilem, mansuetum obedi-
entem. Disidera illum invenire & complecti, ut possis cum S.
Paulo verè gloriari: Vivo ego, jam non ego, vivit verò in me
Christus. Pete id ipsum à Beatissima Matre DEI.

MEDITATIO 2da.

De mediis inquirendi Christum.

Præl: 1: Spectabo tres Reges inquirentes Christum Natum:

Præl: 2. Petam gratiam imitandi tres Reges in Christo in-
quirendo.

PUNCTUM Ium.

Egrediendum de mundo, & relinquenda omnia, ut inveniat Christum.

Considera: Ium Modum, seu medium, quo tres Reges in-
quirunt, & inveniunt Christum, esse egressionem de domo
sua, abstractionemq; suà à Parentibus, cognatis, amicis, juxta il-
lud, quod DEUS dixit ad Abraham. *Egredere de domo tua, &
de cognatione tua, & de terra tua, & veni in terram, quam mon-
stravero tibi.* Ità tres Reges, egressi sunt de terra sua, relique-
runt Regna, commoditates, delicias, domos, amicos, notos su-
es, & iverunt in terram, quam illis DEUS monstravit in lumi-
ne stellæ; propterea etiam invenerunt Christum, tu Religiose

egressusne es de mundo? de domo tua? de cognatione tua? & quidem non solum corpore, sed etiam cogitatione, & affectu? non residensne adhuc mente in domo paterna? non prospectasne retrò terram, ex qua existi? non jactarisne tædiis, ac desideriis, ad cognationem tuam. Abstrahere ab his omnes cogitationes, & affectus tuos. *Obliviscere populum tuum & domum Patris tui*, monente Psalmista Psal: 44. Si vis invenire Christum. Pete à DEO cor mundum, & ab omnibus transitoriis expurgatum, ut verè Christum in eo concipias, & parias. *Cor mundum crea in me Deus, & Spiritum rectum innova in visceribus meis.* Psal: 50.

PUNCTUM 2dum.

Stellâ Cæli, duce, querendus & inveniendus Christus.

CONsidera 2dum Medium inquirendi, & inveniendi Christi, esse Cæli lumen, hujus ductum secuti sunt SS. Reges & invenerunt Christum. Et tibi Religiose lumen rationis, & veræ fidei principia, non feræles mundi cometæ sequendi sunt, si optas Christum invenire, tum hîc in vita perfectiore, tum ibi in æternitate. Non præluceat tuis actionibus fatua carnis, ac mundi sapientia, sed æternas cum omni Sanctitate, & justitia connexas attende veritates. Non te fallaciæ mundi decipiant, non carnis prudentia infatuat: Prudentia enim carnis, mors est, & sapientia hujus mundi, stultitia est apud DEUM. Vide itaq; quibûs regulis, atq; principiis utaris, ad tuam vitam ordinandam? Cæcò impetu naturæ, & passionum ad ordinaria agenda impelleris? an omnia in lumine Cæli peragis? Plusne gratiæ DEI illuminanti defers? an sensualitati, & amorì proprio obcæcanti mentem? Vide omnes progressus vitæ tuæ, & quidquid tenebrosum inveneris, stude ab animo tuo amovere. Pete à DEO, ut te semper illuminet, & rectâ viâ deducat. *Illuminare his, qui in tenebris, & umbra mortis sedent, ad dirigendos pedes nostros in viam pacis.*

PUN.

PUNCTUM 3tium.

Resignatione sui in DEI voluntatem invenitur Christus.

Considera multa occurrisse tribus Magis, retrahentia illos, & præcogitata, & arrepta via ad Christum quærendum. 1^{mo} retrahebat eos amor Regnorum, & libertatis. 2^{do} Retrahebant difficultates viarum. 3^{tio} Pericula tum relictæ domûs, & sui populi, tum suarum personarum ad remotas terras pergentium; exterùm illi totos se, ac sua Regna Divinæ Providentiæ commiserunt, nihilq; solliciti de suis Regnis, nec de suis suorumq; subditorum periculis, ingressi sunt viam, constanter inquisituri Christum. Nec statuebant terminos suæ inquisitionis, vg. si hic vel ibi cum non invenimus, revertemur domum; sed multa emensi itinera, tamdiu sustinebant incommoda, superabant difficultates, procedebant in itinere, donec in illius amplexum pervenirent confisi Divinæ Providentiæ. Ita & quemvis Religiosum decet, ut se totum divinæ committat providentiæ, nec sit sollicitus de suis, nec de se ipso, nec sibi eligat locum, tempus, officia, in quibus quærat Christum. Iacta cogitatum tuum in DEUM, dicit Psalter, & ipse te enutriet. Noli unquam cogitare de victu, de loco mansionis tuæ, de functione, quam obiturus es in Religione, DEO committe omnia, & quietus vives. Cogita tu de DEO, & DEUS cogitabit de te, & sapientiùs, meliùs, disponet universa, quàm tu tibi optare posses. Crede illius Bonitati, & Sapientiæ. Confide providentiæ, & beatus eris, nunquid tu melior, aut sapientior, aut potentior illo? dic ergo: non mea Domine, sed tua fiat voluntas, in me, de me, circa omnia mea, suscipe universam libertatem meam, Intellectum &c. &c.

MEDITATIO 3tia.

De alijs medijs inquirendi, & inveniendi Christum.

PRÆf. 1: Spectabo tres Reges inquirentes Christum Natum.

Præf.

Prel: 2. Petam gratiam imitandi tres Reges in Christo inquirendo.

PUNCTUM 1mum.

Promptè obediendo invenitur Christus.

Considera, quàm perfectissimæ obedientiæ exemplum nobis tres Reges reliquerunt. 1mò: Enim non audierunt loquentem sibi DEUM, signum tantum voluntatis ejus adverterunt, & statim obediunt: *vidimus stellam ejus, & venimus.* Inter videre stellam, & venire, nihil interpositum. 2dò: Non ignorabant itinerum molestias, terræ, & æris injurias, aliaq; incommoda, per hæc tamen nolebant se excusare ab exequenda voluntate DEI. 3tò: Non defuerunt multorum exempla eandem stellam spectantium, quos cura domûs, affectus propinquorum, propria commoda retinebant, horum tamen exemplis non cesserunt tres Reges, nec se ab obedientia retrahi permiserunt, pluris voluntatem DEI, quàm omnia creata æstimando, illud volventes mente: *Quis ut DEUS.* 4tò: Non sufficebat tribus Regibus, exisse de sua terra, alienas lustrasse oras: sed tamdiu persistebant in frangendis itinerum difficultatibus, quamdiu perfectè non fuerint executi voluntatem DEI, quamdiu non invenirent Natum Christum Dominum. Talis debet esse Religiosi Societatis obedientia, ut se ad quodvis, etiam signum voluntatis Superioris promptissimum exhibeat. Nullas excusationes prætendat, aliorum exemplis, aut respectibus non labefactetur, & omnia sibi injecta plenissimè impleat. Vide jam, utrùm talis hucusq; fuerit tua obedientia: deplora ejus defectus, propone in posterum subjectissimus vivere in Religione, pete auxilium à DEO.

PUNCTUM 2dum.

Castè vivendo invenitur Christus.

Considera, quod tres Reges tuæ primum inquirunt, & inven-
niunt

niunt JESUM, cū se abstraxerint à domesticis voluptatibus, cū oculos, & mentem ad Cælestia elevaverint, cū cor suum terrenis rebus evacuatum, inveniendi Christi desideris impleverint. Vide quanta fuerit puritas in oculis eorum, qui despectis mundanis, Cæli lumen prospiciunt. *Vidimus stellam ejus.* Quanta puritas in ore, qui nihil aliud, nisi de Nato Christo, & ejus adoratione colloquuntur, *ubi est? qui natus est, venimus adorare eum.* Quanta puritas in intentione, qui non se ipsos, non quidpiam aliud, nisi solum JESUM in omnibus quærebant. Vide tu Religiose, quanta sit puritas tuarum cogitationum, intentionum, animæ, & corporis, omniumq; sensuum? quibus sermonibus lingua tua occupatur? suntne de divinis? an de vanitatibus? Erubescere, desine defectus, elue oculos tuos in lacrymis Puelli JESU. Propone custodiam sensibus tuis.

PUNCTUM 3tium.

Multa patiēdo, invenitur Christus.

Considera, quæ, & quanta patiantur Reges? ut inveniant Christum, imò Patiuntur jacturam Regnorum, quæ relinquēbant. 2dò: Patiuntur longioris viæ molestias. 3tò: Hyemis inclementiam. 4tò: Patiuntur subtractionem stellæ, quæ illis ad tempus disparuit. 5tò: Patiebantur periculum vitæ, dum Herodes turbatus esset & omnis Hierosolyma cum eo; hæc tamen omnia pacatō animō, generosa mente sufferebant. Non querulabantur, non desperabundis agitabantur cogitationibus, non mærore conficiebantur, sed plenī spe, congrua adhibebant mediā, quæ illis suggererat DEUS, non allucente sibi Cæli stella, intrarūt civitatem, exquirebant ab hominibus, ubi nasceretur Christus. Ita & Religiosus se gerere debet, ita patienter omnia sufferre, ita constanter sustinere incommoda, ita fortiter pati desolationes. Vide, qualis tua patientia? quæ in adversis fortitudo?

P p

quis

quis in tolerandis desolationibus, animus? Agnosce & deplora tuam infirmitatem, & impatientias. Implora Dei auxilium, & pete Spiritum patientiæ. Gratulare SS. Regibus eam constantiam in patiando, roga, ut tibi eundem Spiritum impetrent à parvulo JESU, statim à cunabulis multa propter nos patiente.

MEDITATIO 4ta.

De Adventu Regum in Conspectum Christi.

Præl: 1. Cogitabo tres Reges, accedentes ad stabulum Christi.

Præl: 2. Petam gratiam imitandi tres Reges.

PUNCTUM 1um.

Accedunt Reges ad Christum.

CONsidera, quâ modestiâ, quâ reverentiâ, cum qua admiratione, ac stupore accedant tres Reges ad parvulum JESUM, ut & tu similiter te componas, accedendo ad orationem, & ad Christum in Eucharistiâ, tum visitaturus eundem, tum communicaturus. Vide, quòd Reges non horreant sordes stabuli, non despiciant paupertatem aut infirmitatem Infantis, sed ex Cælesti lumine, agnoscunt hunc puerum, esse Deum; ut & tu non deterrearis paupertate, aut contemptu, à servitio Dei; ut dicas, postquam Deus pro te vilis factus est, non inveniri JESUM per viam æstimationum, plausuum, ac gloriæ humanæ. Reflecte te, quantum tibi sapiat vilitas & humiliatio Christi; quantum æstimes ejus paupertatem? Dole, desidera à Christo Spiritum ejus. Pete eandem gratiam à DEO Patre.

PUNCTUM 2dum.

Reges salutant Christum.

CONsidera, quàm profunda sui demissione venerantur Christum Principes, teste Evangel: Matth: 2. *Et procidentes adoraverunt*

vult eum. Imprimis procidebant in terram, profundissimæ reverentia signum exhibendo, deinde animò in abyssum nihili sui se abjiciendo, suamq; indignitatem consistendi in Conspectu tantæ Majestatis profitendo, tum Supremum Infantuli Christi dominium, atq; suam subjectionem, & in omnibus à Deo dependentiam recognoscendo, tandèmq; perfecto cultu Patriæ eum adorando. Expende, quid ad tantam Pueruli æstimationem induxerit Reges? Induxit eos primò viva fides, quâ in humilitate Infantis agnoscebant sublimitatem divinam, & quem videbant parvum in præsepio, credebant immensum in Cælo, ô si & tu cognosceres ubiq; Deum existentem! modestius viveres, si vivaciter crederes in Eucharistia præsentem, cum majori ejus reverentia, & tui animi subjectione, ac tui contemptu ad illum accederes! Secundò induxit eos propria sui notitia, & vanitatum contemptus. Ex ignorantia enim sui ipsius, oritur superbia, & cæcitas mentis; stude cognoscere te ipsum, & despicias te; æstimabis autem, & reverberis Deum. Noverim te Domine, noverim me, nec aliud desiderem, æstimem, præter Te, Tibi serviam, Te amem, Te laudem omnibus diebus vitæ meæ.

PUNCTUM 3tium.

Affectus trium Regum erga Christum.

CONsidera, quos affectus elicuerint Sancti Reges, in adoratione Christi. 1mò: Vivam fidem suam professi sunt in eum. 2dò: Gratias egerunt, quòd per stellam eos ad se adduxerit, illisq; se manifestaverit. 3tò: Gratias egerunt, quòd dignatus sit incarnari, nasci in mundo, ad redimendos homines. 4tò: Obtulerunt se ad perpetua ejus obsequia. 5tò: Proposuerunt eum ubiq; prædicare, ad ejusq; cognitionem suos subditos educere. Excita in te similes affectus, offer te ad quævis ardua pro Christo ferenda.



MEDITATIO 5ta.

De Conversatione Regum cum Christo.

Prel: 1: Spectabo tres Reges ante parvulum JESUM procedentes, & ei munera offerentes.

Prel: 2, Pete gratiam fructuosæ meditationis, de hoc Mysterio.

PUNCTUM 1mum.

Colloquium Regum cum Christo.

CONsidera Reges facta profunda veneratione parvulo JESU, sic illum alloquentes: O Fili Dei, quid Tibi cum filiis hominum? quid luci cum tenebris? quid sapientiæ cum eo, qui comparatus est jumentis insipientibus? quid immensitati cum exigua infantis statura? Aut etiam illud ex Psalmo: Quid est homo, quia sic magnificas eum? aut quid est Filius hominis, quia sic apponis erga eum cor tuum? Deinde audi parvulum JESUM, veluti respondentem: Deliciæ meæ sunt, esse cum filiis hominum. Natus sum propter vos ô homines! ut & vos velitis renasci Deo, & innovari Spiritu. Factus sum caro, ut vos abstracti à carne, soli Deo vivatis, nec sapiatis, nisi quæ sunt Spiritûs. Factus sum homo, ut in vobis desinat vetus esse homo. In terram veni, ut vos, terram deseratis, terrenaq; omnia, & in Cælis sit conversatio vestra. Parvulus sum datus vobis, ut me facilius capiat, ut ad me securius accedatis, utq; quilibet hominum parvulus fiat in oculis suis, non intumescat. Erumpe & tu Religiose in affectus cum tribus Regibus: Et quæ jam ab hinc erunt deliciæ meæ, ô Deus Infans! nisi esse tecum, cum tuæ deliciæ sint, esse mecum, ô Parvule, magne! ô maxime, parve! accedo ad te, & procido ante te, ego figmentum tuum, opus manuum tuarum, calca Domine, deprime hanc meram pulveris massam à te animatam. Vilescam pro te ô parvule Deus, ut Tua gloria augeatur.

PUN-

PUNCTUM 2dum.

Colloquium trium Regum cum Beatissima, & S: Josepho.

Considera tres Reges, omni reverentia facta Beatissimæ Virgini, inquisivisse ab illa: cur ô Sanctissima Mater hunc Infantem divinum reclinasti in præsepio? cur illum non intulisti in nobiliorem locum? & eam respondentem audi: *quia in propria venit, & sui eum non receperunt.* Statim etiam ab Infantia docere voluit: Discite à me, qui mitis sum, & humilis corde. Vide ô Religiose, utrum & in te infans JESUS invenerit locum? utrum, & tu pulcrum ad te recepisti? dic cum Psalte: Deus cordis mei, & pars mea Deus in æternum. En Domine totus sum Tuus, totusq; esse volo in æternum, sicut Tu totus meus esse voluisti.

PUNCTUM 3tium.

Munera offerunt Reges.

Considera tres Reges, quod apertis thesauris obtulerunt Christo, Aurum, Thus, & Myrrham. Non comparent vacui in Conspectu Christi, donant illi, quidquid habent pretiosum, nec dubium est, quod obtulerint etiam id, quod hisce muneribus designatur, cum Auro charitatem, cum Thure devotionem, cum Myrrha mortificationem. Vide ô Religiose, an cum hisce donis coram Christo compareas? Experirisné in te Charitatem, erga Deum, & proximos? adhibesné Devotionem in Orationibus tuis, & obsequiis Divinis? non fugisné mortificationem? Erubescere. Implora Dei Gratiam, offer te Deo ad omnia ejus beneplacita.

MEDITATIO 6ta.

De Regibus abeuntibus à Christo.

Præf: 1. Cogitabo tres Reges abeuntes à Christo.

Præf: 2. Peram gratiam fructuosæ meditationis de hoc Mysterio.

PUNCTUM 1um.

Monentur in somnis, ne redeant ad Herodem.

Considera Providentiam Dei, circa Reges, qui facta promissione Herodî de suo ad eum reditu, perplexi hærebant, an eadem, quâ venerunt, an aliâ redirent viâ? in qua perplexitate creditur illos recurrissè ad Deum, & implorâsse lumen, ut & tu Religiosè discas in dubiis per orationem recurrere ad Deum, implorare auxilium ejus. Mittit postea Deus Angelum, qui doceat Reges, ô quanta est Dei Providentia circa eos, qui confidunt Deo! Agnosce & tu, & lauda Dei Providentiam. Repone te & tua in ejus sinum. Committe te Illi regendum in omnibus dubiis, & adversis. Crede, quòd tibi benè erit, ex illius dispositione. *Bonum est confidere in Domino, quàm confidere in homine, Bonum est, sperare in Domino, quàm sperare in Principibus. Psal: 117.*

PUNCTUM 2dum.

Valedicunt Christo.

Considera, quanta affectûs teneritudine advolvuntur plantis JESU, abeuntes Reges? quibûs suspiriis, & devotione benedictionem, ac dona in futurum postulent? directionem suâ in totam vitam implorent? quas protestationes constantis sui in Christum affectûs faciant? quibûs propositis se obfirment? quâ demissione coronata capita sua inclinent, ad infantuli JESU benedictionem? Approba hos omnes Regum affectus, complace tibi in illis. Offer eosdem Parvulo JESU; ac in omnes vitæ Religiosæ annos, pete ab eodem benedictionem. Protestare, quòd velis ei fideliter, constanter, ac ferventer servire in hac Religione.

Pun.

PUNCTUM 3tium.


Per aliam Viam revertuntur.

CONsidera, cur Reges non hâc viâ, quâ venerunt, redeant?
imò: Quia in illa priore viâ, amiserant stellam, inciderant in
Herodem & periculum, facta promissione redeundi. Et tu Re-
ligiose cautus sis tum propriis, tum alienis periculis. Procul ab iis oc-
casionib9 recede, eas conversationes fuge, in quibus aut lumen gra-
tiæ Divinæ subtrahitur, aut Regulæ franguntur, aut periculum
aliquod instat. 2dò: Ut ostenderet alios nos debere abire, à con-
sortio & conversatione cum Christo, sive per orationes, sive per
communione[m] habita[m] cum illo, quàm antea eff. mus. Proinde
ex illius usu semper humiliores, modestiores, patientiores, spiri-
tualiores esse deberemus. Reflecte te, quos fructus hucusq; col-
legisti ex tot meditationibus, communionibus, alijsq; Exercitiis
spiritualibus? Erubescere, dole, alius semper & alius esse desidera.

Pete à Christo, ut illo præduce, de virtute in virtutem
progredi valeas.



LIBRARY
VNIK
CRACOVENSIS



186

Biblioteka Jagiellońska



stdr0021255

